

BIBL. NAZ.

Vitt. Emanuele III

164

L

8

NAPOLI

17  
D. 17  
75









# INSTITUTIONES THEOLOGICÆ

AD USUM STUDIOSE JUVENTUTIS

AUCTORE

CAJETANO DE FULGURE

AVERSANÆ

CATHEDRALIS ECCLESIE CANONICO

OLIM

IN AVERSANO CLERICORUM SEMINARIO  
S. THEOLOGIE PRÆCEPTORE


*Editio quarta auctior, et emendatior.*

TOMUS II.

Continens Tractatus.

De Trinitate.

De Rerum Creatione.



---

NEAPOLI 1822.

EX TYPOGRAPHIA JANUarii REALE.

*Superiorum Facultate.*




*Quodcumque in hac Ecclesiae agricultura fide Patrum satum est, hoc idem filiorum industria decet excolatur, et observetur; hoc idem floreat, et maturescat; hoc idem proficiat, et perficiatur. Fas est etenim, ut prisca illa caelestis Philosophiae dogmata processu temporis excurentur, limentur, poliantur; sed nefas est, ut commulentur, nefas, ut detruncantur, ut mutilentur.*

*Vincentius Lirinensis Commonit. I. cap. 30.*

Πισιν ημεις οτε παρ αλλων γραφομενην ημιν νεωτεραν παραδεχομεθα, οτε αυτοι τα της ημετερας διανοιας γεννηματα παραδιδουσι τολμωμεν, οια μη ανθρωπινα λογιζονται τα της ευσεβειας ρηματα αλλ' απερ παρα των αγιων πατερων δεδιδαγματα, ταυτα τοις ερωτησιν ημας διαγγελουμεν.

*Basilius Epist. ad Antioch. Eccl.*



# LIBER QUARTUS

## SEU

### TRACTATUS DE TRINITATE

#### *Praefatio.*

Quae superiori libro de Deo disputavimus, aliqua ex parte rationi penitus impervia non erant. *Invisibilia enim ipsius, a creatura mundi, per ea, quae facta sunt, intellecta, conspiciuntur: sempiterna quoque ejus virtus, et divinitas, inquit Apostolus Rom. 1. 20.: ita ut sint inexcusabiles, qui aut Dei notitia caruerunt, aut cognoscentes Deum, non sicut Deum glorificaverunt. Nunc autem altius mentis aciem oportet attollere ad ea, quantum possumus, contemplanda, quae de Trinitate personarum in una Divinitate, non rationis lumen, non creaturarum testimonium, sed ipse nobis Dei Spiritus, ac Sapientia revelavit. Sileat igitur hic humana ratio, totamque divinae se auctoritati, ac veritati subjiciat. Qui enim scrutator est majestatis, opprimetur a gloria Prov. XXV. 27. Quatenus autem vis intelligendi, quae vivacitas rationis, quae acies cogitationis ostendit, quomodo sit Trinitas? inquit Augustinus Lib. XV. de Trin. cap. 6. Scrutari hoc temeritas est, credere pietas est, nosse vita, et vita aeterna est, inquit Bernardus Lib. V. de Consid. cap. 8. Unum crit rationis munus, ut quae increduli, atque haeretici contra Trinitatis mysterium, quod totius Christianae Religionis fundamentum est, objecerunt, ut evincerent illud esse rationi contrarium, dissolvat.*

In eo autem positum est hoc mysterium, quod in uno Deo tres sint personae, quarum prima secundam, et utraque simul tamquam unum principium tertiam producat. In quo explicando, ut ordine procedamus, primam exponemus errores varios, in quos haeretici inducti

4 *Theologicarum Institutionum Lib. IV. Cap. I.*  
sunt. Tum trium personarum existentiam probabimus.  
Deinde tres illas personas unam eandemque numero  
habere naturam ostendemus. Quarto dicemus de ipsarum  
personarum processionibus, circuminsessione, et mis-  
sione. Quinto de earum ad se invicem relationibus,  
ac notionibus. Sexto de variis ipsarum nominibus. De-  
nique, ne quis detur errandi locus, nonnullas addemus  
regulas ex quibus de Trinitate loquendum est.

## C A P. I.

*Variae recensentur haereses contra veritatem Mysteriorum  
SS. Trinitatis exortae.*

1. **P**racter Gentiles, Judaeos crassiores, et Mahumethanos, qui Trinitatem irrident, vetustiores haeretici *Simon* magus, ejusque discipuli *Menander*, *Saturninus*, et *Basilides*, nec non *Valentinus*, aliq. contra hoc mysterium portenta quaedam errorum evomuerunt, quae hic explicare longum esset, et inutile. Docebat *Simon*, teste *Irenaeo Lib. I. cap. 20.*, unam esse in Divinitate personam, quae modo Pater, modo Filius, modo Spiritus Sanctus dicta sit: hanc autem personam esse seipsum, nempe *Simonem*, qui Judaeis apparuerit ut Filius, Samaritanis ut Pater, Gentilibus ut Spiritus S. Licet autem paulo aliter rem explicet *Augustinus Lib. de haeres. cap. I*; tamen *Irenaei* hac in re sicut vetustior, ita major videtur auctoritas; ideoque *Maurini* Patres in recentiori editione *Augustini* ea tamquam supposititia rescuerunt, quae hac in re *Irenaeo* erant contraria. Ab hac una divina persona productas esse creaturas aliquas agebat nobilissimas, quas appellabat *Aëonas*, inter quas ipsum quinto loco ponebat Verbum. *Valentinus* *Aëonas* istos multiplicabat usque ad numerum tricenarium, inter quos et Verbum, et Spiritum S. collocabat. Vide de his haeticis *Epiphanium*, *Irenaeum*, *Theodoretum*, *Augustinum*, *Tertullianum* (a).

II.

---

(a) Inter recentiores *Pearson In Ignatianis*, *Tillemontium in Notis de Simonianis*: et inter heterodoxos *Bellum Lib. II. cap. I.*, et litigium *De haeresib. I. Saec.*

II. *Praxeas* primum ob fidei confessionem conjectus in carcerem, deinde *Montani* haeresim professus, mox ejusdem *Montani* hostis accerrimus, et accusator apud *Zephyrinum* Romanum Pontificem, a quo *Montanus* damnatus est. Ob ea gesta tumens superbia, novae haeresis fuit auctor, docens, Patrem, Filium, et Spiritum Sanctum unam esse personam; atque hinc Patrem ipsum incarnatum, et passum: qua in re a *Simone*, ceterisque vetustioribus haereticis ejus dogma discrepabat; unde ejus erroris sectatores *Patripassiani* dicti sunt. Contra ipsum scripsit *Tertullianus*, *Montani* veneno jam infectus, *Librum contra Praxeam*. Damnatum *Praxeam* occultasse haeresim, deinde iterum eam disseminasse, idem *Tertullianus* est auctor.

III. In eundem scopulum post *Praxeam* impegit *Noëtus* Smyrnensis ex *Theocreto Lib. III. haeret. fab. cap. 3.* vel *Ephesius* ex *Epiphanio Haeres. LVII.* circa annum CXLV., et *Sabellius* Ptolemaidensis circa annum CCLVII., qui errorem magis disseminavit, sectamque fecit celebriorem, ita ut discipuli jam non *Praxeani*, aut *Noetiani*, sed *Sabelliani* dicerentur. Hic haeresim suam hoc exemplo explicabat: Sicut sol unus est, et in se vim habet duplicem illum minandi, atque calefaciendi; sic Deus una est hypostasis, quae si in sua substantia spectetur, dicitur Pater: si vero quoad virtutem homines illustrandi, edocendi que, dicitur Filius; si demum quod ad vim eos inflammandi per gratiam, Spiritus Sanctus. *Sabellium* dampnavit *Dionysius Alexandrinus* in Synodo, eumque variis Epistolis confutavit, praesertim ad *Sixtum* S. Pontificem, ut scribit *Eusebius Lib. VI. Hist. cap. 6.* Legendus de hac haeresi *Basilii Homil. XXVII.* contra *Sabellianos, Arianos etc. et Epist. LXIV. ad Doctores Eccl. Neocaes.*, *Athanasius Orat. contra Gregales Sabellii*, *Theodoretus Lib. II. haeret. fab. cap. 10.* Quarto saeculo *Priscillianus* in Hispania *Sabellii*, et *Manichaei* dogma est amplexus, ex *Augustino. Lib. de haeres. cap. 70.* Inde secta *Priscillianistarum*, quae misere turbavit Hispanias. Damnati sunt *Priscillianistae* pluribus synodis, imprimis *Caesaraugustana* anno CCCLXXX. *Toletana* I. anno CCCC., *Bracarensi* anno DLXIII. et aliis. *Priscillianus* cum sociis capite damnatus est Impe-

ria-

6 *Theologicarum Institutionum Lib. IV. Cap. I.*  
riali iudicio, quod primum videtur capitalis poenae  
in haereticos exemplum.

IV. *Paulus* patria *Samosatenus*, *Antiochenus* Patriarcha, circa annum CCLXII. docuit et ipse, Deum unam esse personam, nempe Patrem; deinde post *Cerinthum*, *Hebionem*, *Carpocratem*, *Theodotum*, *Artemam*, aliosque veteres haereticos, assernit, Christum purum esse hominem, cui Deus Pater verbum, seu sapientiam, et virtutem suam indidit; Spiritum Sanctum vero esse gratiam a Patre in homines diffusam. In eo itaque, ut observat *Leontius Lib. de Sectis Act. 3.*, *Paulus Samosatenus* a *Sabellio* discrepabat, quod *Sabellius* unam esse Dei personam dicebat, quae tria haberet nomina; *Paulus* vero non eundem dicebat esse Patrem, Filium, et Spiritum Sanctum; sed Patrem, aiebat esse Deum, qui omnia creasset; Filium purum hominem, nempe Christum sapientia, et virtute a Deo plenum; Spiritum Sanctum gratiam Dei in homines effusam. Duo Concilia Antiochiae habita sunt contra Paulum Samosatenum, unum anno CCLXIV. alterum anno CCLXX. In priori quidem callida dissimulatione Patres elusit, at in posteriori convictus, anathemate percussus, atque e sede sua dejectus est. Cum autem Episcopali domo nollet abscedere, interpellatus *Aurelianus* Imperator, licet ethnicus, cum expulit, iussitque iis domum tradi, quibus Itali Antistites, et Romanus Pontifex scriberent concedendam. Vide *Eusebium Lib. VII. Hist. cap. 23. et 24.*, et *Theodoretum Lib. II. haeret. fab. cap. 9.*

V. *Photinus* *Syrmiensis* Episcopus, saeculo IV. Pauli Samostateni haeresim ab inferis revocare aggressus, paucis mutatis, agente *Basilio Ancyrano*, damnatus est in Synodo *Syrmiensi* anno CCCL. ut omnes memoriae prodiderunt veteres, *Epiphanius Haeres. VXX.* *Theodoretus Lib. II. haeret. fab. cap. 12.* aliq. ita ut falsus hac in re videatur *Garnerius Dissert. de haeres et lib. Nestor. §. 5.*, qui *Photinum* aliqua ex parte excusare nititur.

VI. *Arius* Presbyter *Alexandrinus*, saeculo IV. magnam Ecclesiae pestem intulit. Docuit, Filium Dei meam esse creaturam, ante mundum quidem conditam, sed tamen in tempore. Damnatus est primum in Synodo *Alexandrina* ab *Alexandro* ejus Episcopo: sed cum  
lea-

longe lateque haeresim disseminasset, pluresque infecisset Episcopos, Presbyteros, omnisque conditionis homines, habitum est anno CCCXXV. Concilium Nicaenum primum oecumenicum, in quo damnatus est, jussuque Constantini M. pulsus in exilium, ejusque libri combusti sunt. Post, fraude Arianorum revocatus ab exilio, misere periit.

VII. Post Concilium Nicaenum latius Ariana haeresis est diffusa. Innumerabiles Synodi habitae sunt ab Arianis, novaeque in dies procusae fidei formulae. Omnes tamen Ariani in tres partes scissi sunt. Prima fuit rigidiorum Arianorum, qui, duce *Aëtio* et *Eunomio*, Verbum Patri dissimile *ἀνομοιον* affirmarunt. Hinc dicti *Eunomiani*, *Aetiani*, et *Anomoet*. Altera *Semidrianorum*, qui duce *Basilio Ancyrano*, Verbum per omnia Patri simile docebant, non tamen *Consubstantiale*. Tertia, inter duas priores media, concedebat, Verbum esse Patri simile, sed non quoad substantiam; eorum caput extitit *Acacius Caesariensis*. Longa est Arianismi Historia. Vide *Athanasium*, *Theodoretum*, *Epiphanium*, aliosque veteres. Multa de iis habet *Tillemontius*. *Natalis Alex.* concilia omnia tum Catholicorum, tum Arianorum, Scriptoresque Catholicos, qui Arianos olim oppugnaverunt, accurate recenset. Historia autem Arianorum, quam *Maymburgus* adornavit (a), variis rationibus improbat a viris doctis.

VIII. *Macedonius* Semiarianus, Episcopus Constantinopolitanus, Spiritus S. divinitatem, quam negaverant omnes haeretici, qui de Verbi divinitate male senserant, acrius oppugnavit. Ejus discipuli *Pnevmatomachi*, seu Spiritus S. hostes vocati sunt, Damnatus est Macedonius in Concilio Constantinopolitano I., atque Episcopatu abdicatus anno CCCLXXXI. Scripserunt contra ejus haeresim *Athanasius Epist. ad Serapionem*, *Basilias Lib. de Spiritu Sancto*; *Ambrosius* tribus Libris *de Spiritu Sancto*.

IX. Trithetiae, duce *Joanne Philopono*, VI. saeculo docuerunt naturam divinam in Patre, Filio, et Spiritu

---

(a) *Histoire de l'Arianisme.*

8 *Theologicarum Institutionum Lib. IV. Cap. I.*

tu S. multiplicari, sicut natura humana in tribus hominibus. Nicephorus *Lib. XVIII. Hist. cap. 49.* auctor est, eos statuisse in divinis tres substantias, et naturas; sed tamen non ausos dicere tres esse Deos: aut tres Deitates, ita ut obscurius locuti videantur.

In hunc errorem, paucis immutatis, impegisse videtur saeculo XII. Abbas *Joachim* vir pietate conspicuus, sed in rebus Theologicis parum acutus, qui, cum legisset apud Magistrum sententiarum naturam divinam non gignere, non gigni, nec procedere, eam propositionem, tamquam haeticam traduxit, quasi inde sequeretur, in Deo non Trinitatem, sed quaternitatem esse ponendam. Hinc librum scripsit contra *Petrum Lombardum*, quo probare conatus est, ipsam naturam divinam in Patre gignere, in Filio gigni, in Spiritu Sancto procedere, ac promde multiplicari naturam divinam in tribus personis. Et tamen fatebatur, unum esse Deum ex tribus illis naturis coalescentem; sicut multi homines unum populum constituunt; quemadmodum etiam *Act. IV. 32.* dicitur: *multitudinis credentium erat cor unum et anima una.* Damnata est haec Ioachimi sententia in Concilio Lateranensi IV. sub Innocentio III. non tamen ipsa auctoris persona, quippe qui moriens omnia scripta sua Apostolicae Sedis iudicio subjecerat. Vide *Nat. Alexandrum in Hist. Saec. XII. (a).*

X. *Michael Servetus*, Medicus Hispanus, Sabellii haeresim revocavit saeculo XVI. Genevae combustus est vivus, agente Calvino.

XI. Post ipsum *Laelius Socinus* Senensis, Calvinista, et *Faustus* ejus nepos eandem haeresim latius propagarunt. Docuerunt eum *Sabellio*, *Noeto*, et *Praxeas*.

u-

---

(a) Eandem haeresim ab inferis revocare conatus est *Petrus Fayditius* anno 1696 in Libro, quem inscripsit: *Atteration du dogme Theologique par la Philosophie d'Aristote.* Eum refutavit *Lud. Hugu.* in Libro, cui titulus *Refutation du Systeme de M. l'Abbé Faydit sur la Trinité*



nam esse in Deo personam: cum *Paulo Samosateno*, Christum esse merum hominem, quem ipsi dicunt a Deo missum ad homines verbo, et exemplo edocendos, ideoque constitutum Ecclesiae caput, vocarique improprie Deum: quod nomen apud ipsos non naturae est, sed honoris, et potestatis; Spiritum S. non esse personam, sed virtutem, et efficaciam Dei. Incredibile dictum est, quot subtilitatibus, et sophismatis conati sint Sociniani catholicorum argumenta eludere, et suum stabilire dogma. Egressi ab Italia in Poloniam, et Transylvaniam se receperunt, ubi eorum secta adhuc perdurat, quae naturalem quandam potius, infinitis sententem erroribus, quam Christianam religionem profitetur. Contra eos scripserunt non solum Catholici, ut *Petavius*, *Bossuetus*, et alii, sed etiam Protestantes *Zanchius*, *Bullus*, *Hoornebekius* etc.

XII. Porro omnes istae haereses dividi possunt in tres classes. Prima negat Trinitatem personarum in divinis, ut *Simon*, *Menander*, *Basilides*, *Praxeas*, *Noëtus*, *Sabellius*, *Paulus Samosatenus*, *Michael Servetus*, et *Sociniani*. Altera fatetur tres personas, sed non unius naturae divinae, hoc est non consubstantiales; ut *Ariani*, *Semiariani*, *Macedoniani*. Tertia tres personas docet habere tres divinas naturas, ut *Tritheitae*. His autem omnibus addendi sunt Graeci Schismatici, qui saeculo XI. duce *Michaele Caeculario*, ab Ecclesia Romana recesserunt, docentes Spiritum Sanctum a solo Patre, non etiam a Filio procedere: quod dogma olim a *Photio*, aliisque Graecis informatum, jam pridem in Oriente spargi coeperat.

Nunc contra hos errores catholica veritas stabilienda est. Sed ne in obscuro laboremus, explicanda prius sunt nomina quaedam, quorum in hoc Tractatu frequentior erit usus. Omnis enim, quae recte instituitur aliqua de re disputatio, ab ipsa debet nominum definitione proficisci.

## C A P. II.

*Explicantur nomina nonnulla, quorum frequentior in hoc Libro est usus.*

I. **M**ysterium Trinitatis est una numero, eademque in tribus personis subsistens natura divina. *Natura* autem est *essentia* rei, prout in seipsa, non in individuo, in quo est, consideratur. Sic cum dico naturam humanam, non *Petrum*, non *Paulum*, non denique ullum singularem hominem intelligo; sed ipsam communem omnibus hominibus essentiam, quamvis essentia hæc non in se, sed in ipsis singularibus existat hominibus.

II. *Persona* vero definitur: *substantia, singularis, intelligens, tota in se, et incommunicabilis alteri*. Singulæ definitionis partes attendendæ sunt. Dicitur enim 1.<sup>o</sup> *substantia*, ut accidentia excludantur, et significatur ens aliquod per se existens: 2.<sup>o</sup> *singularis*; quia persona est aliquid existens: nihil vero existit nisi in singularibus individuis: 3.<sup>o</sup> *intelligens*; quia substantia ratione carens non dicitur persona (quod nomen dignitatem aliquam exprimit) sed *suppositum*; licet aliquando substantia intelligens vocetur etiam *suppositum*: 4.<sup>o</sup> *tota*, ut significetur, substantias etiam intellectu ac ratione præditas, quæ sunt totius compositi partes, qualis est anima hominis, dici non posse personas: 5.<sup>o</sup> *in se*, quia si existit in alio, a quo perficiatur, ut natura humana in Christo, persona non dicitur; 6.<sup>o</sup> *incommunicabilis alteri*; quia cum persona ultimo compleat, ac terminet naturam, jam alteri communicari non potest. Igitur ipsa natura tota in individuo existens dicitur persona, vel *suppositum*: persona quidem si est intelligens; *suppositum* vero si intellectu careat. Hinc persona brevius a Boetio definitur, *Rationalis naturæ individua substantia*: quam definitionem a *Laurentio Valla* immerito reprehensam *Petavius* erudite defendit *Lib. IV. cap. 4.* Sed cum personæ usurpamus nomen, directe quidem sive, ut ajunt, in recto, illud, quod est unum singulare intelligimus: oblique vero, sive in obliquo ipsam com-

munem pluribus naturam. Sic cum Socratis personam dico, singularem illum intelligo, qui naturam habet humanam. Caeterum personae nomen ad refutandam Sabellii impietatem a Patribus usurpatum est inopia vocabulorum. Unde Augustinus *Lib. V. de Trin. cap. 9.* Cum quaeritur, inquit, quid tres? magna prorsus inopia humanum laborat eloquium; dictum est tamen tres personae, non ut illud diceretur, sed ne taceretur.

III. Illud vero, quodcumque sit, per quod efficitur, ut natura intelligens ultimo compleatur, ac terminetur, ideoque alteri communicari nequeat, Scholastici barbare *personalitatem* appellant; vel *subsistentiam*, si natura intellectu careat, quamvis aliquando *subsistentiae* nomen pro ipsa persona, vel supposito adhibere soleant.

IV. Quod Latini naturam, Greci *υσίαν*, et *φυσιν* vocant. Sed vocis hujus varia fuit apud veteres Graecos significatio. Usurpata est enim aliquando ad significandam personam; atque hinc oritur aliquando in explicandis eorum locis ambiguitas. Certe Paulus Samosatensis dixerat Patrem, Filium, etc. Spiritum Sanctum esse *μορφωσιν*, seu *unius usiae*: quae propositio vera est, si *usiae* usurpetur pro natura: et tamen ob id a Patribus est damnatus; quia *usiae* nomen tum ab ipsis, tum a Samosateno pro persona usurpabatur. Imo et post exortam Arianam haeresim nonnulli Scriptores Catholici dixerunt Filium esse *υσίαν γεννητην*, *genitam usiam*, utique *usiam* pro persona usurpantes. Sed paulatim post Nicenam Synodum receptum est, ut *υσία* tantum pro natura adhiberetur, ideoque numquam dicerentur in Deo tres *usiae*. Ab *υσία* factum est vocabulum *ομοϋσιον*, seu *consubstantiale*, et *ομοϋσιον* seu *similis substantiae*.

V. Sed quod Latini personam appellant, Graeci dicunt *υποστασιν*. De hoc tamen vocabulo magna olim extitit controversia; quia sicut *υσία* aliquando dicta est ad significandam personam, ita e contrario aliquando hypostasis usurpata pro natura; atque hinc veteres aliquando tres in Divinitate hypostases, aliquando unam hypostasim esse affirmabant: quae de re celebris est epistola Hieronymi ad Damasum (a). Vide Petavium *Lib.*

IV.

(a) Cum enim duo facti essent Antiochiae Episcopi *Meletius*, et *Paulinus*, ideoque schisma ortum esset (quae de re

12 *Theologicarum Institutionum Lib. IV. Cap. III.*  
*IV. cap. 1.* Tandem sublata ambiguitate, et retenta voce hypostasis ad personam significandam, tres in Deo constanter dictae sunt *hypostases*, et una *usia*.

VI. Explicanda est etiam hic differentia inter causam, et principium: Causa enim 1°. non est ejusdem numero naturae cum effectu; 2°. producit effectum a se pendentem; 3°. est prior effectu saltem natura. Sic arbor est causa fructus. At principium, prout a causa distinguitur, est ejusdem naturae cum re producta; ac proinde non producit effectum a se pendentem, nec prius est re producta. Sic materia, forma, et privatio, ex doctrina Peripateticorum, sunt principia corporum; et natura principium proprietatum cujusque rei. Omnis ergo causa est principium, sed principium, cum stricte loquimur, non est causa. Vetustiores tamen Patres hanc strictam loquendi rationem non ubique servarunt. Nam Graeci aliquando Patrem vocarunt *αἰτία*, causam Filii; quos imitatur etiam Augustinus *Lib. LXXXIII. Quaest. Quaest. 16.* Quippe *αἰτία* causam pro principio dixerunt. At Latini Patres communius nomen causae tum Deo tribuunt, cum refertur ad creaturas. Sed respectu divinarum personarum principii nomine utuntur; atque ideo dicunt, Patrem esse principium Filii; causam creaturarum.

### C A P. III.

*Asseritur Trinitas Personarum in divinis.*

*Advertendum.* Sociniani fatentur, Trinitatem personarum ab omnibus Patribus, qui vel Concilio Nicaeno adfuerunt, vel post ipsum Concilium floruerunt, fuisse traditam; ac proinde contendunt, hoc dogma probandum vel ex una Scriptura, vel addita adsum-

---

vide Ruffinum *Lib. I Hist.* Socratem *Lib. II. cap. 24*) Meletiani tres hypostases, Pauliniani unam dicendam esse hypostasin contendebant, seque mutuo haereseos accusabant, et *Hieronymum* utrique in suas partes trahere conabantur; qua de re illa R. Pontificem consulit.

summum traditione Patrum *Antenicaenorum*. Nos quamquam ex iis, quae diximus in secundo Libro de Ecclesiae infallibilitate, et auctoritate Traditionis, possemus etiam sine Scripturis illos revincere; tamen juvat omni eos argumentorum genere confutare, ut et simul resellamus haereticos, et obstruamus ora nunnallis, qui se profitentur catholicos, et tamen causam agunt haereticorum, docentes vel ex Scriptura catholicam doctrinam demonstrari non posse, ut Richardus Simonius in *Hist. Crit. Novi Test.* contra quem scribit *Bossuetus*; vel Patres Antenicaenos in hac parte contrarium docuisse, ut de iis ferme omnibus docet *Petavius*, qui tamen in Praefatione sententiam retractavit, vel saltem emollire studuit.

## P R O P O S I T I O.

*Trinitas personarum in divinis demonstrari potest obscurius quidem ex Veteri Testamento: clarissime vero ex Novo, et ex Patrum Antenicaenorum Traditione.*

*Prob. 1. pars.* Licet in Veteri Testamento *Mysterium Trinitatis* obscurius revelaverit Deus, tum quia, periculum erat, ne Judaei crassiores Polytheismum, in quem erant propensi, profiterentur, ut *Chrysostomus Hom. V. de Incompr.* alique Patres advertunt; tum quia decebat ut ipse Unigenitus, qui est in sinu Patris hoc mysterium clarius enarraret; tamen non desunt Veteris Testamenti loca, quibus plures esse Personas in divinis ostenditur.

I. *Genes. cap. I. 26.* ait Deus: *Faciamus hominem ad imaginem et similitudinem nostram.* Atqui haec verba dicta non sunt ad Angelos; quia homo factus ad imaginem Dei *Ibid. v. 27.*, non est ad imaginem factus Angelorum; imo nec poterat simul ad imaginem Dei fieri, atque Angelorum, quorum natura infinito intervallo a natura Dei distat, ut recte observat *Basilius Hom. IX. in Hexam.* Ergo ad alias personas divinas dicta sunt (a) Unde *Theodoretus Quaest. XIX. in Genes.*

*Sub-*

---

(a) Accedit, quod absurdum est opinari Angelos Deum in creatione hominis adjuvisse: *Malach. II. 10 Numquid non Deus unus creavit nos?* *Is. XL. 13. Quis adjuvit Spiritum Domini?*

14 *Teologicarum Institutionum Lib IV. Cap. III.*

*Subjungens, inquit, illud faciamus, expressit numerum personarum. Similiter cum iterum singulari numero dixit imaginem, eandem naturam ostendit.*

Rursus *Ibid. cap. III. 22.* ait Deus Jeovah יהוה, quod nomen, fatentibus Judaeis, est Dei proprium: *Ecce Adam quasi unus ex nobis factus est: irridens scilicet ejus stultitiam, qua uxori indulserat, similitudinem Dei appetenti. Atqui haec verba explicari non possunt, nisi fateamur plures in Divinitate personas; alioqui sensus esset: ecce Adam quasi unus ex me; quo quid ineptius? Ergo.*

Praeterea *Ibid. cap. XI. 7.* ait Dominus: *Venite, descendamus, et confundamus ibi linguam eorum.* Atqui haec verba dicta non sunt ad Angelos, tum quia nulla eorum ante mentio facta fuerat, tum quia si eorum ministerio uti voluisset Deus in eo opere, potius imperandi modo dixisset: *ite, descendite, et confundite etc.* Ergo ad duas alias personas divinas, ut observat Chrysostomus, vel quivis auctor *Homil. de Trinitate Inter Opp. Chrysost. Tom. I. Vide, obsecro, quomodo Patris vox Filium, et Spiritum Sanctum vocet; nam si ad unum solum hoc dictum esset, debebat dicere: veni, et descendamus: quia autem dixit, venite: unius est vox ad duos honore aequales. Et Genes. XIX. 24. Dominus pluit super Sodomam, et Gomorrhham ignem a Domino. Adde quod Moyses Deum nominans, saepissime utitur, sicut et posteriores Prophetæ, plurali numero Elohîm, cujus rei nulla ratio reddi potest, cum facile uti potuerit singulari numero Eloah, vel Jeovah, nisi ad plures personas respexerit: ipsique Judæi in hoc esse aliquod mysterium confitentur.*

II. In *Psalmo XLIV.* ait David: *Sedes tua, Deus, in saeculum saeculi, virga directionis virga regni tuî. Dilexisti justitiam, et odisti iniquitatem: propterea unxit te Deus Deus tuus oleo laetitiae; ubi manifeste recensentur tres personae divinae. Et in Psalmo CIX. Dixit, Dominus Domino meo: sede a dextris meis.* Et in *Psalm. XXXII. Verbo Domini caeli firmati sunt: et Spiritu oris ejus omnis virtus eorum: ubi vides Patrem, Verbum, et Spiritum Sanctum.*

III. *Isaias cap. IV. 8.* non obscure innuit plures in  
Di-

Divinitate personas, dicens: *Audiui vocem Domini dicentis: Quem mittam, et quis ibit nobis? Et dixi, Ecce ego, mitte me: ubi unus est Deus, qui mittit: quem mittam? mitte me: et tamen plures personae quis ibit nobis?* Eas autem personas esse tres, ibidem innuit trina repetitione laudum Dei, quas Seraphim canebant, dicentes *Sanctus, Sanctus, Sanctus Dominus Deus exercituum*. Haec loca contra Iudaeos simul, et Socinianos valent.

IV. Patres ante Nicaenum Concilium laudata Vet. testamenti loca de Trinitate personarum unanimi consensu explicuerunt, ut Justinus *Dial. cum Tryph.*, Theophilus Antiochenus *Lib. II. ad Autolyc.*, Irenaeus *Lib. III. cap. 6.*, Tertullianus *Lib. cont. Prax. cap. 12. et 13.* Novatianus *Lib. de Trin. cap. 21.*: et post Concilium Nicaenum omnes Patres eundem sensum perpetua, et constanti doctrina tradiderunt (a); ita ut mira sit temeritas Bonfrerii, Simonii, Calvini, Castalionis, et aliorum, qui loca Vet. Testamenti alio detorquere conati sunt.

V. Docent etiam Patres, *Mysterium Trinitatis* non fuisse omnino Iudaeis, saltem sapientioribus, ignotum licet obscurius. Ita Origenes *Homil. II. in Josue*, Epiphanius *Haeres. V.*, Ambrosius. *Lib. de Cain et Abel. cap. 8.*; et Augustinus *Lib. II. cont. Maximin. cap. 26.* id probat ex *cap. XVIII. Genes.*; ubi Abraham tres vidit, et unum adoravit.

VI. Philo Iudaeus *Lib. de mundi Opificio, et alibi*, docet, Mundum a Verbo Dei creatum esse, quod distinguit a Patre, docens, ipsum esse Filium Dei, aeternam Dei imaginem; eumque veteribus Patriarchis apparuisse. Ergo saltem obscure revelatum est, et creditum in Vet. Testamento *Mysterium Trinitatis*. Licet enim Philo acci-

cipe-

---

(a) Athanasius *Lib. cont. Gent.*; Nyssenus *Lib. de tristim. cont. Iudaeos*. Basilius *Lib. V. cont. Roman.* Cyrillus Hieros. *Catech. X.*, Ambrosius *Lib. VII. Hexam. cap. 7.*, Chrysostomus *Hom. VIII. in Genes.*, Augustinus *Lib. I. De Trin. cap. 1.* Theodoretus *Quaest. XXI. in Genes.* et alii, Imo in Concilio Syriensi anathema dictum est, his, qui ea loca aliter explicarent.

16 *Teologicarum Institutionum Lib. IV. Cap. III.*  
cipere ista potuerit a Christianis, cum tempore Aposto-  
lorum floruerit; non tamen ea credidisset homo Iudaeus  
nisi vidisset habere in Scripturis Vet. Testamenti fun-  
damentum.

*Prob. 2<sup>o</sup>. pars. 1. Joan. XIV. 16.* ait Christus :  
*Ego rogabo Patrem , et alium Paraclitum dabit vobis ,*  
*ut maneat vobiscum in aeternum , Spiritum veritatis . . .*  
*v. 26. Paraclitus autem Spiritus Sanctus , quem mittet*  
*Pater in nomine meo , ille vos docebit omnia.* Vides  
hic aperte Patrem , Filium , et Spiritum Sanctum non  
quidem ut virtutem , et efficientiam Patris ; sed ut ter-  
tiam in Divinitate personam : ait enim *alium Paracli-*  
*tum : ille vos docebit :* et cap. *XV. Ille testimonium*  
*perhibebit de me :* et cap. *XVI. Cum venerit ille ar-*  
*guet mundum de peccato . . . Ille me clarificabit ,* quae  
nonnisi de persona subsistente , atq. distincta possunt  
intelligi.

2. *Matth. XXVIII. 19. Euntes docete omnes gentes*  
*baptizantes eos in nomine Patris , et Filii , et spiritus*  
*Sancti ;* ubi nomine Filii , fatentibus Socinianis , persona  
a Patre distincta intelligitur , nempe Christus. Ergo  
etiam nomine Spiritus Sancti tertia persona est intelli-  
genda , ab utroque distincta ; absurdum enim est dicere ,  
homines baptizari in nomine Patris , Filii et virtutis Dei.

3<sup>o</sup>. *I. Joan. V. 7. Tres sunt , qui testimonium dant*  
*in caelo , Pater , Verbum , et Spiritus Sanctus : et*  
*hi tres unum sunt.* Sed quia locus hic omnino obstruit  
ora Socinianorum , idcirco nullum non moverunt lapi-  
dem , ut eum e Scripturis expungerent , quorum infe-  
rius cavillationes refutabimus.

*Prob. 3. pars. 1. ex Symbolo Apostolorum ,* quo ante  
Nicaenum concilium tota Ecclesia usa est. 2. *Irenaeus*  
de *universa Ecclesia sui temporis* ait *Lib. I. cont. haer-*  
*es. cap. 2. Ecclesia per universum orbem usque ad fi-*  
*nes terrae seminata . . . accepit eam fidem , quae est in*  
*unum Deum Patrem Omnipotentem . . . et in unum*  
*Jesus Christum Filium Dei , et in Spiritum Sanctum*  
*Justinus Apol. II. Patrem , et qui ab eo venit Filium ,*  
*et Spiritum Sanctum Propheticum colimus , et adora-*  
*mus.* Tertullianus *Lib. cont. Prax. cap. 30. Judaicae*  
*fidei ista res est sic unum Deum credere , ut Filium*  
*Dei adnumerare nolis ; et post Filium Spiritum. Quidam*



erit inter nos, et illos, nisi differentia ista? (a) 3.<sup>o</sup> Haeretici, qui ante Concilium Nicaeum Trinitatem sustulerunt, statim ab Ecclesia proscripti sunt, ut Sabelliani, Paulus Samosatenus, et alii, quos Dionysius Alexandrinus damnavit, et confutavit adeo vehementer, ut apud nonnullos male audiens, quasi in contrarium errorem declinasset, purgare se debuerit apud Dionysium R. Pontificem. 4. Denique quovis saeculo baptismus in nomine Patris, et Filii, et Spiritus Sancti datus est: alioqui tamquam irritus habitus est, ac repetitus. Ergo etc.

## Solvuntur objectiones.

Non est opus omnia Judaeorum commenta, et Socinianorum subtilissimas tricas, et inania sophismata refellere. Sed praecipua confutabimus.

*Objic. I. contra 1m. part.* Verba illa Vet. Testamenti faciamus, descendamus, et alia in plurali numero scripta sunt ad Dei loquentis dignitatem, ac maiestatem exprimendam; sicut etiam hodieum viri principes facere consueverunt, in quorum edictis nihil frequentius, quam volumus, jubemus: vel sunt verba cohortantis se ad opus; sicut solent artifices dicere: faciamus statuam, etc. Ergo non ostendunt plures personas.

*rg. Neg. ant.* Quis enim princeps, aut artifex dixit aliquando, aut dicere potuit ad semetipsum: Venite, et faciamus: sicut dixit Deus: venite, descendamus? Praeterea mos iste principum loquendi de se in plurali numero non erat usu receptus in prisca illa morum simplicitate tempore Moysis, qui refert alia magnorum Regum dicta, ut Abimelech, Pharaonis, etc. in singulari numero: imo ipse Deus cum Legem suam jussit, ac promulgavit, ubi praecipue auctoritatem suam ostendere oportebat; ut advertit Theodoretus Q. XX. in Genes., in singulari numero de seipso loquitur. Mos autem artificum cohortantium se ad opus praeterquam quod in-

B

di-

(a) Add. Athenagoras Legat. pro Christian. Clemens Alex. Lib. I. Paedagogi cap. 6., Dionysius Alex. ap. Athanas. Lib. de Dionysii seient., Gregorius Thaumaturgus ap. Nissen. in ejus vita, Cyprianus, Minucius Felix, Novatianus, etc.

48 *Theologicarum Institutionum Lib. IV. Cap. III.*

dignus Deo est, in quo nulla est animi suspensio, ut cohortatione hac indigeat; etiam in mente artificis sic loquentis supponit aliquos saltem in imaginatione sua praesentes, qui audiant, et exequantur opus. Caeterum quis faber ferrarius, aut lignarius, aut quis sutor solus inter artis instrumenta sedens, adjuvante ipsum nemine, dicat ipse sibi: *Faciamus gladium, aut aratrum compingamus?* inquit Basilus *Homil. IX. in Hexameron.*

*Objic. II.* Verba Psalmorum *Sedes tua Deus in saeculum saeculi. Dixit Dominus Domino meo, etc.* intelligenda sunt de Salomone, aut Ezechia, aut alio viro principe; quem Propheta appellat Deum improprie: sicut in *Psalmo LXXXI.* ipsos iudices appellat Deos, *Ego dixi: Dii estis.* Ergo non significant plures in Divinitate personas.

*Res. Neg. ant.* Ipsimet enim Judaei fatentur, laudata Psalmorum verba non de Salomone, sed de Messia intelligenda esse. Sociniani vero id negare nullo modo possunt, cum Paulus *Heb. I. 8.*, et Christus *Matth. XXII. 42.* ea de Messia intelligenda esse doceant. Quod autem nomen Dei, et Domini non improprie ibi accipiendum sit, patet ex contextu sermonis. Scriptura enim, cum nomen Dei improprie usurpat, semper aliquid addit, ne in errorem inducamur, sicut in laudato *Psal. LXXXI.* post ea verba: *Ego dixi: Dii estis, et filii Excelsi omnes:* statim addit: *vos autem sicut homines moriemini.* Cum autem personam aliquam sine ullo additamento constanter Deum vocat, non nisi proprie intelligendum est; alioquin sciri non poterit quandonam de vero Deo sermo sit. Hinc Irenaeus *Lib. III. cap. 6.* *Neque Dominus,* inquit, *neque Spiritus Sanctus, neque Apostoli, qui non esset Deus, definitive, et absolute Deum nominassent aliquando, nisi esset verus Deus.*

*Objic. III. contra 2. m part.* Locus ille *I. Joan. V. 7.* *Tres sunt, qui testimonium dant in caelo etc.* supposititius est, nihilque inde confici potest. Etenim ille versiculus suppositus est, qui in veteribus codicibus Syriacis, Arabicis, Graecis, et Latinis praesertim manuscriptis desideratur, nec laudatus est a Patribus; licet ad revincendos Arianos, Sabellianos, aliosque, contra quos

illi disputabant, maxime esset opportunus. Atqui laudatus versiculus in veteribus codicibus Syriacis, et Arabicis desideratur, ut patet ex Polyglottis Bibliis *Waldonis*; nec non in Graecis, et Latinis, ut patet ex manuscriptis codicibus, quos consuluit *Erasmus*, qui hunc versiculum in sua Editione praetermisit; et ex iis, qui asservabantur in Bibliothecis Vaticana, Barberiniana, Regia Parisiensi, Colbertina, Anglicana, Sangermanensi etc.; nec laudatus est a Patribus, qui contra Sabellianos, Arianos etc. disputabant, Ergo etc. Hinc *Erasmus* (qui accessit Socinus) *Comment. in Epist. Joan.* putat, hujus fraudis auctorem fuisse *Hieronymum*, cujus nomine extat *Prologus* in Epistolas Canonicas. At *Ricardus Simonius* hunc *Prologum Hieronymo* abjudicat *Hist. Critic. Textus Novi Test. cap. 18.* quasi commentitium recentioris auctoris opusculum, aitq. hunc versum primo in margine a pio aliquo interprete scriptum esse; deinde incuria amanuensium irrepsisse in textum; cumque Latini Constantinopoli potiti sunt sub Innocentio III. a Latinis in Graecos codices fuisse transfusum. *Simonio* adhaeret *Clericus Part. III. Art. Crit. sect. 1. cap. 14. et in Quaest. Hieronymianis cap. 9.*

¶ *Transeat Maj. Dist. min.* Desideratur hic versiculus in aliquibus codicibus incuria amanuensium, et non laudatur ab aliquibus Patribus, qui mendosis usi sunt exemplaribus, *conc.* Desideratur in omnibus codicibus, et a nullo ex Patribus laudatur, *neg.* Dixi *transeat major*; quia non librariorum, et Criticorum, sed Ecclesiae est definire, quinam sint Libri Canonici, et quae genuinae eorum partes. Porro Ecclesia in Concilio Tridentino *Sess. IV.* declaravit *Canonicas singulas Sacrorum Librorum partes*, prout in Ecclesia legi consueverunt; sicut legitur hic versus in Ecclesia Latina in Officio Dominicæ I. post Pascha, et in Ecclesia Graeca, ut patet ex eorum *Lectionario*, fatente *Simonio*; nec poterat ad Graecam Ecclesiam manare error a Latinis, quibus Graeci erant iufensissimi, ab eisque tanquam ab haereticis, et hostibus cavebant: nec omisissent iis obijcere corruptionem Scripturae, cum minora objecerint. Imo nec constanter in utraque Ecclesia receptus esset

no *Theologicarum Institutionum Lib. IV. Cap. III.*  
versus; si fuisset falsus; *variare enim debuerat error,*  
ut ait Tertullianus *Lib. de Praescrip.*

Quod ergo spectat ad veteres codices Graecos (nam Syriacos, et Arabicos, cum sint versiones ex textu Graeco originali, non multum moramur) legebatur hic versus in manuscriptis vetustissimis ante Latinorum expeditionem in Graeciam, ut testatur *Correctorium Librorum Saeculo X.* scriptum, quod in Bibliotheca Sorbonica servabatur. *Calvinus* etiam, et *Beza* testantur, aetate sua in melioribus Graecis manuscriptis extitisse. *Robertus Stephanus* ex sexdecim vetustissimis Graecis codicibus, quos consuluit, septem tantum invenit, in quibus non integer versus deerat, sed tantum verba duo: *in caelo*: quae nihil sensui textus officiant. Cardinalis *Ximenius*, conquisitis undique, praesertim ex Vaticana Bibliotheca, melioris notae codicibus, cum versum in Editione Complutensi anni MDXVII. retinuit. Imo ipse *Erasmus*, qui in prioribus editionibus eum praetermiserat, in tertia editione restituit ex vetusto codice Anglicano. Calumnia vero, quam ipse in *Hieronymum* doctorem sanctissimum pariter, et doctissimum impegit, intoleranda prorsus est. Si ergo *Prologus in Epistolas Canonicas* est revera *Hieronymi*, quod probabilius est, (conjecturae enim, quibus eum *Hieronymo* abjudicant *Simonius*, et PP. Benedictini in Editione ejus Operum, infirmas sunt) putandum est, Hieronymum ex fide meliorum codicum eum versum retinuisse, et reprehendisse codices, qui eo carerent.

Quod spectat ad codices Latinos, negari non potest, in pluribus, et melioribus eum versum inveniri, ut testantur Lovanienses in Editione Scripturae, quam anno MDLXXX. magno manuscriptorum conquisito numero, fecerunt; PP. Benedictini in citatum *Prologum Hieronymi*, et alii. Sed quod caput est, et rem omnino conficit, *Cassiodorus*, qui Saeculo V. conquisitis undique antiquissimis, et probatissimis codicibus, quanta maxima valebat diligentia libros Sacros contulit, et emendavit, hunc versiculum mandat in Libro, quem edidit *Massejus* anno MDCCXXI. cui titulus *Complexiones in Epistolas, et actus Apostolorum*

lorum. Patet autem codices, qui tempore Cassiodori erant antiquissimi, vel ipsa Apostolorum tempora attingisse, vel ab iis parum abuisse.

Falsum est autem, nullum ex veteribus Patribus hunc versiculum protulisse contra haereticos. Nam praeter Hieronymum, de quo paulo ante diximus, protulit illum Cyprianus *Lib. de Unit. Eccl. cap. 4. De Patre, inquit, et Filio, et Spiritu Sancto scriptum est: et hi tres unum sunt.* Ubi autem scriptum est, nisi in laudato loco Joannis? Protulit etiam Eugenius Episcopus Carthaginensis in professione fidei, quam nomine 400. Episcoporum Hannerico Vandalorum Regi obtulit, dicens: *Ut adhuc luce clarius unius divinitatis esse cum Patre, et Filio Spiritum Sanctum doceamus, Joannis Evangelistae testimonio comprobatur; ait namque: tres sunt, qui testimonium perhibent in caelo: Pater, Verbum, et Spiritus Sanctus: et hi tres unum sunt: apud Victor. Viten. Lib. III. de Persecutione Africana.* Insigne est hoc testimonium, quippe editum a tot Episcopis coram adversariis contentiosissimis. Protulit et Fulgentius in *Respons. ad 10. object. Arianor. Beatus Joannes Apostolus testatur dicens: Tres sunt, qui testimonium perhibent in caelo, Pater, Verbum, et Spiritus S.: et hi tres unum sunt.* Quod etiam Beatissimus Martyr Cyprianus in *Epistola de Unitate Ecclesiae testatur, dicens etc.* Protulerunt et alii, quos omittimus; ex regulis enim Criticae vel unum positivum testimonium vincere debet sexcenta negativa eorum Patrum, apud quos hic versus non citatur, vel quia aliqua eorum scripta perierunt: vel quia ipsi in mendosos codices inciderunt, in quibus versus ipse deerat.

*Inst. Ex concessis,* nonnulli codices hunc versum habent, in nonnullis deest. Cur ergo non potius judicamus mendosos eos codices, qui hunc versum exhibent, quam eos, qui illo carent?

¶ Quia 1.º facile fuit amanuensibus errare omitendo hunc versum, impossibile vero illud addendo. Cum enim uterque versiculus, septimus scilicet, et octavus ab iisdem verbis incipiant *tres sunt, qui testimonium dant* et in eadem verba desinant *unum sunt*, facile fuit, errante

22 *Theologicarum Institutionum Lib. IV. Cap. III.*

rante oculo, ab uno ad alium versiculum transilire: quod et accidisse in aliis Scripturae locis, in quibus plures versus consequentes ab iisdem verbis incipiebant, notant PP. Benedictini *loc. cit.* At contra impossibilis erat additio, non solum quia piaculum erat aliquid addere verbo Dei; sed etiam quia cum per totum orbem Scripturae exemplaria sparsa essent, facile erat detegere fraudem: nec tanta consensione tota Ecclesia unius, aut alterius amantius additamenta, tamquam verbum Dei receperet, aut ex margine in textum intrusisset.

2.<sup>a</sup> Quia si citatum versiculum septimum demas, jam mutila est Joannis oratio, et ipse contextus lacunam ostendit. Ait enim v. 6. *Spiritus est, qui testificatur, quoniam Christus est veritas*; v. 7. *quoniam tres sunt, qui testimonium dant in caelo: Pater, Verbum, et Spiritus Sanctus: et hi tres unum sunt*; v. 8. *et tres sunt, qui testimonium dant in terra: Spiritus, et aqua, et sanguis: et hi tres unum sunt*; v. 9. *Si testimonium hominum accipimus, testimonium Dei majus est: quoniam hoc est testimonium Dei, quod majus est, quoniam testificatus est de Filio etc.* Deme versum septimum, jam, ut patet, tota oratio non cohaeret.

*Objic. IV.* Licet negari non possit, ex Novo Testamento demonstrari, Filium esse aliam personam a Patre distinctam, neque id diffiteantur Sociniani, quippe qui docent, Filium, nempe Christum, utpote purum hominem, esse personam a Deo Patre distinctam; tamen Spiritum Sanctum esse distinctam a Patre personam neque ex verbis Christi *Joan. IV.*, neque ex formula Baptismi, neque ex Epistola *Joan. I. cap. V. 7.* probari potest. Non quidem ex verbis Christi *Joan. XIV.*; nam sicut Christus ait, Spiritum esse alium Paraclitum, seu consolatorem; ita etiam David *Psal. XXII.* de virga et baculo Domini ait. *Virga tua et baculus tuus, ipsa me consolati sunt.* Quis autem dixerit, eas esse personas a Patre distinctas? Non etiam ex formula baptismi; sicut enim Paulus *Act. XX. 32.* ait: *Commendo vos Deo, et verbo gratiae ipsius*; et *Ephes. VI. 12.* *Confortamini in Domino, et in potentia virtutis ejus,* quibus locis conjungit cum persona Dei ejus operationes, quae personae non sunt; ita etiam forma baptismi

ptismi intelligi potest in nomine. Patris, et filii, et virtutis Dei. Non denique ex verbis I. Joan. V. 7. nam sicut in versu 7. dicitur: *Tres sunt, qui testimonium dant in caelo: Pater, Verbum, et Spiritus Sanctus: et hi tres unum sunt*; ita etiam sequenti versu dicitur: *Tres sunt, qui testimonium dant in terra: spiritus, et aqua, et sanguis: et hi tres unum sunt*. Atqui ex his verbis non eruitur, spiritum, aquam, et sanguinem esse tres personas; ergo nec ex prioribus eruitur, Spiritum Sanctum esse personam a Patre distinctam, sed tantum aliquam ejus operationem. Ergo.

¶. Neg. ant. et similitudines allatas. Ad 1m. enim dicimus, longe disparem esse rationem inter laudata *Psalmi* verba, et ea, quae habentur apud *Joannem*. Ibi enim dicitur Spiritus testificari, arguere, clarificare, loqui quaecumque audierit: quod nonnisi personae subsistenti convenire potest; et distinguitur praeterea personali pronomine *enimvero ille: Ille docebit, ille testimonium perhibebit, ille arguet mundum, ille quaecumque audiet loquetur*. Et haec loquendi ratio constans est in Scripturis; ita ut si liceret eam ad figuratum sensum transferre, nullus esset, qui non posset in alienum sensum detorqueri, locus; et Scriptura potius ad decipiendos, quam ad docendos homines composita videretur; uteretur enim nomine spiritus, quo nomine utique persona aliqua intelligitur; cum omnibus characteribus personalibus insiguiet; nullum daret locum *spiritum* in sensu figurato intelligendi, et tamen sensus figuratus esset. Ipse Filius dici posset non esse persona. At contra laudata *Psalmi* verba, et alia Scripturae loca; in quibus per *prosopopoeiam* operationes personales rebus inanimatis tribuuntur, statim figuratum sensum praeserunt.

Ad 2m. Recte dicere potuit Apostolus: *commendo vos Deo, et verbo gratiae: confortamini in Domino et in potentia virtutis ejus*; sensus enim est, nos commendari, et confortari in Deo, ut per verbum gratiae suae, suamque potentiam nos servet. At in nomine idem est, ac in auctoritate; auctoritas autem est personae, quis enim sanus dixerit: *in auctoritate sapientiae Regis, aut virtutis ejus?* ac proinde cum dicitur

in

24 *Theologicarum Institutionem Lib. IV. Cap. III.*  
in nomine Spiritus, sicut in nomine Patris, et Filii,  
tertia persona intelligenda est; nec potest nisi insulse  
virtus Dei significari.

*Ad 3m.* Dispar etiam ratio est versus octavi, et se-  
ptimi. Nam praeterquam quod illa clausula versus 8.  
*hi tres unum sunt*, in plurimis deest codicibus, ut te-  
stantur Lovanienses Correctores, et Innocentius III.  
*Cap. cum Marthae de Celebr. Missar.*, advertendum  
est; nullam ex tribus, versu 8. commemoratis, esse  
personam, nam spiritus, aqua, et sanguis ex Augu-  
stino *Lib. II. cont. Maximin. cap. 22.* est spiritus a  
Christo in Cruce emissus, aqua, et sanguis ex ejus  
mortui latere fluentes: quae testantur Christum esse ve-  
rum hominem contra haereticos ejus temporis, qui id  
negabant. Ac proinde periculum non erat, ne aliqua  
ex iis pro persona acciperetur. Sed in versu 7. Ver-  
bum, et Spiritus conjunguntur cum persona Patris, et  
dicitur quod *tres sunt*; et *hi tres unum sunt*: quis  
ergo adeo caecus, ut non videat ibi tres personas?

*Inst.* Ideo virga, et baculus Domini, spiritus, aqua,  
et sanguis, et cetera non possunt intelligi de persona,  
quia statim unusquisque videt, operationes personarum  
iis tribui per *prosopopoejam*. Atqui idem dici potest  
de Spiritu Sancto. Nam Spiritus nomen saepissime in  
Scripturis usurpatur pro vento, aut aliis rebus, quas  
clarum est, non esse personas, ex. gr. pro voce, pro  
virtute, et *energia*, pro vita etc. quae colligit Joan.  
*Clericus Part. II. Art. Crit. Sect. 1. cap. 5.* Usurpatur  
etiam ipsum nomen Spiritus Sancti pro gratia Dei;  
sicut cum dicitur *Marc. I. 8. Ille baptizabit vos Spi-  
ritu Sancto*; quis enim dixerit, baptizari nos persona  
divina? Denique cum dicitur *Spiritus Dei*, id ipsam  
spiritualem Dei naturam significare videtur: sicut cum  
nos dicimus spiritum hominis, non intelligimus per-  
sonam aliquam ab homine distinctam. Quam compa-  
rationem instituit Apostolus *I. Cor. II. 11. Quis enim  
hominum scit quae sunt hominis, nisi spiritus homi-  
nis, qui in ipso est? ita et quae Dei sunt, nemo  
cognovit, nisi Spiritus Dei.* Ergo.

*R. Neg. min. Ad Confirm. Dist. ant.* Usurpatur pro  
rebus, quas constat non esse personas, sed semper ad-  
ditur



ditur aliquid, quo distinguatur a persona Spiritus Sancti, *conc.* Nihil additur, sed dicitur absolute *Spiritus Sanctus*, *neg.* Quoties igitur nomen spiritus pro rebus adhibetur, quae personae non sunt; semper aliquid additur, quo ad res illas coarctetur ejus nominis significatio. Sic cum dicitur *Isaiae XL. 7.* aëfactum esse foenum, quia *Spiritus Dei sufflavit in eo*, unusquisque videt, accipi hic spiritum pro vento urente. Sic etiam cum dicitur *Spiritus procellae*, nemo nescit intelligendum esse de vehementi tempestate: et idem dicas de aliis Scripturae locis. Sed numquam *Spiritus Sanctus*, praesertim si in Graeco articulus praecedat *το πνευμα αγιον*, de alia re intelligitur; quam de ipsa Spiritus S. persona, ut observavit Didymus *Lib. I. de Spiritu Sancto*. Neque contrarium evincitur ex locis in objectione recitatis. Nam *Marci I. 8.* cum dicimur baptizari Spiritu Sancto, ipsa persona Spiritus Sancti intelligitur, non quia baptizamur persona divina: sed quia per metonymiam tribuitur gratiae ipsum Spiritus Sancti nomen, qui eam infundit: sicut cum lux dicitur sol, quia a sole diffunditur: et Lex Mosaica, librique Prophetarum dicuntur *Moyse*, et *Prophetas*: *Luci XVI. 29.* *Habent Moysen, et Prophetas: audiant illos*. Cacterum gratiam distinctam esse a Spiritu Sancto, tanquam effectum a causa, patet ex Apostolo *Rom. V. 5.* *charitas Dei diffusa est in cordibus nostris per Spiritum Sanctum*. Comparatio autem instituta ab Apostolo *I. Cor. II. 11.* in eo solum sita est, quod sicut interiores hominis cogitationes nemo novit, nisi spiritus ipsius hominis; ita etiam abscondita Dei mysteria nemo novit, nisi Spiritus Sanctus: sed ipse Apostolus disparem rationem innuit; nam de homine ait: *spiritus hominis, qui in ipso est*: at de Deo: *Spiritus qui ex Deo est*; subdit enim post laudata verba: *nos autem non Spiritum hujus mundi accepimus, sed Spiritum qui ex Deo est*, sive procedit. Quis autem de anima hominis dixerit: *Spiritus qui ex homine est*?

*Objic. V.* Scriptura ubique praedicat Dei unitatem; idque etiam naturali lumine notum est. Ergo non sunt tres personae.

R. Neg.

26 *Theologicarum Institutionum Lib. IV. Cap. III.*

¶ *Neg. cons.* Licet enim in rebus creatis, ubi una est natura, unam etiam personam esse oporteat; id tamen fides docet, verum non esse de natura infinita, quae una est in tribus personis. Etsi autem nos id naturali lumine directe intelligere non possumus; tamen ipsa naturalis ratio nos edocet 1.<sup>o</sup> non valere argumentum, et comparisonem a finito ad infinitum; 2.<sup>o</sup> si varietas ingeniorum inter ipsos homines efficit, ut unus clare percipiat, quae alius hebetiori ingenio intelligere non valet; multo magis putandum est, mentem divinam multa clarissime comprehendere, quae mens hominum percipere non potest. Idcirco si ineptus esset homo ingenii rudioris, qui negaret quidquid ipse non intelligit, licet ab homine docto, nec mendaci asseratur; multo magis ineptus esset, qui negaret quod a Deo constat esse revelatum, licet ipse non intelligat.

Instant hic Sociniani, et innumera sophismata promunt, ut probent, Trinitatem personarum esse rationi contrariam. Nos tamen istas eorum tricas infra dissolvemus, ubi expendemus, an Mysterium Trinitatis contrarium sit rationi.

*Obje. VI. cont. 3m. part.* Si priorum saeculorum Patres Trinitatem personarum in divinis credidissent, et scripto docuissent, utique Gentiles ipsis objecissent vel deorum numerum, quem Christiani passim iis exprobrabant, itaque par pari retulissent, vel saltem argumenta innumera, quae unicuique cogitanti de hoc mysterio veniunt in mentem. Atqui neutrum fecerant. Ergo etc.

¶ *Neg. min.* tum quia non omnia supersunt scripta eo tempore a Gentilibus contra Christianos, et a Christianis contra Gentiles; tum quia ex scriptis, quae supersunt, constat, gentiles, et haereticos revera utrumque objecisse Christianis, ut patet ex objectionibus *Celsi* apud *Origenem Lib. cont. Cels.*, ex objectionibus aliorum Gentilium apud *Justinum Apolog. I.*, ex objectionibus *Praxeae* apud *Tertullianum Lib. cont. Prax.*

## C A P. IV.

*Ostenditur, tres personas esse consubstantiales, h. e. habere eandem naturam divinam.*

**Advertendum.** **S**Tatuta Trinitate personarum; demonstrandum modò est, tres illas personas esse *consubstantiales*, hoc est eandem habere numero substantiam, et naturam divinam. Quod primo hic generatim exequemur de omnibus simul personis; deinde in sequentibus capitibus sigillatim idem de unaquaque ostendemus persona, hoc est personam Filii, et Spiritus Sancti esse consubstantiales Patri, quem habere unam, et individuum naturam divinam, nemo negat.

## P R O P O S I T I O.

*Tres personae Pater, Filius, et Spiritus Sanctus sunt consubstantiales, hoc est eandem habent divinam naturam. Est dogma fidei.*

*Prob. I. Matth. XXXVIII. 19.* formam baptismi præscribens Christus, ait: *Euntes docete omnes gentes, baptizantes eos in nomine Patris, et Filii, et Spiritus Sancti.* Non ait in nominibus, sed in nomine, hoc est in una eademque trium personarum auctoritate. Atqui quorum auctoritas una est, una etiam debet esse natura; nam si una persona increata esset, alia creata, non una eademque esset ambarum auctoritas; sed in una esset naturalis; essentialis, et infinita; in altera esset supernaturalis, accidentalis, finita, ac derivata. Ergo etc. Præterea per eam formulam devoentur homines, et consecrantur simul Patri, Filio, et Spiritui Sancto sine ulla distinctione, atque discrimine. Ergo eorum debet esse eadem natura divina; sacrilegum enim esset consecrari hominem simul Creatori, et creaturae, cum Deus honoris sui *Zelotes* sit *Exod. XX. 5.* nec illum cum rebus creatis communicari patiatur. Ergo.

*Prob. II. ex celebri loco Joannis Epist. I. Cap. V.*

*7. Tres sunt, qui testimonium dant in caelo: Pater,*

28 *Theologicarum Institutionum Lib. IV. Cap. IV.*  
*ter, Verbum, et Spiritus Sanctus: et hi tres unum*  
*sunt.* Quibus verbis nihil clarius dici poterat de una  
eademque trium personarum natura. Ejus autem ver-  
sus veritatem supra adversus Criticorum objectiones  
vindica vimus. Ergo.

*Prob. III. ex traditione Patrum Antenicænorum.*  
1.<sup>o</sup> Justinus *Apolog. II.* Hunc Patrem, et qui ab eo ve-  
nit Filium, et Spiritum Peopheticum colimus, et ado-  
ramus, cum ratione, et veritate venerantes. Atqui con-  
stat, uni, et soli Deo deberi adorationem, quam hic sine  
ullo discrimine exhiberi dicit Patri, et Filio, et Spi-  
ritui Sancto. Ergo etc. 20. Athenagoras *Legat. pro*  
*Christianis: Deum asserimus, et ipsius Verbum, et Spi-*  
*ritum Sanctum, tria quidem secundum potentiam, Pa-*  
*trem, Filium, et Spiritum Sanctum; actu vero, et es-*  
*sentia unum.* Et clarius rem explicans, ait: Quis igitur  
non miretur, cum audiat, nos qui Deum Patrem  
praedicamus, et Deum Filium, et Spiritum Sanctum,  
eorum in unitate virtutem, et in ordine distinctionem  
explicantes, Atheos vocari? 3.<sup>o</sup> Tertullianus *Lib.*  
*contra Praxeam* totus est in hoc dogmate explicando,  
et asserendo. Sic ait cap. 2. Custodimus oeconomiae  
Sacramentum, quae Unitatem in Trinitatem disponit,  
tres dirigens Patrem, et Filium, et Spiritum San-  
ctum. Tres autem non statu, sed gradu; nec sub-  
stantia, sed forma; nec potestate, sed specie (for-  
mam, et speciem pro personarum proprietate usurpat).  
unius autem substantiae, unius status, et unius po-  
testatis, quia unus Deus. Idem repetit cap. 3. 12. et  
22. 4.<sup>o</sup> Dionysius Romanus in *Episola contra Sabellianos*,  
cujus fragmenta refert Athanasius *Lib. de de-*  
*cret. Syn. Nic.* refellens Sabellii haeresim, qui tres per-  
sonas non distinguebat, haec addit: Audio quosdam  
apud vos esse Cathechistas, et doctores divini verbi, qui  
illius sunt opinionis auctores, qui ex diametro pugnant  
cum Sabellii placitis. Hic enim blasphematur, Filium ip-  
sum esse asserens Patrem, et e converso Patrem esse  
Filium. At isti tres quodammodo praedicant, dum San-  
ctam Monadem dividunt in tres hypostases peregrinas,  
et a se invicem plane separatas. Subdit: Etenim ne-  
cesse est, uniri omnium Deo Verbum, et in Deo manere,  
et habitare Spiritum Sanctum. Jam vero divinam

quoque Trinitatem in unum velut in caput quoddam, et summum Omnipotentem Deum universorum colligi, et coalescere prorsus est necesse. Ecce manifeste praedicat Romanus Pontifex in Trinitate unitatem, et in unitate Trinitatem esse dogma fidei in Ecclesia universa. De Patribus vero, qui post Nicaenum Concilium floruerunt, nulla potest hac in re esse dubitatio. Ergo.

*Prob. IV. ex Symbolo Apostolico*, in quo a primis Ecclesiae sacculis fideles in Deum Patrem, Filium, et Spiritum Sanctum se credere professi sunt. Atqui credere in Deum est ei non modo per fidem, sed etiam per spem, et charitatem adhaerere, tamquam ultimo fini, Ergo cum non liceat hoc modo adhaerere creaturis, ipsum Filium, et Spiritum Sanctum Deum esse fideles semper professi sunt. Hic ubi primum aliquis docere coepit, vel Filium, vel Spiritum Sanctum non esse Deum, statim reclamarunt fideles: quae reclamatio tamquam antiquae fidei vox habenda est: statimque Novatores tamquam haeretici proscripti sunt in Conciliis, ut in Nicaeno, Constantinopolitano etc. Ergo.

#### *Objectiones solvuntur.*

**I. Objic. I.** Ex eo quod baptizamur in nomine Filii, et Spiritus Sancti, et credimus in Filium, et Spiritum Sanctum, non sequitur, utramque personam esse ejusdem cum Patre naturae; sed tantum nos baptizari baptismo Filii, seu Christi, et per gratiam Dei ablui a peccatis: sicut ex eo quod Apostolus *I. Cor. X. 2.* ait. *omnes in Moyse baptizati sunt*, non sequitur, Moysen esse Deum. Et ex eo quod legitur *Exod. XIV. 31.* *crediderunt Domino, et Moysi servo ejus*, non sequitur, Moysen Domino coaequari. Denique ex eo quod proponatur edictum auctoritate Regis, et Praefecti, non sequitur, eos eadem potestate pollere. Ergo.

**R. Neg. ant. et comparationes allatas.** Qui enim dicit in nomine Patris, et Filii, et Spiritus Sancti, ostendit unam eandemque in tribus auctoritatem, ideoque unam naturam, ut supra diximus. Item qui credit in Patrem, Filium, et Spiritum, aeque fertur erga eos eadem fide, spe, et charitate. Sed Apostolus non ait,

Istrac-

36 *Theologicarum Institutionum Lib. IV. Cap. IV.*

Istraclitas baptizatos in nomine Moysis, sed in Moyse; hoc est Moyse duce; quamquam etiamsi diecret in nomine Moysis, adhuc dispar esset ratio a forma baptismi; quia non dixisset, omnes baptizatos esse in nomine Patris, et Moysis, communem faciens utriusque auctoritatem; sicut nos baptizamur in nomine Patris, et Filii, et Spiritus Sancti. *Exodi* vero cap. *XIV.* non legitur: *Crediderunt in Dominum, et Moysen*; sed *Domino, et Moysi*; aliud autem est credere Deo, aliud credere in Deum. Denique si quando edictum proponatur ipsissimis hisee verbis auctoritate Regis, et Praefecti urbis (quod nescio an umquam factum sit) ipse edieti textus ostendit, auctoritatem praefecti a Regia esse diversam, et in eo tantum esse positam, ut Regis voluntatem exequatur. At non ita se res habet in forma baptismi.

*Objic. II.* Sicut in laudato Joannis loco de Patre, Filio; et Spiritu Sancto dicitur: *et hi tres unum sunt*: ita et de spiritu; aqua, et sanguine dicitur *vers. 8. et hi tres unum sunt*. Atqui inde non eruitur, spiritum, aquam, et sanguinem esse ejusdem individuae naturae. Ergo nec ex superiori versiculo eruitur, Patrem, Verbum, et Spiritum unius esse naturae.

*R. Dist. maj.* Et haec verba versus 8. *et hi tres unum sunt*, praeterquam quod in pluribus desunt codicibus, in ipso originali contextu evidenter ostendunt, longe disparem unitatem esse spiritus, aquae, et sanguinis ab ea, quae est Patris, Filii, et Spiritus Sancti; *concl. neg.* In textu enim Graeco de Spiritu, aqua, et sanguine non dicitur *οι τρεις εν ειςιν*, sicut dicitur de Patre, Filio, et Spiritu Sancto; sed *οι τρεις εις εν ειςιν* hi tres in unum sunt, hoc est in idem testimonium conspirant, et consentiunt. Dissimilis ergo est utriusque versus ratio.

*Inst.* Etiam unitas, quae de Patre, Filio, et Spiritu Sancto praedicatur, intelligi potest unitas voluntatis, et testimonii. Nam *Joan. XVII. 21.* ait Christus: *Pater... rogo... pro eis, qui credituri sunt... ut omnes unum sint, sicut tu Pater in me, et ego in te... ut sint unum, sicut et nos unum sumus.* Orat igitur, ut fideles sint unam, sicut Pater, et Filius unum sunt.

sunt. Atqui fideles non possunt esse unum, nisi concordia voluntatis. Ergo Pater, et Filius, ideoque et Spiritus eodem sensu unum sunt.

*Neg. ant. Ad confirm. Dist. maj.* Et hæc similitudo unitatis in omnibus perfecta est, *neg.* In aliquibus, *conc.* Quoties igitur creatura Creatori comparatur, semper infinito intervallo minor est; et similitudo ex aliqua, non autem omni ex parte urgenda est: sicut cum ait Christus *Matth. V. 48. Estote perfecti, sicut et Pater vester caelestis perfectus est*, quis adeo desipiat, ut eandem dicat esse posse in creatura perfectionem, quæ est in Creatore? Preterea cum ibi Christus Patrem oret ut homo, potuit eam discipulis unitatem, atque concordiam, quantum capaces erant, adprecari, quam ipse homo cum Patre habet. Vide Theodoretum *Lib. II. Hist. cap. 8.*, et Maldonatum in *comm.*

*Objic. III. Joan. XVII. 3.* Christus Patrem alloquens, ait: *Hæc est autem vita æterna: ut cognoscant te, solum Deum verum, et quem misisti Jesum Christum.* Ergo si solus Pater est Deus; Filius, et Spiritus Sanctus non sunt ei consubstantiales.

*¶. Dist. ant.* Pater est solus verus Deus, ita ut excludat inanes Deos, *conc.* Ut excludat Filium, et Spiritum Sanctum, *neg.* Nam ut observat Petavius *Lib. III. de Trin. cap. 1.* in Graeco adjectivum *μονον* solum non afficit pronomen *Σε* te, sed sequentia verba *verum Deum*; ait enim *ἵνα γινώσκῃς σε τον μονον αληθινον θεον*, ut cognoscant Te, qui es ille solus verus Deus. Porro aliud est dicere: *solus Pater est verus Deus*; aliud: dicere: *Pater est ille solus verus Deus*, ut patet.

*Objic. IV. Ait Apostolus I. Cor. VIII. 6. Nobis tamen unus Deus, Pater, ex quo omnia, et nos in illum: et unus Dominus Jesus Christus, per quem omnia, et pos per ipsum.* Ergo soli Patri Dei nomen attribuit.

*¶. Dist. cons.* Ut excludat inanes Gentium Deos, *conc.* Ut excludat Filium, et Spiritum Sanctum, *neg.* Alioqui si dicendo *unus est Deus, Pater*, excluderet a divinitate Filium; dicendo etiam *unus Dominus Jesus Christus* excluderet a dominatione Patrem, quod

32 *Theologicarum Institutionum Lib. IV. Cap. IV.*

absurdum est. Solos igitur inanes Gentilium Deos a natura divinitatis excludit, de quibus paulo ante dixerat: nam etsi sunt qui dicantur Dii, sive in caelo, sive in terra ( siquidem sunt Dii multi, et domini multi ): nobis autem unus est Deus: Movere autem nos non debet quod de Patre dicat ex quo omnia, de Filio vero per quem omnia; Pater enim est principium, quod a nullo procedit, Filius a Patre.

*Objic. V. Dionysius Petavius*, inter Catholicos doctissimus, *Lib. I. de Trin.* scilicet omnes Antenicænos Patres, paucis exceptis, ait, non agnovisse unitatem naturæ divinæ in Patre, Filio, et Spiritu Sancto. *Ricardus Simonius* Catholicæ etiam communionis auctor, in *Hist. Critica Novi Test.* fatetur, veteres doctores numquam clare docuisse *ταυτοσιν* seu unitatem naturæ in tribus personis. Quomodo ergo revincemus heterodoxos, si ipsi nobis adversantur Catholici?

*¶ Neg. cons. Petavius* enim vel rei evidentia evictus, vel Catholicorum offensione commotus, quidquid scripserat de Patribus Antenicænis, in *Praefatione* vel retractavit, vel, quantum potuit, sensu catholico explicavit, atque emollivit. Melius quidem nomini suo consulisset, si omnia ex ipso opere expunxisset; sed cum se revocaverit, frustra Sociniani de ejus auctoritate gloriantur. *Simonius* magnam suo nomini labem aspersit. Sed sicut exiguae stipulae fumus lucem solis nequit extinguere, ita istorum sententia auctorum tenebras offundere non potest lumini scripturarum, et traditionis, quam non solum nostri, sed etiam heterodoxi scriptores, praecipue *Georgius Bullus*, eruditissime, et doctissime explicuerunt.

Nunc, quoniam trium personarum divinitatem, et consubstantialem naturam generationis ostendimus; jam de divinitate, Filii, et Spiritus Sancti, sicut ante fuit propositum, sigillatim discremus.



## C A P. V.

*Ostenditur, Verbum divinum, sive Filium esse Patri  
quod est, seu consubstantialem.*

**V**erbi divinitas, et consubstantialis cum Patre natura potest demonstrari vel directe ostendendo scilicet ipsum Verbum esse Patri consubstantiale, vel indirecte, scilicet demonstrando, Christum esse Deum; ex eo enim evidenter sequitur, Verbum Deum esse, Patrique consubstantiale; quia persona Christi, ut in *Lib. VI. de Incarnatione* docebimus, ipsa Verbi persona est. Sed nos ista commodo tironum dividemus, atque hic directe solum demonstrabimus Verbi divinitatem 1°. ex Scripturis; 2°. ex traditione Patrum Antenicænorum; 3°. ex Concilio Nicaeno, et sequentibus Patribus.

## §. I.

*Verbi divinitas, et consubstantialis cum Patre  
natura ex Scripturis ostenditur.*

## P R O P O S I T O

*Ex Scripturis evidenter ostenditur Verbi divinitas. Est non solum contra Arianos, et Socinianos, sed etiam contra Simonium, qui, licet fateatur, Verbum esse Deum; negat tamen id clare ex Scripturis ostendi.*

*Prob. I. ex Evangelio Joan. cap. I. In principio erat Verbum, et Verbum erat apud Deum, et Deus erat Verbum. Hoc erat in principio apud Deum. Omnia per ipsum facta sunt: et sine ipso factum est nihil. Quo ex textu sic concludimus. 1o. Æternitas est solius Dei, ut in Lib. III. cap. 7. docuimus. Atqui hic Verbo tribitur æternitas; utitur enim Joannes verbo erat, quod omnia tempora transcendit; quia quodcumque temporis punctum fixeris, semper vera esse debet hæc propositio: Verbum erat; ideoque semper erat; ac proinde*

Tom. II.

C

ab

34 *Theologicarum Institutionum Lib. IV. Cap. V.*

ab aeterno erat, ut observant Chrysostomus *Homil. III. in Joan.* Basiliius in *haec verba*, Cyrillus *Lib. I. in Joan. cap. 5.* et alij. Unde Ambrosius *Lib. I. de fide ad Grätian. cap. 5.* *Erat apud Deum. Erat, erat, erat: ecce quater erat: ubi impius invenit, quia non erat?* Merito ergo in Concilio Nicæno Arianis anathema dictum est asserentibus fuisse momentum, quando Verbum non erat. Praeterea ait Evangelista: *in principio erat.* Atqui verba ista *in principio* absolute posita significant in principio omnium rerum, in ipsa creatione rerum, a qua tempus incepit. Ergo Verbum erat ante omnia tempora, ac proinde ab aeterno.

2°. Ex laudato *Joannis* loco Verbum semper erat ac proinde non est factum, sed a seipso erat. Atqui quod non est factum, sed est a se, Deus est, ut ex *Lib. III. cap. 2.* manifestum est Ergo.

3°. Item *omnia per Verbum facta sunt.* Ergo Verbum factum non est, alioquin vel falsum esset, omnia facta esse per Verbum: vel aliud comminisci debemus Verbum, per quod Verbum factum est; et tunc illud aliud Verbum Dei Filius vere esset; non hoc alterum, quod per illud factum est. Atqui quod non est factum, Deus est, ut patet. Ergo.

4°. Tribuitur Verbo in laudato textu omnium rerum creatio; ait enim; *omnia per ipsum facta sunt*: quod et in *Psaln. XXXII.* dicitur: *Verbo Domini caeli firmati sunt.* Atqui creatio opus omnipotentiae, sive infinitae virtutis est. Ergo si Verbum est omnipotens, Deus est.

5°. Denique Verbum, ad omnem ambiguitatem tollendam, absolute et simpliciter dicitur Deus: *et Deus erat Verbum*: in qua propositione sive Deus ponatur ut praedicatum cum Hilario *Lib. I. de Trin. cap. 7.*, sive ut subjectum cum aliis Patribus, idem omnino sensus est. Cacterum Ex Graeco constat textu, Deum esse propositionis attributum, seu praedicatum. Ergo etc.

*Prob. II. ex Apostolo in Epist. ad Hebr. cap. I.* ubi divinitatem Filii Dei magnifice praedicat. Ait enim: *Ad Angelos quidem dicit: qui facit Angelos suos spiritus; et ministros suos flammam ignis. Ad Filium autem: Thronus tuus, Deus, in saeculum saeculi: virga aequitatis, virga regni tui. Dilexisti justitiam, et odi-*

*sti-*

si iniquitatem: propterea unxit te Deus, Deus tuus oleo exultationis prae participibus tuis. Et: Tu in principio Domine terram fundasti; et opera manuum tuarum sunt coeli. Ipsi peribunt, tu autem permanebis; et omnes ut vestimentum veterascent: et velut amicum mutabis eos, et mutabuntur: tu autem idem ipse es, et anni tui non deficient. Quibus verbis Apostolus 1.<sup>o</sup> appellat Filium absolute Deum: Thronus tuus, Deus, in saeculum saeculi: 2.<sup>o</sup> ne qua esse posset de sensu hujus nominis dubitatio, ait, ipsum esse caeli, et terrae creatorem; 3.<sup>o</sup> ipsum habere aeternitatem, ac immutabilitatem. Atqui haec omnia impij esset tribuere nisi verò, et soli Deo. Ergo.

*Prob. III. ex Psalmo CIX.*, ubi Pater Filium alloquens, ait; *ex utero ante Luciferum genui te*, hoc est ab aeterno ex mea substantia te genui; non sicut creaturas, quas in tempore ex nihilo eduxi. Atqui ex substantia Dei creatura gigni non potuit: imo nec potest esse omnino Filius, nisi ejusdem sit cum Patre substantiae; ut Cyrillus *Lib. XXIII. Thesauri*, alique Patres advertunt. Ergo.

Denique probatur etiam argumentis, quibus *Lib. VI.* in Tractatu de Incarnatione ostendemus, Christum esse Deum. Licet enim ex quo Verbum Deus est, non sequatur continuo, Christum esse Deum, nisi demonstretur antea contra Nestorium, Christi personam esse ipsum Verbum; tamen, ex quo Christus est Deus, evidenter Verbum esse Deum evincitur.

*Diluuntur objecta.*

Sicut argumenta, quae Christi divinitatem confirmant, alio in loco proferenda reservavimus; ita et objectiones, quae directe contra ipsius Christi divinitatem pugnare videntur.

*Objic. I. Ex cap. I. Joan.* non sequitur, Verbum esse verum Deum. Nam 1.<sup>o</sup> verba illa *in principio* multi Patres explicant *in Patre*, ut Clemens Alex. *Adhort. ad Graecos*, Cyrillus Alex. *Lib. I. in Joan. cap. 1.*, Augustinus *Lib. VI. de Trin. cap. 2.* et alii, quos vide apud Maldonatum *in Comment.* Alii explicant *in Deo*, ut Athanasius *orat. cont. Arianos*. Atqui sic explicata illa verba non probant ipsius Verbi aeternitatem: potest

quim dici, ipsum fuisse in mente Dei tanquam Verbum in tempore proferendum, ut Ariani arguebant apud Athanasium *Epist. de sentent. Dionys. Alexandr.*; aut saltem Verbum ibi non significare Filium Dei, sed aeternam Patris sapientiam, qua cuncta creavit. Praeterea possunt etiam intelligi cum Socinianis in principio praedicationis Evangelii, ita ut tota *Joannis* narratio metaphorica sit, significans, omnia, quae ad salutem pertinent, et mundum spiritalem, facta esse per verbum Evangelicum. Denique verba Moysae *in principio creavit Deus coelum et terram Gen. I.*, et verba Christi de diabolo *Joan. VIII. 44. ille homicida erat ab initio* non prostant, mundum, et diabolum esse ab aeterno. Ergo nec ista; *in principio erat Verbum.*

*¶ Neg. ant. ad 1<sup>am</sup>. Confirm. neg. min.* Licet enim illa verba *in principio* explicentur *in Patre*, vel *in Deo*, non tamen significant, Verbum fuisse *objective* tantum in auctore Dei, nam hoc sensu creaturae omnes, imo et omnia possibilia in Deo fuerunt; atque ideo nihil peculiare dixisset Joannes de Verbo; imo addidisset quando, aut quomodo ipsum Verbum productum esset, sicut de ceteris creaturis ait: *omnia per ipsum facta sunt.* Quod autem Verbum ibi sit ipse Dei Filius, patet ex sequentibus, ubi Joannes ait: *Verbum caro factum est; et vidimus gloriam ejus, gloriam quasi Unigeniti in Patre; et ex Apostolo Heb. I.*, ubi tribuit Filio, quod hic Joannes Verbo tribuit. Igitur verbum *erat υποστατικως*, *substantive*, accipiendum est, ut significet *existebat*: quod verbum indefinite praeteritum ejus aeternitatem demonstrat, ut supra ex *Ambrosio*, aliisque Patribus ostendimus.

*Ad 2.* Valde ridicula est interpretatio Socinianorum, non solum quia contra rectissimam Augustini regulam *Lib. III. De Doct. Christiana cap. 10.* detorquet ad metaphoram, quod in litera nihil absurdum, sed valde naturalem habet sensum, et contra regulam Tridentini *Sess. IV.* proponit explicationem contrariam ei, quam semper tenuit, et tenet Ecclesia, et unanimis Patrum consensus; verum etiam quia figurata illa Socinianorum explicatio ipsa se se destruit. Ait enim Joannes: *mundus per ipsum factus est.* Si ergo juxta Socianos *mundus* significat Ecclesiam, quomodo subnectit statim Evangelista: *et mundus eum non cognovit?*

*Ad 3.* Non ait Moyses: *in principio erat coelum, et terra*; sed *in principio creavit Deus coelum, et terram*: quae verba statim temporalem creationem ostendunt. Nec Christus ait de diabolo: *ille erat ab initio*, sed *homicida erat ab initio*, hoc est initio suae creationis in peccatum lapsus malum nocendi animum habuit. Unde longe dispar est ratio.

*Inst. 1.º* Ex eo quod ait Joannes: *omnia per ipsum facta sunt*, non sequitur, Verbum non esse factum; sicut cum dicimus, fabrum omnia per asciam, dolabram, aut serram facere, non sequitur, ipsam asciam non esse factam. Neque ait Joannes: *Omnia ab ipso facta sunt*, sed *per ipsum*: quod significat instrumentum, quod necessario debet esse creatum, et ab alio pendens. Ergo.

¶ *Neg. ant.* Non solum enim ait Joannes: *omnia per ipsum facta sunt*; sed addidit: *sine ipso factum est nihil*: quae generalis sententia clare ostendit, Verbum non esse factum; alioquin falsum esset, *nihil esse factum sine Verbo*. Particula autem *sine* per saepe in Scripturis causam principem significat, ut *Prov. VIII. 15. per me reges regnant*: et *I. Cor. I. Paulus Apostolus Jesu Christi per voluntatem Dei*. Quod autem in laudato Joannis loco revera causam principem denotet, patet non solum ex ipso contextu, in quo dicitur Verbum extitisse ab aeterno; verum etiam ex Apostolo *Heb. I.*, ubi de Filio Dei explicat, quod dicitur in *Psal. CI. et tu in principio Domine terram fundasti: et opera manuum tuarum sunt coeli*: quae verba certe non instrumentum, sed principem causam demonstrant.

*Inst. 2.º* In laudato Joannis loco Verbum non dicitur *o theos*; Deus cum articulo, quemadmodum in eodem loco Pater Deus dicitur cum articulo emphatico *o theos* sed simpliciter *theos Deus* sine articulo. Atqui Deus in Graeco textu sine articulo positus non ipsum summum Deum, sed inferiorem aliquam designat potestatem; sicut cum dicitur *Exod. VII. 1. Ecce constitui te Deum Pharaonis*; et *Psal. LXXXI. Ego dixi: Dii estis*. Ergo etc.

¶ *Neg. min.* Chrysostomus enim Graecae utique linguae peritissimus *Homil. III. in Joan.* Arianis talia obijicientibus respondet, ipsum Patrem aliquando vocari Deum *theon* sine articulo, ut *Rom. I. 7. Gratia vobis*

et

38<sup>a</sup> *Theologicarum Institutionum Lib. IV. Cap. V.*

et pax a Deo Patre nostro : in Greco *απο θεου* sine articulo. Contra Filius Rom. IX. 5. dicitur *ο θεος* cum articulo. Ratio igitur , cur Joannes Verbum appellans Deum, articulo non est usus , ea est ; quia nomen *Deus* ibi *praedicatum* est propositionis ; Verbum vero *subjectum*. Solent autem Graeci articulum subjecto non praedicato praepondere ; ideo Joannes dixit *θεος ην ο λογος* *subjecto λογος* praeponens articulum. Moyses vero , et Judices non absolute dicuntur *Deus* ; sed ille *Deus Pharaonis* , isti mortales quidam Dii , a Deo vero constituti super terram ; addit enim : *vos autem sicut homines moriemini*. Imo, ut advertit Hilarius *Lib. VII. de Trin.* eo ipso , quod Moyses , et Judices dicuntur constituti Dii , patet non esse natura veros Deos. At de Verbo dicitur : *Deus erat verbum*. Nihil luculentius.

*Objic. II.* Sapientia , quae Verbum Dei est , dicitur creata *Eccli. XXIV. 14. Ab initio , et ante saecula creata sum*. Et *Prov. VIII. 22.* ubi vulgata legit : *Dominus possedit me in initio viarum suarum*, *LXX.* habent *ο κυριος εκτισε με* *Dominus creavit me*. Ergo non est Deus.

*¶ Dist. ant.* Dicitur creata , creatione improprie dicta , quae pro quacumque productione usurpatur , *conc.* Creatione proprie dicta , *neg.* Ex duobus textibus in objectione prolatis unus alteri lucem affundit. Nam *Prov. VIII. 22.* Textus Hebraicus , qui originalis est , et versioni *LXX.* praefereendus , cum Vulgata nostra consonat ; habet enim : *Dominus possedit me* , h. e. *genuit* , quo sensu dicitur *Genes. IV. 1. possedi hominem per Deum*. Imo in ipsa versione *LXX.* in aliis codicibus fortasse emendationibus nonnulli Patres Graeci , ut Basilus *Lib. II. cont. Eunom.*, et Gregorius Nyss. *Lib. I. cont. eundem* legerunt *εκτισε* possedit : et facile fuit amanuensibus oscitantibus pro *εκτισε* scribere *εκτισα*. Igitur ex hoc loco *Proverb. VIII.* intelligitur quo sensu ipsa Sapientia *Eccli. XXIV.* de se dicat : *ab initio , et ante saecula creata sum*, h. e. *ab aeterno genita* : nisi et hic in textu Graeco error amanuensium subrepperit. Nec insolens est in Scripturis , ut creatio pro quacunque productione usurpetur , ut *Jerem. XXXI. 22. Creavit Dominus populum super terram*. Et fortasse si verbum *εκτισα* apud *LXX.*

**LXX.** non est amanuensium error, voluerunt interpretes eo verbo uti, ne si adhibuissent *gignendi* verbum, suspicaretur aliquis in Filii Dei generatione eas imperfectiones, quae sunt in creaturarum generationibus. His accedit, quod cum Sapientia de se dicat: *ab initio, et ante saecula* ( h. e. ab aeterno ) *creata sum*, non potest intelligi creatio proprie dicta; quia nihil creatum est, et fortasse nec creari potuit ab aeterno, ut in libro superiori diximus, et in sequenti dicemus uberius.

*Objic. III.* De Filio ait Christus *Marci XIII. 32. De die autem illo vel hora nemo scit, neque Angeli in caelo, neque Filius, nisi Pater.* Ergo si Filius aliquid ignorat, Deus non est.

¶. Filium Dei praefer. divinam naturam assumpsisse humanam in incarnatione, ut suo loco dicemus. Quapropter nonnulla de se dicit ut Deo, sicut est illud: *Ego et Pater unum sumus Joan. X. 30. Pater meus usque modo operatur, et ego operor. Joan. V. 17. Ego sum alpha et omega, principium et finis, dicit Dominus Deus, qui est, et qui erat, et qui venturus est omnipotens Apoc. I. 8. etc.*; alia vero ut de homine, quale est praecipue illud *Joan. XIV. 28. Pater major me est: quod vehementer urgebant Ariani, nosque suo loco explicabimus*; alia demum de utraque natura, ut *Joan. III. 13. Nemo ascendit in caelum, nisi qui descendit de caelo, Filius hominis, qui est in caelo.* Hoc igitur posito, nonnulli Patres ad verba in objectione recitata ita respondebant Arianis. Filius ignorat diem iudicii ut homo, *conc.* Ut Deus, *neg.* Quae responsio sufficit ad obstruenda ora Arianorum, et Socinianorum. Sed quia Filius neque ut homo ignorat iudicii diem, ut ostendimus suo loco, ideo aliter distinguendo, respondemus. Filius ignorat iudicii diem ut Deus, *neg.* Ut homo, *subdist.* Ignorat ut persona singularis, *neg.* Ut caput hominum, quibus eam scientiam non revelat, *conc.* Sicut Sacerdos in iudicium vocatus ac rogatus testis, recte dicit, se ignorare, quae in confessione sacramentali audivit. Neque hoc est alienum a phrasi Scripturarum, ut observat Augustinus *Lib. LXXXIII. Quaest. LX.* Sicut enim scire Deus dicitur etiam cum scientem facit, sicut scriptum est: *tenet vos Dominus Deus vester, ut sciat si diligatis eum*.

40 *Theologicarum Institutionum Lib. IV. Cap. V.*  
eum . . . sic et cum dicitur nescire , aut pro eo dicitur , quod non approbat . . . aut pro eo , quod utiliter nescientes facit , quod scire inutile est.

¶ *Objic. IV. Joan. V. 19. Non potest Filius a se facere quidquam , nisi quod viderit Patrem facientem. Ergo minister est , et imitator a Patre pendens.*

¶ *Dist. ant. Non potest a se facere quidquam propter naturam , quam habet communem cum Patre , a quo procedit , conc. Propter infirmitatem , aut subjectionem , neg. Quid superest , ait Ambrosius Lib. IV. de fide cap. 3. , nisi ut per unitatem inseparabilem potestatis nihil credamus Filium facere , nisi quod viderit Patrem facientem ? quia per inseparabilem unitatem nihil a se facit Filius ; quoniam nihil vult , quod Pater nolit : quod utique non infirmitatis est , sed unitatis. Igitur propter naturam cum Patre communem nihil facere potest , quod non facit et Pater ; propter processionem a Patre nihil potest facere a se , quia a Patre est.*

## §. II.

*Eadem Verbi divinitas , et consubstantialis cum Patre natura ex Patribus Antenicænis ostenditur.*

*Adv. Jam supra innuimus , non solum Socinianos , sed et Ricardum Simonium asserere , Patres Antenicænos alienos fuisse a Verbi divinitate , quibus incaute magna ex parte aliquando adhaesit Petavius. Sed Patrum defensionem praeter Catholicos egregie peregit Georgius Bullus. Nos , ne tironum memoria opprimatur , praecipuos producemus tum Graecos , tum Latinos ; aliorum loca indicabimus.*

## PROPOSITIO.

*Patres , qui ante Nicaenum Concilium floruerunt , unanimi consensu docuerunt , Verbum esse Deum , ideoque Patri ὁμοῦσιν.*

*Prob. I. ex Patribus Graecis. 1.º Ignatius , qui primo saeculo cum Apostolis vixit , et ipsum fortasse Chri-*



Christum adhuc puer vidit, ut est aliquorum opinio, obiit vero senex, et Martyr initio saeculi secundi, sic habet in *Epist. ad Ephesios*: *Unus est medicus. carnalis et spiritualis, factus et non factus, in carne Deus, in morte vita vera, et ex Maria, et ex Deo*: quae verba non solum Christi, sed ipsius Verbi divinitatem directe ostendunt, quod appellat absolute *Deum*; et ne de sensu ejus nominis quaestio esset, ait esse *non factum*; quod homini soli vero Deo convenit.

2.<sup>o</sup> Justinus saeculo II. *Apol. II. Filium*, inquit, esse *Patri universorum*, qui quod *Verbum Dei primogenitum sit, Deus etiam existit*. Eum autem numero, seu persona, non essentia distinctum a Patre docet in *Dial. cum Tryph.*, dicens: *Virtutem istam, quam Deum sermo Propheticus vocat, non ut solis lumen nomine tantum numerari, verum numero aliud quiddam esse ratione exquisita supra paucis explicavi: Virtutem hanc dicens de Patre genitam virtute, et consilio ipsius, non per abscissionem, tamquam dispersita esset Patris essentia, prout alia omnia divisa, et secta, non eadem sunt, quae ante fuerunt, quam scinderentur*. Idem docet aliis in locis, ut in *Oratione paraenetica ad Graecos*, quam ut genuinum Justini opus agnoscunt eruditi (a), et alibi.

3.<sup>o</sup> Eodem saeculo *Athenagoras*, praeterea, quae supra attulimus, in *Legatione*, sive *Apologia pro Christianis* ait: *Filius Dei est Verbum Patris in idea, et efficacia; ab ipso enim, et per ipsum facta sunt omnia, cum Pater, et Filius unum sint, ita ut Filius sit in Patre, et Pater in Filio, per unionem, et potentiam spiritus siquidem mens, et Verbum Dei Filius Dei est*. Idem docuerat eodem saeculo II. *Melito Sardensis*, *Polycarpus*, *Tatianus*, *Theophilus Antiochenus*, et ipsi SS. Martyres in passione sua idem professi sunt, quorum verba passim refert *Ruinartus in Actis synceris*.

4.<sup>o</sup> *Iraeneus* saeculo III., discipulus *Polycarpi*, qui fuit *Joannis Apostoli* auditor, magnifice de Verbi divinitate

lo-

---

(a) Vide *Nat. Alex. Dupin*, et alios.

42 *Theologicarum Institutionum Lib. IV. Cap. V.*  
loquitur *Lib. II. cont. haeres. cap. 43.* ait, illud esse  
aeternum: Non enim, inquit: ineffectus es, o homo, ne-  
que semper coexistebas Deo, sicut proprium ejus Verbum  
Et *Lib. IV. cap. 11.* Quoniam qui de rubo locutus est  
Moysi, et manifestavit, se esse Deum Patrum, hic est  
viventium Deus. Quis enim est vivorum Deus, nisi qui  
est super omnia Deus, et super quem alius non est Deus?...  
Qui igitur a prophetis adorabatur Deus vivus, hic est  
vivorum Deus, et Verbum ejus, qui et locutus est Moysi.  
Ipse igitur Christus cum Patre vivorum est Deus, qui  
et locutus est Moysi, qui et Patribus manifestatus est.  
Quid clarius?

5.º Clemens Alexandrinus in *sine Paedagogi* ait:  
Patrem, et Filium unum esse Deum, per quem est ae-  
ternitas. Et in *Admonit. ad Gent.* Verbum divinum,  
qui est manifestissimè verus Deus, qui est universorum  
Domino exaequatus, quoniam erat ejus Filius, et Ver-  
bum erat in Deo. Ex quibus vides quam iniqua sit cen-  
sura *Joan. Clerici Epist. I. Crit. contra Clementem*  
*Alex.*

6.º Eodem saeculo III. Origenes, licet a Petavio. *Lib.*  
*III. de Trin. cap. 4.*, et Huetio in *Origenianis Lib. II.*, No-  
risio *Dissert. de V. Syn. cap. 2.*, Nat. Alexandro *Hist.*  
*saec. III. Dissert. XVI. §. 2.*, et aliis, tamquam Aria-  
nismi parens traducatur, tamen in operibus, quae non  
sunt ab haereticis interpolata. Verbi divinitatem agnoscit:  
Ait enim *Lib. I. contra Cels. Sumptis muneribus* (Ma-  
gi) quae veluti symbola illi, qui ex Deo, et homine  
mortali esset, ut ita dicam, compositus, darent, postquam  
didicerunt ubinam natus fuisset; ut regi aurum, ut mo-  
rituro myrrham, ut Deo thus obtulerunt. Et *Lib. IV.*  
Quod si Deus immortalis Verbum, mortali corpore huma-  
naeque anima susceptis, videtur Celso mutari, et aliam  
formam assumere, sciat ille, Verbum, natura manens  
Verbum, nihil eorum pati, quae corpus, aut anima patitur.  
Multa alia loca collegerunt Origenis defensores Sixtus  
Senensis, Claudius Espencaeus, Genebrardus, Hallo-  
xius, qui quatuor libris *Origenianas Vindicias* comple-  
xus est, et alii; ex quibus constat, eam hac in parte non  
errasse; licet in aliis ejus doctrina a multis Episco-  
pis, et denum a Concilio V. Oecumenico damnata sit.

70. *Gregorius Thaumaturgus*, celeberrimus *Origenis* discipulus, in *Confessione Fidei* apud *Gregorium Nysenum* ( in ejus *Vita* ) *Unus* inquit *est Deus Pater Verbi viventis, sapientiae subsistentis et potentiae, et figurae aeternae, perfectus perfecti genitor. Pater Filii unigeniti Unus Dominus; solus ex solo, Deus de Deo . . . potentia totius creaturae effectrix. Filius verus veri Patris, aeternus aeterni etc.* Idem docuit alter *Origenis* discipulus *Dionysius Alexandrinus* eodem tertio saeculo clacerrissimus apud *Athanasium Lib. de sentent. Dionys. Alex.* ( ita ut mirum sit, *Danielem Huetium Lib. II. Origenian. cap. 2. Gregorium Thaumaturgum, et Dionysium Alexandrinum* Ariano veneno infectos asserere ) *Lucianus, et Methodius* Martyres, et qui multis aequivalent, *Patres Concilii Aptiocheni contra Paulum Samosatenam.* Eorum omnium testimonia vide apud *Carolus Witsasse, Bossuetum* contra *Jurium, P. Cordemoi* contra *Socinianos, Laurentium Berti, Nicolaum Nurrium* (a); et ex heterodoxis *Georgium Bultum* in defensione fidei *Nicaenae.*

*Prob. II. ex Patribus Latinis. 1.º Tertullianus* ( licet nonnulli hac in parte eum accusent, nec multum negotii nobis facesseret, si errasset, cum in aliis quoque ab Ecclesiae fide defeccrit, et in haeresim *Montani* lapsus sit ) de *Verbo Dei* haec habet *Apolog. cap. 21. Hunc ex Deo prolatum dicimus, et prolatione generatum, et idcirco Filium Dei, et Deum dictum ex unitate substantiae; nam et Deus Spiritus . . . Ita de Spiritu Spiritus, et de Deo Deus, lumen de lumine: quae verba, ut vides, symbolo Nicaeno inserta sunt. Et Lib. cont. Prax. cap. 17. omnia Patris nomina, et attributa Filio convenire docet. Nomina Patris Deus Omnipotens, Altissimus, Dominus virtutum, Rex Israelis, Qui est . . . Haec dicimus et in Filium competisse, et in his Filium venisse, et in his semper egisse, et sic ea in se hominibus manifestasse. Et ibid. cap. 22. Dicens ( Filius ) Unum sumus Ego, et Pater, ostendit duo-*

---

(a) Le Nourry in Apparatu ad Bibl. PP;

44 *Theologicarum Institutionum Lib. IV. Cap. III.*  
duos esse, quos aequat, et jungit. Et *Lib. de Resur-*  
*rect. carnis: Est enim Sermo Deus, qui in effigie Dei*  
*constitutus, non rapinam existimavit parari Deo. Alia*  
*eiusdem loca vide apud Nat. Alexandrum, et alios,*  
*supra laudatos.*

2.<sup>o</sup> *Lactantius licet Rhethoricae magis, quam Theo-*  
*logiae peritus in varios errores declinaverit, in hoc*  
*tamen dogmate non dissentit a ceteris. Nam Lib. IV.*  
*cap. 29. Gentilium objectionem occupans, ait: For-*  
*tasse quaerat aliquis, quomodo cum Deum nos unum*  
*colere dicamur, duos tamen esse asseveramus Deum Pa-*  
*trē, et Deum Filium. Cui objectioni respondet: Cum*  
*dicimus Deum Patrem, et Deum Filium, non diversum,*  
*dicimus, nec utrumque secernimus; quia nec Pater*  
*sine Filio esse potest, nec Filius a Patre secerni; si-*  
*quidem nec Pater sine Filio nuncupari, nec Filius po-*  
*test sine Patre generari. Cum igitur et Pater Filium*  
*faciat, et Filius Patrem, una utrique mens, unus*  
*spiritus, una substantia est.*

3.<sup>o</sup> Idem docuerunt Cyprianus *Lib. II. Testim. ad*  
*Quirin. cap. 6., Novatianus Lib. de Trin. cap. 31.,*  
*Arnobius Lib. I. advers. gent., et alii.*

4.<sup>o</sup> Cum primum aliquod verbum exiit alicui ex  
Patribus Antenicaenis sive Graecis, sive Latinis,  
quod Verbi divinitatem labefactare videretur, recla-  
marunt statim fideles, et alii Ecclesiae Doctores, ut  
accidit *Dionysio Alex.*, qui cum acrius Sabellianos ipse  
sectaretur, ideoque aliquibus visus esset non recte de  
Filii Dei divinitate sentire, statim accusatus est apud  
*Dionysium R. Pont.*, apud quem illustri apologia se  
purgavit. Atqui nemo reclamasset; nisi totius Ecclesiae  
fides eo tempore pro Verbi divinitate stetisset. Ergo.

5.<sup>o</sup> Patres, qui in Concilio Nicaeno definierunt  
contra Arium, Verbum esse Patri *ὁμοῦσιον*, utique  
ante Concilium Nicaenum floruerant, exeunte tertio sae-  
culo, et quarto ineunte; eamque doctrinam a majori-  
bus acceperant; alioquin quomodo tam cito, tamque  
universali consensu in re tanti momenti, nemine recla-  
mante, facta esset in toto orbe illa mutatio doctrinae?  
imo cum signari non possit tempus, quo doctrina de  
Verbi divinitate coeperit, argumentum est invictissimum,

causa

eam ab Apostolis manasse. Hic Socinianis haeret aqua; *Socinus* enim *epist. II. ad Radecium*, et in *Respons. ad Vieum* contendit, usque ad Nicaenum Concilium solum Patrem pro vero Deo habitum. Contra vero in *Epist. III.* ferme sub ipsa Apostolorum tempora, ait, contrarium dogma invaluisse. In eadem dissensione laborant ejus sectatores.

6.<sup>o</sup> Denique nullum ex Antenicaenis Patribus *Ario* fuisse, patet ex ipsa Arianorum confessione apud *Alexandrum Alexandrinum* in Epistola, quam refert *Theodoretus Lib. I. Hist. cap. 4.*, et apud *Athanasium Lib. de Synodis Arimin. et Seleuc.* Nec unquam cum Catholicis contendentes concedere voluerunt, ut ex Patribus Antenicaenis quaestio definiretur, ut auctor est *Socrates Lib. V. Hist. cap. 1.<sup>o</sup>* Quapropter iis semper Catholici doctrinae novitatem objecerunt, ut *Athanasius Lib. de decr. Syn. Nic.* *Hilarius Lib. I. ad Constant.*, *Basilii Lib. I. cont. Eunom.*, *Nyssenus Orat. III.* etc. Quod pudore suffundere deberet Socinianos, qui putant, se invenire in illis Patribus, quod Ariani ipsis viciniore invenire non potuerunt.

Unus est *Eusebius Caesariensis*, qui Nicaeno Concilio adfuit, sed antea jam florebat, de cujus fide merito dubitatur. Cum enim semper *Ario* faverit, et Arianorum factionem adjuverit, non leve praejudicium est, cum *Ariano* etiam dogmati fuisse: cum praesertim in ejus scriptis multa sint duriora, quae in aliis benigne excipi possent, at in amico Arianorum non possunt. Ideo eum accusarunt e veteribus *Athanasius*, *Hilarius*, *Epiphanius*, *Hieronymus*, *Photius*, *Zonaras*, *Nicephorus*, *Sophronius*, e recentioribus *Baronius*, *Petavius* etc. At eum excusarunt ex antiquis *Gelasius Caesariensis*, *Theophilus Alexandrinus*, Auctor Libri de duabus naturis *Gelasio* tributus, *Gelasius II.* Auctor Quaestionum *Vet. et Novi Test.* inter Opera *Augustini*; ex recentioribus vero *Sixtus Senensis*, *Valesius*, *Dupinus*, ejusque censor et castigator *Matthaeus Petitdidier*, et *Bullus*. Sed quamvis vir iste magnus, in errorem fuisset inductus, contra traditionem trium saeculorum praevalere non posset. Magna enim ingenia in magnos errores rapiuntur; inflante scientia, non aedificante charitate.

Sol-

*Solvuntur Objectiones.*

*Advertendum.* Non patitur instituti ratio ut omnes Socinianorum cavillationes contra singulos Patres Antienicaenos excutiamus, opus enim exeresceret in immensum. Sat erit primo generales afferre responsiones; deinde praecipua quaedam objecta speciatim confutare. Sciendum igitur 1.<sup>o</sup> Patres, qui ante natas haereses scripserunt, securius, atque idcirco aliquando minus commode locutos esse, cum se ita intelligi putarent, uti in Ecclesia Catholica credebatur, ut advertit Hieronymus *Apolog. II. cont. Rufin.* dicens: *Antequam in Alexandria, quasi daemonium meridianum, Arius nasceretur, innocenter quaedam et minus caute locuti sunt.* Idque saepe inculcat Augustinus *Lib. XVI. de Civ. cap. 2. et Lib. I. cont. Julian. n. 22. et in Psal. LIV.*

2.<sup>o</sup> Patres, qui contra haereses scripserunt, aliquando visos esse in contrarium errorem declinare, ut advertit Theodoretus *Dial. III.* Ita Augustinus Pelagianos impugnans, ab iis arguebatur, quasi Manichaeorum patronus, et Cyrillus Alex. Nestorium refellens, videbatur adversariis aut in haeresim Apollinaris impingere, aut Eutychianismi semina spargere. Cum ergo veteres illi Patres Noëtum, Sabellium, Paulum Samosatenum confutarent, qui tres personas negabant, in aestu disputationis nonnulla minus caute protulerunt, quae videbantur prima fronte tres distinctas naturas adstruere. Sed cum quaestio tunc non esset de unitate naturae divinae; quam constabat esse religionis Christianae basim, sensu Catholico intelligendi sunt de tribus personis, quarum distinctionem illi haeretici negabant.

3.<sup>o</sup> Cum Filius a Patre sit genitus, et Spiritus Sanctus ab utroque procedat, et ex hac processione oriatur distinctio personarum; Patres, ut distinctionem illam contra haraeticos probarent, processiones personarum maxime urgebant. Hinc vocabant solum Patrem Deum peculiari quadam ratione *αυτοθεον*, quia ipse est fons, et origo Divinitatis, ut Patres loquuntur: non quod divinam genuerit naturam, quod absurdum est, sed quod ipse sit aliarum principium personarum, sive principium

pium sine principio, quod et Paulus Apostolus facit ut observat *Chrysostomus Hom. V. de Incomprehensibili*, atque eadem ratione aliquando Patrem dixerunt *causam*, et *auctorem* Filii, nomen causae latius pro principio usurpantes. Imo ratione originis Patrem Filio majorem, sive priorem dixerunt.

4.<sup>o</sup> Cum missio in divinis, ut suo loco dicemus, sit processio unius personae ab alia, habens adjunctum effectum aliquem temporalem, ex. gr. creationem, legis promulgationem, incarnationem, gratiae effusionem: hinc illa persona mitti potest, quae ab alia procedit; Pater vero mitti nequit, quia non procedit ab alio: Atque hac ratione docent veteres, solum Filium fuisse visibilem, Patrem vero invisibilem, rursus Filium esse Patris ministrum etc.

5.<sup>o</sup> Cum plura sint Filii nomina, puta *Ratio*, *Sapientia*, *Filius*, *Verbum*, *Sermo* etc. putarunt veteres; varia illa nomina eidem personae tribui, sed varia ratione, ac sensu. Sicut enim in nobis etiam silentibus est ratio, et sapientia; sed verbum est cum aliquid mente concipimus, sermo vero cum cogitata ore proferimus; sic dicebant illi, ab aeterno quidem fuisse Filium, quatenus Ratio, et Sapientia dicitur; sed tunc extitisse sermonem, cum Pater, quae ab aeterno disposuit, extra se protulit in mundi creatione; tunc enim *dixit*, et *facta sunt* omnia. Atque hinc explicatur quo sensu nonnulli Patres dicant, *Sermonem*, et aliquando etiam *Filium* non fuisse ab aeterno.

6.<sup>o</sup> Vocabulo *ουσια*, *φυσis*, et *υποστασις* (a) non eodem semper sensu a Veteribus usurpata sunt; aliquando enim *ουσιαν*, et *φυσιν* usurpant pro persona: *υποστασιν* vero pro natura, aliquando vero sensu contrario. Hinc non temere putandum est, veteres tribuisse Filio aliam a Patre naturam; quia fortasse dicunt eum habere aliam *ουσιαν*, aut *φυσιν*.

7.<sup>o</sup> Denique cum Verbum naturam humanam in incar-

car-

---

(a) *Uxia, physis et hypostasis.*

carnatione assumerit, multa ei secundum humanam naturam conveniunt, quae divinitati repugnant; atque ideo veteres Filio Dei nonnulla tribuunt, quae videntur cum facere Patre minorem; sed secundum naturam ab eo assumptam intelligenda sunt. His igitur praeractis, facile objectiones omnes dissolventur; quarum aliquas exempli loco subijcimus.

*Objic. I.* Patre Antenicæni docent, solum Patrem esse summum illum Deum, quem Scripturae dicunt esse super omnia. Sic Origenes *Hom. II. in Joan. Dicendum est*, inquit; *quod autheos (a) quidem Deus ille, est cum articulo, propter quod et Servator ait . . . ut cognoscant te solum verum Deum; quidquid. vero est praeter hunc, qui autheos dicitur, participatione, et communione divinitatis illius deificatum est. Imo et Lib. VIII. contra Cels., quem constat non esse ab haereticis interpolatum, damnat eos, qui diversam ab aliis sententiam sequentes, temere affirmant, Salvatorem esse summum Deum: at nos nihil simile, qui credimus dicenti: Pater major me est. Similia docet Irenaeus Lib. II. cap. 49. Ergo.*

*¶. Dist. ant.* Docent, solum Patrem esse *autheos* sive *per se* Deum peculiari quadam ratione, quia a nullo procedit, et ipse est principium sine principio, fons, et origo totius divinitatis, et eatenus ratione originis major, sive, prior Filio, *conc.* Quia ipse solus et non Filius, nec Spiritus S. habent naturam divinam, *neg.* Certe Athanasius divinitatis Verbi acerrimus propugnator (*Orat. cont. Sabellii gregales*) concedit, dici posse, solum Patrem esse *illum verum Deum*. Caeterum nec opus Origenis in Joannem ab omni haereticorum fraude est certe immune, nec vera est ejus observatio de articulo, quem dicit apponi solum cum de Patre agitur, ut supra ex Chrysostomo ostendimus.

*Objic. II.* Solent Patres Antenicæni appellare Patrem *causam*, et auctorem Filii, quem dicunt *secundum Deum*,

(a) *Autheos,*



Deum, sive secundam potestatem, et aliud quid *ερε-  
πον* τ<sub>1</sub> post Patrem. Sic Justinus in *Dial. cum Tryph.*  
Ergo.

n. *Dist. ant.* Ratione originis, *conc.* Ratione alte-  
rius naturae, *neg.* Nomen enim causae aliquando strictius usurpatur ad significandum id, quod est tempore prius, et a quo effectus pendet; aliquando latius ad significandum principium, et originem. Hoc posteriori sensu veteres, praesertim Graeci, nomen causae, et auctoris Patri dederunt, etiam ii, qui post Concilium Nicaenum acriter Filii divinitatem propugnarunt, ut ipse Alexander, qui primus Arium damnavit, apud Theodoret. *Lib. I. Hist. cap. 4.* Basilium *Lib. I. cont. Eunom.*, Gregorius Naz. *Orat. XXXVI.*, Hilarius *Lib. XII. de Trin.* et alii; licet posteriores Latini Patres propter ambiguum nominis significationem ab eo abstinuerint. Quia igitur Filius est alia persona a Patre procedens, ideo nonnulli dixerunt cum *ερεπον* τ<sub>1</sub> aliud quid (quam loquendi rationem Graeci usurpant non solum eum de alia natura, sed etiam eum de alia persona loquuntur) ejusque Patrem dixerunt causam.

*Objic. III.* Constans est Patrum Antenicenorum doctrina, Patrem esse invisibilem, et incomprehensibilem; Filium vero visibilem, ideoque docent, eum, qui Moysi, et Patriarchis locutus est, non fuisse Patrem, sed Filium. Id Justinus ex professo probat in *Dial. cum Tryph.* inquit enim: *Profecto qui dixit Moysi, se Deum esse Abrahae ... non creator universorum Deus erit ... nemo non omnino mente captus auctorem universorum, et parentem, relictis omnibus supercoelestibus, in parva terrae particula visum dicere audeat ... Non existimetis, ipsum ingenitum Deum descendisse, aut aliquo in loco ascendisse; neque enim illē non enarrabilis Pater et Dominus universorum in aliquem locum venit, neque ambulat, neque dormit, nec movetur, nec loco comprehendi potest, Haec de Patre, De Filio vero; Ille, inquit, qui visus Patriarchis Deus dicitur; Angelus, et Dominus vocatur, ut, ex his etiam cognoscatis, eum parenti universorum ministrasse. Idem docet Theophilus Antiochenus *Lib. II. ad Autolye.* Deus, et Pater, inquit, universorum non potest ille quidem comprehen-*

66. *Theologicarum Institutionum Lib. IV. Cap. V.*

*di. . . sed ejus Verbum, cum sit ejus virtus, et sapientia, assumens Patris, et Domini universorum personam, veniebat in Paradisum sub persona Dei, et cum Adamo colloquebatur. Et ne singulorum verba proferamus, idipsum tradunt Irenaeus Lib. IV. cap. 37., Tertullianus cont. Prax. cap. 16. Novatianus de Trin. cap. 25., Patres Concilii Antiocheni contra Paulum Samosatenum in Epistola, quae habetur Tom. I. Concilior., Clementis Alex. Origenes, et alii. Ergo si apud eos ideo Pater est invisibilis, quia incomprehensibilis, et immensus est; Filius contra, qui visibilis est, minor Patre esse debet, et alterius naturae. Augustinus quidem in Libris de Trinitate saepe docet, eum qui Moysi, et Patriarchis apparuit, fuisse Angelum, ut etiam testatur S. Stephanus Act. VII.; et ex hoc Jansenius Yprensis Lib. Prooemiali cap. 12. ait, Augustinum primum Patrum divinitatem Filii Dei adversus Arianas machinas stabilisse. Sed non vidit iste 1.º nec Augustinum id sibi arrogasse, neque negasse, in Angelo illo fuisse praesentem Deum; quia multa de se dixit, quae non nisi Deo conveniunt, ut *Ego sum, qui sum etc.* 2.º quamvis dicamus, non Filium Dei, sed Angelum apparuisse, semper objectionem Socinianorum stare, quia cum omnes ferme Patres ante Nicaenum Concilium docuerint, eum fuisse ipsum Dei Verbum; nisi respondeas, ex hoc non sequi, eos fuisse Arianos, non solum non destrues, sed augebis difficultatem, concedendo scilicet, tot tantosque Patres Arianismo favisse. Quare.*

*II. Dist. ant.* Docuerunt, Filium, et non Patrem apparuisse Patriarchis; quia Filius a Patre procedit, Pater ab alio non procedit, *conc.* Quia Filius est alterius a Patre naturae, *neg.* Cum missio in divinis nihil aliud sit, nisi processio unius personae ab alia, habens adjunctum temporalem effectum; ut suo loco dicemus, illa persona mitti potest, quae procedit. Hinc cum *apparitiones* illae fuerint temporales effectus potentiae, sapientiae, et misericordiae Dei, conjunctus cum alicujus personae missione, quia ille, qui loquebatur, aliquando dicitur in Scripturis *Angelus*, hoc est *missus*; sequebatur, eam personam Patrem esse non posse, qui mitti nequit, quia non procedit ab alio, aliunde dici non po-

terat simplex Angelus ; quia multa de se dicebat, quae nonnisi vero Deo conveniant. Erat igitur juxta Patres illos alia a Patre persona. Et hoc argumento vincebant Sabellianos Trinitatem negantes, et conciliabant Scripturae loca, quae aliquando dicunt, Deum esse invisibilem, aliquando visibilem ; ita ut Pater sit Deus invisibilis, Filius visibilis, non quidem in natura divina, quam habet cum Patre invisibilem, et incomprehensibilem ( ut Libro superiore cap. 9. dictum est ), sed in forma visibili, quam assumpsit, cum a Patre missus est : quam visibilem formam, cum numquam assumat Pater, quia numquam mittitur, ideo in sua invisibilitate, incomprehensibilitate, et immensitate manens, non poterat apparere Patriarchis.

Hanc esse genuinam Patrum illorum Theologiam, licet non adeo clare ante natas haereses explicatam, patet 1.<sup>o</sup> quia ex eo probant, Patrem non apparuisse Patriarchis, quia est ingenitus : cum e contrario ille, qui apparuit, dicatur aliquando *Angelus*, idest missus, quod Patri convenire non potest. Ita Justinus, Patres Antiocheni, et alii : 2.<sup>o</sup> quia Filium, quem dicunt apparuisse, non minus quam Patrem invisibilem, et incomprehensibilem esse docent in natura divina ; visum tamen in forma assumpta. Ita Justinus, vel quivis auctor in *Cohort. ad Graecos*, de Filio loquens, ait : *Oportebat, ut princeps Hebraeae gentis Moyses existentem cognosceret Deum. Unde illi ... visus est Filius, quantum homini fas est Deum videre, qui dixit ad eum : ego sum, qui sum.* Et Irenaeus *Lib. IV. cap. 24.* ait : Verbum naturaliter quidem esse invisibile. Clemens Alex. *Lib. VII. Strom. n. 5.* Filium Dei docet esse ubique, et nusquam contineri. Idemque tradit Origenes *Lib. IV. cont. Celsi. et alibi*, Tertullianus *cont. Prax. cap. 14.* : 3.<sup>o</sup> quia Patres, qui post Concilium Nicaenum maxime contra Arianos decertarunt, nihilo secius docuerunt, non Patrem, sed Filium apparuisse Patriarchis, ut Hilarius *Lib. IV. de Trin.*, Theodoretus *Lib. V. advers. haeres. cap. 1.*, imo ipse Athanasius *Orat. IV. contra Arian.*, et alii : quod non docuissent, si ex eo sequeretur, Filium aliam habere a Patre naturam.

*Inst.* Docent laudati Patres, Filium, cum Patriarchis apparuit, fuisse Patris ministrum, ut conceptis verbis

52 *Theologicarum Institutionum Lib. IV. Cap. V.*

affirmant Justinus *loc. cit.*, Irenaeus *Lib. IV. cap. 17.*, Clemens Alex. *Lib. VII. Strom.* n. 25., Origenes *Lib. II. cont. Cels.*, Tertullianus *cont. Prae.* cap. 12. Ergo. *W. Dist. aut.* Docent, Filium fuisse ministrum Patris improprie, et latiori sensu, quatenus scilicet a Patre missus, ejus voluntatem exsecutus est, *conc.* Proprie, *neg.* Ipse enim Justinus *Epist. ad Diognetum*, quam non esse genuinum ejus opus, nullis adhuc solidis confirmatum est argumentis, ut Natalis Alex. advertit; ipse, inquit, *omnipotens Deus Verbum inter homines locavit, non quemadmodum aliquis conjicere possit, misso hominibus ministro aliquo, aut Angelo, sed ipso Opifice et Creatore omnium, tamquam Rex mittens Filium Regem, misit tamquam Deum*: et Irenaeus *Lib. III. cap. 8* ait, *Filium in subjectione non esse.* Atque id adeo verum est, ut Patres etiam, qui post Concilium Nicaenum Verbi divinitatem defendunt, non abnuant dicere, Filium Patri ministrasse, imo obediens fuisse. Sic Hilarius *Lib. V. de Trin.* ait, *Filium in condendo mundo obediens dictis Dei, Deum fuisse.* Numquid hoc proprio, et strictiori sensu accipiemus? Fatendum quidem, posteriores Patres cautius locutos hanc vocem rejecisse, ut Hieronymum *Apolog. I. cont. Rufin.*, Cyrillum Alex. *Lib. I. Comment. in Joan. cap. V.*: sed aequum non est, ut eandem loquendi proprietatem exigamus a Patribus, qui ante natam haeresim scripserunt ad contrariam haeresim, quae prius serpebat, confutandam.

*Objic. IV.* Veteres nonnulli Patres asserunt, Filium non semper extitisse: *λογον*, sive *Sermonem* tunc fuisse a Patre genitum, cum ad mundi creationem progressus est: ante eam creationem Verbum fuisse ipsam patris rationem, et sapientiam, ipsius Patris portionem. Sic Tertullianus *Lib. cont. Hermog.* cap. 3. contendenti *Hermogeni*, materiam esse aeternam, quia alioqui Deus non fuisset ab aeterno Dominus, deficiente subjecto, cui dominaretur, respondet, *Deum non fuisse ab aeterno Dominum, sicut non fuit ab aeterno Pater, nec ab aeterno Iudex.* En ejus verba: *Nam nec Pater potuit esse ante Filium, nec Iudex ante delictum. Fuit autem tempus cum et delictum, et Filius non fuit.* Et quod magis mirum est, docet quod si materia esset ab aeterno, esset

et. ut dicitur in Gen. 1. 1. *in principio erat Verbum*, sicut in

utique Filio Dei antiquior. Quale est, inquit, ut *Filia Dei*, *Sermone unigenito*, et *primogenito* aliquid fuerit praeter Patrem antiquius? Tunc ergo Filium, et Sermonem dicit a Deo genitum, cum mundum condidit; *Lib. cont. Prax. cap. 7.* Tunc igitur etiam ipse *Sermo* speciem, et ornatum suum sumit, sonum, et vocem; cum dicit Deus: *Fiat lux.* Haec est *nativitas* *Sermonis*, dum ex Deo procedit: conditus ab eo primum ad cogitatum in nomine *Sophiae*: Dominus condidit me initium viarum suarum; dehinc generatus ad effectum. Exinde cum parem sibi faciens, de quo procedendo *Filius* factus est: Similia docent *Athenagoras*, *Tatianus*, et alii veteres. Ergo.

¶ *Dist. ant.* Asserunt, in Mundi creatione Filium fuisse genitum generatione externa, quae ipsi tribuit nomen *Verbi*, *Sermonis*, et juxta *Tertullianum* etiam nomen *Filii*, conc. Generatione interna, et aeterna, quae ipsum constituit secundam a Patre personam, quae est *Ratio*, et *Sapientia* Patris ab aeterno genita, et subsistens, neg. Licet enim una, eademque sit *Filii* persona ab aeterno genita; tamen cum nomina habeat plura, putarunt veteres, aliqua ex illis nomina varios respicerent ejus effectus, qui cum non sint ab aeterno, asseruerunt, ea nomina non ei convenisse ab aeterno; sicut Deo ab aeterno existenti non convenit ab aeterno nomen creatoris, et domini. Cum ergo nomen *Sermonis* significet verbum non solum mente conceptum, sed etiam extra mentem ore prolatum; sicut nomen *Filii* significat non partum in utero conceptum, sed in lucem editum; docuerunt, *Rationem*, quae ab aeterno genita est a Patre, tunc extitisse *Verbum*, *Sermonem*, et (juxta *Tertullianum*) etiam *Filium*, cum extra Deum processit ad creationem universi. Hanc vero exteriorum prolationem vocant generationem; sicut *Ecclesia* *Incarnationem Verbi*, et *Apostolus* ejus resurrectionem *generationem* vocat, accomodantes ei *Psalmi* verba: *Filius meus es tu, Ego hodie genui te.* Duplicem ergo distinguunt generationem; alteram temporalem, ex qua secunda persona dicitur *Sermo*, *Filius* etc.; alteram aeternam, ex qua dicitur *Ratio*, et *Sapientia*: *Ante omnia*, inquit *Tertullianus Lib. cont. Prax. cap. 5, Deus erat.*

erat solus . . . solus autem , quia nihil aliud extrinsecus præter ipsum. Caeterum ne tunc quidem solus ; habebat enim secum quam habebat in se metipso, Rationem suam scilicet. Rationalis enim Deus . . . quæ ratio sensus ipsius est ; hæc Graeci λόγος dicunt, quo vocabulo Sermonem appellamus ; ideoque jam in usu est nostrorum per simplicitatem interpretationis sermonem dicere in primordio apud Deum fuit ( adverte Tertullianum fatcri, se recedere a communi usu loquendi Christianorum ) cum magis rationem competat antiquiorem haberi etc. . . . quia non sermonalis a principio Deus, sed rationalis ante principium. Quæ ratio non erat juxta Tertullianum attributum Patris absolutum ; sed altera persona subsistens ejusdem cum Patre naturæ ; alioquin stulte hinc Tertullianus probasset contra Praxeam negantem plures personas, Deum ab æterno non fuisse solum, nisi quia extra Deum nulla alia erat creatura ; nec dixisset alibi in textibus clarissimis supra recitatis, aliisque in locis, Filium esse alteram personam ejusdem substantiæ cum Patre.

Imo Patres, qui post Arium scripserunt, non dubitarunt duplicem hanc Verbi generationem agnoscere. Sic Zeno Veronensis *Serm. III. Principium*, inquit, *fratres, Dominus noster est Christus, quem ante omnia sæcula Pater adhuc in semetipso . . . amplectebatur. Sed excogitatarum ut ordinem instrueret rerum, inefabilis illa virtus . . . e regione cordis eructat verbum . . . De Deo nascitur Deus.* Similia docent alii. Quanto magis ergo id licuit Patribus, qui ante uatas hæreses securius locuti sunt ?

*Inst.* Tertullianus ait, hæc exteriorem Verbi prolationem esse *nativitatem perfectam Sermonis*, ante quam Verbum erat *portio* Patris, ut ipse ait *Lib. cont. Prax. cap. 9. et alibi.* Ergo non agnoscit aliam internam ; atque æternam Verbi generationem.

*Dist. ant.* Ait, hæc prolationem esse *nativitatem perfectam Sermonis*, quatenus Sermo est, *conc.* Quatenus est Ratio, Sapientia, Mens, Deus de Deo, *neg.* Rursus ante hanc prolationem Verbum ait fuisse *portionem* Patris improprie, *conc.* proprie, *neg.* Quoniam sermo verbum significat ore prolatum, ideoque inquit Tertullianus, per-

perfectam generationem Verbi Dei, quatenus dicitur *Sermo*, tunc fuisse, cum ad opus externum prodiiit. Cum autem ait, Verbum ante exteriorem manifestationem fuisse Patris *portionem*, imitatur Jurisconsultorum stilum (ut saepe alias facit) qui partum in materno utero adhuc latentem, dicunt *portionem maternorum viscerum*, et nondum *filium*. Caeterum isthaec improprie esse accipienda, patet ex eo quod agnoscit Tertullianus divinitatem indivisibilem esse. *Divinitas*, inquit *Lib. cont. Hermog. cap. 7. gradum non habet, utpote unica. minor se nunquam poterit esse. Et in cit. Lib. cont. Prax. cap. 9.* explicans quo sensu dixerit Filium Patris *portionem*: non *diversitate*, inquit, *aliud a Patre Filium, sed distributione: nec divisione aliud, sed distinctione*; quia non sit idem Pater, et Filius.

*Obijc. V. Pierius Alexandrinus apud Photium Cod. CXIX. dicit, duas esse  $\psi\sigma\iota\alpha\varsigma$ , et duas  $\phi\upsilon\sigma\iota\varsigma$  Patris, et Filii. Clemens etiam Alex. Lib. VII. Strom. n. 15. ait, naturam ( $\phi\upsilon\sigma\iota\varsigma$ ) Filii esse soli Omnipotenti propinquissimam, ac proinde a natura Patris distinctam, eaque minorem. Origenes vero Tom. II. in Joan. ait: Nos autem, qui tres hypostases esse Patris, Filii, et Spiritus Sancti persuasi sumus. Hypostasis autem eo tempore pro natura usurpabatur, ut fuisse probat Petavius Lib. IV. cap. 2. Ergo distinguunt naturam Filii a natura Patris.*

*W. Dist. ant. Et Pierius, Clemens, aliq.  $\psi\sigma\iota\alpha\varsigma$  et  $\phi\upsilon\sigma\iota\varsigma$ , Origenes vero  $\psi\sigma\iota\alpha\varsigma$  usurpant pro persona, conc. Pro natura, neg. Ita observat de Pierio ipse Photius loc. cit. De Patre et Filio pie credit, nisi quod substantias  $\psi\sigma\iota\alpha\varsigma$  duas, totidemque naturas  $\phi\upsilon\sigma\iota\varsigma$  esse dicit, substantiae, et naturae nomine, quantum ex iis, quae hunc locum antecedunt, et consequuntur, colligitur, pro hypostasi usus, non ita vero ut qui Ario adhaerent. Nomina ergo  $\psi\sigma\iota\alpha$ ,  $\phi\upsilon\sigma\iota\varsigma$ , et  $\psi\sigma\iota\alpha\varsigma$  olim promiscue usurpabantur pro natura et persona, ita ut ex contextu possit intelligi, quo sensu iis usi sint auctores. Usque ad aetatem Hieronymi, nondum certa erat, et fixa eorum vocum significatio, ut constat ex ejus Epistola ad Damasum LVII. Caeterum Origenes  $\psi\sigma\iota\alpha\varsigma$  loc. cit. usurpat pro persona; exponens enim*

sententiam *Patrispassianorum* ait, eos asserere Patrem, et Filium non solum *εἷα*, sed etiam *ὁμοτάτοι* esse unum. Unde concedimus *Petavio*, *ὁμοτάτω* aliquando usurpatam a veteribus pro natura; sed negamus, id semper factum, ut contra *Petavium* ostendit *Bullus Sect. II. cap. 9. n. II.*

*Objic. VI.* Patres secundae Synodi Antiochenae contra *Paulum Samosatenum* proscripserunt vocem *ὁμοούσιον* consubstantiale, ut testantur *Athanasius Lib. de Syn. Arim. et Seleuc.*, *Basilii Epist. LII.*, *Hilarius Lib. de Syn.* Ergo non agnoverunt Filium Patri consubstantialem.

Respondet *Hilarius*, *Paulum Samosatenum* dixisse Filium Patri *ὁμοούσιον* sensu haeretico, idest unius cum Patre personae; ideoque Patres Antiochenos eam vocem in sensu Samosateni, non in sensu catholico rejecisse. Sed salva tanto Doctori reverentia, respondemus cum *Athanasio*, et *Basilio*, qui Concilii Antiocheni sensum videntur magis perspectum habuisse; respondemus, inquam, *Paulum Samosatenum* non usum esse voce *consubstantialis*, quae etiam ipsius dogma pessumdat, ut observat *Basilii Ep. LII.*, nosque ostendemus inferius, sed calumniatum esse catholicos, eo quod distinguendo Personas Patris, et Filii facerent eas *consubstantiales* eo sensu, quo duo corpora dicuntur consubstantialia, quando eadem substantia in duas partes divisa est. Itaque licet veteres catholici Doctores, ut *Origenes*, *Dionysius Alexandrinus*, *Theognostus*, et alii dixerint Verbum Patri *consubstantiale*, ut observat *Pamphilus Martyr in Apolog. Orig.*, *Athanasius Lib. de Decret. Synodi Nic.*, et alii; tamen ne quis calumniandi locus daretur Samosateni sectatoribus, satius duxerunt Antiocheni Patres ab ea voce tunc non necessaria esse abstinendum. Sed Ariana haeresi grassante, cum nulla alia ad explicandum dogma catholicum vox suppeteret, quam Arianum in sensum haeticum non detorquerent; nec amplius periculum esset, ne *consubstantiale* acciperetur eo sensu, quo *Paulus* calumniabatur Catholicos, merito Patres Nicaeni vocem illam antiquo usui restituerunt, et consecraverunt. Caeterum de Verbi divinitate eandem fuisse fidem Patrum Antiochenorum, et Ni-



Nicaenorum, patet ex eorum Epistolis tum ad *Paulum Samosat. Tom. I. Concilior. Labbei*, tum ad *Dionysium R. Pontif. et ad universi orbis fideles apud Athanasium Lib. de Synod.*

## §. III.

*Verbi divinitas ex definitione Nicaenae Synodi, et sequentibus Patribus invicte demonstratur.*

*Advertendum I.* Cum *Arius* ab *Alexandro* Episcopo suo Alexandrino in Synodo, centum Episcoporum damnatus esset, ex *Theodoreto Lib. I. Hist. cap. 1. ad Eusebium* confugit Nicomediensem Episcopum, qui, ut auctor est *Sozomenus Lib. I. cap. 7.*, coacta aliquot Episcoporum Synodo, eum communioni contra canones restituit. Quapropter *Alexander* supplices literas Constantino M. dedit, ut auctoritate sua grassanti malo mederetur. Ille primum Alexandriam misit *Osius* Episcopum Cordubensem, si quo pacto res ex aequo componi posset. Sed cum haeresis magis in dies serperet, indixit Oecumenicum Concilium Nicaeae in Bythinia, accessitis ex universo orbe Episcopis (quibus etiam vehicula ex publico suppeditavit) idque assentiente *Sylvestro R. Pontifice*, qui eo misit legatos.

II. Habitum est igitur anno CCCXXV. magnum Nicaenum Concilium, cui adfuerunt Episcopi CCCXVIII. doctrina, aetate, sanctitate, et nonnulli etiam martyrio illustres, qui audientes impia *Arii* dogmata in Synodo recitata, obstructis auribus, ut refert *Athanasius Orat. I. cont. Arian.*, ea detestati sunt. Deinde formula fidei composita est, qua declaratum est, *Filium Dei unigenitum esse ex Patre natum ante omnia saecula, Deum de Deo, lumen de lumine, Deum verum de Deo vero: genitum, non factum, consubstantialem Patri, per quem omnia facta sunt*; eaque formula inserta est symbolo, quod refert *Athanasius Epist. ad Solitar.*, *Hilarius Lib. de Synodis*, *Socrates Lib. I. Hist. cap. 5.*

III. Huius formulae omnes Episcopi subscribere, utpote quae fidem exponeret omnium orbis Ecclesiarum. *Socrates* quidem asserit *loc. cit.* quinque *Arianos* Episcopos subscribere noluisse, *Eusebium* Nicomediae, *Theogni-*

58 *Theologicarum Institutionum Lib. IV. Cap. V.*  
*dem Nicaeae, Marin Chalcedonis, Theonam Marmaricae,*  
*Secundum Ptolemaidis.* Sed hos omnes, quamvis prin-  
 cipio detrectaverint, tandem subscripsisse constat, tum  
 ex eorum nominibus, quae leguntur in Actis, tum ex  
*Athanasio*, qui Concilio interfuit *Lib. de decret. Sy-*  
*nodi Nic.* Imo Hieronymus *Dialogo cont. Luciferian.* ait,  
 ipsum Arium subscripsisse formulae: quod tamen negat  
*Socrates Lib. I. Hist. cap. 8. et 20.*, et *Athanasius*,  
 cujus longe major hac in re existimanda est auctoritas.

IV. Regnante Constantino M. Ariani Episcopi ausi  
 non sunt aperte Nicaenam definitionem impugnare; sed  
 omnes vires intenderunt contra *Athanasium*, strenuis-  
 simum Arianismum adversarium. At sub Constantio, qui to-  
 tus erat Arianorum, novas procuderunt fidei formu-  
 las, ut Nicaenam abolerent, quarum praecipuae fuerunt  
*Antiochena, Syrmensis, Ariminensis, Ancyrana, Se-*  
*leuciensis.* Sed catholica fides, licet aliquandiu vehem-  
 enter oppugnata, tandem praevalet.

V. Sociniani non negant, Nicaenum concilium, et  
 omnes sequentes Patres docuisse Filium esse Deum, et  
 Patri *consubstantialem*; sed asserunt, Nicaenos Patres  
 a fide defecisse. Nonnulli etiam ex eorum fautoribus  
 effutiunt, Nicaenum Concilium per verbum *consubstan-*  
*tiale* non intellexisse quod a catholicis creditur, scili-  
 cet *numericam* naturae divinae unitatem, sed tantum  
*specificam*; quemadmodum tres plantae ex eodem se-  
 mine procreatae *consubstantiales* dici possunt. Ita *Joan-*  
*Clericus, Curcellaeus Dissert. I. de Vocibus Trini-*  
*tatis etc.*; quodque mirum est, laudant pro hac sen-  
 tentia *Petavium Lib. IV. de Trin. cap. 5. et 9.*

## PROPOSITIO I.

*Nicaeni concilii definitio est invictissima divinitatis*  
*Verbi demonstratio.*

*Prob. I.* Ex ratione generali, qua *Lib. II. demon-*  
*stravimus*, Ecclesiam sive per orbem dispersam, sive  
 in Concilio generali congregatam falli non posse in de-  
 finiendis fidei controversiis.

*Prob. II.* Patres Concilii Nicaeni erant Episcopi, ex  
 universo Christiano orbe doctissimi, atque sanctissimi;

id enim testantur non solum Athanasius *Epist. ad Epictetum*, Phoebadius *Lib. cont. Arian.*, Epiphanius, Socrates, Theodoretus, et alii: sed et ipse Eusebius *Caesariensis*, minime Arianis suspectus auctor *Lib. III. de Vita Constant. cap. 7.* dicens: *Ex omnibus Ecclesiis, quae universam Europam, Africam, atque Asiam impleverunt, ii, qui inter Dei ministros principem locum obtinebant, simul convenere: et cap. 9. Porro ex his Dei ministris alii sermone Sapientiae, alii gravitate vitae, et laborum tolerantia eminebant, alii modestia, et comitate morum erant ornati; ac nonnulli quidem eorum ob propectam aetatem maximo in honore erant; nonnulli et corporis et animi juvenili vigore enitebant.* Ergo cum doctrina eminèrent, ignorare non potuerunt primum hoc religionis dogma, quod vel ipsis pueris, et catechumenis ante omnia tradi debebat; nec illud, cum essent sancti, immutare voluerunt; imo nec potuissent immutare, si voluissent, quomodo enim, nisi omnes mente capti essent, hoc fuissent constati, ut in momento totius orbis fidem in praecipuo hoc articulo mutarent? Hinc manifestum est, tempore Concilii Nicaeni universam Ecclesiam credidisse ut dogma fidei, Verbum esse Deum, et Patri consubstantiale, idque magis ex eo confirmatur, quod Christiani omnes Concilii definitionem unanimi consensu susceperunt, quod non fecissent, si contrarium antea credidissent.

Atqui non potest signari tempus, quo haec doctrina ante Concilium Nicaenum inceperit; et invaluerit. Nam ipsi Ariani primis saeculis viciniore satebantur, ut supra observavimus; suam doctrinam esse novam, adeo ut illi dicant, inquit Athanasius *Lib. de Syn. Arimin. et Seleuc.*, nobis primo revelatum est, et a nobis Christianorum fides incipit: quam novitatem ipsis etiam objiciunt Hilarius *Lib. I. ad Constantium Imp. n. 5.*, Basilii *Lib. I. cont. Eunom.*, Gregorius Nys. *Orat. III. cont. Eunom.* imo cum Theodosius Imp. ipsis proposuisset, utrum vellent in publica disputatione cum Catholicis definiri controversiam ex Patrum auctoritate, hanc conditionem noluerunt accipere, ut testantur Socrates *Lib. V. cap. 10.*, et Sozomenus *Lib. VII. cap. 12.* Ergo licet Scriptura nihil haberet de Verbi divinitate, tamen manifestum esset, illud dogma ab Apostolis fuisse traditum. Sol-

*Solvuntur Objectiones.*

*Objic. I. Liberius* Papa, cum aliquandiu fortiter Nicaenam fidem, et Athanasium defendisset, pulsus tamen Beraeam in exillum a Constantio, tandem anno CCCLVII. taedio, atque aerumnis fractus, subscripsit formulae Syrmienti, quam Hilarius (*in fragment.*) vocat *perfidiam Arianorum*, et damnationi Athanasii: et hoc pacto revocatus est ab exilio. Ergo non putavit, Nicaenam definitionem esse adeo firmam, ut retractari non posset. Confirmatur ex Concilio Ariminensi, in quo Episcopi plusquam trecenti formulae ab Arianis compositae subscripserunt: ita ut dixerit Hieronymus *Dial. cont. Lucifer. Tunc usiae nomen abolitum est, tunc Nicaena fides conclamata est. Ingenuit totus orbis, et se Arianum esse miratus est.*

*n. Dist. ant.* Subscripsit libere, *neg.* Vi et dolo, *subdist.* Subscripsit formulae Syrmienti, quae sensum habebat catholicum, nec Nicaeno contrarium, licet aliis verbis expressum, *conc.* Quae sensum habebat manifeste haereticum, *Transeat.* Liberius itaque, quandiu liber fuit, Nicaenam fidem, et Athanasium strenue defendit; ideoque in exilium pulsus est, anno CCCLV. quo in exilio adhuc fortis biennio duravit. Sed tandem taedio fractus, vi, et fraude Arianorum circumventus, anno CCCLVII. subscripsit. Qua in re male quidem se gessit; sed quamvis subscripsisset formulae evidenter haereticae, tamen ejus subscriptio, nec *definitio ex cathedra* fuit, nec ullius omnino censenda est roboris. Subscriptiones enim, quae per vim extorquentur, non subscribentium sensum exhibent, sed eorum, qui coegerunt, ut monet *Athanasius*. Etenim ab exilio redux Liberius Nicaenam fidem defendit, et Ariminensis Concilii Acta rescidit.

Sed observandum est, tres fidei formulas tribus annis fuisse Syrmii ab Arianis compositas. Prima anno CCCLJ. contra Photinum Sabelliano dogmate labefactatum, quae formula ad decipiendum subdole composita, sensum habebat Catholicum, et Nicaeno consonum, licet sub aliis vocibus; ut ita paulatim Nicaena formula, et nomen

consubstantiale aboleretur. Fatebatur enim, Filium esse Deum de Deo; et in viginti septem anathematismis veram ei tribuebat aeternitatem, et divinitatem; et si quid habebat duriusculum in anathematismo XVII., ex aliis verbis clarioribus catholice explicari poterat, sicut eam explicat Hilarius *Lib. de Synodis*. Altera edita est anno CCCLVII. ab Ursacio, Valente, Germinio, et Potamio Arianis, quae evidenter impia, et haeretica est, ut videre est apud Athanasium *Lib. de Synod. Arim. et Seleuc.*, et Hilarium *Lib. de Synodis*. Tertia denique anno CCCLIX., a Basilio Ancyrano composita, Verbum dicebat Patri per omnia simile, rejectis tamen vocibus substantiae, et consubstantialis. Cuinam ex his tribus subscripserit Liberius, aperte non constat. Valesius arbitratur, subscripsisse tertiae, Blondellus secundae, Baronius et alii primae.

Haec postrema sententia verisimilior est. Quod enim Liberius non subscripserit tertiae formulae, ut putat Valesius, videtur manifestum. Editam enim illa est anno CCCLIX.; at anno CCCLVII. Liberius formulae subscripserat. Quod vero nec secundae subscripserit, multis argumentis adstruitur, inter quae illud est praecipuum, quod Hilarius ait, formulam, cui subscripsit Liberius, editam esse a Basilio Ancyrano, Theodoro Heraclaeensi, Sylvano Tarsensi, aliisque, quos viginti duos enumerat. Atqui Basilius Ancyranus tantum abest, ut secundam illam formulam ediderit, quin illam acriter impugnavit, et in Synodo Ancyrana damnavit; Theodorus Heraclaeensis jam ab anno CCCLV. mortuus erat, biennio ante editam secundam formulam: Sylvanus vero Tarsensis vir erat catholicus, et multa passus ab Arianis: imo pro Verbi divinitate contra Anomoeos in Concilio Seleuciensi coram ipso Imperatore Constantio pugnavit, teste Theodoretto *Lib. II. Hist. cap. 27*. E contrario Germinius, et Potamius, qui certe secundam formulam ediderunt, non recensentur ab Hilario inter auctores formulae a Liberio susceptae. Ergo etc.

Merito tamen Hilarius ait, Liberium subscripsisse perfidiae Arianorum, et Hieronymus *Catalog. Scrip. Eccles. cap. 97. et in Chron. subscripsisse haeresi, haereticae praevitati*; quia licet conceptis verbis Nicaenam Fidem

62 *Theologicarum Institutionum Lib. IV. Cap. V.*

non damnaverit, nec haeresi manifestae subscripserit, nihilominus dampnans *Athanasium*, et novam formulam suscipiens, quae ad obliterandam Nicaenam composita erat, catholicam causam deserebat, et cum Arianis communione junctus erat.

Idem de Concilio Ariminensi respondemus. Principio quidem Nicaenam fidem fortiter asseruere Patres. Sed cum Imperator ad Ecclesias suas eos redire vetuerit, donec formulae subscriberent, fracti taedio, fame, omnique aerumnarum genere, videntes etiam, formulam illam in sensu obvio, et literali non esse Nicaenae contrariam, ipsosque Arianos *Ursacium*, et *Valentem* anathema dicere *Ario*, et ejus sectatoribus; studio pacis se posse subscribere in sensu catholico putarunt. Vide quae de Concilio Ariminensi diximus *Lib. II. Cap. 9.* Ex ipsis autem *Hieronymi* verbis in objectione recitatis, et ex aliis, quae praecedunt, quaeque consequuntur, manifestum est, Episcopos illos a catholica sententia non fuisse dimotos. Cum enim Arianis Episcopi post illam Catholicorum subscriptionem triumpharent, quasi Nicaena fides conclamata esset, atque abolita; tunc ingemuere catholici, et se Arianos esse mirati sunt; quae admiratio non utique locum habuisset, si illi in sensu Ariano subscripsissent. Quapropter ipse *Hieronymus* ab omni eos haeresis crimine, ac suspitione defendit, ac liberat.

PROPOSITIO I.

*Vox ὁμοῦσιον, seu Consubstantiale, a Concilio Nicaeno adhibita est ad significandam numericam, non specificam substantiae unitatem in Patre, et Filio.*

*Prob. I.* Si Patres Nicaeni per *το ὁμοῦσιον* non intellexissent individuam, sive *numericam* substantiae unitatem, sed *specificam*, sicut dicimus tres homines eandem habere naturam humanam, profecto execrationi simul, et rigui sese totius Christiani orbis objecissent; adstruxissent enim tres Deos: quod non solum rationi repugnat naturali, verum etiam primo Symboli articulo, quo credimus in unum Deum. At hoc de viris illis sanctissimis, et doctissimis opinari absurdum est. Ergo.  
*Prob.*

**Prob. II.** Patres, qui vel Concilio Nicaeno adfuerunt, vel ita Nicaeno fuerunt aetate proximi, ut cum Nicaenis Episcopis diu versati fuerint, constanter asserunt, ea ratione, eoque sensu adhibitum esse nomen *ομοουσιον* ut significaretur, Filium natum esse de substantia Patris, ita tamen ut substantia Patris non fuerit ullo pacto divisa. Atqui hoc intelligi nequit, nisi *ομοουσιον* significet *numericam* substantiae unitatem, ut patet. Ergo.

**Prob. maj. 1.º** Athanasius *Lib. de Decret. Syn. Nic.* Ut enim, inquit, cum audimus, eum Filium, et Geramen esse, non humano more, sed prout Deo convenit, intelligimus; ita quoque cum audimus, eum consubstantialem esse, nequaquam delabentes ad humanos sensus, partitiones, et divisiones Deitatis cogitamus; sed tamquam de incorporalibus agitantes *UNITATEM* naturae, et *IDENTITATEM* lucis non dividamus. **2.º** Eusebius Caesariensis in *Epistola*, quam post Nicaenum Concilium ad Caesarienses scripsit, haec habet: Illud Patri consubstantiale esse quomodo esset intelligendum, ab eis diligenter quaerere coepimus... Fatebantur illi, ex substantia esse idem significare; quod ex Patre esse, non tamen partem patris esse... Quapropter huic sententiae etiam a nobis assensum est, nec vocem *Consubstantiale* rejecimus.... Filium Patri consubstantialem esse ratione exquisitum est, et probatum, non more corporum debere intelligi, neque quidquam simile cum mortalibus animantibus. Nam neque divisione substantiae, neque defectu, sed nec affectione ulla, mutatione Paternae essentiae, et facultatis posse constare: ap. Theodoret. *Lib. I. Hist. cap. 12.* Ecce aperte dicit, non eo sensu Filium Dei esse Patri consubstantialem, quo mortales animantes, ex. gr. duo homines consubstantiales dici possunt

**3.º** Hilarius *Lib. de Synodis*: Non hic, inquit, sanctissima Religiosorum virorum Synodus nescio quam priorem, quae divisa sit, substantiam introducit, sed Filium natum de substantia Patris.

**4.º** Synodus Parisiensis an. CCCLXII. apud Hilarium in *Fragment, Homousion*, inquit, ad explicandam veram, et legitimam ex Deo Patre unigeniti Dei nativitatem sumus amplexi, detestantes secundum Sabellii blasphemias

64 *Theologicarum Institutionum Lib. IV. Cap. V.*  
 mias ipsam unionem, neque aliquam partem Patris esse  
 Filium intelligentes, sed ex toto, atque perfecto, in-  
 nascibili Deo totum, atque perfectum Unigenitum Deum  
 natum, unius a nobis idcirco vel Usiae, vel Substan-  
 tiae cum Deo Patre confessum . . . . . ita  
 ut non unio Divinitatis, sed UNITAS intelligatur.

5.<sup>o</sup> Ambrosius *Lib. III. de fide cap. 7.* Recte ergo  
 ομοσιον Patri Filium dicimus, quia verbo eo et per-  
 sonarum distinctio, et naturae UNITAS significatur. I-  
 dem probari potest ex Augustino *Lib. contra sermonem*  
*Arianor.*, Basilio *Epist. 300.* et aliis, apud quos ita ad-  
 hibetur, atque defenditur homoustion, ut ipsa divinitas  
 constantissime dicatur esse una, ac simplicissima et in-  
 dividua Monas, in qua unum est ac simplicissimum re-  
 rum omnium principium, una μοναρχια, una ενεργεια  
 sive operatio. Ergo.

*Refutantur argumenta Clerici, et Curcellaei.*

*Objic.* Eo sensu vox ομοσιον adhibita est a Patri-  
 bus Nicaenis, quo sensu eam passim Graeci Scriptores  
 adhibuerunt; non enim putandum est, eos in re gra-  
 vissima vetus vocabulum novo, et eousque inaudite  
 sensu usurpare voluisse. Atqui Graeci passim ομοσιον  
 usurparunt ad significandam specificam unitatem. Ait  
 enim Aristoteles (apud Anonym. *De Celebribus Opinion.*  
*de Anima* editum cum Origenis *Philocalia*) ομοσιαι,  
 δε ταυτα αστρα, omnia astra sunt consubstantialia. Et  
 Agapius ap. Photium: ηλ.ον, και σεληνην ομοσιαι κη-  
 ρυττει Θεω Solem, et Lunam consubstantiales Deo  
 praedicat. Porphyrius *Lib. de Abst.* ab esu ani-  
 mal. n. 19. εγχε ομοσιαι αι των ζων ψυχαι ημε-  
 τεραις, siquidem animalium animae consubstantiales  
 sunt nostris. Et Theodoretus *Dialog.* Inconfusus citat  
 locum Apollinaris, ubi ait: οι ανθρωποι τ.ις αλ.γ.ις  
 ζωις ομοετιοι κατα το θωια το αλογον, ετερο-  
 σιοιδε καχο λογικοι, homines brutis irrationalibus  
 consubstantiales sunt quoad corpus, diversae vero sub-  
 stantiae quatenus rationales sunt. Quae omnia specifi-  
 cam substantiae unitatem significant, ut patet. Ergo.

¶ *Dist. maj.* Eodem sensu, salva tamen differentia,  
 quam exigit infinita rei diversitas, de qua loque-  
 ban-



bantur, *conc.* Eodem sensu omnino, *neg.* In rebus creatis, de quibus Auctores in objectione recitati loquebantur, non potest esse unitas essentiae, nisi *specificae*; plures enim res creatae sicut plures habent hypostases, sic et plures naturas habeant necesse est; ut in Deo non potest esse unitas essentiae, nisi *numerica*; alioquin adstruerentur tres dii, quod absurdum est, et a Patrum Nicaenorum mente longe alienum.

*Inst. 1.<sup>a</sup>* Atqui eodem omnino sensu Patres Nicaeni nomen *μονοθειον* usurparunt; quo veteres Graeci. Ait enim Athanasius *Lib. de decr. Syn. Nic.* quod sicut Isaac filius est Abraham, eique consubstantialis; sic Filius Dei est Patri consubstantialis. Imo communis est haec Veterum contra Arianos comparatio, quod, sicut Petrus; Paulus, Joannes tres sunt hypostases, unam autem habent naturam humanam; sic Pater, Filius, et Spiritus S. (a). Ergo.

*¶ Dist. unt.* Et haec comparatio quoad aliqua urgenda est, *conc.* Quoad omnia, *neg.* Notum enim est, comparationes non in omnibus valere. In hoc igitur uno urgetur a Patribus ea comparatio, quod sicut tres homines, licet distinctas habeant hypostases, non tamen naturas diversas, quia unus non est magis, aut minus homo, quam alius: ita Pater, Filius, et Spiritus Sanctus ita tres sunt hypostases, ut unus non magis Deus sit, quam alius. Quod quidem in hominibus intelligi debet de unitate naturae *specificae*; at in Deo nonnisi de individua, sive *numerica* unitate potest intelligi; alioquin tres essent Dii, ut supra dictum est. Patres autem, qui ea utuntur comparatione, constanter docent, non posse dici plures Deos, licet possint dici plures homines. In illa summa Trinitate, inquit Augustinus *Lib. XV. de Trin. cap. 23.*, quae incomparabiliter rebus omnibus antecellit, tanta est inseparabilitas, ut cum Trinitas hominum non possit dici unus homo; in illa unus Deus et dicatur, et sit.

*Inst. 2.* In Concilio Chalcedonensi definitum est, Jesum Christum esse *μονοθειον πατρι κατα την θεοτητα, και ομονοειον ημιν κατα την ανθρωποτητα, consubstantia-*  
*Tom. II. E. lem*

(e) Basilias *Lib. II. contra Eunom.* Cyrillus in *Thesauris*, Augustinus *Episs. 170.*, al. 65. n. 6.

*lēm Patri secundum Divinitatem, et consubstantialē nobis secundum humanitatem. Atqui specificē tantum est nobis consubstantialis secundum humanam naturam. Ergo.*

*g. Dist. ant.* Est consubstantialis Patri, et nobis, diversa tamen ratione pro rerum diversitate, *conc.* Eadem ratione, *neg.* Responsio patet ex iis, quae supra dicta sunt.

*Inst. 3.°* Si Patres Nicaeni per *ὁμοουσιον* unitatem numericam explicare voluissent, dixissent potius Filium Patri *μονοουσιον*, aut *ταυτοουσιον* quam *ομοουσιον*. Ergo.

*h. Neg. ant.* Vocabula enim illa *μονοουσιον*, et *ταυτοουσιον* in sensu Sabellii intelligi potuissent. At *ομοουσιον* necque Sabellium, et Arium confodit, ut observat Basiliius. Qui enim dicit *Consubstantialē*, jam personas duas ostendit (nemo enim est sibi ipsi consubstantialis), et simul unam profitetur naturam, quae in divinis non potest esse una, nisi numero. Sabelliani dicunt *μονοουσιον* sed non *ομοουσιον*; inquit Athanasius in exposit. Fidei; et Epiphanius Haeres. LXXVI. Non dicimus *ταυτοουσιον*, ne ista vox à nonnullis usurpata, ad Sabellianum dogma trahatur.

#### Scholion.

I. Ut paucis complectamur ea, quae de Verbi divinitate hucusque ex traditione deduximus, » Divinitas Filii Dei, inquit Auctor *Elementorum Theologiae*, quae nuper ab anonymo *Congregationis Missionis Sacerdote* edita sunt Romae anno MDCCCH. *Tom. II. pag. 134.*, erat ante Concilium Nicaenum ejusmodi dogma Christianae religionis, ut reponeretur inter pauca, et praecipua Doctrinae Christianae capita, quibus Catechomeni ad baptismum suscipiendum, et ad nomen suum Christianismo dandum erudiebantur, et informabantur (ex Luciano); ut traderetur in libris ad usum fidelium accommodatis (ex Paedagogo Clementis, et Pastore Hermiae); ut exponeretur in libris aliis, aut scriptis ad religionem pertinentibus (passim); in confessionibus fidei (ex Gregorio Thaumaturgo); in religionis Christianae apologiis (ex Lactant. Arnob. Justin. etc.); ut in precibus publicis, et privatis (Ex Constit. Apost. Polycarp. Ignat.)

*Ignat.*); ut in canticis sollemnibus, et aliis Dei glorificationibus celebraretur ( *ex Cajo, Clem. Alex. Plinio, et Polycarp.* ); ut illud martyres coram tyrannis confiterentur, proque illo tuendo morentur ( *ex Ss. Felicit. Symphoros. Epipod. Polycarp. Ignat.* ); ut qui contra illud dicebant, aut contra dicere videbantur, male in Ecclesia audirent ( *ex Euseb. Pamph. et Dion. Alex.* ); ut qui illud aperte inficiabantur, Ecclesiasticos Auctores ad scribendum adversus se subito excitarent ( *ex Cajo Hippol. Port. etc.* ); ut deferrentur ad Episcopos, ad summum praesertim Pontificem; concilia contra ipsos cogerentur, et aut palinodiam cantare deberent, aut sedibus suis, gradibusve, ac Ecclesiae communione privarentur; et jam antequam contra eos sententiâ ferretur, haberentur pro haereticis ( *ex Syn. Antioch. Dionys. Alex. Origene, Victore Rom.* ); ut ne schismatici quidem, et alias haeretici illud violare auderent ( *ex Novatian.* ); ut tamquam Evangelica, et Apostolica traditio haberetur ( *Ex Lucian. Antioch.* ); ut omnes Ecclesiae monerentur per literas de judiciis contra eos, qui illud temerabant, pronuntiatis ( *ex Syn. Antioch.* ); ut ubicumque, seu in omnibus Ecclesiae partibus, et a Scriptoribus Catholicis cujusvis regionis doceretur ( *passim* ); ut illius persuasio, et professio ad Apostolos usque retrahatur ( *ex Ignat. Polyc. Clem. Rom. Herma, Barnaba* ). In illud igitur tota retro, et ultima remotissimaque antiquitas consensit. «

II. Scripserunt de hoc argumento fusius inter veteres quidem *Athanasius, Basilus, Nazianzenus, Hilarius, Augustinus, Fulgentius, Vigilius Tapsensis*: inter recentiores ex heterodoxis *Georgius Bullus in Defensione fidei Nicaenae, Josue Placcus De praeexistentia Verbi, Maresius in Hydra Socinianismi expugnata, Hornebeckius in Socinianismo confutato*; e nostris *Nicolaus le Nourry in Apparatu ad Bib. PP., Bossuet contra Jurium, Thomassinus, Witassius, Prudentius Maranus, Natalis Alexander, Petavius*, qui tamen in iis, quae de Patribus Antenicenis habet, caute legendus est, et alii.

III. Nos quoniam pro instituti brevitate satis, ut opinor, de Verbi divinitate diximus, restat, ut et de

divinitate Spiritus S., sicut antea sumus polliciti, more, atque instituto nostro breviter, ac dilucide disseramus.

C A P. VI.

*De Divinitate Spiritus Sancti.*

*Ad.* Spiritum Sanctum esse Deum, ideoque Patri, Filioque consubstantialem, definitum est contra Macedonianos in Concilio Constantinopolitano I. anno CCLXXXI., in quo sic est declaratum: *Credimus in Spiritum Sanctum Dominum, et vivificantem, qui ex Patre procedit, qui cum Patre, et Filio simul adoratur, et conglorificatur.* Et in Epistola Synodica ad Damasum R. Pontificem docet, Spiritum Sanctum esse Patri, et Filio consubstantialem, et coaeternum. Eam autem definitionem Damasus in Concilio Romano confirmavit. Non negant igitur adversarii, exeunte quarto saeculo hanc fuisse totius Ecclesiae fidem; quae hucusque servatur; sed contendunt, eam Scriptura, et Traditione Patrum quatuor priorum saeculorum non fulciri. Satis igitur erit Scripturas, et eorum saeculorum Patres producere, idque ex abundanti; sufficeret enim sola Ecclesiae definitio, ut in Tractatu *de Locis Lib. II* dictum est.

PROPOSITIO

*Spiritus Sanctus est verus Deus; ideoque Patri, et Filio consubstantialis. Est dogma Fidei.*

Praeter argumenta, quae supra cap. 3. explicata sunt ad ostendendam trium simul personarum divinitatem ....

*Prob. I. ex Scriptura.* Ille enim verus Deus est, cui Scriptura constanter Dei nomen, divinasque proprietates, attributa, et operationes attribuit; alioquin ipsa nos Scriptura in errorem induceret. Atqui Scriptura haec constanter Spiritui Sancto tribuit.

1.<sup>o</sup> Tribuit illi Dei nomen; qui enim locutus est per Prophetas, vocatur, et est Deus ex Apostolo *Heb. I. multifariam, multisque modis olim Deus loquens Patribus in Prophetis.* Sed qui locutus est per Prophetas, est ipse

ipse Spiritus Sanctus; ait enim Petrus II. cap. I. 21. Spiritu Sancto inspirati, locuti sunt sancti Dei homines; et Act. I. 16. Oportet impleri Scripturam, quam praedixit Spiritus Sanctus per os David de Juda. Et Paulus Act. XXVIII. 26. ea verba, quae Isaias cap. VI. 9. a Deo exercituum (Jehova) dicta refert: audite audientes, et nolite intelligere, affirmat a Spiritu Sancto esse dicta: bene Spiritus Sanctus locutus est per Isaiam Prophetam ad Patres nostros dicens; aure audietis; et non intelligetis. Ergo etc. Praeterea Act. V. 3. ait Petrus: Anania, cur tentavit Satanas cor tuum, mentiri te Spiritui Sancto... non es mentitus hominibus, sed Deo. Et Apostolus I. Cor. XII. 6. et 11. Divisiones operationum sunt, idem vero Deus, qui operatur omnia in omnibus.... haec autem omnia operatur unus atque idem Spiritus, dividens singulis prout vult; et cum dixisset cap. III. 16. nescitis quia templum Dei estis... 2. cup. VI. 19. ait: nescitis quoniam membra vestra templum sunt Spiritus Sancti? Ergo.

2.º Tribuit etiam attributa divina. Etenim omnipotentia, immensitas, et infinita scientia ita sunt propria Dei attributa; ut creaturae convenire non possint; ea autem Spiritui Sancto tribuit Scriptura, Scientiam quidem infinitam; nam ait Apostolus I. Cor. II. 10. Spiritus omnia scrutatur, etiam profunda Dei. Et Christus Joan. XVI. 13. Cum venerit ille Spiritus veritatis, docebit vos omnem veritatem. Immensitatem vero; nam Sap. I. 7. Spiritus Domini replevit orbem terrarum; et Psal. CXXXVIII. Quo ibo a Spiritu tuo? et quo a facie tua fugiam? etc. Denique omnipotentiam, ut constat ex operationibus, quae potentiam requirunt infinitam; de quibus mox dicemus. Ergo.

3.º Divinas etiam operationes Scriptura Spiritui Sancto tribuit, qualia sunt creatio, justificatio, charitatis diffusio, miracula. 1.º Creationem, Psalm. CIII. E-mittes spiritum tuum, et creabuntur; et Jo. XXXIII. 4. Spiritus Dei fecit me. 2.º Justificationem. I. Cor. VI. 11. Sed abluti estis, sed sanctificati estis, sed justificati estis in nomine Domini nostri Jesu Christi, et in Spiritu Dei nostri. 3.º Diffusionem charitatis Rom. V. 5. Charitas Dei diffusa est in cordibus nostris per Spiritum

San-

*Sanctum, qui datus est nobis.* 4.<sup>o</sup> *Miracula Matth. XII. 28. ait Christus: si in Spiritu Dei ejicio daemonia. Et Apostolus I. Cor. XII. 8. Alii quidem per Spiritum datur sermo sapientiae: alii autem sermo scientiae secundum eundem Spiritum: alteri fides in eodem Spiritu: alii gratia sanitarum in uno Spiritu: alii operatio virtutum: alii prophetia, alii discretio spirituum, alii genera linguarum, alii interpretatio sermonum. Haec autem omnia operatur unus, atque idem Spiritus. Ergo.*

*Prob. II. Ex Traditione priorum quatuor saeculorum, cujus paucos, compendii gratia, testes proferemus.* 1.<sup>o</sup> *Justinus Apolog. II. refellens calumniam Gentilium, docet, Christianos non esse atheos; quia, licet non colant Gentilium numina, colunt tamen, et adorant Patrem, Filium, et Spiritum Sanctum. Verum hunc ipsum (Patrem); et qui ab eo venit Filium, et Spiritum Sanctum colimus, et adoramus.*

2.<sup>o</sup> *Athenagoras Legat. pro Christian. Quis non miretur, cum audiat: nos, qui Deum Patrem praedicamus, et Deum Filium, et Spiritum Sanctum, eorum in unitate virtutem, et in ordine distinctionem explicantes, atheos vocari? Ambo haec Justinus, et Athenagorae testimonia licet supra retulerimus, placuit tamen repetere, cum maximi sint ponderis.*

3.<sup>o</sup> *Irenaeus Lib. V. cap. 12. ait, afflatum, quo Adam animatus est, differre a Spiritu Sancto; eo quod afflatus ille sit creatus in tempore; et Spiritus Sanctus creator, et sempiternus; Aliud est afflatus vitae, qui et animale efficit hominem; aliud Spiritus vivificans, qui et spirituale constituit eum ... Aliud est quod factum est ab eo, qui fecit. Afflatus igitur temporalis; Spiritus autem sempiternus.*

4.<sup>o</sup> *Clemens Alex. Lib. I. Paedagogi cap. 6. Unus quidem est universorum Pater, unus est etiam Verbum universorum, et Spiritus Sanctus unus, qui et ipse est ubique.*

5.<sup>o</sup> *Tertullianus Lib. cont. Prax. cap. 13. Duos quidem definimus, Patrem, et Filium; etiam tres cum Spiritu Sancto .... Duos tamen Deos numquam ex ore nostro proferimus; non quasi non et Pater Deus, et Filius Deus, et Spiritus Sanctus Deus, et Deus unus-*  
quis.

quisque. Idem alii docent (a). Ergo constabat traditio de Divinitate Spiritus Sancti usque ad Concilium Constantinopolitanum I., ex quo lucusque eadem fides intemerata permansit.

*Solvuntur objecta.*

*Obbie. I.* Qui gemit, postulat, contristatur, mittitur, non est Deus. Atqui Spiritus Sanctus gemit, et postulat, et contristatur, et mittitur. Ait enim Apostolus Rom. VIII. 26. *Ipse Spiritus postulat pro nobis gemitibus inenarrabilibus.* Et Ephes. IV. 30. *Nolite contristare Spiritum Sanctum.* Et Joan. XIV. 26. *Paraclitus autem Spiritus Sanctus, quem mittet Pater in nomine meo.* Ergo.

*¶. Dist. maj.* Qui gemit, postulat, et contristatur proprie, et mittitur cum imperio, tamquam subditus, conc. Qui gemit, postulat, et contristatur per metaphoram, et mittitur tamquam aequalis ab eo, a quo procedit. *neg.* Atqui Spiritus Sanctus non proprie, sed per metaphoram gemit, et postulat; quia scilicet nobis gemendi, et postulandi praeostat affectum; quia gemere, et postulare nos facit. *Dictum est*, inquit Augustinus *Epist. CV.*, *interpellat pro Sanctis; quia interpellare sanctos facit; sicut dictum est: tentat vos Dominus Deus noster, ut sciat an diligatis eum, hoc est ut scire vos faciat.* Et idem Apostolus Galat. IV. 6. ait; *Misit Deus Spiritum Filii sui in corda vestra, clamantem: Abba, Pater:* hoc est facientem clamare. Dicitur etiam per metaphoram contristari, sicut ipse Deus dicit *Gen. IV. 7* *poenitet me fecisse hominem; quia enim homines contristati recedunt*

---

(a) Cyprianus *Lib. de unit. Eccl. cap. 4.* et *Epist. ad Iubajanum.* Dionysius Romanus in *Epistola contra Sabellianos apud Athanasium de decretis Syn. Nic.* Gregorius Thaumaturgus in *confessione fidei apud Gregor. Nyssen. in ejus Vita.* Athanasius *Epist. ad Serapionem.* Basilii, et Ambrosii *Lib. de Spiritu Sancto.* Gregorius Naz. *Orat. XXXVII.*, *Patres Concilii Alexandrini apud Socratem Lib. III. cap. 7.*

dunt ab amicis, a quibus laesi sunt; ideo cum Spiritus Sanctus recedit ab homine propter peccatum, contristari dicitur. Missio autem in divinis subjectionem non arguit, sed processionem, ut suo loco dicemus.

*Inst. 1.º* Non est confugiendum ad metaphoram, ubi sensus ad literam planus est, et apertus. Ergo.

*¶ Dist. ant.* Si sensus ad literam contra clarissima Scripturae testimonia, et contra perpetuam Ecclesiae traditionem non pugnet; *conc.* Si pugnet, ut in hac causa accidit; *neg.*

*Inst. 2.º* Si Spiritus Sanctus ideo diceretur postulare, quia postulandi affectum inspirat, etiam Pater postulare diceretur; quia et ipse hunc inspirat affectum. Atqui falsum consequens. Ergo et *antecedens.*

*¶ Neg. seq. maj.* Quia licet opera ad extra, qualis est haec orationis inspiratio, sint tribus personis communia; per appropriationem tamen illi personae tribuuntur tum a Scriptura, tum a Patribus, cujus personae proprium characterem, et idioma expriment. Sic quia Pater est fons, et origo totius Divinitatis, ei tribuuntur opera omnipotentiae: quia Filius est Verbum Patris, ei attribuuntur opera, in quibus sapientia elucet; et quia Spiritus Sanctus per amorem Patris, et Filii procedit, ei tribuuntur ea opera, quae ad sanctificationem nostram pertinent, qualis est orationis affectus.

*Objic. II.* Qui non loquitur a semetipso, Deus non est. Sed Spiritus Sanctus non loquitur a semetipso; Christus enim *Joan. XVI. 13.* de Spiritu Sancto ait: *Non loquetur a semetipso: sed quaecumque audiet loquetur.* Ergo.

*¶ Dist. maj.* Qui non loquitur a semetipso, quia ab alio pendet, tamquam a causa, *conc.* Quia ab alio procedit, tamquam a principio, *neg.* Audire igitur nihil aliud est, nisi scientiam ab alio accipere: et quia in Deo scientia, et essentia idem sunt, ideo Spiritus Sanctus ab eo accipit scientiam, sive ab eo audit, a quo habet essentiam, seu a quo procedit: eademque ratione dicitur non loqui a semetipso, quia ab alio habet essentiam, et quae ab essentia divelli nequeunt, scientiam, et operationem. Unde Augustinus *Tract. XCIX. in Joan.* *Non loquetur, inquit, a semetipso; quia non est*



est a semetipso: (quo sensu Dominus dixit: mea doctrina non est mea, sed ejus, qui misit me). Sed quaecumque audiet loquetur: ab illo audiet, a quo procedit. Audire illi scire est, scire vero esse... Quia ergo non est a semetipso, sed ab illo, a quo procedit, a quo illi est essentia, ab illo scientia; ab illo igitur audientia, quae nihil est aliud, quam scientia.

*Inst.* Christus verbo utitur futuri temporis, audiet, loquetur: ergo non intelligendus est de scientia, quam habeat Spiritus ab aeterno; sed de futura revelatione, quae illi fiet; ac proinde Deus non est.

*¶ Neg. cons.* Quia cum aeternitas omnia tempora complectatur, de eo quod aeternum est, cujuscunque temporis verbum ponatur, rectissime dicitur: unde pergit Augustinus loc. cit. Nec moveat quod verbum futuri temporis positum est (audiet)... illa quippe audientia sempiterna est, quia sempiterna scientia: in eo autem quod sempiternum est... cujuscunque temporis verbum ponatur, sive praeteriti, sive praesentis; sive futuri, non mendaciter ponitur. Quamvis enim natura illa immutabilis, et ineffabilis non recipiat fuit, et erit, sed tantum est... tamen propter mutabilitatem temporum, in quibus versatur nostra mortalitas, et nostra mutabilitas, non mendaciter dicimus et fuit, et erit, et est; fuit, quia nunquam defuit; erit, quia nunquam deerit; est, quia semper est... Semper igitur audit Spiritus Sanctus; quia semper scit: ergo et scivit, et scit, et sciet, ac per hoc audivit, et audit, et audiet. Usus autem est Christus verbo futuri temporis audiet, propter effectum futurum: annuntiabit vobis.

*Objic. III.* Omnia facta sunt per Verbum Joan. 1. Ergo ipse Spiritus Sanctus factus est.

*¶ Dist. ant.* Omnia facta sunt per Verbum, excludendo reliquas personas, *neg.* Non excludendo illas, *conc.* Sicut enim omnia dicuntur facta per Verbum, ita et per Spiritum Sanctum: Verbo Domini caeli firmati sunt: et spiritu oris ejus omnis virtus eorum: Psalm. XXXVII. Omnia igitur, quae creata sunt, per Verbum creata sunt; sed quia creatio est opus Dei ad extra, tribus personis communis est, licet una commemoretur.

*Objic.*

*Objic. IV.* Neque Concilium Nicaenum, neque Constantinopolitanum aperte vocat Spiritum Sanctum Deum: *Basilius* agens de Spiritu Sancto a voce *Deus* consulto abstinuit: imo *Hom. XVII.* ait: *Neque ipse Deus est, sed Dei spiritus, et apud Deum, qui et a Deo mittitur, et per Filium nobis suppeditatur.* Pariter se gessit *Hilarius in Libris XII. de Trinitate.* Ergo.

*Dist. ant.* Quia ad eorum scopum necesse non erat, *conc.* Quia illum non putabant Deum, *neg.* In Concilio Nicaeno non de divinitate Spiritus Sancti, sed de divinitate Filii agebatur. In Concilio Constantinopolitano adhibita sunt ejusdem significationis verba ad explicandam Spiritus Sancti divinitatem: imo in *Epistola Synodica ad Damasum* dictus est Spiritus S. *Deus, Patri, et Filio Consubstantialis.* *Basilius* in omnibus suis operibus divinitatem Spiritus Sancti strenue asserit; docet enim, unam esse ejus cum Patre, et Filio substantiam: eum inter creaturas non esse numerandum: nos baptizari in nomine Spiritus Sancti aequae ac in nomine Patris, et Filii; sed prudentis oeconomiae causa ab illa voce *Deus* aliquando abstinuit. Habebat enim contra se opposita hinc Arianorum, inde Macedonianorum agmina, quae si simul aggrederetur, metus erat, ne illi, conjunctis inter se viribus, Catholicos omnes Episcopos e suis sedibus ingenti Ecclesiae damno deturbarent. Cedendum igitur fuit aliquantisper tempori: quia etsi numquam liceat contra veritatem loqui, expedit tamen aliquando tacere veritatem, cum majus damnum, et scandalum prudenter timetur; nec est aliunde necessarium eam palam proferre. Eam autem oeconomiam non semper putavit S. Doctor necessariam; nam *Homil. CXL.* aperte inquit: *Confitendum est, Deum esse Patrem, Deum Filium, Deum Spiritum Sanctum.* Ita *Gregorius Naz. Orat. XX.* *Basilium* defendit. Quod autem ait *Basilius Hom. XVII.* *nec ipse est Deus, etc.* licet eam ob causam in suspicionem venerit haereticos, ab ea tamen ipse se purgat *Epist. LXXIX.* quia nomine *Dei* more veterum, ut supra observavimus, intellexit Patrem, qui peculiari quadam ratione dicitur *Deus*, quia ab alio non procedit. *Hilarius* praecipue contra Arianos de divinitate Verbi pugnat; ideo.

ideoque mirum non esset, si de divinitate Spiritus S. siluisset. Caeterum *Lib. XII.* ait, Spiritum S. non esse creaturam; imo in *Matth. cap. 33.* loquens de forma baptismi: baptizamus, inquit, in nomine Patris, et Filii, et Spiritus Sancti, ut quorum una est divinitas, sit una largitio, nomenque Trinitatis unus Deus. Vide haec fusius apud Natalem Alex. in *Hist. Ecol. Saec. IV. Dissert. XLIII.* his igitur expeditis, quae ad trium personarum divinitatem pertinebant, et ex quibus satis, ut arbitramur, tum Calvinistae *Jurii* impudentia retunditur, qui usque ad Nicaenum, imo et Costant. Concilium fidem Trinitatis informem, atque imperfectam fuisse deblaterat, de quo *Bossuetus* docte, atque erudite disputat; tum etiam *Petavii*, *Huetii*, aliorumque imprudentia; jam de ipsarum est personarum processionibus disputandum.

## C A P. VII.

## De Processionibus divinis.

*Adv.* **P**rocessio apud Latinos, ut *προβολη* apud Graecos Patres, in divinis est emanatio unius personae ab alia. Expendendum autem hic est 1.° utrum agnoscendae sint hujusmodi processionis: 2.° quot sint: 3.° an Spiritus Sanctus a Patre, Filioque procedat, recteque adjecta sit symbolo Constantinopolitano haec ipsa particula *Filioque*: 4.° quodnam sit divinarum processionum principium.

## §. I.

*Utrum agnoscendae sint processionis in divinis, et quot illae sint.*

## P R O P O S I T I O.

*Agnoscendae sunt in Deo processionis: eaeque duae sunt, nempe Verbi, et Spiritus S., ex quibus Verbi processio dicitur generatio: processio vero Spiritus S. simpliciter processio dicitur. Est dogma Fidei.*

*Prob. 1a. pars.* Scripturae aperte testantur, esse in Deo processionis; Filius enim de seipso ait *Joan. VIII.*

76 *Theologicarum Institutionum Lib. IV. Cap. VII.*  
*VIII. 43. Ego ex Deo processi, et veni: et Prov. VIII.*  
*22. Dominus possedit me. (i. e. genuit) in initio viarum*  
*suarum. De Spiritu Sancto vero Joan. XV. 26. Cum*  
*autem venerit Paraclitus, quem ego mittam vobis a*  
*Patre, spiritum veritatis, qui a Patre procedit.*

*Prob. 2a. pars.* Tot sunt processiones, quot personae  
 procedentes. Atqui hae duae sunt, Filius, et Spiritus  
 Sanctus; neque enim unquam Scriptura Patrem, qui  
 fons totius Divinitatis est, ab alio ait procedere. Ergo.

*Prob. 3a. pars.* De Verbo dicitur *Psal. II. Filius*  
*meus es tu. Ego hodie genui te;* et *Psal. CIX. Ex*  
*utero ante luciferum genui te;* et *Isaiae LIII. 8. Gene-*  
*rationem ejus quis enarrabit?* Sed qui dicitur Filius, et  
 genitus, procedit per veram a Patre generationem. Er-  
 go. Quod autem processio Spiritus Sancti generatio  
 non sit, patet ex eo quod Filius dicitur in Scripturis  
*Unigenitus. Joan. I. 18. Unigenitus Filius, qui est in*  
*sinu Patris, ipse enarravit.* Item. *Joan. III. 16. Sic*  
*Deus dilexit mundum, ut Filium suum Unigenitum daret;*  
*et I. Jo. IV. 9. Filium suum Unigenitum misit Deus in mun-*  
*dum.* At non esset Unigenitus, si etiam Spiritus San-  
 ctus per veram generationem procederet. Unde auctor  
 symboli, quod *Athanasio* tribuitur, ait; *Spiritus San-*  
*ctus a Patre, et Filio non factus, nec creatus, nec*  
*genitus, sed procedens:* quippe ob nominum inopiam  
 generalis vox processio ad significandam Spiritus Sancti  
 emanationem usurpata est. Ergo etc.

### *Solvuntur objecta.*

*Objic. I. cont. 1m. part.* Si essent in divinis proces-  
 siones, una persona esset prior altera. Atqui hoc repu-  
 gnat trium personarum divinitati. Ergo.

*¶. Dist. maj.* Esset prior altera origine, *conc.* Tem-  
 pore, aut dignitate, *neg.* Per processionem enim tota  
 divina natura, quae individua est, communicatur ab ae-  
 terno cum persona procedente; ac proinde persona pro-  
 cedens eandem accipit aeternitatem, dignitatem, et  
 perfectionem, quae est in persona, a qua procedit;  
 ac proinde persona procedens non transit a non esse  
 ad esse; nec a producente pendet, quasi a causa.

*Inst.*

*Inst.* Melius, et beatius est dare, quam accipere. Ergo saltem haec praerogativa non est in persona procedente.

¶ *Dist. ant.* Beatius est dare, quam accipere in creatis, *conc.* In divinis, *neg.* Ratio autem in eo dispar est, quod in creatis, qui dat, non suam ipsius dat naturam; sed vel aliquam rem suam, vel ad summum naturam alteram suae similem, sicut cum Pater generat filium, ac proinde semper remanet in eo, qui dat, praerogativa quaedam, quae in accipiente non est. At in divinis eadem numero natura divina cum persona procedente communicatur; ideoque non potest in dante remanere aliquid, quod non sit accipienti communicatum. Hinc non est melius in divinis habere *Paternitatem*, quam *Filiationem*: nec melius est habere *Filiationem* cum *spiratione activa*, quam *spirationem passivam*, de quibus infra erit sermo.

*Inst.* 2.<sup>o</sup> Posita processione Filii, et Spiritus Sancti, solus Pater esset ens a se. Ergo Filius, et Spiritus Sanctus non essent Deus.

¶ *Dist. ant.* Solus Pater esset ens a se, ita ut excludat omne principium; *conc.* Ut excludat causam, *neg.* Cum enim Pater cum Filio communicet eandem, quam habet, naturam divinam, profecto sicut natura Patris est ens a se excludens causam, a qua pendeat, ita et natura Filii. Solus autem Pater principio caret, cum sit fons, et origo totius divinitatis; sed hoc non efficit, ut ejus natura sit major, aut melior natura Filii, cum una eademque sit.

*Objic. II. cont. 2m. part.* Nulla reddi ratio potest, cur duae, et non plures sint in Deo processiones; si enim Pater generat Filium, cur non item ipse Filius? cur non et Spiritus Sanctus? habent enim et ipsi intellectum, voluntatem, et proprietates alias, quas habet Pater: et ita in infinitum.

¶ *Dist. ant.* Nulla potest reddi ratio *extrinseca*, *neg.* *Intrinseca*, *subdist.* Nulla ratio demonstrans, *conc.* Suadens, imo et persuadens ei, qui mentem habet fide imbutam, *transeat.* Potest igitur reddi *extrinseca* ratio, cur non plures sint, quam duae processiones, scilicet certissima Dei revelantis auctoritas. Qua posita, quamvis nullam possemus intelligere, ne probabilem quidem

dem rei revelatae rationem, non esset propterea negandum quod a Deo revelatum est. Caeterum asserre rationes possumus, quae licet reluctantem haereticum omnino revincere non valeant, fidelibus tamen persuadent. Sicut enim in mente nostra, quae est ad imaginem Dei effecta, duae sunt actiones, quae terminum habent intra mentem; una quidem intellectus, per quam producit verbum, altera voluntatis, per quam producit amor; ita in Deo unus atque idem actus, qui virtute multiplex est, intellectui et voluntati aequivalens, verbum et amorem producit. hoc tamen discrimine, quod in mente nostra verbum, et amor accidentia sunt; at in Deo, in quo nihil est accidens; sunt personae subsistentes. Hae autem subsistentes personae aliud Verbum, et alium Spiritum non producant, tum quia earum intellectus, et voluntas non est actus ab intellectu, et voluntate Patris distinctus, tum quia si producerent, non essent ipsae perfectissimae; quia esset aliud Verbum, atque alius Spiritus, qui alias perfectiones haberent, saltem numero distinctas, quibus ipsae carerent.

*Obje. III.* Processio infinita omnem aliam processionem excludit. Atqui processio Filii infinita est. Ergo aliam processionem excludit; ac proinde unica in Deo potest esse processio.

*¶. Dist. maj.* Processio infinita in omni genere, *conc.* In uno genere, *subdist.* Excludit omnem aliam processionem in illo genere, *conc.* In alio genere, *neg.* Itaque processio Verbi, quae est infinita in genere, intellectionis, excludit omnem aliam in illo genere processionem; ideoque non nisi unum potest esse Verbum. Sed non excludit aliam processionem in alio genere, puta amoris.

*Inst.* Processio Filii est in omni genere perfectionis infinita; quia est processio personae divinae, quae debet esse in omni genere infinita. Ergo.

*¶. Dist. ant.* Est infinita in omni genere perfectionis simpliciter simplicis, quam melius est habere, quam non habere, *conc.* In omni genere perfectionis simplicis, *neg.* Paternitas autem, Filiatio, Spiratio passiva, ut infra dicetur, sunt perfectiones simplices; nec est melius unam habere, quam aliam.

*Obje.*

*Objic. IV. cont. 3m. part.* Quare processio Verbi dici debet *generatio*, non item processio Spiritus Sancti?

*Y.* Si ab haeretico fiat haec interrogatio, respondendum est, nos id nescire; quia, utpote ad salutem minime necessarium, non est a Deo revelatum; nec propterea negandum quod revelatum est, quia ratio ejus revelata non est. Hinc Augustinus *Lib. II. cont. Maximin. cap. 14.* *Distinguere*, inquit, *inter illam generationem, et hanc processionem, nescio, non valeo, non sufficio.* Et *Tract. XCIX. in Joan. n. 4.* *Quid intersit inter procedere, et nasci, et longum est quaerendo disserere, et temerarium, cum disserueris, definire.* Similia docent alii Patres, quos vide apud Tournely *Tom. II. Quaest. 2. art. 4.*; Petavium; et alios.

Si vero interrogatio fiat a catholico, respondendum est, Patres et Theologos varias afferre probabiles hujus discriminis rationes, ex quibus nos verisimiliorem amplectemur, cum agemus de divinarum processionum principio.

#### Corollaria.

*I.* Hinc sequitur, quatuor esse in Deo *relationes reales*, eaeque sunt *Paternitas*, *Filiatio*, *Spiratio activa*, et *spiratio passiva*. Ad relationem enim *realem* constituendam tria requiruntur, atque sufficiunt; scilicet *subjectum*, *terminus* reipsa distinctus, et *fundamentum relationis*. Atqui posita processione duarum personarum, nempe Filii, et Spiritus Sancti, haec tria reperiuntur in quatuor relationibus, quas paulo ante diximus. Pater enim, ex. gr. est *subjectum*, Filius est *terminus*; processio Filii a Patre est *fundamentum*, seu *ratio*, qua Pater refertur ad Filium. Ergo. Idem de aliis relationibus dicas.

*II.* Sequitur etiam, quinque esse in Deo *notiones*, si-  
ve *idiomata idiomata*. Notio enim est character exprimens aliquam personae dignitatem, propter quam una ab alia distinguitur. Atqui posita processione Filii, et Spiritus Sancti, quinque sunt hujusmodi characteres, nempe *Innascibilitas*, *Paternitas*, *Filiatio*, *Spiratio activa*, et *Spiratio passiva*. Ergo etc. Et *innascibilitas* quidem, licet nomine negativo exprimatur, significat tamen praecipue rationem primi principii, quae est in Patre.

## §. II.

*Utrum Spiritus Sanctus procedat a Patre, et Filio.*

*Adv. I.* Filium a solo Patre procedere, et gigni, nemo negat, qui Trinitatem agnoscit. Spiritum Sanctum a Patre procedere, aperte docent Scripturae *Joan. XV. 26.*, et definitum est in Concilio Constantinopolitano contra Eunomianos, et Macedonianos. Sed gravissima mota lis est a Graecis contra Romanam Ecclesiam, quam haereseos accusant, eo quod doceat, Spiritum Sanctum procedere a Patre simul; et Filio.

*II.* Primus omnium Theodoretus scribens contra *Anathematismum IX.* S. Cyrilli, ait esse impium; et blasphemum asserere; Spiritum Sanctum ex Filio, et per Filium constantiam habere: ex quo Bellarminus *Lib. II. de Christo cap. 21.*, Petavius *Lib. VII. de Trinitate cap. 1.*, alique viri docti censent, Theodoretum primum fuisse erroris Graecorum architectum; licet nonnulli cum benignè interpretentur, ut infra videbimus.

*III.* Saeculo VII. jam Graeci cum Latinis contendere incipiebant de processione Spiritus Sancti, ut patet ex Epistola *Maximi martyris ad Marinum*, in qua Latinos defendit. At saeculo VIII. ea disputatio acrior esse coepit; ut constat ex variis Conciliis Italiae, Galliae, et Germaniae, in quibus contra Graecorum criminationes processio Spiritus Sancti ex Patre, et Filio defenditur.

*IV.* Cum *Photius* saeculo IX. Constantinopolitanae Sedis invasor, a qua *Ignatium* adhuc viventem eiecerat, a *Nicodao I.* damnatus esset, vesano furore in Romanam Ecclesiam debacchatus, praeter alia, quae ei impudenter objecit, in eo etiam Latinos accusavit, quod docentes processionem Spiritus Sancti a Patre, et Filio, a recta fide defecissent.

*V.* Post *Photii* mortem, Graeci pro innata levitate fluctuantes, nunc cum Latinis redibant in gratiam, nunc ab iis deficiebant, donec saeculo XI., agente *Michaela Caerulario* Patriarcha Constant., confirmatum est Schisma Graecorum, a quibus haereseos nota inusta est Ecclesiae

Ro-



Romanae, eo quod Spiritum Sanctum ex Patre, et Filio procedere doceat, et particulam ipsam *Filioque* symbolo Constantinopolitano inseruerit.

VI. Ad conciliandam pacem, et controversiam finiendam, praeter Provinciales sinodos Gentiliacensem, Foro-Julensem, Aquisgranensem, Barcnsem, in quo *S. Anselmus* egregie pro catholica fide certavit, tria Concilia oecumenica habita sunt, Lateranense IV. sub Innoc. III. anno MCCXV. Lugdunense II. sub Gregorio X. anno MCCLXXIV., et Florentinum sub Eugenio IV. anno MCCCXXXIX. In his Conciliis Graeci cum Latinis renovarunt pacem, ac symbolum cum additione particulae *Filioque* decantarunt: ast ad Ecclesias suas reversi, in pristinum errorem, et schisma ter sunt relapsi. In Concilio praesertim Florentino, omnibus Graecis Episcopis subscribentibus, unus obstitit *Marcus Ephesinus*, qui reversus in patriam Graecos complures pervertit, et a pace tot laboribus conciliata revocavit: in ejus sceleris, ut creditur, poenam paulo post in ipso Pentecostes die, Constantinopoli a Turcis capta, Graecorum Imperium extinetum est; eosque Deus in errore, et schismate, quod adhuc perdurat, dereliquit. Non defuerunt tamen etiam ante Concilium Florentinum inter Graecos viri docti, qui catholicum dogma cum Latinis defenderent, inter quos celeberrimi *Joannes Beccus*, et *Nicephorus Blemmydes*: nec desunt modo complures Graeci Romanae Ecclesiae et fide, et communione conjuncti. Vide *Le Quien in Panoplia adv. Graec.* Allatum in *Graecia Orth.* etc.

## PROPOSITIO

*Spiritus Sanctus a Patre, et Filio, aequè dicitur.*  
Est dogma fidei.

*Prob. I. Ex Scripturis:* 1.<sup>o</sup> Ille procedit a Patre, et Filio, qui aequè dicitur *Spiritus Patris*, et *Spiritus Filii*; non enim aliam ob causam dici potest *Spiritus Patris*, quam propter processionem a Patre; ac proinde si dicitur etiam *Spiritus Filii*, praecedat etiam a Filio. Atqui *Spiritus Sanctus*, aequè dicitur in Scripturis *Spiritus*

Patris, et Spiritus Filii. *Matth. X. 20.* Non enim vos estis qui loquimini, sed Spiritus Patris vestri, qui loquitur in vobis. *Ad Gal. IV. 6.* misit Deus Spiritum Filii sui in corda vestra. Ergo etc.

2.<sup>o</sup> Ille procedit a Patre, et Filio qui aequè mittitur a Patre, et Filio, *Missio enim ipsa processio est*, inquit Gregorius M. *Hom. XXVI. in Evang.*; et consentiunt Graeci Patres. Atqui Spiritus Sanctus aequè mittitur a Patre, et Filio. A Patre quidem; nam *Joan. XIV. 26.* ait Christus: *Paraclitus autem Spiritus Sanctus, quem mittet Pater in nomine meo.* A Filio vero; ait enim ipse Christus *Joan. XVI. 7.* *Si enim non abiero, Paraclitus non veniet ad vos: si autem abiero, mittam eum ad vos.* Ergo.

3.<sup>o</sup> Qui aliquid accipit a Filio, ab illo procedit; cum enim natura divina individua sit, qui aliquid accipit, naturam ipsam accipit. Atqui Spiritus Sanctus accipit aliquid a Filio; ait enim Filius *Joan. XIV. 54.* *Ille me clarificabit: quia de meo accipiet, et annuntiabit vobis. Omnia quaecumque habet Pater, mea sunt; propterea dixi: quia de meo accipiet.* Ergo.

*Prob. II. ex Patribus Graecis, quorum auctoritatem aduersarii reverentur, atque suspiciunt. 1.<sup>o</sup> Athanasius Orat. III. cont. Arian. Quaecumque, inquit, Spiritus habet, haec a Verbo habet. Et Epist. I. ad Serapion. n. 20. Ex Verbo, quod ex Patre esse conceditur, effulget (Spiritus) et ab eodem mittitur, ac datur. 2.<sup>o</sup> Gregorius Nyssenus Lib. I. cont. Eunom, Quemadmodum Patri Filius jungitur, et cum ex illo originem ducat, hypostasi tamen posterior non est; sic etiam Spiritus Sanctus ad Filium se habet; nam in sola principii ratione Filius prius, quam Spiritus Sancti hypostasis concipitur. ita ut excepta principii ratione, sanctissima Trinitas in omnibus probe sibi consonet. 3.<sup>o</sup> Cyrillus Alex. Lib. I. de adoratione in spir. et verit. Spiritus est Patris, et Filii; qui substantialiter ex utroque, nimirum ex Patre per Filium profluit. Et in Thesauro Assert. XXXIV. Cum igitur Spiritus Sanctus procedat a Patre, et Filio, manifestum est; divinae substantiae ipsum esse. Denique in Epistola contra Nestorium, quae lecta; probataque est in Conciliis Ephesi-*  
no,

ab, Chalcedonensi, et Constantinopolitano. II. Spiritus non est a Filio alienus, quandoquidem Spiritus veritatis nominatur, Christus autem est veritas; et perinde quoque ab illo, atque a Deo Patre procedit (a). 4.<sup>o</sup> Idem docent Basilii Lib. II. et III. cont. Eunom., Epiphanius Haeresi LXII. et LXXIV., et alii (b). Ex quibus Patrum Graecorum locis constat, inanem esse eorum responsionem, qui ajunt, Patres, cum Spiritum Sanctum a Filio quoque procedere affirmant, non de persona, sed de donis Spiritus Sancti intelligendos esse. Quod est verbis Ss. Patrum manifeste contrarium, qui docent, ipsam Spiritus Sancti hypostasim distingui a Filio ratione principii, sicut eadem ratione Filius a Patre distinguitur. Ergo etc.

Prob. III. ex Patribus Latinis, qui eo tempore flo-  
ruerunt, quo Graeci Romanam Ecclesiam, cui conjun-  
eti, et subiecti erant, tamquam veritatis magistrum ha-  
bebant. 1.<sup>o</sup> Tertullianus Lib. cont. Prax. cap. 4. Filium  
inquit, non aliunde deduco, sed ex substantia Patris ...  
Spiritus non aliunde puto, quam ex Patre per Filium.  
2.<sup>o</sup> Hilarius Lib. II. de Trin. Loqui de eo (Spiritu)  
non necesse est, qui de Patre, et Filio auctoribus confiten-  
dus est. 3.<sup>o</sup> Ambrosius Lib. I. de Spir. S. cap. 10. Spi-  
ritus quoque Sanctus, cum procedit a Patre, et Filio,  
non separatur a Patre, non separatur a Filio. 4.<sup>o</sup> Au-  
gustinus Lib. IV. de Trin. cap. 20. Nec possumus dice-  
re, quod Spiritus Sanctus et a Filio non procedat.  
Neque enim frustra idem Spiritus et Patris, et Filii  
Spiritus dicitur: 5.<sup>o</sup> Leo M. Epist. XV. Alius qui genuit,  
alius qui genitus est, alius qui de utroque processit (c).

F 2

Porro

(a) Idem saepe repetit Lib. de recta fide ad Regin. Lib. X.  
et XI. Comment. in Joan.

(b) Dydimus lib. II. de Spiritu S., Maximus Mart. Tracta-  
de Candelabro, et in Epist. ad Marin.

(c) Adi possunt Marius Victorinus lib. I. cont. Arium  
Gennadius lib. de Eccl. i. ogm. cap. 4, Gregorius M. Hom.  
XXVI. in Evang., Fulgentius lib. de Fide ad Petrum cap.  
11., Auctor Symboli S. Athanasii, Anselmus lib. de Processi.

84 *Theologicarum Institutionum Lib. IV. Cap. VII.*

Porro ex his Ambrosius, Augustinus, Leo M. tamquam catholici doctores laudati sunt in Conciliis Oecumenicis apud Graecos habitis, nempe Ephesino; Chalcedonensi, Constantinopolitano II. Ergo.

*Prob. IV. Ex Conciliis generalibus*, ex quibus tria in Oriente habita laudarunt Cyrilli Epistolam, in qua, ut supra vidimus, processio Spiritus Sancti ex Patre et Filio asseritur; tria alia in Occidente eandem doctrinam, consentientibus Graecis, et Latinis, definierunt, praeter plura Concilia Provincialia Italiae, Galliae, et Germaniae (a).

*Prob. V. Ex rationibus Theologicis*: 1.<sup>o</sup> Quidquid habet Pater, habet et Filius, excepta Paternitate, ut docent Patres ex laudatis Christi verbis: *omnia quaecumque habet Pater, mea sunt*. Ergo. 2.<sup>o</sup> *In divinis nulla est distinctio, ubi non interest relationis oppositio*: quod est tritum apud Theologos axioma desumptum ex Anselmo *Lib. de proces. Spir. S. cap. 2.*, et Augustino *Tract. XXXIX. in Joan.* ubi ait: *hoc solo numerum insinuant, quod ad invicem sunt*. Ergo si Spiritus Sanctus non procederet a Filio, ac proinde non haberet erga Filium relationem oppositionis, quae ex processione oritur, non distingueretur a Filio. Ita S. Thomas *I. P. Q. XXXVI. art. 2.* Sed quia Henricus *Quod lib. V. Quaest. IX.*, et Scotus in *Dist. XI.* contendunt, Spiritum Sanctum adhuc distinctum iri a Filio, etsi ab illo non procederet; ideo cum Graecis disputantes, non nimium rationes Theologicas urgere oportet in re tot Scripturarum, Patrum, et Conciliorum auctoritatibus stabilita, ne novam ipsis praebeamus litigandi materiam.

Sol-

---

(a) Vide haec fusius apud Leonem Allatum in *Graecia orthodoxa* aliisque ejus operibus, Le Quien *Dissert. I. in Damascen et in Panoplia*, Natalem Alexandrum *Dissert. XVII. in Hist. Eccl. Saec. IX.*, Petavium etc.

*Solvuntur objecta.*

*Objic. I.* Scriptura numquam conceptis verbis docet, Spiritum Sanctum a Filio procedere: sicut e contrario expresse docet, ipsum procedere a Patre. Ergo.

*¶ Dist. ant.* Et tamen id implicate perhibet verbis idipsum sonantibus, *conc.* Secus, *neg.* Cum enim Scriptura nos doceat, Spiritum Sanctum esse Spiritum Filii, mitti a Filio, accipere a Filio; quid aliud haec innuunt ac significant, nisi eum a Filio procedere? Cum autem aliquando solum Patrem nominat, non excludit Filium: sicut cum dicit, Spiritum mitti a Filio, non excludit Patrem: Si ergo de Patre, et Filio procedit Spiritus Sanctus, cur Filius dixit: De Patre procedit? Cur putas, nisi quemadmodum ad eum solet referre et quod ipsius est, a quo et ipse est? Unde illud est, quod ait: mea doctrina non est mea, sed ejus qui misit me. Si igitur hic intelligitur ejus doctrina, quam tamen dixit non suam, sed Patris; quanto magis illic intelligendus est et de ipso procedere Spiritus Sanctus: ubi sic ait; de Patre procedit, ut non diceret de me non procedit? Verba sunt Augustini Tract. XCIX. in Joan.

*Objic. II.* Concilium Constantinopolitanum, loquens de processione Spiritus Sancti in Symbolo, solius Patris mentionem facit, et videtur consulo abstinaisse a commemorando Filio. Et in Spiritum Sanctum Dominum, et vivificantem, qui ex Patre procedit. Ergo.

*¶ Dist. ant.* Solius Patris mentionem facit, quia processio ex Patre tunc negabatur ab haereticis, *conc.* Quia ex solo Patre procedit Spiritus Sanctus, *neg.* Quod enim Spiritus Sanctus ex Filio procederet neque a catholicis tunc, neque ab haereticis negabatur; sed Eunomiani, et Macedoniani docebant, ipsum ex solo Filio procedere, quasi esset creatura. Cum igitur ea sit Conciliorum consuetudo, imo et religio, ne quid definiant, et multo minus Symbolo inserant, nisi quod est necessarium, satis putarunt Patres definire, Spiritum Sanctum ex Patre procedere, ideoque esse Deum.

*Objic. III.* Theodoretus in Confutatione Anathematismi IX. S. Cyrilli eum reprehendit, quod dixerit, Spiritum San-

Sanctum ex Filio extantiam habere; et in *Epistola ad Monasteria* ait de eodem Cyrillo: blasphematur et in *Spiritum Sanctum*, non ex Patre cum procedere dicens secundum Domini vocem; sed ex Filio esse; Idem docet in *Exposit. Epist. ad Rom. cap. 8.*, et in *I. ad Cor. cap. 2.* Ergo.

¶ *Neg. cons.* Praeter Bellarminum et Petavium supra citatos, etiam Garnierius *Dissert. III. de Fide Theodoretæ cap. I.* fatetur, Theodoretum errasse. Sed cum ejus scripta contra Cyrillum reprobata primum fuerint in Ephesina Synodo, in qua contraria Cyrilli doctrina probata est; et deinde eadem Theodoretæ opera damnata sint in Concilio V. et VI. Oecumenicis, nihil ex ejus auctoritate contra Catholicae Fidei dogma concludi valet. Potest tamen Theodoretus excusari eo quod errore facti, cum impensius Nestorio faveret, quem credebatur innoxium, putaverit Cyrillum docuisse, Spiritum Sanctum procedere ex Filio, excluso Patre; aut extantiam habere ex Filio, quasi unam ex creaturis; sicut sententiam suam explicat in *Expositione Epist. ad Rom. loc. cit. Spiritum Sanctum et Dei appellavit, et Christi, non quod, ut volunt haeretici execrandi, ex Deo per Filium creatus sit.* Et ipsa *Epistola ad Monasteria* ita refert Cyrilli sententiam male a se intellectam: blasphematur et in *Spiritum Sanctum*, non ex Patre ipsum procedere dicens: quae fuit haeresis Macedonii.

¶ *Obje. IV.* Damascenus *Lib. I. de Fid. Orth. cap. 11.* Spiritum Sanctum, inquit, ex Patre esse dicimus; et Patris Spiritum appellamus. Ex Filio autem Spiritum Sanctum non dicimus, sed Filii Spiritum nominamus. Ergo.

¶ *1.º* Nonnullos concedere, Damascenum in eo errore innoxie ante Ecclesiae definitionem versatum esse; cumque esse Joannem illum, contra quem Synodus Aquisgranensis anno DCCCIX. declaravit, Spiritum Sanctum etiam a Filio procedere. Sed cum Joannes, de quo Synodus loquitur, dicatur Hierosolymitanus, non videtur cum Damasceno confundendus.

¶ *2.º Dist. ant.* Non dicimus esse ex Filio, tamquam ex primo principio, aut tamquam creatore Spiritus Sancti, conc. *Neg.* Solent enim nonnulli Graeci Patres hanc adhibere cautionem, ut Patri tribuant

propositionem *ex*, Filio propositionem *per*; quod et Apostolus servavit *I. Cor. VIII. 6. Unus Deus Pater, ex quo omnia... unus Dominus Jesus Christus, per quem omnia*; non ut negent, Filium esse etiam principium Spiritus Sancti (idem enim significant propositiones *ex*, et *per*, ut supra docuimus *cap. 5.*); sed ut innuant, Filium non esse primum principium sine principio, sed procedere ex Patre. Ita Cardinalis Bessarion *Orat. pro union.* Damascenum explicat: idque confirmatur ex verbis ejusdem Damasceni *loc. cit. quemadmodum ex sole est radius, et splendor (ipse enim et radii, et splendoris fons est) sed per radius splendor nobis communicatur*: ubi comparat Patrem soli, Filium radio, Spiritum Sanctum splendori: manifestum autem est, splendorem esse a sole, et radio; seu a sole per radius. Caeterum hanc cautionem non omnes servant Graeci Patres, ut videre est in locis supra recitatis.

*Obje. V.* Si Spiritus Sanctus procedit ex Patre, et Filio, duo erunt Spiritus Sancti principia. Atqui hoc tamquam absurdum rejiciunt Concilia Lugdunense, et Florentinum. Ergo.

*R. Neg. ant.* Sicut enim res Creatae sunt a Patre, Filio, et Spiritu Sancto, et tamen non sunt tria, sed unum rerum creatarum principium; ita quamvis Spiritus Sanctus sit a Patre, et Filio, non duplex, sed unum erit ejus principium. Ad multiplicandum enim principium non sufficit multiplicatio personarum, sed requiritur etiam duplex forma, seu operatio. Cum igitur Pater, Filium gendrando, communicet et eandem numero naturam, et cum natura eandem virtutem *spirandi*, sive producendi Spiritum Sanctum, quam ipse habet, sicut personae duae Pater et Filius non sunt duae naturae divinae, ita non sunt duo principia Spiritus Sancti, qui *ex utroque aeternaliter tamquam ab uno principio, et unica spiratione procedit*: verba sunt Concilii Florentini in *Decr. union.*, cui praeverat Lugdunense.

*Inst.* Vel virtus spirandi est *personalis*, vel *essentialis*. Si primum; ergo est solius Patris, quippe qui proprietates personales cum Filio non communicat: si secundum; ergo etiam Spiritus Sanctus sui ipsius, vel alterius  
Spi-

Spiritus Sancti est principium. Quod utrumque absurdum est.

II. Esse proprietatem personarum duarum, nempe Patris, et Filii; quia licet Pater non possit communicare cum Filio proprietates personales, quae relative opponuntur *Filiationi*, ut est *Paternitas*; communicat tamen virtutem spirandi, quae *Filiationi* non opponitur. Vide haec fusius pertractata apud Manuelem Calecam in *Libris quatuor contra Graecos*, Bessarionem in *Lib. de Processione Spiritus Sancti*, S. Thomam in *Opuis. contra Graecos*, Pithaeum in *Libro de Processione Spiritus Sancti*, Petavium, Natalom Alexandrum etc.

### Corollaria.

I. Ergo Spiratio activa, quam diximus esse unam ex quatuor divinis relationibus, unica, et simplicissima est. Patri Filioque communis.

II. Quamquam inter personas divinas non sit ordo temporis, aut dignitatis, cum unaquaeque eandem habeat naturam; est tamen ordo originis. Prior enim origine Pater est, secundus Filius ab eo genitus, tertius Spiritus Sanctus ab utroque procedens.

### §. III.

*Utrum recte Symbolo Constantinopolitano addita fuerit particula illa Filioque.*

*Ad.* Haec quaestio a superiore distincta est; potest enim aliquod esse dogma fidei, et tamen non inserendum Symbolo. Sed Graeci utrumque conjungunt. Ajunt enim Latinam Ecclesiam corrupisse symbolum per additionem illam, utpote falsam; et fidei contrariam quam cantilenam a Photio, aliisque inceptam, Graeci Schismatici repetere non cessant. Nos postquam ostendimus, processionem Spiritus Sancti ex Filio ad dogmata Fidei spectare, recte etiam hoc dogma Symbolo esse insertum per additionem particulae *Filioque*, demonstramus.

PRO-



## P R O P O S I T I O.

*Recte Ecclesia particulam Filioque Symbolo adjunxit.  
Est dogma Fidei in Florentina Synodo; Graecis  
etiam suffragantibus, definitam.*

*Prob.* Habet Ecclesia auctoritatem vel in Symbolo, vel in alia publica professione fidem explicandi, quando eam videt ab haereticis labefactari, et expedit salutem fidelium, ut hac ratione gliscenti malo occurratur, fideles ab haereticis discernantur, et ipsi haeretici, ad Ecclesiam redeunt, fidem suam publice testentur. Nam hoc non solum pendet ab auctoritate pascendi gregem, quam Christus Ecclesiae dedit (in qua auctoritate continetur etiam potestas condendi de integro ipsum Symbolum, ut fecerunt Apostoli tamquam Ecclesiae pastores; et a fortiori addendi aliqua symbolo jam composito); sed etiam exemplo et praxi ipsius Ecclesiae probatur. Nonne enim Nicaena Synodus Symbolo Apostolico, quod tunc in universa Ecclesia servabatur, addidit vocem *Consubstantialis*, et alias, quae expedire visae sunt contra nascentem Arianorum haeresim? Nonne Synodus Constantinopolitana addidit alia, quae visa sunt opportuna contra haeresim *Macedonii*? Atqui cum addita est Symbolo Constantinopolitano particula *Filioque*, expediebat, ut hoc dogma explicaretur in Symbolo. Schismatici enim ex eo quod in Symbolo Const: dicebatur Spiritus ex Patre procedere, occasionem arripiebant docendi, eum procedere ex solo Patre; et Ecclesiam Romanam, quae contrarium docebat, a fide excidisse. Ergo recte Ecclesia additionem illam probavit, et servat.

*Solvuntur Objecta.*

*Objic.* In Concilio Ephesino *Part. I. Act. VI*, audito impio Nestorii Symbolo oblato a *Charisio* Presbytero, quædam *Photius*, et *Anastasius* Nestoriani excommunicaverant, eo quod eidem symbolo subscribere noluisset, statutum est, alteram fidem nemini licere proferre, aut conscribere, aut componere, præter definitum a Sanctis Pa-

90 *Teologicarum Institutionum Lib. IV. Cap. VII.*  
*tribus, qui Nicaeae cum Spiritu Sancto congregati fue-*  
*runt. Qui secus fecerint, Episcopos quidem, et Clericos*  
*deponendos; laicos vero excommunicandos. Idem statuit*  
*Concilium Chalcedonense Act. XI. Imo Patres Concilii*  
*septimi, sive Nicaeni II. post fidei definitionem concla-*  
*marunt: Nos eos, qui addunt quid, vel adimunt, ana-*  
*thematizamus. Ergo particula Filioque Symbolo Nicae-*  
*no-Constantinopolitano adjecta est contra Canones in*  
*tribus Conciliis Oecumenicis sancitos; ideoque impro-*  
*banda.*

*R. Dist. ant. Prohibuerant Concilia illa, aliquid in*  
*symbolo Nicaeno mutare, addere, minuere, quod esset*  
*contra fidem Nicaenam; conc. Quod esset ipsius Fidei*  
*Nicaenae clarior expositio, subdistin. Prohibuere pri-*  
*vatos, conc. Ipsam Ecclesiam, neg. Vetant igitur*  
*Patres aliquid mutari, addi, minui in symbolo Nicae-*  
*no, quod ipsam Nicaenam fidem violaret, quale erat*  
*symbolum Nestorianum a Charisio oblatum: idque si-*  
*gnificatur a Patribus per alteram fidem praeter definitam:*  
*non vetant autem additionem Nicaeno symbolo conso-*  
*nam; alioquin nec ipsum symbolum Constantinopolita-*  
*num recipiendum esset; quia aliquid addit Nicaeno.*  
*Hinc Concilium Chalcedonense Actione I. anathema dixit*  
*Dioscoro, eo quod in Ephesino Latrocinio deposue-*  
*rit Flavianum, et Eusebium Dorilaei Episcopum, propter*  
*additionem factam Nicaeno symbolo eorum verborum: et*  
*consubstantialem nobis secundum humanitatem. Quod qui-*  
*dem anathema injustum fuisset, si Concilium Ephesinum*  
*poena depositionis, et excommunicationis quamcumque*  
*additionem prohibuisset, etiam non contrariam Nicaenae*  
*fidei. Sic Joannes Abtiochenus, ceterique Orientales*  
*Episcopi ap. Cyrillum Alex. in Epist. ad Joan. Antioch.*  
*profitentur, se nihil addere fidei in Nicaea a Sanctis*  
*Patribus expositae: et tamen post professionem hanc,*  
*longam fidei confessionem edunt, in qua multa addunt*  
*de Incarnatione, aliisque dogmatis, quae in Nicaeno*  
*symbolo non sunt. Cautum etiam est, ne quis priva-*  
*tus aliquid addere audeat Nicaeno symbolo; sed id non*  
*impedit, quominus ipsa Ecclesia, quae eandem nunc*  
*habet auctoritatem, quam habebat in Concilio Ephesino,*  
*et Chalcedonensi, addat ea, quae sibi expedire visa sunt;*  
*cum*

etiam haec additio pertineat ad disciplinam pro temporum varietate mutabilem.

*Inst. Leo III.* R. Pontifex anno DCCCIX. restituit Legatis Concilii Aquisgranensis petentibus, ut additio particulæ *Filioque* facta symbolo ab ipso Leone probaretur: imò symbolum sine ea voce Graecis, et Latinis literis duobus scutis argenteis insculpi jussit ad perpetuam memoriam. Judicavit igitur quaecumque additionem a quocumque factam esse illicitam.

*¶. Dist. ant.* Ita se gessit Leo, quia additio fiebat ab Ecclesiis particularibus, necdum ipsi videbatur necessaria, *conc.* Quia absolute erat illicita, *neg.* Haec enim contigerunt ante Schisma Photii, ex quo Graeci coeperunt impudentius Latinam Ecclesiam accusare haereseos propter doctrinam de processione Spiritus Sancti ex Patre, et Filio.

*Quaeres*, quonam tempore additio illa facta sit?

*¶. Manuel Calecas et Genebrardus* cam additionem tribuunt Damaso Papae saec. IV. *Baronius* post *S. Antoninum*, *Julianum* Cardinalem in *Sess. IV. Conc. Florent.* et alios, putat, factam in septimā synodo Oecumenica. Sed haec non satis probata sunt; imò valde suspecta redduntur ex facto Leonis III., de quo paulo ante diximus. Quod certum est, primo invenitur haec additio facta in Hispaniis in Concilio Toletano III. anno DLXXXIX., deinde in Galliis, et in Germania in Concilio Aquisgranensi anno DCCCIX.; postremo in Italia, et in ipsa Romana Ecclesia medio Saeculo IX. circa tempora Nicolai I., ut constat non solum ex objectionibus Photii, verum etiam ex responsione Ratramni Corbejensis *Lib. II. Responsionum ad Object. Graecor.*, qui probat, eam additionem in Ecclesia Occidentali recte factam; tandem totius Ecclesiae judicio probata est in Conciliis Oecumenicis. De additione vocis *Filioque* vide Petrum Pithaeum in *Historia Controvers. De Process. Spir. S.* Jam enim aliqua de processionum divinarum principio addenda sunt, ut suus etiam Scholasticis quaestionibus tribuatur locus. Quas tamen non more Scholasticorum tractabimus, qui magnas his de rebus, atque prolixas solent gerere controversias; sed attingemus leviter, ne aut

92 *Theologicarum Institutionum Lib IV. Cap. VII.*  
aut omnino contempsisse Scholas; aut diutius, quam par  
erat, in iis immorati videamur.

#### §. IV.

##### *De principio divinarum processionum.*

*Ado. I.* Duplex Theologi principium distinguunt, quo-  
rum alterum dicitur *principium quod*, alterum *principium*  
*quo*. Prius est persona, quae producit; alterum est virtus,  
qua producit; et hoc iterum duplex est *remotum*, et *pro-*  
*ximum*. Proximum est virtus, quae *immediate* producit;  
*remotum*, quod *mediate*. Res explicari potest exemplo  
artificis. Sculptoris persona *ex. gr.* est *principium quod*  
producit opus; *actiones* enim *sunt suppositorum*, seu  
personarum: virtus autem ejus est *principium quo*. Et  
hoc duplex est; aliud *remotum*, nempe natura huma-  
na, intellectus, voluntas, ars, brachia, manus; aliud  
*proximum*, nempe malleus, et scalprum. Sic etiam in  
actibus internis intellectionis, et voluntatis, persona Pe-  
tri est *principium quod*: natura humana est *principium*  
*quo remotum*: intellectus, et voluntas *principium quo*  
*proximum*.

II. De principio *quod* divinarum processionum nulla  
est inter catholicos controversia; constat enim, Patrem  
generare Filium: Patrem, et Filium *spirare* Spiritum  
Sanctum; unde Patris persona est *Principium quod* Fi-  
lii: Patris, et Filii persona est *principium quod* Spiritus  
Sancti. Sed controversia est in scholis agitata, quodnam  
sit *principium quo*? licet enim nulla sit in Deo *realis*  
distinctio inter haec principia, est tamen *virtualis*.  
*Principium quo remotum* esse naturam divinam, consen-  
tiunt Theologi. *Principium vero quo proximum* Duran-  
dus in *I. Dist. VI. q. 2.* putat, esse ipsam naturam  
divinam, prout est foecunda, et infinita; *S. Bonaventura*,  
*ipsas relationes paternitatis, filiationis, spirationis*,  
de quibus infra agemus; *S. Thomas*; et reliqui Theologi,  
intellectum, et voluntatem, non absolute considerata;  
sic enim tribus personis communia sunt, nec tamen sin-  
gulae personae aliud producant *terminum*; sed quatenus  
adjunctas habent relationes paternitatis, et spirationis  
acti-

activae, tamquam conditiones, sine quibus intellectus, et voluntas nihil producerent.

## PROPOSITIO I.

*Natura divina est principium quo remotum; sed non proximum divinarum processionum.*

*Prob. 1a. pars.* Illud est divinarum processionum principium quo remotum, in quo tamquam in radice continetur producendi virtus. Atqui virtus producendi, quaecumque tandem illa sit, continetur in natura divina, tamquam in radice, a qua nostro intelligendi modo omnia Dei attributa, et omnis operatio manare intelligitur. Ergo.

*Prob. 2a. pars. 1.º ex definitione Concilii Lateranensis IV. sub Innoc. III., in quo contra Libellum Abatis Joachim probata est sententia Petri Lombardi 1. Sent. Dist. 5. nempe: Natura Divina est quaedam summa res, quae nec gignit, nec gignitur, nec procedit.* Nos, inquit Pontifex cap. 2., sacro approbante Concilio, credimus, et confitemur, quod una quaedam summa res est, incomprehensibilis quidem; et ineffabilis, quae veraciter est Pater; Filius, et Spiritus Sanctus ... et illa res non est generans, nec genita, nec procedens. Ergo natura divina non est principium quo proximum divinarum processionum.

2.º Inter produciens, atque productum realis necesse est intercedat distinctio; absurdum enim est, ut aliquid semetipsum producat. Ergo si natura divina esset principium quo proximum divinarum processionum Filii et Spiritus Sancti; jam ipsius Filii, et Spiritus Sancti natura esset numero distincta a natura Patris: quod repugnat unitati essentiae divinae: imo Filii et Spiritus S. personae a natura divina reipsa distinguerentur: quod absurdum esse *Lib. III. cap. 3.* demonstravimus. Ergo etc.

3.º Omnis natura nihil immediate per se producit, sed per facultates suas. Ergo.

*Objic. 1. cont. 1m. part.* Concilium Lateranense IV., ut paulo ante dictum est, definitivè naturam divinam non esse nec generantem, nec genitam; nec procedentem.

Ergo

Ergo non est principium quo remotum divinarum processionum.

¶ *Neg. cons.* Laudata enim definitio intelligenda tantum est de principio quo proximum, non autem remoto. Cujus rei ea ratio est, quia si natura divina poneretur ut principium quo proximum processionis Filii, et Spiritus Sancti, necessario sequeretur, naturam Filii, et Spiritus Sancti esse numero distinctam a natura Patris, ut mox ostendimus. Et revera Abas Joachim hanc doctrinae suae consequentiam vidit, et docuit, unitatem (naturae divinae) non esse veram, et propriam, sed quasi collectivam, et similitudinariam: quemadmodum dicuntur multi homines unus populus, et multi fideles una Ecclesia, juxta illud Act. IV. 32. multitudinis creditum erat cor unum, et anima una. Sed si natura divina statuitur principium quo remotum divinarum processionum, absurdum illud non sequitur. Virtus enim generandi, atque spirandi, quae tamquam ex fonte a natura divina fluere intelligitur, nihil aliud est, nisi virtus communicandi cum Filio, et Spiritu Sancto eandem numero divinam naturam.

*Obje. II. cont. 2m. part.* Nulla est realis distinctio inter essentiam Dei, et ejus attributa, et operationem. Ergo quaecumque virtus, et operatio principium divinarum processionum esse dicatur, semper verum est. ipsam Dei essentiam esse processionum principium.

*Dist. ant.* Nulla est realis distinctio, sed tamen agnoscenda est distinctio virtualis, ut Libro III. cap. 3. diximus. *conc.* Secus, *neg.* Fatemur, in Deo intelligere, velle, et esse non distingui reipsa; sed cum virtute distinguantur, dicimus, principium processionum non esse statvendum proxime in ipsa essentia; si enim haec virtualis distinctio sufficit ut dicamus, essentiam Patris communicari Filio, non vero personam; sufficit etiam ut dicamus, non esse essentiam principium quo proximum processionum, sed aliud virtute ab ipsa essentia distinctum.

*Inst.* Patres docent, Filium esse de substantia Patris, de essentia Patris. Sufficiant pro omnibus Patres Concilii Toletani XV. anno DCLXXXVIII. Filius, inquit, Dei de essentia Patris natus est, essentia de es-

sen-

*sentia, sicut natura de natura, et substantia de substantia ..... sic et voluntas de voluntate .....* quia non est aliud Dei voluntas, aliud Dei natura. Sic et Hilarius *Lib. de Synodis: Omnibus creatis substantiam Dei voluntas attulit; Filio vero natura dedit.* Et Damascenus *Lib. I. de Fid. Ord. vap. 8.* ait, generationem esse opus naturae. Ergo.

*¶ M. Dist. ant.* Docent, Filium esse de essentia Patris ad evertendum errorem Arianorum, qui asserabant, illum esse ex nihilo creatum, *conc.* Ad constituendam essentiam principium quo proximum processionis, *neg.* Non ergo iis in locis propositum erat Patribus enucleatius explicare principium quo proximum processionis; sed tantum Arianos oppugnare, qui docebant, Filium esse creaturam libera Patris voluntate ex nihilo eductam.

## PROPOSITIO II.

*Intellectus, et voluntas sunt in Deo principium quo proximum generationis Filii, et processionis Spiritus Sancti, non quidem absolute spectata, sed quatenus adjunctas habent relationes Paternitatis, et Filiationis.*

*Prob. 1a. pars.* nempe intellectum Patris esse principium quo proximum generationis Filii. I. Sacrae litterae Filium appellant Verbum Patris. *Joan. I. In principio erat Verbum.* Et quidem hoc nomine cum ab aliis personis distinguunt *I. Joan. V. 7. Tres sunt qui testimonium dant in Caelo: Pater, Verbum, et Spiritus Sanctus.* Atqui Verbum est terminus intellectus. Ergo.

*¶ Prob. II. ex PP.,* qui ideo Filium, docent appellari Verbum, quia de Patris mente, atque intelligentia procedit. 1.º Tertullianus *Lib. cont. Praxeam cap. 5.* ait, Filium esse Dei rationem, quod cogitando Pater illum generat. 2.º Basiliius *Hom. VI. Cur Verbum?* Ut perspicuum sit, processisse ex mente. 3.º Gregorius Nazianz. *Orat. XXXVI. Verbum porro dicitur, quia ita se habet ad Patrem, ut sermo ad mentem.* 4.º Augustinus *Lib. XV. de Trin. cap. 13. Verbum natum est ... de Patris scientia, de Patris Sapientia.* 5.º Fulgentius *Lib.*

*III. ad Monim. c. 7. Sic est Verbum apud Deum, sicut est in mente verbum, sicut in corde consilium; cum enim mens apud se verbum habet, utique cogitando habet; quia nihil aliud est apud se dicere, quam apud se cogitare. Cum ergo mens cogitat, et cogitando verbum intra se generat, de sua substantia generat verbum.*

*Prob. III. ratione Theologica. Filius Colos. I. 15. dicitur imago Dei invisibilis: et Heb. I 3. Splendor gloriae et figura substantiae Patris. Atqui ens maxime spiritale, ut est Deus Pater, non alia ratione potest intra se gignere sui ipsius imaginem, et figuram nisi per intelligentiam; mens enim intelligendo imaginem objectae rei intra se format. Ergo etc. Et quamvis in mente creata verbum, sive imago rei objectae, personam non sit subsistens, sed mera objectae rei idea, in Deo tamen imago cum perfectissima sit, subsistentiam habet; alioquin non perfecte personam Patris, qui est persona subsistens, repraesentaret.*

*Prob. 2a. pars. Spiritus Sanctus vocatur a Patribus Charitas, Amor, Dilectio, Unio, et Complexus Patris et Filii. Atqui haec omnia a voluntate proficiscuntur. Ergo etc. Ipsum nomen spiritus actum voluntatis designat; spiritus enim motio est, atque impulsus: voluntatis autem est mentem in rem amatam movere, inclinare, impellere. Ergo etc.*

*Prob. 3a. pars. Intellectio, et volitio absolute spectata communis actus est trium personarum; non minus enim Pater, quam Filius, et Spiritus Sanctus intelligunt, atque amant; quia unica est tribus operatio, sicut una natura. Ergo si intellectio, et volitio absolute principium essent processionum, profecto Filius, et Spiritus Sanctus alias etiam personas producerent, et ita processiones in divinis essent numero infinitae. Quod absurdum esse, nemo non videt. Ergo intellectio, et volitio producunt Verbum, et Spiritum Sanctum, quatenus conjunctae sunt cum Paternitate, et Spiratione activa, non tamquam principiis ad productionem concurrentibus, ut nonnulli volunt Scholastici, quia earum relationum munus, ac virtus non est producere, sed duntaxat terminare naturam, et referre unum ad alium; verum tamquam conditione, sine qua intellectio, et volitio subsistentes termi-*



nos non producerent: sicut *Petraitas*, ut ajant, in Petro non est principium ejus operationum: sed tantum natura humana, quae in abstracto quidem operari non posset, quia subsistentia careret; operatur tamen quantum tenus a persona Petri terminatur, ita ut ipsa Petri persona sit conditio, sine qua natura humana, quia non non subsisteret, operari non posset.

## Corollaria.

I. Ergo solae relationes *Paternitatis*, et *Filiationis*, non sunt principum quo proximum divinarum processionum. Si enim non sunt principium etiam conjunctae cum intellectione, ac volitione, ut dictum est; a fortiori si solae spectentur.

II. Ex iis, quae de principio processionis Filii, et Spiritus Sancti dicta sunt, erui potest aliqua ratio, cur processio Filii dicatur generatio, non vero ita vocetur processio Spiritus Sancti. Quamvis enim Petavius *Lib. VII. cap. 13.* novem recenseat rationes a veteribus excogitatas hujus discriminis; verisimilior tamen est sententia S. Thomae *I. P. Q. XXVII. art. 1. et 2.*, et *Q. XXXIV. art. 2.* Generatio enim est origo viventis a vivente principio conjuncto, in similitudinem naturae vi processionis: quae est definitio generationis apud Theologos, et Philosophos recepta. Atqui in ente spiritali solus intellectus virtutem habet producendi sibi similem imaginem, ut supra dictum est; voluntas vero natura sua non ad similitudinem tendit, sed ad unionem. Ergo Filius, qui procedit per intellectum; vi suae processionis similitudinem habet cum Patre; ac proinde ejus processio recte generatio dicitur. *Processio Verbi*, inquit S. Thomas, in divinis habet rationem generationis; procedit enim per modum intelligibilis actionis, quae est operatio vitae, et a principio conjuncto, et secundum rationem similitudinis; quia conceptio intellectus est similitudo rei intellectae; et in eadem natura existens. Vide quae Petavius *Lib. VII. cap. 14.* congerit ex Patribus testimonia pro hac D. Thomae doctrina. Haec tamen pro catholicis non ut certa, sed ut verisimilia dicta sunt. Haereticis enim om-

98. *Theologicarum Institutionum Lib. IV. Cap. VII.*

nino dicendum est, nos discrimen utriusque processionis nescire, ut supra monuimus. *Et quidem generationem inter, et processionem discrimen intercedere edocti sumus; caeterum quis sit hujus distinctionis modus, prorsus nescimus, inquit Damascenus Lib. I. de Fid. Orth. cap. 10.*

III. Sequitur etiam ex dictis, distinguendam esse intellectionem, et amorem *essentialem* ab intellectione, et amore *notionali*. . . Prior actus est tribus personis communis, diciturque absolute intellectio, atque amor. Altera vero, nempe intellectio *notionalis* est Patris proprius, et appellatur *dictio*; *dicere* enim significat non solum intelligere, sed etiam intelligendo verbum exprimere. Amor *notionalis* est proprius Patris, et Filii, et dicitur *spiratio*; *spirare* enim significat in divinis non solum amare, sed etiam amando personam producere, quae terminus amoris est. Caeterum *essentialis* actus a *notionali* non distinguitur reipsa, sed ratione, *κατ' ἀντιφασιν* propter diversos, quos producant, ac respiciunt effectus. Unus tamen est, idemque simplicissimus actus, qui simul intellectio, ac voluntas est, ex quo Filius, et Spiritus S. ab aeterno, et res creatae in tempore, quamvis non eadem ratione, modoque, processerunt.

IV. Quamquam attributa absoluta, et operationes *ad extra* tribus personis communia sunt; tamen *per appropriationem* quaedam uni, quaedam alteri tribuuntur a Scriptura et Patribus, prout conveniunt uniuscuiusque personae notioni, et modo, quo ab alia procedit. Sic quia Pater est fons et origo totius divinitatis, Filius a Patre per intellectum, et Spiritus a Patre et Filio per voluntatem sive amorem, Patri tribuuntur opera omnipotentiae; unde in symbolo Deus Pater Omnipotens dicitur: Filio opera sapientiae; unde *Prov. VIII.* Dei sapientia vocatur; et *I. Cor. I. 24.* Dei virtus et sapientia: Spiritui Sancto opera amoris; *Charitas Dei diffusa est in cordibus nostris per Spiritum Sanctum, qui datus est nobis Rom. V. 5.*

V. Quoniam intellectus, et voluntas, et quodcumque aliud statuatur divinarum processionum principium est actus in Deo maxime necessarius, hinc processionem necessariae etiam dicendae sunt. Si ergo Patres aliquando

cas

nas esse affirmant voluntarias, sicut Concilium Sardicense apud Hilarium *Lib. de Synodis* anathema dicit iis, qui dicerent, *quod neque consilio, neque voluntate Pater genuerit Filium*; et Concilium Syrmienſe (*ibid.*) statuit, ut si quis nolente Patre natum dicit Filium, anathema sit; intelligendi sunt de voluntate concomitante: sicut si quis diceret, Petrum voluntarie esse hominem, quod vult, eiſque placet esse hominem: ut sapienter rem explicat S. Thomas, cujus doctrinam hac in parte, ut saepe alias, non solidis rationibus impugnat Petavius. Caeterum cum Ariani voluntarium acciperent pro eo quod est liberum, ut inde inferrent, Verbum libera Dei voluntate factum, sicut creaturae; negarunt Patres, processiones esse eo sensu voluntarias, ut videre est apud Augustinum *Lib. XV. de Trin. cap. 20.* Hinc iisdem haereticis ita objicentibus; vel Pater volens genuit Filium, vel nolens; respondebant: nec volens genuit, nec nolens; sed naturaliter.

## Solvuntur objectiones.

*Objic. I. cont. 1. et 2. prop. part.* Principium quo proximum divinarum processionum non debet esse tribus personis commune; alioquin singulae personae alias producerent. Atqui intellectus, et voluntas sunt tribus personis communes. Ergo.

*¶. Dist. min.* Intellectus, et voluntas absolute spectatae sunt tribus personis communes, *conc.* Prout conjunctae cum relationibus paternitatis, et spirationis activae, *neg.*

*Inst. 10.* Nulla est potior ratio cur intellectio Patris producat Filium, non vero intellectio Filii, et Spiritus Sancti: amor Patris et Filii spiret Spiritum Sanctum, non vero amor, quo Spiritus Sanctus seipsum, et alias personas prosequitur. Ergo.

*¶. Neg. ant.* Ratio enim cur intellectio Filii, et Spiritus Sancti alium Filium non producat ea est, quod intellectio Filii, et Spiritus eadem reipsa est cum intellectione Patris; ac proinde cum una, eademque intellectio nonnisi unum *adaequatum* habere possit terminum, qui est ipsum Verbum, infinitum, et perfectissi-

me repraesentans quidquid est intelligibile; sequitur non posse aliud verbum produci per eandem intellectionem; prout est in Filio, et Spiritu Sancto; alioquin prius illud Verbum imperfectum esset; quia esset aliud verbum intelligibile ab illo distinctum.

*Inst. 2.º* Ex concessis intellectio Verbi ab intellectione Patris non distinguitur. Atqui intellectio Patris generat Verbum. Ergo Verbum per eandem intellectionem generat seipsum, quod absurdum est: idem de Spiritu Sancto dicas.

*R. Dist. min.* Intellectio Patris generat Verbum, quatenus est cum relatione paternitatis conjuncta, ut supra diximus, *conc.* Secus, *neg.* Similiter cum amor Spiritus Sancti non sit reipsa ab amore Patris et Filii distinctus, cujus terminus *adaequatus* ipse est Spiritus Sanctus, non potest alium Spiritum producere.

*Objic. II. cont. 2. Coroll.* Processio Spiritus Sancti, licet sit per voluntatem, est etiam origo viventis a vivente principio conjuncto in similitudinem naturae vi ipsius processiois. Ergo non minus dici posset generatio quam processio Verbi.

*Prob. ant.* Quod sit origo viventis a vivente principio conjuncto in similitudinem naturae, patet; nam Spiritus Sanctus est persona vivens a principio vivente, et conjuncto producta, habens naturam similem, imo eandem cum principio, a quo procedit; quod vero naturam similem habeat vi processiois, videtur etiam certum; 1.º quia Spiritus Sanctus non habet naturam divinam a se; ergo ab alio vi processiois; 2.º quia procedit ut Deus; ergo ut similis in natura vi processiois.

*R. Neg. ant.* quoad ultimam partem. Licet enim Spiritus Sanctus procedendo naturam habeat divinam; non tamen vi processiois habet. Virtus enim amoris non ea est, ut producat terminum amanti similem; sed tantum ut nexum efficiat, et *unionem* amanti, atque amati: quae Unio in divinis ipse Spiritus Sanctus est, virtute a natura divina distinctus; sed quia Unio non est distincta *reipsa* a divina natura, ideo Spiritus Sanctus, qui vi suae processiois est Unio Patris, et Filii, habet etiam per *concomitantiam*, ut ajunt, naturam di-

vi-

*De Trinitate.* 101

vinam. Caeterum haec sobrie tractanda sunt, et confitendo semper mentis nostrae imbecillitatem.

*Iust. Cam Tournely.* Ex concessis Patres, ut *Damasenus*, *Augustinus* supra laudati, et alii aperte confessi sunt, humani ingenii tenuitatem rationem discriminis inter generationem Verbi, et processionem Spiritus Sancti perspicere non posse. Ergo satius est eorum imitari modestiam, quam ullum utriusque processionis afferre discrimen.

*n. Dist. ant.* Et tamen illi ipsi Patres, qui hoc ingenue fassi sunt, non propterea abstinuerunt ab afferendis probabilibus ejus discriminis rationibus in gratiam catholicorum, *conc.* Secus, *neg.* Et revera ratio a *S. Thoma* exposita etiam a Patribus fuerat excogitata, praecipue ab *Augustino*. Nos ergo Patres ipsos imitantes fatemur, id a nobis certo sciri non posse, silente revelatione, sed tamen; quod probabilius est visum, attulimus.

*Scholion.*

I. Quae runt hic ulterius Scholastici; ex quarum rerum intellectione, et ex quarum rerum amore praecedit Verbum, et Spiritus Sanctus. Et quod ad Verbum quidem, *Scotistae* docent, procedere tantum ex cognitione essentiae divinae, et attributorum absolutorum: *Thomistae* ex cognitione essentiae, et omnium attributorum; imo et creaturarum possibilitium: alii denique ex cognitione non solum essentiae divinae, attributorum omnium, et creaturarum possibilitium, sed et creaturarum existentium, posito divino decreto, quo eas producere ab aeterno constituit. Haec postrema sententia verisimilior est; 1.<sup>o</sup> quidem quia unica, et simplicissima est in Deo intellectio, aeterna, perfectissima, et comprehendens res omnes, quae cognosci possunt, ejusque cognitionis terminus unus est, Verbum scilicet divinum: 2.<sup>o</sup> quia id saepe docet *Augustinus*. Ait enim *Lib. XI. Confes. cap. 7. Verbum sempiternae dicitur, et eo sempiternae dicuntur omnia; neque enim finitur quod dicebatur, et dicitur aliud, ut dici possint omnia, sed simul ac sempiternae omnia.* Et *Lib. XV.* de

de Trin. cap. 14. *Novit omnia Deus Pater in seipso, novit in Filio, sed in seipso tamquam seipsum, in Filio tamquam Verbum suum, quod est de omnibus, quae sunt in seipso.*

II. Neque vero inde sequitur, creaturas esse Verbi principium; aut, quod idem est, Verbum esse creaturarum imaginem. Licet enim in creaturis rationalibus objecta res cum intellectu concurrat tamquam cognitionis principium; non ita tamen est in Deo, qui creaturas omnes in seipso videt, ut in *Lib. III. cap. 13. §. 3.* probavimus; ac proinde creaturae non sunt *objectum* movens, sed terminus divinae cognitionis.

III. Pari ergo ratione de Spiritu Sancto dicendum est, cum procedere necessario quidem ex amore essentialis divinae, et attributorum omnium: ex amore vero creaturarum non necessario, sed posito decreto divino, quo eas producere ab aeterno statuit, nullo modo ex amore possibilem; quia non est in Deo amor hic, ut in *Lib. III. cap. 14.* dictum est. Sicut enim unica est in Deo cognitio comprehendens omnia, quae cognosci possunt; ita et unus amor omnia amabilia complectens, cujus amoris terminus est Spiritus Sanctus. Quidquid autem est, a Deo amatur *Sap. XI. 25. Diligis omnia, quae sunt; et nihil odisti eorum quae fecisti.* Sed cum amor creaturarum in Deo liber sit, non procedit ex eo Spiritus Sanctus, nisi ex hypothesei divini decreti. Caeterum qui odium mali proprie dictum in Deo agnoscunt, fatentur etiam, Spiritum Sanctum ex eo odio procedere; ideoque peccatum Spiritui Sancto praesertim opponi: unde ait Apostolus *Ephes. IV. 30. Nolite contristare Spiritum Sanctum.*

IV. Quae si vera sunt, quis non videt, quanto nos erga totam Trinitatem amoris impetu incitari necesse sit, scientes, ex eadem illa Patris intellectione, atque eodem Patris, Filiique amore, licet non eodem modo, processisse nos, sive conditos esse in tempore, ex qua intellectione, atque amore ipsae Filii, et Spiritus S. personae ab aeterno processerunt: imo ejusdem nos intellectionis, atque amoris *objectum*, licet non necessarium, ab aeterno extitisse? Nam sicut unaquaeque divina persona in aliarum cognitione, et dilectione tota est,

est, ut quidquid intelligit, et vult, ad illam cognitionem, atque amorem referatur; ita nos quoque ad totius Trinitatis cognitionem, ac dilectionem quidquid cogitamus, atque diligimus, referre debemus, cujus dilectionis nexus erit, ac vinculum, quamquam dispari ratione, Spiritus S., qui Patrem Filiumque connectit. Quam quidem cum SS. Trinitate societatem significare videtur *Joannes. I. cap. I. 3.* dicens; *Ut et vos societatem habeatis nobiscum, et societas nostra sit cum Patre, et cum Filio ejus Jesu Christo.* A qua societate, qui peccando divellitur, quantum efficiat malum, comprehendere non potest. Sed haec nimis sublimia modum nostrae imbecillitatis excedunt.

## C A P. VIII.

*Consectaria capituli praecedentis. De circuminsessione, et missione divinarum personarum.*

**Ado. I.** Quoniam Pater Filio, et rursum Pater, et Filius Spiritui Sancto eandem número divinam naturam communicant, quae non est distincta reapse a personis, hinc sequitur divinarum personarum *circuminsessio*, quam Graeci *περικύρησις* appellant, quod Latine dici potius *circumincessio*, quam *circuminsessio* posset, ut observat *Petavius*. Est igitur circuminsessio proprietas, qua una persona intime, et mutuo in alia inest, sine earundem personarum confusione. *Per hanc naturalem unitatem*, inquit *Fulgentius Lib. de fide ad Petrum cap. 1.*, *totus Pater in Filio, et Spiritu Sancto, totus Filius in Patre et Spiritu Sancto est, totus quoque Spiritus Sanctus in Patre et Filio.*

**II.** *Missio* vero est unius personae processio ab alia, adjunctum habens temporalem effectum; unde *missio includit processionem aeternam, et aliquid addit, scilicet temporalem effectum*, ut inquit Angelicus Doctor *I. P. Q. XLIII. art. 2. ad 3.* Et 1.º quidem missio est processio unius personae ab alia; quia cum missio sit exitus quidam, et processio unius ab alio, nec una persona divina possit ab alia separari, et digredi, tamquam de-

lo-

104 *Theologicarum Institutionum Lib. IV. Cap. VIII.*  
 loco in locum, cum unaquaeque immensa sit, et in alia  
 existens per circumin sessionem, patet missionem in divi-  
 nis non aliam esse posse, quam internam, atque aeter-  
 nam processionem. Ideo solus Pater non legitur missus;  
 quia non habet auctorem, a quo genitus sit, vel a quo  
 procedat, ut ait Augustinus *Lib. contr. Serm. Arianor.*  
*cap. 4.*; sed tantum dicitur venire, tamquam ab alio  
 non missus, ut *Joan. XIV. 23.* Si quis diligit me,  
 sermonem meum servabit; et Pater meus diliget e-  
 um, et ad eum veniemus, et mansionem apud eum fa-  
 ciemus.

2.<sup>o</sup> Adjunctum habet temporalem effectum, quia cum  
 persona divina immensa sit quod ad substantiam, non  
 potest praesens fieri rebus, et loco, quo mittitur, nisi  
 per novam quandam, ideoque temporalem operationem;  
 atque ideo in Scripturis missioni semper temporalis ali-  
 quis effectus adjungitur. Quod si aliquando Patres, ut  
 Cyrillus Alex. *Lib. II. in Joan.* missionem appellant  
 solam processionem aeternam, ii de missione inadaequa-  
 ta sunt intelligendi. Sit igitur.

## PROPOSITIO I.

*Agnosenda est divinarum personarum in se invi-  
 cem circumin sessio. Est dogma fidei.*

*Prob. I. ex Script. Joan. X. 38.* ait Filius: Pater in  
 me est; et ego in Patre, Et *cap. XIV. 10.* Non cre-  
 ditis quia ego in Patre, et Pater in me est? . 4 . Pa-  
 ter autem in me manens, ipse facit opera.

*Prob. II. ex PP. 1.<sup>o</sup> Tertullianus Lib. cont. Prax.*  
*cap. 25.* Connexus, inquit, Patris in Filio, et Filii in  
 Paraclete tres efficit cohaerentes, alterum ex altero,  
 qui tres unum sunt, non unus. 2.<sup>o</sup> Hilarius *Lib. VIII.*  
*de Trin.* Fides est, Patrem in Filio, et Filium in Pa-  
 tre per inseparabilis naturae unitatem confiteri. 3.<sup>o</sup> Au-  
 gustinus *Lib. VI. de Trin. cap. 10.* In summa Trini-  
 tate tantum est una (persona), quantum tres simul, nec  
 plus aliquid sunt duae, quam una . . . . . Ita et sin-  
 gulae sunt in singulis, et omnia in singulis, et singu-  
 lae in omnibus, et omnia in omnibus, et unum omnia.

4.<sup>o</sup>



4.<sup>o</sup> Hyeronimus in *Cap. III. Ezech. Filius est locus Patris, sicut et Pater est locus Filii. Fulgentii locum supra protulimus. Idem alii docent (a).*

*Obje.* Si Pater esset in Filio, utique in Filio esset paternitas. Atqui in Filio non est paternitas: alioquin Filius esset Pater, quod fidei repugnat. Ergo etc. Idem de aliis personis dicas.

¶ *Dist. maj.* Esset in Filio paternitas tamquam forma, per quam Filius subsistat, *neg.* Esset paternitas per simplicem unitatem, sive, ut ajunt, *identitatem* cum natura divina, quae est in Filio, *conc.* Ut Filius sit Pater, non sufficit ut in eo sit paternitas, tamquam aliquid non distinctum reipsa a divina Filii natura; sed requiritur, ut ipse Filius per paternitatem subsistat. Hoc autem non accidit in circuminsessione.

*Inst.* Quae se mutuo excludunt, non possunt in se mutuo esse. Atqui tres personae SS. Trinitatis sese mutuo excludunt; nam inter se relative opponuntur propter paternitatem, filiationem, spirationem activam, et passivam. Ergo.

¶ *Dist. maj.* Quae se mutuo excludunt quoad omnia, non possunt esse in se mutuo, *conc.* Quae se mutuo excludunt quoad aliqua, *neg.* Porro personae divinae non quoad omnia se mutuo excludunt; nam in natura divina unum sunt. Vide S. Thomam *I. P. Q. XLII. art. 5.* De circuminsessione fusiùs tractarunt Genebrardus *Lib. II. de Trin.*, Petavius *Lib. IV. cap. 16.*, et alii.

PRO-

---

(a) Dionysius Rom. *Epist. cont. Sabell. ap. Athanas. Athanas. in legat. pro Christ.*, Dionysius Alexandr. *in Apolog. ap. Athanas.*, Basilius *Epist. XXXVIII.* Ambrosius *Lib. X. in Luc.*, Dionysius *De Div. nomin. cap. 2.*, Damascenus *Lib. 1. de fid. cap. 8. etc.*

## PROPOSITIO II.

*Agnosenda est divinarum personarum, nempe Filii, et Spiritus Sancti missio; eaque duplex, visibilis, et invisibilis. Est fidei dogma.*

*Prob. 1a. pars. Joan. III. 17. Non misit Deus Filium suum in mundum, ut judicet mundum, sed ut salvetur mundus per ipsum. Item Joan. VIII. 16. Solus non sum: sed ego, et qui misit me, Pater: et cap. X. 36. Quem Pater sanctificavit, et misit in mundum, vos dicitis: quia blasphemas, quia dixi: Filius Dei sum. Gal. IV. 4. At ubi venit plenitudo temporis, misit Deus Filium suum, factum ex muliere, factum sub lege. Ecce missio Filii. De missione vero Spiritus Sancti ait Apostolus. Ibid. 6. Misit Deus Spiritum Filii sui in corda vestra clamantem: Abba, Pater. Et Joan. XIV. 26. Paraclitus Spiritus Sanctus, quem mittet Pater in nomine meo: et cap. XVI. 7. Si autem abiero, mittam eum ad vos. Ergo.*

*Prob. 2a. pars. Effectus temporalis per missionem productus aliquando est visibilis, ut in incarnatione Verbi, et in illapsu Spiritus Sancti super Christum in specie columbae, et super Apostolos in specie ignis; aliquando vero invisibilis, ut cum dicitur Sap. IX. 4. et 10. Da mihi sedium tuarum assistricem sapientiam. . . mitte illam de caelis sanctis tuis. Et de Spiritu Sancto Rom. V. 5. Charitas Dei diffusa est in cordibus nostris per Spiritum Sanctum, qui datus est nobis: et Galat. IV. 6. Misit Deus Spiritum Filii sui in corda vestra. Ergo.*

*Objic. Qui mittitur, minor est mittente. Atqui tres personae aequales sunt, Ergo non potest ulla mitti.*

*g. Dist. maj. Qui mittitur per imperium, conc. Qui mittitur per processionem, quae adjunctum habet temporalem effectum, neg. Responsio patet ex definitione missionis.*

*Inst. 10. Effectus temporalis toti est Trinitati communis; est enim opus ad extra. Ergo nulla singularis persona ad eum producendum mitti potest.*

*N. Dist. ant.* Est communis toti Trinitati, sed tamen per appropriationem tribuitur uni, aut alteri personae, cuius notioni praecipue congruit, *conc.* Secus. *neg.* Vide quae supra diximus *Cap. praec. §. 4. prop. 2. Corol. 4.*

*Inst. 20.* Missio non fit semper per processionem. Nam Synodus Toletana XI. in *fidei Profess.* ait: *Missus Filius non solum a Patre, sed et a Spiritu Sancto missus esse credendus est in eo quod per Prophetam dicitur: et nunc Dominus misit me, et Spiritus ejus. A seipso quoque missus accipitur, pro eo quod inseparabilis non solum voluntas, sed et operatio totius Trinitatis agnoscitur: patet autem, Filium non procedere a Spiritu Sancto, nec a seipso. Ergo si haec missio fieri non potest per processionem, fieri debet per imperium.*

*N. Dist. ant.* Missio improprie dicta non fit per processionem, *conc.* Missio proprie dicta, *neg.* Synodus enim Toletana loquitur de Filio, ut homine, in qua natura factus est utique imperio totius SS. Trinitatis obediens usque ad mortem. Loquitur etiam de hypostatica conjunctione naturae humanae cum persona Verbi, quam quidem conjunctionem tota simul Trinitas tamquam causa efficiens operata est. Porro ea missio proprie dicta non est.

### Scholion.

Etsi effectus invisibilis missionis tribus personis sit communis, personae vero missae per appropriationem tribuatur; satendum tamen est, ipsam personam, quae invisibili modo mitti dicitur, non solum per operationem, et dona, sed speciali quadam, et inexplicabili ratione, etiam quoad substantiam, homini justo, ad quem mittitur, copulari, in eoque habitare. Sic Apostolus *Rom. V. 5.* utrumque distinguit, nempe charitatem in corde, iusti diffusam (quod opus toti est Trinitati commune) et ipsam personam Spiritus justo datam. *Charitas Dei diffusa est in cordibus nostris per Spiritum Sanctum, qui datus est nobis.* Hinc etiam saepe ducet, justum esse templum Spiritus Sancti, eumque in iusto habitare, ut *Rom. VIII. 9. et 11., I. Cor. VI. 19. 11., II.*

108 *Theologicarum Institutionum Lib. IV. Cap. IX.*  
*II. Tim. I. 14. et alibi.* Idem etiam docent SS. Patres  
 ut Cyrillus *Lib. XXXIV. Thesauri*, Augustinus *Lib.*  
*XV. de Trin. cap. 26.*, et alii apud Petavium, qui  
 fuse hoc argumentum persequitur *Lib. VIII. cap. 4. 5.*  
*6. et 7.*

## C A P. IX.

### *De divinis relationibus.*

**A**d. J Am supra diximus, esse in Deo relationes qua-  
 tuor, *Paternitatem, Filiationem, Spirationem activam,*  
*et Spirationem passivam.* Multa autem de relationibus  
 Theologi disputant, quae nos partim alibi tractavimus,  
 partim explicabimus hoc capite. Nam relationes non distin-  
 gui reipsa ab essentia divina, contra *Gilbertum Porretanum*  
*Lib. III. cap. 3.* docuimus: distingui vero *virtualiter*, ut  
 ajunt contra Eunomianos et Nominales ibidem ostendimus;  
 ex quo consequens est, ut quamvis essentia, et relationes  
 prout sunt in Deo, unum idemque sint; tamen nostro intel-  
 ligendi modo essentia non sit, ut Scholae ajunt, de *con-*  
*ceptu formali* relationum, nec vicissim relationes de *con-*  
*ceptu formali* essentiae, qua de re acriter inter Schola-  
 sticos disputatum est. Quod quidem non ad Scotistarum  
 sensum, ac distinctionem intelligendum volumus, sed ad  
 significandum, essentiam, atque personas, licet unum rei-  
 psa sint, nostro tamen intelligendi modo per rationem,  
*κατ' ἐννοιαν* distingui. Vide *Lib. III. cap. 3.* Eas ve-  
 ro relationes, quae secum invicem opponuntur, ut *Pa-*  
*ternitas, et Filiatio, Spiratio activa, et passiva,* rea-  
 pse inter se distingui manifestum est. Quae vero non si-  
 bi invicem opponuntur, ut spiratio activa et paternitas,  
 spiratio activa et filiatio, non distingui realiter, constat  
 ex communi axioma: *in Deo omnia sunt unum, ubi*  
*non intercedit relationis oppositio*, ex Anselmo *Lib. de*  
*process. Spirit. S.* Superest igitur hic discutendum  
 1.<sup>o</sup> an relationes dici debeant perfectiones; 2.<sup>o</sup> an sin-  
 gulae propriam habeant existentiam, ita ut dici possit,  
 in Deo tres esse existentias; 3.<sup>o</sup> an praeter tres subsi-  
 stentias relationum proprias, agnosci debeat absoluta quae-  
 dam subsistentia, quae essentiae divinae conveniat.

## PROPOSITIO I.

*Relationes in divinis sunt perfectiones simplices.*

*Prob.* Esse Patrem, Filium, Spiritum Sanctum est relatio, sive esse relativum. Ait enim Augustinus *Lib. V. de Trin. cap. 13.* Dicitur relative Pater, Pater ad Filium dicitur. Item dicitur relative Filius, relative dicitur et Verbum, et Imago, et in omnibus his vocabulis ad Patrem refertur. Atqui esse Patrem, Filium, et Spiritum Sanctum perfectio est; docent enim Patres, divinitatem fore imperfectam, nisi in Patre, Filio, et Spiritu Sancto subsisteret: Non potest esse perfecta divinitas, inquit Cyrillus *Lib. II. The-sauri cap. 1.* nisi Filium habeat, et fructum ex se pariat. Ergo etc.

*Objic. I.* Si relationes essent perfectiones, singulae divinae personae non essent infinite perfectae; unaquaeque enim careret perfectione relativa, quae est in alia: Filius ex gr. paternitate: imo tres simul personae perfectiores essent, quam una. Atqui utrumque absurdum est. Ergo etc.

*R. Neg. seq. maj.* Cum enim relationes a natura divina non sint reapse distinctae, per circuminsessionem, de qua supra dictum est, unaquaeque persona habet perfectiones alterius; ideoque ait Augustinus *Lib. VI. de Trin. cap. 8.* Tantum esse solum Patrem, vel solum Filium, vel solum Spiritum Sanctum, quantum tres personas simul sumptas. Adde, relationes non esse perfectiones simpliciter simplices, quae melius est habere, quam non habere, sed perfectiones simplices, quae aequalibus perfectionibus opponuntur, ita ut non sit melius iis ornari, quam oppositis, ut *Lib. III. cap. 10.* diximus.

*Objic. II.* Si relationes essent perfectiones, dici posset, esse in Deo tres res. Sed hoc absurdum est; alioquin enim possent in Deo dici tres essentiae, tres aeternitates, tres immensitates etc. Ergo.

*R. Dist. maj.* Essent in Deo tres res relativae, conc. Absolutae, neg. Augustinus enim *Lib. I. de Doct. Christ. cap.*

110 *Theologicarum Institutionum Lib. IV. Cap. IX.*  
 cap. 3. non abnuitt dicere, tres personas divinas esse *tres*  
*res*: et Anselmus *Lib. de Incarn. cap. 3. Nihil prohibet*,  
 inquit, *Patrem et Filium dicere duas res*. Absur-  
 dum autem est dicere in Deo tres res absolutas, ut et  
 tria entia, tres aeternitates, immensitates etc.; quia  
 cum tres personae unicam naturam habeant, unam  
 etiam habent existentiam; ideoque sunt unum ens, una  
 aeternitas, immensitas, etc.

## P R O P O S I T I O II.

*Tres divinae relationes unam habent existentiam. Est*  
*contra Scotum in I. Dist. XI. Q. 2., Suarez Lib.*  
*III. de Trin. cap. 4., aliosq.*

*Prob. I.* Scripturae, et Patres quoties de existentia  
 loquuntur, semper eam referunt ad naturam. Sic *E-*  
*æod. III. 14.* ait Deus: *Ego sum, qui sum*: et *Deuter.*  
*VI. 4. Audi Israel: Dominus Deus noster, Dominus*  
*unus est*: et *Job. XIV. 14. Quis potest facere mundum*  
*de immundo conceptum semine?* nonne tu qui solus es?  
 Hinc catholici, qui saeculo IV. contendebant, utrum  
 tres dicendae essent in Deo hypostases, in concordiam  
 redierunt, explicato nomine hypostaseos; scilicet, si eo  
 nomine intelligeretur *existentia*, unam dicendam esse hy-  
 postasim: si vero *subsistentia*, tres. Vide Hieronymum  
*Epist. ad Damas.* Hinc etiam Augustinus *Lib. VII. de*  
*Trin. cap. 4.* ait. *Quod est, ad se dicitur; Pater au-*  
*tem ad Filium*; hoc est existentia pertinet ad naturam,  
 relatio autem terminum respicit. Et Cyrillus *Alex.*  
*Dial. II. Ecquem locum in Deo habere putandum est*  
*ingenitum?* Nam si *ingenitum ipsum est per sese, et in*  
*extantia propria positum, est autem hoc, ut illi asse-*  
*rent; proprium Dei, et Patris, diversum quippiam erit*  
*ab eo, cujus est proprium.* Nam quod alicujus est, et  
 proprie constitutum existit, diversum plane est ab eo,  
 cujus est, atque ita duplicatur simplex natura Patris,  
 eaque ex Patre, et ingenito componitur. Quod de in-  
 genito ait Cyrillus, idem de relationibus dicendum est.

*Prob. II.* Existentia est, per quam ens aliquod est,

ut ajunt, *extra nihil*, *Subsistentia* vero est existendi modus. Non multiplicatur igitur existentia, nisi multiplicatis entibus, sive naturis; ac proinde cum Deus unicum sit ens, una natura; unam habeat necesse est existentiam, licet *subsistentiae*, seu modi hujus existentiae tres sint.

*Objic.* Possunt in Deo dici tres res, ut supra ex *Augustino*, et *Anselmo* observavimus. Atqui res aliquid significat existens. Ergo possunt in Deo dici tres existentiae.

*¶. Dist. maj.* Possunt in Deo dici tres res relativae, *conc.* Absolutae, *neg.* *Dist.* etiam *min.* Res significat aliquid existens vel existentia propria, vel existentia *subjecti conc.* Existentia propria semper, *subdist.* Res absoluta, *conc.* Res relativa, *neg.* Res igitur semper aliquid existens significat; sed non semper existens existentia propria, nisi sit res absoluta. At res relativae, cujusmodi sunt relationes in divinis, cum sint, sive mente a nobis concipiantur ut modi, et affectiones subjecti, in quo sunt, non existunt; nisi per existentiam subjecti, in quo recipiuntur, sive recipi intelliguntur.

### PROPOSITIO III.

*Essentia divina, prout intelligitur ante relationes, non habet propriam subsistentiam tribus personis communicatam. Est contra Cajetanum I.*

*P. Q. XXIX. art. 4., Suarez Lib.*

*IV. cap. 4., aliosq. Thomistas.*

*Prob. I.* Illud non debet in essentia divina fingi a nobis, quod nec Scriptura; nec Patres agnoverunt. At nec Scriptura, nec Patres unquam quartae istius *subsistentiae* meminerunt, quae essentiae divinae conveniat, prout ante relationes a nobis intelligitur. Patres enim constanter docent, nonnisi tres esse in Deo subsistentias. Sic Concilium V. generale *Collat. VIII. Anath. I.* Si quis inquit, non confitetur unam Deitatem in tribus subsistentiis, sive personis adorandam; talis anathema sit. Quibus similia apud Patres Graecos; Latinosque passim occurrunt. Vide Petavium *Lib. IV. cap. 3.* Ergo.

*Prob.*

*Prob. II.* Si natura divina propriam subsistentiam haberet, sicut propriam existentiam habet, dici posset Deus *unus subsistens*, sicut dicitur *unus existens*. Atqui hanc locutionem rejecerunt Patres. *Hilarius enim Lib. de Synod.* docet, hanc esse catholicam fidem, quod Deus *non sit unus subsistens, sed una substantia non differens.*

*Prob. III.* In Concilio Lateranensi IV. declaratum est, in Deo non esse quaternitatem, sed Trinitatem. At nihil prohiberet dici in Deo quaternitatem, si praeter subsistentiam Patris, Filii, et Spiritus Sancti, haberet etiam ipsa essentia divina propriam subsistentiam. Ergo.

*\*Solvuntur Objecta.*

*Objic. I.* Patres aliquando docent, *trium personarum esse unam subsistentiam*. Ita *Agatho Papa in Epist.* quae habetur in VI. Synodo *Act. IV.* Sic etiam docet *Augustinus Lib. VII. de Trin. cap. 4.*, et *S. Thomas Quaest. IX. de Potentia art. 5. ad 13.* Ergo.

*¶. Dist. ant.* Et subsistentiam accipiunt improprie pro substantia existente, *conc.* Proprie pro certo modo existendi ejusdem substantiae, *neg.*

*Objic. II.* Hoc nomen *Deus* rem perfectissimam significat, ac proinde subsistentem; cum subsistentia sit ultima naturae perfectio, et complementum. Atqui nomen *Deus* non dicitur relative ad personas significandas, sed absolute ad designandam naturam. Ergo natura, etiam prout sine relationibus concipitur, propriam habet subsistentiam.

*¶. Dist. maj.* Nomen *Deus* significat rem subsistentem in personis, in quibus revera subsistit, *conc.* Subsistentem subsistentia propria, et distincta a subsistentia personarum, *neg.* Utique qui Deum nominat, rem perfectissimam, ac proinde subsistentem intelligit, sed non subsistentia distincta a subsistentia personarum. Ipsi Sabelliani, et Sociniani, qui unam in Divinitate personam fingunt, cum Deum nominant: intelligunt subsistentem in illa persona, quam solam agnoscunt. At Catholici, qui tres profitentur personas, cum Deum appellant,



mente concipiunt subsistentem in tribus personis, non in propria aliqua subsistentia. Verum his omissis, quae parum utilitatis habent, multum contentioni, restat, ut et de divinis notionibus, sicut fuerat propositum, dicamus.

## C A P. X.

## De divinis notionibus.

*Adv.* Jam supra ostendimus, ex divinis processionibus agnoscendas esse in divinitate *notiones*, seu characteres quosdam, dignitatem aliquam significantes, quibus quaelibet persona dignoscitur, atque ab aliis distinguitur; easque *notiones* esse quinque, *Innascibilitatem*, *Paternitatem*, *Filiationem*, *Spirationem activam*, et *Spirationem passivam*. Nunc ea res explicanda est paulo fusius. Non defuerunt enim Scholastici, qui plures *notiones* statuerunt, ut *Scotus*, qui sextam, nempe *inspirabilitatem*, in Filio agnovit: imo fuerunt etiam qui nullam admitterent *notionem*, ut *Praepositivus*, de quo S. Thomas *I. P. Q. XXXII. art. 2.*

## P R O P O S I T I O.

*Agnoscendae sunt in divinis notiones; eaeque nec pauciores, nec plures sunt quam quinque: Innascibilitas, Paternitas, Filiatio, Spiratio activa, et Spiratio passiva.*

*Prob. 1a. pars. I.* Patres hujusmodi *notiones* in divinis agnoverunt. Ita Basilii *Lib. II. cont. Eunom.*, qui eas appellat *γνωριστὰς ιδιοτητάς*, sive proprietates, quibus personae dignoscuntur; et *Epist. XXXVIII.* eas singillatim recenset; Gregorius Nyss. *Lib. I. cont. Eunom.*, Augustinus *Lib. V. de Trin. cap. 5.*, alique, quos citat Petavius *Lib. IV. in Prooem.*

*Prob. II.* Sunt in Deo distinctae personae, quae ratione originis proprietates personales habent, quibus in se constituuntur, et ab se invicem distinguuntur: hujusmodi autem proprietates *notiones* sunt. Ergo etc.

Tom. II.

H

Prob.

*Prob. 2a. pars.* Notiones duabus ex causis in divinis statuimus; nempe ut personae a se invicem distinguantur, et ut certus earum numerus definiatur. Atqui ad haec duo quinque requiruntur, et sufficiunt notiones. Ut enim personae distinguantur a se invicem, requiruntur, et sufficiunt notiones quatuor; nempe *Paternitas*, qua Pater a Filio distinguitur; *Filiatio*, qua Filius a Patre; *Spiratio activa*, qua Pater, et Filius a Spiritu Sancto; et *Spiratio passiva*, qua Spiritus Sanctus a Patre, Filioque discernitur. Ut vero certus personarum definiatur numerus, explicandum est, non esse in Deo plures processiones, quam duas: ideoque Patrem ab alio non procedere: ad quod requiritur, et sufficit *Innascibilitas* in Patre. Ergo.

### *Diluuntur Objecta.*

*Obje. I. cont. 1m. part.* Non est admittendum quod officit simplicitati naturae divinae. Atqui notiones simplicitati naturae divinae officiunt: per eas enim *abstracta* concipiuntur tamquam a *concretis* distincta; *Paternitas* ex. gr. tamquam distincta a Patre. Ergo.

¶ *Neg. min. Ad prop. dist. Abstracta* concipiuntur distincta a *concretis* reipsa, *neg.* Per rationem, *conc.* Porro distinctio rationis non officit divinae naturae simplicitati, ut diximus *Lib. III. cap. 3.*

*Obje. II. cont. 2m. part.* Tot sunt notiones, quot relationes; per relationes enim personae dignoscuntur, et distinguuntur. Atqui quatuor sunt relationes. Ergo.

¶ *Neg. maj.* Nam per solam relationem Paternitatis, et Spirationis activae non perfecte dignoscitur Pater. Potest enim aliquis Pater esse, et tamen ab alio principio esse. At cum *Paternitati* additur *innascibilitas*, perfecte dignoscitur prima SS. Trinitatis persona, quae ita est Filius; et Spiritus Sancti principium, ut a nullo alio procedat principio.

*Inst. 1.º Innascibilitas* est aliquid *negativum*. Atqui notio *positivam* aliquam dignitatem designare debet. Ergo *innascibilitas* notio non est.

¶ *Dist. maj.* Est aliquid *negativum*, quod ad sonum vocabuli, *conc.* Quod ad rem significatam; *neg.* Significat.

eat enim principium sine principio : quod utique positiva dignitas est primae personae.

*Inst. 2.º* Si *innascibilitas* est aliqua dignitas, Filius, et Spiritus Sanctus, qui ea carent, imperfecti erant, et minus digni : quod est absurdum. Ergo.

*¶ Neg. seq.* Cum enim tres personae divinae eandem numero naturam habeant, a qua notiones non sunt reapse distinctae, habent etiam per circumin sessionem notiones omnes : non quidem in *sensu formali*, ut Scholae ajunt ; sed *identico* : hoc est, non quatenus omnes notiones constituent *formaliter*, et distinguant personas singulas ; sed quatenus idem sunt reipsa cum natura divina, quae in singulis personis inest.

*Objic. III.* Notio debet esse aliquid proprium : Atqui *spiratio activa* communis est Patri, et Filio. Ergo notio non est.

*¶ Dist. maj.* Debet esse aliquid proprium vel uni, vel duabus personis, *conc.* Uni tantum, *neg.* Notio enim ad personas distinguendas valet. Cum ergo *spiratio activa* Patrem et Filium a Spiritu Sancto distinguat, recte notio dicitur : licet non distinguat ipsum Filium a Patre, qui satis inter se per *Paternitatem*, et *Filiationem* distinguuntur.

*Objic. IV.* Praeter quinque notiones agnosci etiam aliae debent. Sicut enim agnoscitur in Patre *innascibilitas*, ita agnosci quoque potest *ingenerabilitas* in Patre et Spiritu Sancto, *inspirabilitas* in Patre et Filio. Praeterea aliae notiones excogitari debent, quibus dignoscatur, Filium non posse alium Filium generare, et Spiritum Sanctum aliam personam nullo modo producere. Ergo plures sunt, quam quinque notiones.

*¶ Neg. ant.* *Ad 1m.* dico, *ingenerabilitatem* in Patre satis explicari per *innascibilitatem*. *Ad 2m.* *Ingenerabilitatem* in Spiritu Sancto non significare dignitatem aliquam ; ac proinde non esse notionem. Nam quod producat per *spirationem* dignitas est ; quod vero non producat alio modo, mera est rei negatio. *Ad 3m.* *Inspirabilitatem* in Patre recte etiam explicari per *innascibilitatem*, quae cum significet primum principium sine principio, omnem excludit procedendi modum. *Ad 4m.* *Inspirabilitatem* in Filio non esse notionem. Nam

quod procedat per generationem, dignitas est; quod vero non procedat per *spirationem*, mera est negatio, ac proinde notio non est. Atque eadem de causa cum non posse generare Filium, non posse producere personam aliam, non sit aliqua dignitas in Filio, et Spiritu Sancto, inutile est ad hoc explicandum alias excogitare notiones.

*Scholion.*

Ex notionibus deducuntur termini *notionales* quinque, qui explicant in *concreto* personas, quatenus habent in se notiones, ut *innascibilis*, seu quod idem est *ingenitus*, *Pater*, *Filius*, *Spirator*, et *Spiratus*. Rursus ex notionibus oritur distinctio inter actum *essentialem*, et *notionalem* in divinis, ut inter intellectionem *essentialem*, et *notionalem*; item inter amorem *essentialem*, et *notionalem*, de quibus supra diximus *cap. 6. Corol. 3.* Nunc iis absolutis, quae ad personarum, processiones, relationes, ac notiones spectabant; jam de personis ipsis tum generatim, tum singillatim est more nostro breviter, ac perspicue disputandum.

C A P. XI.

*De personis divinis tum generatim, tum singillatim.*

§. I.

*De personis divinis generatim.*

*Adv.* **P**ersonae definitionem jam supra *cap. II.* tradidimus. De personis igitur in genere hic quaerendum superest, quid sit id, quod *formaliter* personas constituat; qua de re disceptatum est in Scholis acerrime. De singulis vero personis quaerendum, quae sint singularum nomina; et quae singulorum nominum ratio; quae proprietates.

## P R O P O S I T I O.

*Personae divinae constituuntur per ipsas relationes Paternitatis, Filiationis, et Spirationis passivae.*

*Prob.* Unumquodque per illud in sua natura constituitur, per quod ab aliis distinguitur; unde axioma apud Philosophos receptum est: *idem est principium distinguens, atque constituens.* Atqui personae per solas recensitas relationes a se mutuo distinguuntur. Nam, ut saepe diximus, ubi non est relationis oppositio; omnia in divinis unum sunt. *Hoc solo numero insimulant, quod ad invicem sunt, non quod ad se sunt;* inquit Augustinus *Tract. XXXIX. in Joan. Relativa nomina Trinitatem faciunt, essentialia nullo modo triplicantur,* inquit Fulgentius *Lib. de Trin. Relatio multiplicat unitatem,* inquit Boetius *Lib. de Trin. Ergo.*

*Objecta diluuntur.*

*Objic. I.* Relationes oriuntur ex processioneibus; paternitas, et filiatio ex. gr. ex generatione. Atqui generatio personam jam constitutam requirit; prius enim mente concipitur aliquid esse, quam operari: Ergo relationes non constituunt personas, sed iis jam aliunde constitutis adveniunt.

*R.* Hac difficultate deterritos nonnullos Theologos in contrariam abiisse sententiam. Observandum tamen est, triplex esse relationis personalis munus; 1.<sup>o</sup> ut personam constituat; 2.<sup>o</sup> ut ad actum *notionalem* concurrat; 3.<sup>o</sup> ut referat personam producentem ad eam, quae producta est. Ita paternitas spectari potest: 1.<sup>o</sup> ut forma personam patris constituens; 2.<sup>o</sup> ut conditio concurrens ad actum intellectionis *notionalis*, per quam generatur Filius; 3.<sup>o</sup> ut referens personam Patris ad Filium. Unde Scholastici ajunt, relationes spectari posse. et quatenus personae iusunt, et quatenus eam ad aliam referunt: sive, ut ipsi loqui amant, et *secundum esse in*, et *secundum esse ad*. At haec tria relationis munera, licet mente nostra distin-

stinguantur, in Deo tamen unum sunt. Hoc posito, *dist. maj.* Relationes oriuntur ex processionibus; si spectentur simul secundum triplex earum munus, praecipue quatenus ipsi personae insunt, *neg.* Si spectentur quatenus personam unam ad aliam referunt, *subdist.* Et tunc considerantur imperfecte, et non prout sunt revera in Deo, *transeat.* Spectantur perfecte, ut revera sunt, *neg.* *Proprietas personalis Patris*, inquit S. Thomas I. P. Q. XL. art. 4., *considerari potest dupliciter: uno modo ut est relatio; et sic secundum intellectum ( nostrum ) praesupponit actum notionalem: quia relatio, in quantum hujusmodi, fundatur super actum: alio modo secundum quod est constitutiva personae; et sic oportet, quod praecintelligatur relatio actui notionali, sicut persona agens praecintelligitur actioni.* Dixi autem *transeat*; quia defendi etiam potest, quod ait Suarez *Lib. III. cap. 6. et 7.*; relationes, etiam imperfecte, quatenus personam ad aliam referunt, consideratas, divinas personas constituere. Licet enim relationes *accidentales*, ut est in creatis relatio patris ad filium, personam jam constitutam requirat; non ita tamen se res habet in relationibus *substantialibus*, et *essentialibus*, qualis est in divinis relatio Patris ad Filium; sicut *ex. gr.* cum anima ex sui natura ad corpus animatum referatur ( est enim natura sua forma corporis ), sequitur, relationem hanc ipsam animam constituere.

Ex hac autem responsione facile reliquae Scholasticorum argutationes dissolvi possunt. Dicunt enim 1.<sup>o</sup> Quod refertur, prius constituitur, quam referatur. Ergo relatio requirit, ac *supponit* personas jam aliunde constitutas. 2.<sup>o</sup> Omnis relatio fundamentum aliquod requirit, ex quo exurgit. Igitur relationes divinae supponunt in personis jam aliunde constitutis, fundamentum suum. 3.<sup>o</sup> Munus relationis non est rem constituere, sed tantum referre. 4.<sup>o</sup> Totam rei relatae naturam esse ad aliud. At persona non est tota ad aliud; pater *ex. gr.* spectatur et quatenus in se est, et quatenus ad filium est. Ergo non per solam relationem constituitur.

Respondetur enim haec vera esse de relationibus *accidentalibus*, ut est relatio domini ad famulum; aut etiam

etiam patris ad filium in creatis. Posse etiam haec vera esse de relationibus *substantialibus*, si spectentur imperfecte secundum id quod sunt ad alterum: secus vero si spectentur secundum triplex earum munus; praecipue secundum id quod sunt in re subiecta.

*Objic. II.* Persona ex Augustino *Lib. VII. de Trin. cap. 6.* dicitur ad se non ad alium; hoc est, absolutum aliquid, non relativum significat, alioquin, inquit, si persona ad alium diceretur, posset utique dici Pater persona Filii, et Filius persona Patris: quod absurdum est. Ergo per relationem constitui non potest.

¶ *Dist. art.* Si nomen personae generatim usurpetur, *conc.* Si pro persona divina, *subdist.* Dicitur ad se, non ad alium, quatenus non significat relationem accidentalem, *conc.* Quatenus non significat relationem subsistentem in natura divina, cujus relationis triplex est munus, ut paulo ante diximus, *neg.* Nomen hoc persona, inquit S. Thomas *I. P. Q. XXIX. art. 4.*, dicitur ad se, non ad alterum; quia significat relationem non per modum relationis, sed per modum substantiae, quae est hypostasis. Et secundum hoc Augustinus dicit, quod significat essentiam, prout essentia est idem cum hypostasi. Atque hac ratione dici nequit Pater persona Filii; quia, eum persona relationem significet subsistentem; si Pater persona Filii diceretur, eo utique significaretur, Patrem esse relativam Filii subsistentiam; sed nihil vetat dicere: Pater est persona ad Filium. Utrum autem persona relationem directe, an oblique significet, idem S. Thomas eodem in loco late disputat, cujus praestat sequi doctrinam, quam Petavii, qui Augustini sententiam, ac definitionem hac in re ex professo impugnatur *Lib. IV. cap. 11.* Sed a suo impius Scholiaste castigatur. Sed hac Scholastica controversia relicta, in quae aegre hactenus, atque inviti versati sumus, ne ista omnino tirones ignorarent, videamus quae sint singulorum personarum nomina, quatenam eorum nominum rationes, quae attributa *notionalia*, sive *appropriata*.

## §. II.

*De persona Patris.*

I. Primum, et praecipuum primae Personae est nomen *Patris* in Scripturis usitatissimum, et a Patribus frequentius usurpatum. Advertendum tamen est, hoc nomen dici posse vel de ipsa Dei natura, vel de persona Patris: sive, ut Scholae ajunt, vel *essentialiter*; vel *notionaliter*. *Notionaliter* prima persona *Pater* appellatur respectu Verbi, estque nomen ejus personae proprium. *Essentialiter* vero *Pater* dicitur vel respectu creaturarum omnium, sicut dicitur *Job. XXXVIII. 28. Pater pluviae*; vel respectu hominum, qui per gratiam sanctificati, filiorum adoptionem consecuti sunt: ideoque clamant *Abba (Pater) Rom. VIII. 15. Notionalis* autem Paternitas prior, et nobilior est *essentiali*, et quicumque alia paternitate, ut ait Apostolus *Ephes. III. 14. Flecto genua mea ad Patrem Domini nostri Jesu Christi, ex quo omnis paternitas in caelis et in terra nominatur.*

II. Alterum nomen est *Ingeniti*, quod Graeci *αγεννητον* dicunt. Qui autem scripserunt accuratius *αγεννητον*, et *αγενητον* distinguunt. *Αγενητον* enim increatum significat, estque tribus personis commune nomen, *Αγενητης* vero *ingenitum*; et quatenus excludit omne principium est proprium Patris: sicut e contrario *γεννητον*, nomen est Filii *γενητον* vero, quod *creatum* significat, divinis personis non convenit, ut observat Damascenus *Lib. I. de Fide cap. 8.* Sed hoc discrimen non omnes servavere Patres; unde nonnulli Filium dixerunt *αγεννητον* confundentes scilicet *αγεννητον*, et *αγενητον*; nisi forte hic aliquid librariorum incuria peccaverit. Hac nominis ambiguitate abutebantur Aenomaei, ut Verbo divinitatem negarent. Dicebant enim *αγεννητον* ita esse divinitati proprium, ut ne cogitari quidem posset Deus, qui *αγεννητος* non esset: uno nullam esse affirmabant inter *αγεννητον* et Deum distinctionem, ne illam quidem, quae est per rationem, *κατ'ετινα αν.* Qua de re fuse Petavius *Lib. V. disserit*, nosque etiam *Lib. III. cap. 3.*, quantum sufficere videbatur, disputavimus.



Caeterum ex ipso *Ingeniti* nomine *Basilius* Verbi divinitatem, contra Arianos acute demonstrat. Non enim Pater diceretur *ingenitus*, nisi alia esset persona divina ab aeterno genita, a qua Pater per ingeniti nomen discernerebatur.

III. Tertium nomen est *Principii*, quod peculiari ratione Patri attribuitur, eo quod sit Principium sine principio; unde a Concilio Toletano XI., et Florentino *Sess. XXIII.* dicitur *fons, et origo totius Trinitatis, et Divinitatis*: non quod principium sit sui ipsius, aut naturae divinae; sed ceterarum personarum, sine quibus non esset *Trinitas*, sed *Unitas*. Sed si nomen principii ad creaturas referatur, Trinitati commune est; unde et Filius dicitur *principium* *Joan. VIII. 25. Principium*, inquit, *qui et loquor vobis*. Verum locus hic *Joan. VIII. 25.* Theologorum ingenia torsit, ut videre est apud Maldonatum *Comment. in h. l.*

IV. Dicitur etiam aliquando a Patribus *Causa, Auctor*, ut videre est apud *Hilarium*, et *Augustinum*; sed cum haec nomina ambigua viderentur, eo quod innuant nescio quam inter personas inaequalitatem, jam ab usu recesserunt.

V. Attributum Patri *appropriatum* est omnipotentia; quia ipse a nullo procedens, aliarum personarum principium est, unde in symbolo eum dicimus *Patrem omnipotentem, creatorem caeli, et terrae*.

### §. III.

#### De persona Filii.

I. Secunda persona dicitur 1.<sup>o</sup> frequenter in Scripturis *Filius*, eo quod ex substantia Patris aeterna generatione procedit.

II. Dicitur 2.<sup>o</sup> Verbum *Jo. I. 1, I. Jo. V. 7. et Apoc. XIX. B.* etc. Graece *λογος*, sive terminus Paternae intelligentiae, omnia *intelligibilia* in se uno repraesentans. Atque eadem ratione a Latinis aliquando appellatur *Ratio, Sermo, Sapientia Patris*: imo et in sacris litteris absolute *Sapientia* dicitur, ut *Prov. VIII. Sap. VII. Eccli. XXIV. etc.* Aptius tamen nomen est *Verbi*, quam

quàm Sermonis ; eo quod Sermo vox est prolata extrinsecus , verbum autem interior mentis foetus. Nomen autem hoc λογος , *Verbum* , aliquando a Patribus pro *essentiali* intelligentia Dei usurpatur : ideoque et Patri , et Spiritui Sancto tribuitur , ut apud Irenaeum *Lib. II. cap. 8.* , et Basilium. Sed hoc rarius , et ex contextu sermonis facile intelligitur.

III. Appellatur etiam 3.<sup>o</sup> *Imago* Patris, ut *Colos. I. 15.* *Qui est imago Dei invisibilis* et *Heb. I. 3.* *splendor gloriae*, et *figura substantiae ejus* χαρακτης της ουσιας αὐτου. Ad imaginis enim rationem tria necessaria sunt : 1.<sup>o</sup> similitudo ; 2.<sup>o</sup> expressio ; 3.<sup>o</sup> ut haec similitudo ex ipsius productionis vi , ac natura oriatur. Requiritur quidem similitudo , ut patet ; alioquin imago non erit , quae a *prototype* aberrat. Requiritur etiam expressio ; nempe , ut imago a *prototype*educta sit : sic licet ovum ovo sit simillimum , non tamen unum est alterius imago ; quia unum ab alio non est productum. Denique opus est , ut similitudo vi ipsius productionis habeatur. Porro haec tria Filio conveniunt. Est enim Patri similis ; tum quia eandem habet naturam ; tum quia ipsam Patris personam perfecte repraesentat ; est etiam a Patre productus , eique similis vi ipsius processionis producitur ; procedit enim per intellectionem , cujus proprium est producere verbum rei intellectae simile. Unde Augustinus *Lib. XV. de Trin. cap. 14.* *Seipsum*, inquit, *dicens Pater genuit Verbum sibi aequale per omnia. Non enim seipsum integre, perfecteque dixisset, si aliquid minus, aut amplius esset in ejus Verbo, quam in ipso.* Quamvis autem imaginis nomen sacrae litterae soli Filio tribuant , eamque vocis proprietatem Latini Patres Hilarius *Lib. VIII. de Trin.* Augustinus *Lib. VI. de Trin. cap. 10. et Lib. VII. cap. 1.* , Ambrosius *Lib. X. in Luc.* constanter retineant : Graeci tamen Scriptores minus hac in re accurate locuti , quam Latini , imaginis nomen Spiritui S. etiam accommodant , quem dicunt Patris , Filiique imaginem : quia ab utroque procedit , ut ex Athanasio *Epist. II. ad Serapion.* Basilio *Lib. V. Cont. Eunom.* Cyrillo *Lib. XIII. Thesauri* advertit Estius in *I. Dist. XXVII. §. 9.* Quamvis autem homo ad imaginem Dei sit conditus ,  
qua

qua de re dicemus in sequenti Libro; unus tamen Filius est perfectissima *imago Patris*, et *figura substantiae* ejus.

IV. Denique advertendum est, Filium aliquando a Veteribus appellari *Spiritum*, aut *Spiritum Sanctum*, propter divinam ejus naturam. *Spiritus enim est Deus*: *Joan. IV. 24.* Idque observandum apud Tertullianum *Apolog. cap. 21.* Cyprianum *de Idolor. vanit.*, Lactantium *Lib. IV. cap. 6.*, et alios.

V. Attributum Filio *appropriatum* est *Sapientia*; eo quod ex Patris intelligentia procedit, ut paulo ante diximus; ita ut Sapientia aliquando ipsam Filii personam significet, aliquando attributum ei *appropriatum*.

#### §. IV.

##### *De persona Spiritus Sancti.*

I. Tertia persona dicitur 1.<sup>o</sup> Spiritus Sanctus: eo quod ex sancto Patris, et Filii amore procedit; *Spiritus enim impulsus* significat, unde ventum saepe spiritum sacrae litterae appellant: at proprium amoris est animam impellere in rem amatam, ut observat S. Thomas *Lib. IV. cont. Gent. cap. 19.*, et seq.

II. Dicitur etiam 2.<sup>o</sup> *Donum*, non quidem respectu Patris, et Filii, quorum ab aeterno est per naturam, et a quibus procedit; sed respectu rationalium dumtaxat creaturarum, cum irrationalibus rebus nihil donari, sed dari tantum, aut praeberi possit. Hoc autem nomen habet propter eandem amoris rationem. Amor enim est omnium donorum primum, et ex eo omnia dona proficiscuntur. Unde Spiritus Sanctus, licet non sit donatus, nisi in tempore, sicut legimus *Joan. VII. 39. nondum erat Spiritus datus*; ab aeterno tamen procedit; ut donum, sive *donabilis*, ut observat Augustinus *Lib. V. de Trin. cap. 15.*; ideoque licet Filius etiam in Scripturis legatur datus, ut *Joan. III. 16. sic Deus dilexit mundum, ut Filium suum unigenitum daret*; et *Is. IX. 6. Filius datus est nobis*; proprie tamen doni nomen Spiritui Sancto tribuitur. Dicitur etiam *Para-*  
*cle-*

24 *Theologicarum Institutionum Lib. IV. Cap. XII.*  
*electus*, sive consolator; eo quod charitatem in corde  
nostro diffundens, mire animum solatur, ac reficit.

III. Denique appellatur etiam *charitas*, *amor*, *unio*,  
*vinculum*, *complexus Patris*, *et Filii*: quae omnia ex  
ipsa ratione processioneis, Spiritui Sancto tributa sunt.

IV. Atque eandem ob causam quaecumque ex chari-  
tate, bonitate, misericordia Dei profecta sunt, Spiritui  
Sancto *per appropriationem* aptantur. Hinc divinarum  
largitio donorum ipsi tribuitur *Isa. XI. 2.*, *Joel. II.*  
*28.*, *Joan. VII. 39. et XIV. 16.*, *I. Cor. XII. etc.*  
imo et omnia, quae ad hominum salutem operatus est  
Christus, Spiritui S. sacrae litterae tribuunt, ut ejus  
conceptionem *Luc. I. 35.*, jejunium *Matth. IV. 2.*,  
miracula *Matth. XII. 28.*, sacrificium in cruce *Heb. IX.*  
*24.*, resurrectionem *Rom. VIII. 11.* Denique hominum  
sanctificationem in scripturis Spiritui S. passim tribui,  
nemo est, qui ignoret. Aequum enim erat, ut opera,  
quae charitatem Dei commendant, ei potissimum perso-  
nae attribuerentur, quae ex perfectissima Patris, et Fi-  
lii Charitate procedit. Vide de singularum personarum  
nominibus fuse, et erudite disserentem Petavium *Lib. V.*  
*cap. 5.*, *et L. VII. cap. 7. et 12.*

## C A P. XII.

### *De ratione, et modo loquendi circa* *SS. Trinitatem.*

**R**estat, ut quasdam tradamus regulas, ex quibus de  
SS. Trinitate loquendum est, ne incauta locutio  
errorem aliquem, aut haeresim sapiat. Nam, ut ait  
Augustinus *Lib. X. de Civ. cap. 23.* *Liberis verbis lo-*  
*quuntur Philosophi, nec in rebus ad intelligendum dif-*  
*ficillimis offensionem religiosarum aurium pertimescunt.*  
*Nobis autem ad certam regulam loqui fas est, ne ver-*  
*borum licentia, etiam de rebus, quae his significantur,*  
*impiam gignat opinionem.* Quae quidem regulae ex ipso  
catholico dogmate facile eruuntur. Cum enim constet,  
nam esse Dei essentiam, tres personas a se invicem  
reipsa distinctas, quarum secunda procedit a prima,  
et tertia a prima et secunda, neque inter personas, et

es-

essentiam esse ullam realem distinctionem; manifestum est, quamlibet enunciationem esse falsam, quae aut multiplicem facit essentiam, aut numerum tollit personarum, aut perperam exprimit earum processiones, aut realem distinctionem ponit inter ipsas, et essentiam.

Hinc sequitur I. dici non posse in Trinitate *aliud*, et *aliud*; sed *alius*, et *alius*. Prior enim locutio essentiam facit multiplicem. *Alius est*, inquit Augustinus *Tract. XXXVI. in Joan.*, recte dicis: *aliud*, non recte. *Alius enim est Filius*, quia non est ipse, qui Pater; et *alius Pater*, quia non est ipse, qui Filius; non tamen *aliud*, sed hoc ipsum est et Pater, et Filius.

II. Dici non posse: *essentia generat*, aut *generatur*, aut *procedit*. Si enim hoc verum esset, multiplex esset essentia. Qua in re Abbas Joachim merito reprehenditur.asserens enim contra Petrum Lombardum, *essentiam* generare, generari, et procedere, multiplicem fecit Dei essentiam, neque aliam in Deo unitatem posuit, quam illam, qua dicimus, plures homines esse unum populum. Dixerunt quidem nonnulli veteres Graeci, Filium esse *σταυ γεννητον*, *substantiam genitam*; sed illi *σταυ* pro hypostasi posuerunt, ut cap. II. monuimus. Nunc definita horum nominum significatione, ab hac loquendi ratione recedendum est. Quamvis autem nonnulli Patres improprie locuti, ita affirmaverint: *Deus de seipso*, quod ipse est, *genuit*, ut Augustinus *Lib. de fid. et symb. cap. 3.* *Filius est essentia de essentia*, ut idem Augustinus *Lib. VII. de Trin. cap. 2.* *Divinitas Filii de natura Patris nata est*, ut Fulgentius *Lib. de fid. ad Pet. cap. 2.*, aut ejusdem generis alia, quae apud veteres occurrunt; eorum tamen dicta benigne intelligenda sunt, et commoda interpretatione mollienda, ut monet Estius in I. *Dist. V. §. 2.* Nihil enim aliud sibi volunt, nisi Filium non de nihilo factum, ut Ariani dictitabant, sed ex Patre genitum, unam, eandemque habere divinam cum Patre naturam. Quamquam autem natura divina genita non est: non potest tamen uno vocabulo dici *ingenita*; cum *ingenti* nomen proprie Patri tribuatur, significetque personam, quae a nullo procedens, aliarum principium sit.

III. Appellari non posse Deum *triplicem*, licet recte dicatur *Trinus*. Qui enim *triplicem* dicit Deum, ipsam ejus substantiam quodammodo multiplicem esse significat. Unde Augustinus *Lib. VI. de Trin. cap. 6. Nec quoniam Trinitas est, ideo triplex putandus est; alioquin minor erit Pater solus, aut Filius solus, quam simul Pater, et Filius: cui concinit S. Thomas I. P. Q. XXXI. art. I. ad 3. Quapropter etsi Petavius Lib. VIII. cap. 9. variis rationibus eam locutionem excuset, atque ex Cicerone probet, triplicem, ac trinum apud Latinos idem significare, nobis tamen Augustini auctoritas, et ratio potior est.*

IV. Itidem admitti non posse voces *uniti*, *conjuncti*, ita ut dicatur Deus esse *aliquid unitum* ex tribus personis; haec enim simplicitati naturae divinae officiant.

V. E contrario retinendum esse nomen *Trinitatis* jam inde a secundo Ecclesiae saeculo a Patribus constanter usurpatum; ex communi enim usu fixum, ac definitum est non ad essentiae, sed ad personarum numerum explicandum; quidquid in contrarium nonnulli haeretici cavillantur, quos redarguit ipse Calvinus *Lib. I. Inst. cap. 13. et Inst. c. 6.*

VI. Pari ratione quia Deus, et *Deitas* inter se re ipsa non distinguuntur, sicut dicitur a Patribus *Deus trinus*, sic et *trina Deitas*, sicut et *trina Unitas*, et *una Trinitas*, et *virtus trina*, et *trina Majestas*. Hincmarus quidem Rhemensis Saec. IX. Gothescalcho illud praeter alia objecit, quod *trinam Deitatem* diceret; ideoque in hymno martyrum corrigi jussit eum versum: *Te trina Deitas, unaque poscimus*, pro quo cani voluit: *Te summa o Deitas*. Sed Ecclesia in hymno, qui in Festo Corporis Christi canitur Gotescolchi locutionem retinuit; et merito, cum eam usurpaverint etiam Augustinus *Lib. de duabus animab.*, *Lib. XII. Confes. cap. 7.*, *Serm. LII. de Verb. Dom. et Lib. I. Retract. cap. 15. n. 8.*; ideoque judicium Hincmari nimis rigidum, et severum judicavit; cum utrumque dici posset: *summa Deitas*, ut in hymno *Martyrum*; et *trina Deitas*, ut in hymno *Corporis Christi*.

VII. Quoniam nomina *adiectiva concreta*, ut *aeternus*, *immensus*, *omnipotens* conveniunt simul et natu-

rae, et personis, hinc efficitur, ut si ad significandam naturam usurpentur, dici non possint *tres aeterni*, nec *tres immensi*, nec *tres omnipotentes*, sicut in symbolo, quod Athanasio tribuitur, habemus: *aeternus Pater, aeternus Filius; aeternus Spiritus Sanctus*, et tamen non *tres aeterni*, sed *unus aeternus etc.* E contrario si adhibeantur ad designandas personas, non est absurdum dicere *tres aeternos*; significant enim tres personas, habentes aeternitatem. Sed alia ratio est de adjectivis abstractis, ut est *aeternitas*, *immensitas etc.*, quae cum non nisi ad designandam naturam possint usurpari, dici non possunt in Deo *tres aeternitates*, *immensitates etc.*

VIII. Vitandas esse has voces *unicus*, *singularis*, *solitarius*; destruunt enim personarum numerum. Unde S. Thomas I. P. Q. XXXI. art. 2. *Ad vitandum*, inquit, *Sabellii errorem*, vitare debemus *singularitatem*, ne tollatur *communicabilitas essentiae divinae*. Unde Hilarius dicit Lib. VII. de Trin. *Patrem, et Filium singularem Deum praedicare, sacrilegum est*. Caeterum cum ex contextu patet, sermonem esse de natura divina, non de personis, Deum appellare *Unicum*, ad excludendum *polytheismum*, non esse absurdum; sed semper satius est *unum* dicere, quam *unicum*.

IX. Personas appellari debere *distinctas*, *discretas*; non vero *sejunctas*, *separatas*, *discrepantes*, *dissimiles etc.* ne significetur, eas non esse reapse idem in una simpliciue essentia. Hinc idem S. Thomas I. P. Q. XXXI. art. 2. *Ne tollatur*, inquit, *simplicitas divinae essentiae*, vitandum est nomen *separationis*, et *divisionis*, quae est totius in partes. Ne autem tollatur *aequalitas*, vitandum est nomen *disparitatis*. Ne vero tollatur *similitudo*, vitandum est nomen *alieni*, et *discrepantis*.

XI. Porro tres divinas personas *similes*, et *aequales* esse, fide catholica tenendum, et affirmandum. Quod a Scripturis, et Patribus traditum, in Concilio Lateranensi IV. sancitum est. Hae tamen similitudo, et aequalitas non ceterarum rerum more intelligenda est, quarum similitudo, aut aequalitas in pari, sed distincta qualitate, aut quantitate fundatur, cum in Deo nec qualitas proprie sit, nec quantitas; sed substantia sola; cui nulla potest alia aequalis esse, aut similis, nisi una, ea-

eadem sit. Cum igitur tres personae dicuntur aequales, et unitas naturae, et numerus, atque distinctio personarum explicatur. Unitas quidem naturae; quia nulla potest Deo aequalis esse persona, nisi eandem naturam habeat: distinctio vero personarum; quia nemo sibi melius ipsi aequalis dici ullo modo potest.

XI. Recte autem dici potest: *Pater est sua aeternitas, immensitas, etc. Essentia est Pater, Filius, Spiritus Sanctus*: quia essentia a personis re ipsa distincta non est: sed dicere nefas est: *Pater est Filius, aut Paternitas est Filiatio*, propter realem eorum distinctionem.

XII. Illud etiam quaesitum est, an Pater dici possit *sapiens sapientia genita*, sive Verbo? et an *Pater, et Filius diligant se Spiritu Sancto*? Qua in re distinguendum est: si *sapere*, et *diligere*, dicantur notionali sensu, hoc est: *Pater sapiendo, sive intelligendo, Sapientiam, sive Verbum generat*; et *Pater, et Filius diligendo se, Spiritum Sanctum producant*, utraque propositio vera erit. At si *sapere*, et *diligere* dicantur *essentialiter* eo sensu, quasi Verbum forma sit, et principium intellectionis Paternae; et Spiritus Sanctus sit forma et principium dilectionis, falsae erunt ambae propositiones, quare eo sensu ejusmodi propositiones rejicit Augustinus *Lib. I. Retract. cap. 26. et in Libris de Trinitate* pluribus locis.

XIII. Praeterea nomen *Deus* plerumque pro natura usurpatur; sed aliquando pro persona una, ut cum Filius dicitur *Deus de Deo*: quod ex ipsa sermonis serie dijudicandum est.

XIV. Disputatum etiam est a Theologis, utrum in Deo *tria individua* proprie dici possint. Et Thomistae quidem passim negant; quia *individuum* directe naturam significat, oblique personam, in qua subsistit. Verum si addatur aliquid, per quod ad personam directe significandam coarctetur oratio, cur tria individua dici non possint, non satis causae esse videtur. Ne quis tamen loquendo Scholas adversum se concitet Theologorum, satius erit ab ea dicendi ratione abstinere.

XV. Denique advertendum est, inter nomina *propria*, et *appropriata* illud esse apud Theologos discriminis

ni-



nis, quod propria nomina cujusque personae notionem exprimunt, nec alteri convenire possunt: *appropriata* vero omnibus sunt personis communia; sed aptantur illi propter quandam cum ejus notione congruentiam. Vide de his loquendi regulis Estium in *I. Sent.*, *Sylvium in I. Part. S. Thom.* etc.

## C A P. XIII.

*Utrum notitia mysterii SS. Trinitatis sit ad salutem necessaria.*

*Ad. I.* **N**otitia mysterii hujus alia *implicita*, alia *explicita* est. Prior est qua confuse creditur unius Dei existentia, ignorato prorsus personarum numero; sed agnita tamen sublimitate ejus naturae, quae humanae mentis aciem, et captum longe excedit. Qui enim fatetur esse Deum, illumque, prout in se est, a nobis cognosci non posse, *implicita* Trinitatem confitetur; Deus enim, prout in se est, Trinitas est. At *explicita* cognitio Trinitatis est, qua quis credit esse unum numero Deum in tribus personis.

II. *Explicita* Trinitatis notitia non erat ad salutem necessaria iis, quibus ante Evangelii promulgationem non fuerat clare revelata, quales fuerunt omnes Gentiles, et radiiores Judaei.

III. Post Evangelii promulgationem haeretici *Remonstrantes*, licet Trinitatem agnoscant; contendunt tamen, ejus notitiam non esse articulum fidei *fundamentalem*, ita ut sine salutis dispendio ignorari, imo et negari possit; quam ob rem ipsi cum Socinianis communione conjuncti sunt.

IV. Nonnullos alioquin catholicos, moralis Theologiae auctores dicere non puduit, salutem consequi posse homines, licet culpa sua ignorent mysterium Trinitatis, et Incarnationis. Caeterum licet Theologi omnes doceant, necessariam esse ad salutem fidem Trinitatis *explicitam*, non tamen inter omnes convenit, utrum ea dicenda sit *necessitas medii*, an *praecepti*.

## P R O P O S I T I O.

*Post Evangelii promulgationem fides SS. Trinitatis explicita ad salutem necessaria est necessitate medii.*

*Prob. ex Scriptura. Joan. III. 18. Qui credit in eum, non judicatur; qui autem non credit, jam judicatus est: quia non credit in nomine Unigeniti Filii Dei. Et Petrus Act. IV. 12. de eodem Filio loquens, ait. Non est in alio aliquo salus. Nec enim aliud nomen est sub caelo datum hominibus; in quo oporteat nos salvos fieri. Quibus, aliisque similibus locis manifestum est, ad salutem requiri non solum fidem in Deum unum, verum etiam in Patrem, et Filium, et quidem incarnatum. At non potest haberi fides incarnationis sine fide etiam in Spiritum Sanctum, cujus opera et Filius incarnatus est, et homines Filii merito sanctificati sunt, ut advertit S. Thomas 2a. 2ae. Q. II. art. 8. ; et ante eum Ambrosius Lib. I. de Spir. S. cap. 3. Qui unum dixerit, Trinitatem significavit. Si Christum dicas, et Deum Patrem, a quo unctus est Filius, et ipsum, qui unctus est, Filium, et Spiritum, quo unctus est, designasti. Ergo.*

*Praeterea Matth. XXVIII. 19. et Marc. XVI. 16. Euntes docete omnes gentes, baptizantes eos in nomine Patris, et Filii, et Spiritus Sancti . . . Qui crediderit, et baptizatus fuerit, salvus erit: qui vero non crediderit, condemnabitur. Quibus verbis exigit simul Christus et baptismum, et fidem in SS. Trinitatem, ut medium, sine quo nemo salutem consequi potest: imo magis fidem, quam ipsum Baptismum, ut ait Bernardus Epist. LXXVII. Cautè; et vigilanter non repetivit: qui vero baptizatus non fuerit: sed tantum: qui vero non crediderit, innuens solam interdum sufficere fidem ad salutem, et sine ipsa sufficere nihil. Unde Ecclesia fidem Trinitatis ante Baptismum semper a cathecumenis exegit. Quapropter merito Innocentius XI. anno 1679, eam propositionem proscripsit: Absolutionis capax est homo, quantumvis laboret ignorantia mysteriorum fidei: etiamsi*

etiamsi per negligentiam, etiam culpabilem, nesciat mysterium SS. Trinitatis, et Incarnationis Domini. Quae propositio damnata etiam est ab Academia Lovaniensi anno 1653., et a Clero Gallicano anno 1700.

### *Diluuntur Objecta.*

*Obje. I.* Id solum ad salutem necessarium est, quod solum exigit Apostolus. Atqui Apostolus exigit dumtaxat fidem in Deum remuneratorem: *Heb. XI. 6. credere ... oportet accedentem ad Deum quia est, et quod inquirentibus se remunerator sit.* Ergo non requiritur fides Trinitatis explicita.

*¶ Neg. min.* Ex verbis enim Apostoli patet, necessariam esse fidem in Deum remuneratorem, tamquam basim, et fundamentum aliorum; sed non solam sufficere; id enim non dicit Apostolus, nec dicere poterat, reclamantibus aliis Scripturae locis.

*Obje. II.* Si fides explicita Trinitatis necessitate meritis requireretur ad salutem; multa hominum millia damnarentur, qui de hac fide nihil audire potuerunt; imo multa etiam Christianorum millia, qui rudioris sunt ingenii, nec claram Trinitatis ideam possunt apprehendere. Atqui hoc absurdum est, si infinitam Dei bonitatem, et misericordiam attendas. Ergo.

*¶ Neg. maj. quoad 2m. part.* Nullus enim est ingenio adeo hebes, ut, adjuvante gratia Dei, non possit, saltem ruditer quantum sufficit, Mysterium Trinitatis apprehendere. Quod si quis revera sit ejusmodi, is certe infantibus, et semifatis comparabitur, quibus utique ignorantia non erit salutis impedimento. *At dist. 1m. part. maj.* Multa hominum millia damnarentur ob hanc ignorantiam, *neg.* Ob alia peccata, *conc.* Infidelitas enim negativa in iis, qui mysteria fidei audire non potuerunt, peccatum non est, ut suo loco dicemus: non ergo ob eam damnantur, sed propter eorum peccata. Quod si quis infidelis negativus, divino auxilio adjutus, omnia praecepta legis naturalis servaret, non decisset ei Deus, ut revelaret ei vel per praedicatorum, vel per Angelos, vel per internam revelationem ea, quae scitu necessaria sunt ad salutem, sicut non defuit Cornelio Centurioni

*Act. X.* Haec est responsio *S. Thomae* solidissima. Sicut enim Deus incepit in eo infideli opus bonum, adjuvans illum, ut omnia legis naturalis praecepta servaret; ita Deus ipse opus suum perficiet, adducens illum ad fidem. Si vero quaeras, cur Deus non ita adjuvet infideles omnes negativos, ut a pueritia omnem naturae legem servant, atque hinc adducantur ad fidem? respondere facile possemus, Deum nonnullis propter eorum peccata denegare gratiam, quia justus est; aliis autem largiri, quia misericors est; sed si iterum urgeas, cur erga istum potius, quam erga illum justitiam voluit, aut misericordiam exercere? unum est quod respondere possimus: *O altitudo divitiarum sapientiae, et scientiae Dei!* ... *Numquid iniquitas apud Deum?* *Rom. IX. 14. et XI. 33.*

#### *Corollarium.*

Graviter ergo peccant, non solum qui addiscere negligunt, sed etiam qui, cum ex officio debeant, docere non curant mysterium Trinitatis; quae enim necessaria sunt *necessitate medii*, etiam *necessitate praecepti* necessaria sunt; ideoque omnibus discenda praecipiantur; nonnullis etiam docenda.

#### C A P. XIV.

*Utrum mysterium Trinitatis ratione naturali cognosci, et demonstrari possit.*

*Adv. I.* **D**emonstrari potest aliquid vel *positive*, ex internis scilicet causis, atque principiis; vel *negative*, scilicet objecta diluendo.

II. De negativa demonstratione, quae minus accurate demonstratio dicitur, infra erit dicendi locus. Quaeritur ergo hic, an mysterium Trinitatis demonstrari positive queat, seclusa revelatione, aut saltem posita revelatione? Qua in re tres sunt sententiae.

III. Prima sententia est *Claudiani Mamerti Lib. II. de Statu Animae cap. 7.*, qui tenet, posse hoc mysterium sola ratione naturali demonstrari, etiam seposita revelatione.

latione, unde ait: *Plato unum Deum, et tres in divinitate personas laudabili ausu, mirabili ingenio, inimitabili eloquio, quaesivit, invenit, prodidit . . et indivisam Trinitatem non solum ita credi oportere docuit, sed etiam convicit.* Altera sententia est *Petri Abaelardi*, de quo *Bernardus Epist. CXC.*; et *Raimundi Lulli Lib. de articulis fidei, et Lib. de Demonstratione æquiparantiae*, et aliorum qui docent, posse id demonstrari, saltem posita revelatione. Tertia est inter Theologos communis, nullo pacto, etiam posita revelatione, mysterium Trinitatis ratione demonstrari posse.

### PROPOSITIO I.

*Nullo pacto potest naturali ratione mysterium Trinitatis, etiam posita revelatione, demonstrari.*

*Prob. I.* Scripturae docent, mysterium hoc absconditum esse, nec alia ratione, nisi per revelationem, et fidem cognosci posse. *Matth. XI. 27. Nemo novit Filium, nisi Pater: neque Patrem quis novit, nisi Filius, et cui voluerit Filius revelare.* Et *Matth. XVI. 17.* cum Petrus Christum Dei Filium confessus esset, respondit Christus: *Beatus es Simon Bar-Jona: quia caro et sanguis non revelavit tibi, sed Pater meus, qui in caelis est.* *Isaiae LIII. 8. Generationem ejus quis enarrabit?* Et *Apostolus I. Cor. II. 11. Quae Dei sunt, nemo cognovit, nisi Spiritus Dei.* Ergo etc.

*Prob. II.* Patres docent, Trinitatem longe esse supra humanae rationis captum. *Augustinus Lib. XV. de Trin. cap. 6. Quis, inquit, disputandi modus, quanam tandem vis intelligendi, atque potentia, quae vivacitas rationis, quae acies cogitationis ostendit, quomodo sit Trinitas?* Idem docent *Athanasius Epist. I. ad Serapionem*, *Hilarius Lib. II. de Trin.*, *Hieronymus Lib. XVIII. in Isaiam (a).*

*Prob.*

---

(a) *Fulgentius Lib. II. ad Trasimund. cap. 1.*, *Ambrosius Lib. I. de Fide ad Gratian. cap. 18.*; *Bernardus Lib. V. de Consid. cap. 8.*

*Prob. III. ratione S. Thomae I. P. Q. XXXII. art.*

1. Omnis demonstratio vel est *a priori*, sive per causas; vel *a posteriori*, sive per effectus. Atqui Trinitas non potest demonstrari *a priori*, cum nullam habeat causam, quia est ipse Deus; neque *a posteriori*, cum nullum habeat effectum extra Deum; creaturae enim a Deo effectae sunt, non quatenus Trinus est, sed quatenus unus, et omnipotens est. Ergo.

*Solvuntur Objecta.*

*Obbie. I.* Sunt quaedam nota lumine rationis, ex quibus, saltem posita revelatione, potest demonstrari mysterium Trinitatis. Ergo. *Prob. ant.* 1.<sup>o</sup> Mens humana, quae ad imaginem Dei condita est, intelligit, et vult: intellectionis autem, et voluntatis factus sunt verbum, et amor. Ergo etiam in Deo debet esse Prima persona, quae per intellectionem producit Verbum, et per voluntatem una cum Verbo producit Spiritum Sanctum. Dixi *una cum Verbo*; nam voluntas non operatur nisi praelucente intellectione, et verbo mentis. 2.<sup>o</sup> Ea est boni natura, ut sese diffundat, et communicet quantum potest; ac proinde bonum infinitum, nempe Deus, infinite seipsum communicare debet; non potest autem communicari infinite extra se; quia creatura boni infiniti capax non est. Debet igitur infinite communicari intra se ipsum per intellectionem, et voluntatem, ideoque tres erunt in Divinitate personae. 3.<sup>o</sup> Omnes creaturarum perfectiones excellentiori modo sunt in Deo. Ergo si in creaturis est virtus producendi sibi simile, debet etiam esse in Deo: unde ipse Deus apud Isaiam *cap. LXVI. 9.* Numquid, inquit, ego qui alios parere facio, ipse non pariam...? si ego, qui generationem ceteris tribuo, sterilis ero.....? Quae ratio probat saltem, non esse unam Divinitatis personam. Ergo.

*R. Neg. ant.* Ad 1m. Licet humana ratio cognoscat, esse in Deo *intellectionem*, et *volitionem*, ipsa tamen sola evincere non potest, terminos *intellectionis*, ac *volitionis* esse duas personas a se invicem, et a prima distinctas; quin etiam propter infinitam Dei simplicitatem, quam evidenter cognoscit, concluderet, quod sicut in-

tellectus.

tellectio, et voluntas in Deo non sunt duo, sed unus simplicissimus actus, ab essentia non distinctus; ita et Verbum, et Amor non sint distinctae, et subsistentes personae, sed una persona ab ipsa intelligentia, voluntate, et essentia non distincta.

*Ad 2m.* Cognoscit quidem humana ratio, Deum esse bonum infinitum; non inde tamen sequitur, ut debeat intra se in productione aliarum personarum infinite diffundi. Sufficit enim, ut diffundatur extra se modo infinito, hoc est per infinitam potentiam, quam in creatione adhibuit; per hanc enim verum est, bonum infinitum infinite seipsum communicare; non quoad rem, sed quoad modum.

*Ad 3m.* Omnes creaturarum perfectiones sunt in Deo vel *formaliter*, vel *eminenter*, *conc.* Omnes *formaliter*, *neg.* Perfectiones enim creaturarum, quae imperfectum aliquid includunt, non sunt in Deo, nisi eminenter, tamquam in causa. Omnis autem generatio; lumine naturali nota, imperfectum aliquid vel supponit, vel includit. Supponit enim 1.<sup>o</sup> naturam esse finitam, quae fieri potest in individuis multiplex; et mutabilem, quae per generationem conservari debeat. 2.<sup>o</sup> includit etiam naturalem defectum, quo genitus genitore minor est, ab eoque pendet, tamquam a causa. Igitur si sola consulatur humana ratio, concludendum esset, non esse in Deo generationem. Locus *Isaiae* vero non de generatione Verbi, sed de mirabili Christianae religionis propagatione, et multiplicatione fidelium intelligendus est. Sed etsi intelligendus esset de generatione Verbi, vera esset Prophetiae conclusio; sed ex sola fide, non ex ratione naturali illius veritas ostendi potest.

*Objic. II.* Mysterium Trinitatis non potest demonstrari impossibile. Ergo potest demonstrari possibile.

*Prob. cons.* Inter possibile, et impossibile nihil est medium. Ergo quod demonstrari non potest impossibile, necesse est, ut demonstrari possit possibile.

¶ *Neg. cons.* Ut enim aliquid demonstrari non possit impossibile, sufficit, ut argumenta omnia solvantur quae suadere videntur, rem esse impossibilem. Sed ut demonstraretur possibile, necesse est, ut ex insitis rationibus, atque principiis id esse possibile ostendatur.

Licet.

Licet autem ratione possint utcumque dissolvi argumenta contra mysterium Trinitatis; non tamen potest ex insitis principiis possibile demonstrari. Ad *confirmationem* dicimus, quod licet inter possibile, et impossibile nihil sit medium, cum sint duo contradicentia; tamen cum demonstrare possibile, et demonstrare impossibile, non sint contradicentia, sed ambo affirmantia, datur inter ea medium, nempe quod non potest demonstrari neque possibile, neque impossibile.

*Objic. III.* Creaturae habent necessarium cum SS. Trinitate connexum; quia ab illa pendent, et productae sunt. Ergo potest ex creaturis demonstrari Trinitas.

*¶ Dist. ant.* Habent necessarium cum Trinitate connexum lumini naturali notum, *neg.* Lumini naturali impervium, *conc.*

*Objic. IV.* Praeter demonstrationem a priori, et posteriori, datur etiam demonstratio, quae a *Raimundo Lullo* dicitur demonstratio *aequiparantiae*, sive a re simili. Ergo ex eo quod SS. Trinitas non possit neque a priori, neque a posteriori demonstrari, non efficitur, nullo pacto demonstrari posse.

*¶ Dist. ant.* Dari potest demonstratio *aequiparantiae* inter res similes, *transeat*. Inter res infinite dispares, *neg.* Cum enim inter Deum, et creaturas infinita distantia sit, patet, demonstrationem a re simili non posse hic habere locum. Dixi autem *transeat*, quia cum nulla res sit alteri adeo similis; quin aliqua inter eas intercedat dissimilitudo, plerumque argumentum a re simili non potest ad evidentiam demonstrationis pertinere.

## PROPOSITIO II.

*Gentiles Philosophi accurata SS. Trinitatis notitia caruerunt; si quid vero obscure de ea noverunt, ab Hebraeis potuerunt accipere.*

*Prob. 1a. pars.* Nullus e veteribus Philosophis clare agnovit; et docuit, unam esse numero divinam naturam in tribus personis. Nam *Plato*, qui ceteris sublimius de



de Deo scripsit, licet in *Epistola II. ad Dionysium*, et in *alia ad Hermiam*, quas laudant *Eusebius*, *Clemens Alex.* aliiq. veteres, tres personas videatur agnovisse: tamen 1.<sup>o</sup> non constat, utrum personas ipsas putaverit distinctas, an vero unam, eandemque personam tribus attributis ornatam: 2.<sup>o</sup> unam naturam in tribus personis non agnovit: sed potius tres Deos: aut unum Deum, alias vero duas, creaturas omnium nobilissimas Unde *S. Thomas Lib. IV. con. Gent. cap. 6.* inquit: *Haec positio Ariti, et Eunomii videtur a Platoniorum dictis exorta, qui ponebant summum Deum Patrem, et Creatorem omnium rerum, a quo primitus effluxisse dicebant quandam mentem, in qua essent omnium rerum formae, superiorem omnibus aliis rebus, quam paternum intellectum nominabant, et post hanc animam mundi, et deinde alias creaturas. Et Cyrillus Alex. Lib. VIII. cont. Julian. Verumtamen cum tres primigenias hypostases ipsi quoque (Platonici) statuunt, et usque ad tres hypostases essentiam Dei pertinere asserant, atque interdum ipsum Triadis usurpent vocabulum, Christianorum suffragantur sententiis: nec ad eam rem quidquam eis deesset, si consubstantialis vocabulum accommodare vellent tribus hypostasibus, ut etiam una intelligeretur natura Divinitatis.*

Praeterea *Origenes* in veterum Philosophorum lectione versatissimus *Lib. I. de Princ. cap. 3.* affirmat, omnes Philosophos ignorasse Spiritum Sanctum; quamvis aliqua de Deo, ejusque Verbo obscure cognoverint. Idem docent *Didymus Lib. de Spiritu S.*, *Augustinus Lib. II. Quaest. in Exod.*

Denique si aliqui ex veteribus Philosophis Trinitatem cognovissent, et docuissent, non tantae offensioni, aut irrisioni patuisset hoc mysterium, cum a Christianis propositum fuit. Ergo.

*Prob. 2a. pars.* Certum est, veteres Philosophos in primis *Platonem*, et *Pythagoram*, diu, multumque peregrinatos esse per *Phoeniciam*, et *Aegyptum*, ut rerum scientiam undequaque colligerent. Ergo credibile non est, eos non consuluisset vel libros, vel Sacerdotes Hebraeorum, ut eorum Theologiam sublimitate, et maiestate sua venerandam, scrutarentur. Hinc merito Patres do-

138 *Theologicarum Institutionum Lib. IV. Cap. XIV.*  
 docent, quidquid veri de Deo dixerint Philosophi, ab  
 Hebraeis accepisse. Ita Justinus *Apol. II.* Eusebius *Lib.*  
*XI. Praep. Evang. cop. 10.* Basilii *Homil. XVI.*,  
 Theodoretus *Serm. II. de Graec. affectionib.*, Clemens  
 Alex. *Lib. V. Strom.*, Augustinus *Lib. II. de Doct.*  
*Christ. cap. 28.* Ergo etc. Vide Natal. Alex. *Hist. IV.*  
*Mundi aetat, cap. 7.*, et Huetium tum in *Demonstr.*  
*Evang.*, tum in *Alnetanis.*

### *Solvuntur Objecta.*

*Objic. I. Zoroastres Bactrianus*, qui tempore Semi-  
 ramidis floruisse dicitur, duas saltem personas divinas  
 agnovit, *Patrem*, et *mentem secundam*. *Mercurius vero*  
*Trismegistus*, quem Moysi coevum fuisse ferunt, cla-  
 re dicit in *Pimandro*: *Monas genuit monadem, et in*  
*se suum reflexit ardorem*: quae verba *Patrem*, *Filium*,  
 et *Spiritum Sanctum* aperte innuunt. Etiam Sybilla Ery-  
 thraea *Jesum Christum, Dei Filium* conceptis verbis  
 praedicat. Ergo.

¶ *Neg. cons.* Suppositia enim sunt *Zoroastris, Tris-*  
*megisti*, et *Sybillae* istius opera; et ab ipsis Christia-  
 nis animo quidem, et sine non malo, sed tamen frau-  
 dulenter composita. Vide Petavium *Lib. I. cap. II.*,  
 Casaubonum *Exercit. I. cont. Baron.* Quod si conten-  
 das, carmina Sybillina non posse dici, saltem omni ex  
 parte supposititia, quippe quae a Patribus laudata sint  
 contra Gentiles; respondendum est, Sybillas non natu-  
 rali lumine ea cognovisse, quae scripserunt, sed per  
 divinam revelationem, et prophetiam, quae cum sit  
 gratia *gratis data*, potest etiam esse in peccatoribus, ut  
 in Balaam *Num. XXIII.*, et in Caipha *Joan. XI. 51.*,  
 multoque magis in ipsis Sybillis ob meritum fortasse  
 virginitatis, ut nonnulli Patres opinantur.

*Objic. II. Plato in Epist. II. ad Dionysium, et in*  
*Epist. VI. ad Hermiam, Erastum, et Coriscum*, aperte  
 tres Personas in Divinitate distinguit, quarum primam,  
 appellat *Patrem*; secundam *principium*, *mentem*, *Opi-*  
*ficem*; tertiam vero *animam mundi*. Hinc Patres pas-  
 sim Gentilibus, et Haereticis Trinitatem oppugnantibus,  
*Platonem* objecerunt. Ergo.

¶ *Dist.*

¶ *Dist. ant.* Tres personas agnovit diversae naturae, hoc est tres Deos, transeat. Ejusdem naturae, neg. Ita Platonis mentem explicant ipsi ejus discipuli. Vide Macrobius *Lib. I. in Somnium Scipion. cap. 14.*, Plotinus *Enneade V. Lib. I. cap. 3. et seq.* Unde Cyrillus Alex, *Lib. III. in Julian. Plato*, inquit, *unum quidem esse opificem statuit omnium causam, quem et mundo attentum ait fuisse; sed ante eum extitisse Deum alterum, sive ideam boni. Tertiam autem etiam causam affabricatur, ordine quidem, et natura primis inferiorem, quam et rerum animam appellat.* Ita etiam loquuntur alii Patres, ut merito dixerit *S. Thomas*, Platonem Ario praeclusisse. Cum igitur idem Patres contra Gentiles, et haereticos Platonis auctoritatem urgent, non ita intelligendi sunt, quasi accuratam SS. Trinitatis scientiam ei attribuerint; sed ut eos revincerent, longius a veritate recessisse, quam Plato, qui licet veritatem ipsam non tenuerit, ad eam tamen aliquo pacto accessit.

*Objic. III. Aristoteles Lib. I. de Caelo Textu 2. docet, veteres numero ternario Deum coluisse. Ergo Trinitatem agnoverunt.*

¶ *Neg. cons.* Colere enim Deum numero ternario apud *Aristotelem* non est agnoscere Deum trinum; sed in cultu Dei, sive in precibus, et sacrificiis ternarium numerum, cui perfectionem quandam inesse veteres censabant, adhibere.

### Scholion.

De iis Philosophis intelligenda propositio est, qui ante Christum scripserunt. Postquam vero Christiana religio propagata est, mirum videri non debet, si Platonici multa e nostris accepta in suos libros derivarent, ita ut dicere potuerit *Augustinus Lib. VII. confes. cap. 9. et alibi* in quibusdam se Platoniorum libris primum Evangelii *Joannis* caput, licet aliis expressum verbis, invenisse. Quod autem *Clericus, Moshemius*, alique haeretici effutiant, ex Platonica potius Philosophia Patres nonnulla de Trinitate mutuatos, non minus stultum, quam impium est. Vide *P. Baltus Defense des Saints*  
Pe-

140 *Theologicarum Institutionum Lib. IV. Cap. XIV.*  
*Peres accusés de Platonisme . . . Lamy de recta Chri-*  
*stianorum in eo, quod mysterium Trinitatis attinet,*  
*sententia.*

### PROPOSITIO III.

*Posita fide, possunt aliquae in rebus creatis observari*  
*imagines, quae Trinitatem aliquatenus adum-*  
*brent, licet imperfecte.*

*Prob. 1a. pars ex Patribus, qui varias ex rebus crea-*  
*tis similitudines ad illustrandum hoc mysterium adhibue-*  
*runt. Prima, et praecipua est ipsius animae rationalis,*  
*in qua tria sunt, esse, intelligere, et velle: et haec*  
*tria una eademque anima sunt. Hac comparatione saepe*  
*utilitur Augustinus (a). Altera est radices, trunci, et ra-*  
*mi in eadem arbore. Ea utitur Tertullianus Lib. cont.*  
*Prax. cap. 8., et Augustinus Lib. de fide et Symbo-*  
*lo cap. 9. Tertia est solis, radii, et splendoris. Quar-*  
*ta, fontis, rivi, et fluminis. Quinta, ignis, splendoris,*  
*et caloris. Aliae quoque sunt ejusmodi similitudines re-*  
*rum, in quibus tria quaedam distinguuntur, quorum*  
*unum ab alio procedit; sed tamen unum sunt.*

*Prob. 2a. pars. In omnibus hisce comparationibus non*  
*est una, et simplicissima res in tribus suppositis subsi-*  
*stens, ut patet excurrando per singulas. Quare Hilarius*  
*Lib. I. de Trin. n. 19. merito advertit: Si qua nos de*  
*natura Dei . . . tractantes, comparationum exempla af-*  
*feremus, nemo ea existimet absolute in se rationis per-*  
*fectionem continere; comparatio enim terrenorum ad*  
*Deum nulla est . . . Omnis igitur comparatio homini*  
*potius utilis habeatur, quam Deo apta; quia intelli-*  
*gentiam magis significet, quam expleat.*

CA-

---

(a) Sic *Lib. XIII. Confess. cap. 11. Vellem, inquit, ut haec*  
*aria cogitarens homines in seipsis . . . esse, nosse, velle. Sum*  
*anim, et novi, et volo. Sum sciens et volens: et scio esse*  
*me, et velle, et volo esse, et scire. In his igitur tribus quam*  
*sit inseparabilis vita, et una vita, et una mens, et una essen-*  
*sia; quam denique inseparabilis distinctio, et tamen distin-*  
*ctio; videat qui potest etc. Et Lib. XIV. de Trin. Mens me-*  
*minit sui, intelligit se, diligit se; hoc si cernimus, cernimus*  
*Trinitatem; nondum quidem Deum, sed imaginem Dei.*

## C A P. XV.

*Utrum mysterium SS. Trinitatis possit negative demonstrari, hoc est utrum possint ratione naturali dissolvi, quae ex ipsa ratione contra illud mysterium opponuntur.*

**Adv. I.** **S**eposita revelatione, certum est, non posse dissolvi omnia, quae naturali ratione mysterio SS. Trinitatis opponuntur; non quia ipsa revelatio solutiones objectorum suppeditet; sed quia tam sublime est hoc mysterium, ut ratio sibi relicta non vuspicaretur esse falsa, quae cum tanta veri specie obijciuntur. At posita revelatione, cum certi simus. fide divina, Triunitatem existere, recte concludimus, non posse vera esse, quae contra ipsam pugnare videntur; ideoque considerantes attentius argumenta, quae prima fronte solvi non posse videbantur, tandem delegimus, qua in re peccent.

**II.** Non est tamen necesse, ut tanta evidentia dissolvantur, quantam habere possumus in his rebus, quae minus a sensu, aut ratione humana remota sunt; sed satis est cum aliqua verisimilitudine ostendere, argumenta illa non esse apodictica, et evidentia. Cum enim habeamus exploratam divinae revelationis veritatem, nec possit ratio humana divinae revelationi esse contraria (alioquin ipse Deus esset auctor mendacii; quia ipse tum revelationis, tum rationis est auctor, ut diximus *Lib. I. cap. 5.*); sufficit ostendere, humana mente excogitatas rationes non esse ita evidentes, uti adversarii jactant, ut certo dicamus illas esse falsas, quippe quae veritati divinitus revelatae opponuntur.

**III.** Quidquid contra SS. Trinitatem est unquam ab aliis excogitatum, *Crellius*, *Wolkelius*, et *Volzogenius*, Sociniani collegerunt. Nos praecipua proponemus eorum argumenta; omnes enim eorum ineptias persequi non est operae pretium.

## P R O P O S I T I O.

*Posita revelatione, potest SS. Trinitatis mysterium negative demonstrari.*

Propositio probatur ex ipsa solutione objectorum; hoc enim est negative demonstrare, ut supra diximus.

*Objic.* I. Quae sunt eadem cum uno tertio, sunt eadem inter se. Atqui Pater, Filius, et Spiritus Sanctus sunt idem cum natura divina, quae una numero est. Ergo sunt unum, et idem inter se; ac proinde una est persona divina tribus nominibus insignita. Urget etiam hoc argumentum Baelius *Dict. Hist. Crit. art. Pyrrhon.* ut probet, rationem revelationi esse contrariam (a).

*R. Dist. maj.* Quae sunt eadem cum uno tertio sunt eadem inter se in eo, in quo cum uno tertio sunt eadem, *conc.* In eo, in quo non sunt eadem, *neg.* Cum igitur Pater, Filius, et Spiritus Sanctus ratione naturae sint unum, et idem cum natura divina unica, et simplicissima, recte sequitur, esse unum inter se in natura; hoc est unam, et eandem numero trium personarum naturam. At cum ratione personae non sint idem cum natura divina, a qua *virtualiter* distinguuntur, non sequitur, esse idem inter se ratione personae; hoc est, unam, et eandem esse in divinis personam.

*Inst.* 1.<sup>o</sup> Licet persona virtute distinguatur a natura; re tamen non distinguitur. Ergo ad summum ex *virtuali* distinctione personae a natura divina sequi potest, personas esse inter se virtute distinctas; sicut etiam ex eo quod misericordia, et justitia virtute distinguuntur a natura divina, sequitur, eas esse virtute inter se distinctas.

---

(a) Eandem recinit cantilenam Tolandus, alique increduli, quos egregie confutat Anonymus in libro, cui titulus: *La foi justifiée de tous reproches de contradiction avec la raison*; Leybnitius *De la conformité de la foi avec la raison*, alique.

*¶ Neg. Cons.* et comparisonem ad ejus confirmationem allatam. Misericordia enim, et justitia non opponuntur inter se *relative*: et potest una, eademque res esse misericordia simul, et justitia, propter varios, quos producit, effectus. At Pater et Filius, spirans et spiratus *relative* inter se opponuntur: nec potest idem esse sui ipsius Pater et Filius, spirans et spiratus. Licet ergo inter personam, et naturam realis distinctio non sit, quia persona naturae non opponitur *relative*; tamen inter ipsas personas, quia *relative* opponuntur, distinctio realis est.

*Inst. 2.º* Non potest effectus esse major sua causa. Atqui causa distinctionis personarum a se invicem est distinctio *virtualis* personae a natura. Ergo si illa distinctio est tantum *virtualis*, distinctio personarum a se invicem non potest esse *realis*.

*¶ Neg. min.* Tum quia in divinis nulla est causa, sed principium, et ratio; tum quia principium, et ratio distinctionis personarum a se invicem non est distinctio *virtualis* cujusque personae a natura; sed oppositio relationis, quae inter ipsas personas intercedit. Sic in homine, qui est rationalis secundum mentem, et irrationalis secundum corpus, *rationalitas*, et *irrationalitas*, ut Scholae ajunt, non distinguuntur nisi virtute ab ipso homine; sed ipsa rationalitas re ipsa ab irrationalitate distinguitur; quia ipsi per affirmationem, et negationem opponitur.

*Inst. 3.º* Si distinctio personae a natura non est realis, sequitur, Patrem non posse Filio communicare naturam sine persona. Ergo sicut natura, et persona Filii idem sunt; ita persona Patris, et Filii idem esse debent. Idem dicas de Spiritu Sancto.

*¶ Dist. ant.* Sequitur, Patrem non posse communicare Filio naturam sine persona *formaliter*, *neg. Identice*, sive *per concomitantiam*, *con.* Sensus distinctionis est, quod cum Persona Patris non distinguatur re ipsa a natura, profecto ipsa persona Patris est in Filio per circuminsessionem, de qua supra diximus *cap. 8.*: sed non sequitur, personam Patris *formaliter* subsistere in Filio, cui *relative* opponitur.

*Objic.*

*Objic. II.* Una natura non potest nisi in una persona subsistere; persona enim est ipsa natura subsistens, et incommunicabilis alteri. Ergo vel in Deo una natura est, et una erit persona; vel tres sunt personae, et tres pariter erunt naturae.

*¶. Dist. ant.* In creatis, *conc.* In divinis, *neg.* Licet enim in rebus creatis, et finitis, una natura unam habere possit personam, nec ullum habeamus in creatis contrarium exemplum; quia una persona ita totam exhaurit, et amplectitur naturam finitam, ut haec in una persona subsistat omni modo, quo subsistere potest; non ita tamen cogitandum est de natura infinita; a finito enim ad infinitum non recte concluditur. Quod autem additur, nempe personam esse ipsam naturam subsistentem, et incommunicabilem, nihil aliud probat, nisi naturam, quatenus in una persona subsistit, non posse alteri communicari; hoc est, Patrem non posse esse Filium; sed non probat, naturam divinam, quae uno modo subsistit in Patre, non posse alio modo subsistere in Filio, et Spiritu Sancto.

*Inst. 1.<sup>o</sup>* Sicut persona finita totam naturam finitam amplectitur, et exhaurit; ita persona infinita naturam totam infinitam exhaurit, et amplectitur; alioquin esset dicendum, non totam naturam divinam in una persona subsistere; quod absurdum est. Ergo valet hac in re conclusio a finito ad infinitum.

*¶. Dist. ant.* Persona infinita exhaurit, et amplectitur naturam totam infinitam quoad illum modum subsistendi, qui est illius personae proprius, *conc.* Quoad alium modum subsistendi, cujus natura infinita capax est, et qui non est illius personae proprius, *neg.* Persona ergo Patris exhaurit totam naturam divinam, quatenus potest in *Paternitate* subsistere; sed non quatenus subsistere potest alio modo, qui non est proprius personae Patris, nempe in *Filiatione*.

*Inst. 2.<sup>o</sup>* Ergo una persona divina imperfecta est; quia est alius modus subsistendi, quem ipsa non habet, quia non est ipsi proprius.

*¶. Neg. sequel.* Tum quia relationes *Paternitatis*, *Filiationis* etc. non sunt perfectiones simpliciter simplices, ut supra diximus cap. 9.; ideoque non debet cen-



seri imperfecta persona Patris, eo quod non habeat *formaliter* Filiationem; tum quia in qualibet persona etiam aliae sunt per circuminsessionem, ut supra docuimus *cap. 8.*

*Objic. III.* Valet hoc argumentum: Pater est persona divina, Filius est persona divina, Spiritus Sanctus est persona divina; ac proinde tres sunt personae divinae. Ergo valet et hoc alterum: Pater est Deus, Filius est Deus, Spiritus Sanctus est Deus: ergo sunt tres Dii.

*℞. Neg. cons. et parit.* In priori enim argumento persona *disjunctive* accipitur, scilicet hoc sensu: Pater est persona divina, Filius est altera persona, Spiritus Sanctus est alia persona; ac proinde tres personae esse debent. At in altero argumento *Deus* idem semper intelligitur hoc sensu; Pater est Deus, Filius est idem ille Deus, Spiritus Sanctus est idem ille Deus; atque idcirco falso concluditur; ergo sunt tres Dii.

*Objic. IV.* Sicut repugnat tres esse Deos; quia unus carere deberet perfectionibus alterius, ac proinde non esset Deus: ita repugnat tres esse personas divinas, quia uni personae deesse debent perfectiones alterius, ac proinde non est persona divina.

*℞. Neg. ant. et parit.* Ideo enim repugnat esse tres Deos, quia unus carere deberet alterius perfectionibus, non solum iis, quae dicuntur simplices, verum etiam iis, quae *simpliciter simplices* appellantur; ac proinde non esset Deus, quia deessent ei perfectiones illae, quas melius est habere, quam non habere. At cum tres personae divinae eandem habeant divinam naturam, una non caret perfectionibus alterius, quae dicuntur *simpliciter simplices*; licet careat *personalitate*, et relatione alterius, quae est perfectio *simplex*, quam non est melius habere, quam non habere; ac proinde ejus negatio non efficit, ut persona illa non sit *Ens* perfectissimum; cum praesertim persona una alias etiam duas per circuminsessionem in se habeat.

*Inst.* Ergo natura divina est aggregatum per *accidens*; constat enim ex tribus entibus perfectis. Atqui hoc est absurdum. Ergo.

*℞. Neg. sequel.* Aggregatum enim per *accidens* est quod constat ex pluribus entibus inter se non connexis:

At inter tres personas divinas tantus est connexus, ut ipsae sint unum ens absolutum, una natura divina.

*Objic. V.* Posito Trinitatis mysterio, sequitur, idem simul esse et non esse. Nam 1. Filius esset productus, et non productus; productus quidem ratione personae, non productus autem ratione naturae; at persona, et natura Filii non distinguuntur reipsa, sed una, et simplicissima res est. Ergo idem simul esset, et non esset. 2. Deus esset, et non esset ens simplicissimum; esset quidem Ens simplicissimum propter ea, quae diximus in *Lib. III. cap. 4.*; non esset vero tale, quia Pater, gignendo Filium, partem sui communicaret, nempe naturam; partem vero retineret, nempe personam, et paternitatem. 3. Quaelibet persona esset trina, et non esset; esset quidem trina, quia quaelibet persona Deus est; Deus autem, posito hoc mysterio, est trinus: non esset vero, quia quaelibet persona una est. Ergo.

*R. Neg. ant. Ad. 1m.* Licet natura Filii, ejusque persona non distinguantur reipsa, sed una, et simplicissima res sint; distinguuntur tamen *virtute*, propter quam distinctionem potest Filius dici productus, ac non productus diverso respectu.

*Ad 2.* Negandum est, Patrem, gignendo Filium, partem sui communicare, partem retinere; communicando enim naturam, communicat etiam personam, non *formaliter* (quasi paternitas subsistat in Filio quod absurdum est); sed, ut Scholastici loquuntur, *identice*, per *concomitantiam*, et *circumin sessionem*.

*Ad 3.* Deus est trinus, si consideretur *adaequate*, quatenus in tribus personis subsistit; non vero si *inadequate* consideretur seorsim quaelibet persona; hinc falsum est, quamlibet personam esse trinam, et non trinam.

*Objic. VI.* Posito dogmate Trinitatis, tres essent divinae substantiae; persona enim est rationalis naturae individua substantie; ideoque tres personae tres substantiae esse debent. Atqui unica est Dei substantia, quia unus est. Ergo.

*R. Dist. ant.* Tres essent substantiae, si nomine substantiae intelligas *subsistentiam*: quo sensu aliquando Veteres substantiae nomen adhibuerunt, *conc.* Tres essent substantiae si eo nomine intelligas id, quod per se existit,

sit, nec alio indiget subjecto ad existendum, *neg.* Una enim est Dei substantia, quæ, quia tribus modis subsistit, tres sunt personæ; et quælibet persona est illa substantia singulari modo existens.

*Objic.* VII. Persona est, quæ ultimo terminat naturam, et reddit eam alteri *incommunicabilem*. Ergo aut dicendum est, naturam divinam, subsistentem in persona Patris, esse alteri *incommunicabilem*, et hinc sequitur, unam esse Dei personam, nempe Patris; aut dicendum, naturam divinam in Patre, et Filio subsistentem adhuc esse *communicabilem* Spiritui Sancto, et hinc sequitur, solum Spiritum Sanctum esse veram personam, quia naturam divinam ultimo terminat; redditque eam alteri *incommunicabilem*.

*R. Dist. ant.* Persona est, quæ ultimo terminat naturam, redditque eam alteri *incommunicabilem*, quatenus eo modo subsistit, *conc.* Quatenus alio etiam modo potest subsistere, *neg.* Et quia in creatis una natura unum habet sibi proprium subsistendi modum; hinc una natura, creata, terminata ab una persona, non est alteri *communicabilis*. At natura infinita, quia tribus modis potest subsistere, idcirco terminata a persona Patris, quatenus quidem in *Paternitate* subsistit, non est alteri *communicabilis*; at *communicabilis* est, quatenus potest alio modo subsistere.

*Inst.* Vel Pater est perfectus sine Filio, vel non. Si primum dicas; ergo frustra ei additur Filius. Sin alterum; ergo non est Deus.

*R. Ad ant.* Dico, Patrem esse perfectum sine Filio in natura divina; esse quoque perfectum in ratione Patriæ sine alio intrinsecus sibi adjuncto; sed non esse perfectum Patrem sine Filio, qui est terminus, ad quem Pater refertur, et sine quo cogitari Pater non potest. Hinc Dionysius Alex. ap. Athanas. Lib. De entent. Dionys. Singula, inquit, illa nomina, de quibus locutus sum, *insegregabilia a se invicem sunt nec dividit queunt*. Patrem cum dico, etiam sine mentione Filii, Filium sub Patris vocabulo indicatum volui. Contra si in mentione Filii Patrem omissem tamen ille sub nomine Filii intelligi debuit. Tractat ista fusius Laurentius Berti Lib. VII. cap. 6., ubi omnia Wolsogenii argu-

148 *Theologicarum Institutionum Lib. IV. Cap. XV.*  
gumenta persequitur, atque dissolvit. Multa etiam de his  
habet *Tournely*.

*Libri Conclusio.*

Atque haec in laudem, et gloriam, et honorem  
Patris, Filii, et Spiritus Sancti, unius, et individuae  
Trinitatis dicta sufficiant. Restat tamen, ut, quoniam  
diximus, imaginem quandam in nobis impressam esse  
Trinitatis, atque eidem Trinitati devotos fuisse nos  
in baptismo, et consecratos; caveamus sedulo ne ima-  
ginem adeo praestantem, ac divinam peccato macu-  
lemus; sed ita nos gerere satagamus; ut manentem in  
nobis Patrem, Filium, ac Spiritum S. verbis, factis,  
atque omni vitae ratione et sentiamus interius, et exte-  
rius ostendamus.

*Finis Lib. IV.*

# LIBER V.

S E U

TRACTATUS DE RERUM CREATIONE.

De Angelis. De sex dierum Opificio.

De homine, ejusque lapsu.

*Praefatio.*

**L**ibro superiori, quo de processionibus divinarum personarum intra ipsam divinitatem egimus, apposite hunc subjecimus de processione creaturarum a Deo, sive a tribus simul divinis personis, quae bonitatem suam in rerum creatione, veluti extra se effuderunt. Sed quoniam res creatae trium sunt generum, spirituales, corporeae, et compositae ex corpore et spiritu; ideo erit tractatio haec omnis quadripartita; in prima enim parte de ipsa universim creatione tractabitur; in altera de Angelis: in tertia de creatione mundi hujus corporci, atque visibilis; in quarta de homine, ejusque lapsu in peccatum, secutaque hinc totius humanae naturae corruptione.

P A R S I.

*De rerum Creatione generatim.*

C A P. I.

*Ostenditur, creationem ex nihilo esse Deo possibilem.*

*Adv. I.* **R**erum creationem ex nihilo impossibilem esse, contendunt Athei; atque in ejus opinionis patrocinium vocant veteres Philosophos, quorum plurimi, ut docet Censorinus *De die Natali* cap.

150 *Theologicarum Institutionum Lib. V. Pars. I. Cap. I.*  
4. , Mundum fuisse posuerunt ab aeterno : omnes vero ,  
ut athei putant , saltem materiam ipsam , vel *Chaos* ,  
unde mundus conditus est , aeternam fuisse docuerunt.

II. Sed Philosophorum patrocinium frustra , et inepte prorsus athei implorant. Primo enim ipsi omnem auctoritatem spernunt , et sola ratione volunt inquirendam esse veritatem. Cur ergo de auctoritate veterum gloriantur ? Deinde illi ipsi veteres , Pythagorici nempe , Platonici , et Peripatetici , qui mundum putabant esse ab aeterno ; statuebant tamen , illum esse a Deo factum , ut testatur *Plutarchus* de Pythagoricis , et *Platonici* : et de Peripateticis constat ex ipso *Aristotele Lib. II. Metaphysic.* Quod observat Angelicus Doctor *I. P. Q. XLIV. art. 2. , et Lib. VIII. Physic. Lect. 2.* Si ergo docebant , mundum a Deo factum esse ab aeterno , manifestum est , eos putasse mundum creatum ex nihilo ; si enim factus esset ex jam extante materia , non esset utique factus ab aeterno , quia materia ipsa fuisset mundo antiquior , ut patet. Imo clare docet *Aristoteles* tum in laudato *Metaphysicorum* loco , tum in aliis , primum , ac supremum ens esse omnibus aliis entibus existendi causam ; quod perspicue creationem ex nihilo significat. Vide *Sylvium ad I. P. Q. XLIV. et XLV.*

III. Utrum autem mundus ab aeterno creari potuerit , infra erit dicendi locus. Nunc istam atheorum audaciam , qua confidenter pronunciant , creationem ex nihilo esse impossibilem , necesse est retundamus.

## PROPOSITIO I

*Creatio rerum ex nihilo non est Deo impossibilis.  
Est dogma fidei.*

*Prob.* Quod contradictionem non implicat , non est omnipotentiae Dei impossibile , ut *Lib. III. cap. 12* diximus. Atqui creatio rerum ex nihilo contradictionem nullam involvit. Illud enim contradictionem involvit , quo dicitur ; aliquid simul esse , et non esse ; *ex gr.* mons sine valle , circulus sine rotunditate , triangulum sine tribus lineis , aut angulis. At creatio ex nihilo non est ejusmodi ; aliud enim est , idem simul esse , et  
non

non esse; aliud est, ut quod non erat, jam esse incipiat. Ergo non est omnipotentiae Dei impossibilis. Quod autem sit hoc dogma fidei, patet tum ex generali effato, quod veluti fundamentum Christianae fidei posuit Angelus *Luc. I. 37. Non erit impossibile apud Deum omne verbum*; tum ex eo quod revera ex nihilo cuncta creata esse, ad fidem pertinet.

### Solvuntur Objecta.

*Objic. I.* Vulgatum est axioma: *Ex nihilo nihil, in nihilum nil posse reverti.* Ergo.

¶ *Dist. ant.* Virtute, et potentia finita, *conc.* Virtute, et potentia infinita, *neg.* Virtus enim finita certis est circumscripta limitibus; ita ut quamvis habeat subjacentem materiam, non possit tamen inde omnia facere, quae libuerit; ac proinde multo minus facere aliquid sine ipsa materia jam extante. At virtus infinita ad omne id extenditur, quod contradictionem non implicat; ita ut possit superare distantiam infinitam, quae est inter ens, et nihil: ideoque efficere, ut quod non erat, esse incipiat; et quod erat ulterius non sit.

*Inst.* Atqui contradictionem involvit, fieri aliquid ex nihilo; si enim ex nihilo fieret aliquid, jam nihilum esset subjectum, unde res fieret, ac proinde nihilum simul esset, et non esset.

¶ *Neg. ant. et suppositum.* Cum enim dicimus, virtute divina fieri aliquid ex nihilo, non id intelligimus, quod in objectione *supponitur*, nihilum esse subjectum, unde res efficitur; sed illud tantum, nempe per virtutem infinitam incipere esse rem, quae prius non erat.

*Objic. II.* Omnino intelligi non potest, quomodo creari aliquid possit ex nihilo; fugit enim hoc omnino mentis aciem. Ergo.

¶ *Neg. cons.* Quod enim mente assequi nequeamus creationem ex nihilo, nihil aliud ostendit, nisi mentis humanae imbecillitatem. Sat est scire, nullam ea in re inesse contradictionem; et multa Deum facere posse, quae nos fateamur intelligere non posse.

Co-

*Corollarium.*

Ergo possibile est etiam divinae potentiae res omnes redigere in nihilum. Paris enim potestatis est res creare ex nihilo, et creatas redigere in nihilum.

## C A P. II.

*Utrum omnia, quae sunt, a Deo creata sint ex nihilo.*

*Adv. I.* **N**unc inspiciamus, an quod possibile esse demonstravimus, revera sit a Deo factum, ita ut omnia, quae sunt, a Deo ex nihilo creata sint.

II. Joan. Clericus *Art. Crit. Tom. III.*, et Richardus Simonius *Hist. Crit. Vet. Test. Lib. III. cap. 3.* putant, ex Scripturis clare ostendi non posse creationem rerum ex nihilo.

## P R O P O S I T I O

*Quidquid est extra Deum, ab ipso Deo creatum est ex nihilo. Est dogma fidei.*

*Prob. I. ex Scriptura. Genes. I. In principio creavit Deus caelum, et terram:* quibus verbis totam rerum naturam complexus est Moyses, et quidquid caelo, terraeque continetur. Et quamvis hic aperte non habeatur *creavit ex nihilo*; et ipsum Hebraicum verbum *bara*, *creavit*, sumatur aliquando in Scripturis pro rerum productione ex jam extante materia, sicut in eodem *cap. I. Gen.* dicitur *creavit Deus cete grandia*, utique ex materia extante; tamen cum agitur de creatione caeli, et terrae veram creationem ex nihilo intelligendam esse, patet ex aliis Scripturae locis, ut ex *II. Machab. cap. 7. Caelum, et terram, et ... omnia, quae in eis sunt ... ex nihilo fecit Deus, et hominum genus.* Quid ad haec Clericus? Aitne Machabaeorum libros non esse Canonicos? Sed praeterquam quod id *Lib. II. cap. 3.* confutavimus, concedere saltem debet, Synagogam perpetuo per  
ca



ea verba creavit Deus caelum, et terram, intellexisse creationem ex nihilo, cum Libros Machabaeorum religiose servaverit. Num igitur adeo insolenter et inepte superbus est, ut vim, et potestatem verbi *bara creavit*, quod in *Genesi* positum est, melius se perspexisse, quam omnes veteres Hebraeos, arbitretur?

*Prob. II. ex perpetua Ecclesiae traditione*, cujus innumeri, et locupletissimi testes sunt quotquot vel a primis Ecclesiae sacculis floruerunt Patres. Sufficiant pro omnibus 1.<sup>o</sup> Ambrosius, qui, ex omnium Christianorum sensu loquens *Lib. I. Hexam. cap. 4.* ait, *Auctorem Angelorum, et Dominationum, et Potestatum facile intelligimus eum qui momento imperii sui hanc tantam pulchritudinem mundi ex nihilo fecit esse, quae non erat, et non de extantibus, aut rebus, aut causis donavit habere substantiam.* 2.<sup>o</sup> Augustinus *Lib. I. de Gen. cont. Manich. cap. 2.* Non ea genuit de seipso, ut hoc essent, quod ipse est; sed ea fecit de nihilo. A ceteris recensendis abstinemus, cum definitum sit in Concilio Lateranensi IV., quod *Deus utramque de nihilo condidit creaturam, spiritualem, et corporalem.*

*Prob. III. ratione.* Si aliquid extaret, quod non fuisset a Deo creatum ex nihilo, esset aliud *Ens a se* praeter Deum, quod repugnat. Nam, ut ostendimus *Lib. III. cap. 2.*, *Ens a se* Deus est. Praeterea si materia creata non esset, sed aeterna, esset ens necessarium, immutabile, nullique subjectum; ac proinde nihil ex ea facere potuisset Deus: imo non existeret Deus. Deus enim est *Ens perfectissimum*. Atqui maxima haec perfectio est, ut sit primum *Ens*, a quo omnia alia entia pendeant. Ergo si esset aliquod ens, quod a Deo non pendeat, Deus non esset Deus, ac proinde non esset. Vide *Hist. Crit. Reipub. litergr. Tom. IV. Art. 3.*, ubi contra Clericum fuse disputatur. Tractat haec acutissime S. Thomas *Lib. II. cont. Gent.*

*Corollaria.*

I. Cum ergo Deus cuncta creaverit ex nihilo, patet hinc, quam absurda fuerit eorum Philosophia, qui mundum hunc corporeum ex Dei substantia emanasse somniarunt. Fuerunt ejus sententiae Aegyptii, Chaldaei, Sinenses, aliique. Quid autem insulsius, quam ex Dei substantia spiritali, eaque simplicissima, emanare materiam potuisse? Concoquere id potuerit Spinoza (*in Ethica*): reliqui, quos commemoravimus, nisi pantheismi labe et ipsi aspersi fuerint, quomodo tam inepte errare potuerint, mirandum est. *Vid. Wolphium Theol. Nat. Tom. II. prop. 671.*

II. Ergo quidquid est, bonum est. Si enim quidquid est, a Deo creatum est, non potest esse nisi bonum. Hinc *Gen. I.* de singulis creaturis dicitur: *vidit Deus quod esset bonum*: et deinde de omnibus aptissime secum congruentibus: *vidit Deus cuncta quae fecerat, et erant valde bona.* Et *Sap. XI. 25. Diligis omnia, quae sunt, et nihil odisti eorum, quae fecisti.* Et *I. Tim. IV. 4. Omnis creatura Dei bona est.* Vide *S. Thomam I. P. Q. V. art. 1. et 3.* Merito igitur damnati, atque explosi Manichaei, et Priscillianistae, qui creaturas aliquas natura sua malas asseruerunt, de quibus vide *Epiphanium, Philastrium, Augustinum.* Nunc quod *cap. I.* proposuimus, expendendum est, utrum omnia ab aeterno creata sint, vel creari potuerint.

## 3 C A P. III.

*Utrum omnia creata sint, vel creari potuerint ab aeterno.*

*Ado.* IN prima hujus controversiae parte, utrum scilicet omnia ab aeterno creata fuerint, nonnulli veteres Philosophi, ut Pythagorici, Platonici, et Peripatetici errarunt, docentes, mundum fuisse factum ab aeterno, ut *cap. I.* animadvertimus. At circa alteram partem, utrum potuerit saltem Deus ab aeterno omnia creare; vel quod eodem recidit, utrum creari aliquid ab aeterno contradictionem involvat, acris est inter Theo-  
lo-

logos quaestio. S. Thomas *Opusc. XXVII. de Aeternitate mundi*, et *Quaest. III. de Potent. art. 14. docet*, potuisse mundum creari ab aeterno. At in *Summa I. P. Quaest. XLVI.* non ita clare sententiam suam aperit: imo si vera est lectio nonnullorum Codicum, videtur ea de re vel dubitasse, vel in contrariam potius inclinasse sententiam. Certe *Durandus*, *Cajetanus*, *Sotus*, *Bunne-*  
*sius*, alique tenent, creationem ab aeterno non esse impossibilem: alii, ut *Richardus*, *Henricus*, *Valentia*, alique plurimi id negant.

## PROPOSITIO I.

*Mundum non esse a Deo creatum ab aeterno,  
 dogma fidei est.*

*Prob. Prov. VIII. 22. ait Sapientia: Dominus possedit me in initio viarum suarum, antequam quidquam faceret a principio. Ab aeterno ordinata sum, et ex antiquis antequam terra fieret. Nondum erant abyssi, et ego jam concepta eram: necdum fontes aquarum eruperant. Necdum montes gravi mole constiterant: ante colles ego parturiebar: Adhuc terram non fecerat, et flumina, et cardines orbis terrae. Eccli. XXIII. 29. Domino Deo, antequam crearentur, omnia sunt agnita. Ex Joan. XVII. 5. et 24. ait Christus: Clarifica me tu Pater apud teipsum; claritate, quam habui priusquam Mundus esset. . . . Dilexisti me ante constitutionem mundi. Ephes. I. 4. Elegit nos ante Mundi constitutionem. Alia quoque his similia leguntur in Scripturis. Concilium etiam Later. IV. sub. Innoc. III. definivit: Deum omnipotentem sua virtute simul ab initio temporis utramque de nihilo condidisse creaturam, spiritualem, et corporalem Ergo.*

*Refutantur Objecta.*

*Objic. I.* Vel Deus potuit, et voluit omnia ab aeterno creare: vel potuit, et noluit; vel voluit, et non potuit; vel non potuit, nec voluit. Si primum dicas, jam concedis omnia creata esse ab aeterno. Si reliqua tria, Deus fuisset vel infirmus, vel invidus, quod absurdum est. Ergo.

*¶.* Si creatio ab aeterno contradictionem involvit Deum nec potuisse, nec voluisse aliquid ab aeterno creare; non quia infirmus est; sed quia quae contradictionem implicant; non sunt, nec esse possunt, objectum nec intelligentiae, nec voluntatis ejus, ut *Lib. III. cap. 12.* diximus. Si vero creatio ab aeterno non involvit contradictionem (de quo infra disputabimus) dicendum est, Deum potuisse omnia ab aeterno creare: nec tamen voluisse; non quia invidus; sed quia sapientissimus est, et id vult, quod est decentius.

*Objic. II.* Causa, quae ab aeterno est *in actu*, ab aeterno effectum produxit. Atqui Deus est causa, quae ab aeterno est *in actu*; alioquin mutatus esset a *potentia* ad *actum*, quod divinae perfectioni repugnat. Ergo ab aeterno omnia produxit.

*¶. Dist. maj.* Si causa agit necessario, et non libera voluntate, *conc.* Secus, *neg.* Deus itaque ab aeterno *actu* voluit, ut creaturae essent non ab aeterno, sed in tempore.

*Objic. III.* Si creaturae non semper fuerunt, etiam tempus non semper fuit; cum enim tempus non aliud sit, nisi mensura motus, profecto cum creaturis inceptit. Atqui hoc repugnat: qui enim dicit, tempus non semper fuisse, significat, fuisse tempus, quando non erat tempus. Ergo.

*¶. Neg. min.* Qui enim dicit, tempus non semper fuisse, significat, fuisse aeternitatem antequam inciperet tempus.

*Objic. IV. Eccl. I. 9.* aperte dicitur: *Quid est quod fuit? ipsum quod futurum est: Quid est quod factum est?*

*est? ipsum quod faciendum est. nihil sub sole novum, nec valet quisquam dicere: ecce hoc recens est: jam enim praecessit in saeculis, quae fuerunt ante nos.* Atqui haec verba aeternitatem mundi significant. Ergo.

¶ *Neg. min.* Quamvis enim non fuerit mundus ab aeterno conditus, tanta est tamen ejus antiquitas, ut jure possis dicere, *nihil sub sole novum.* Nam si mundum consideres naturalem, iidem sunt hodie, eruntque in posterum naturalium causarum effectus, qui a principio fuerunt. Si vero hominum actiones, cum iisdem passionibus subjecti sint, quibus veteres erant subjecti, non est mirum si eadem nunc accidunt, quae olim acciderunt, licet eorum memoria perierit.

Alia argumenta vide apud S. Thomam, qui *I. P. Q. XLVI. art. 1.* decem argumenta in contrarium producit, et solvit: *Quaest. 3. de. Pot. art. 17.* triginta in *Lib. II. cont. Gentes. cap. 32. et seq. octodecim:* in *2. Dist. I. Q. 1. art. 5.* quatuordecim.

## PROPOSITIO II.

*Verisimilius est, non potuisse aliquid creari ab aeterno; seu creationem ab aeterno involvere contradictionem.*

*Prob. I.* Quod creatur, incipit esse. Atqui esse incipere aeternitati repugnat. Quod enim aeternum est, semper fuit, nec opus habet, imo nec potest incipere esse. Ergo repugnans, ac proinde impossibile est aliquid creari ab aeterno.

*Confirm. 1.º* Ideo Patres damnarunt eos, qui dicerent, Verbum existere incepisse, quia inde sequeretur Verbum non fuisse aeternum. Ergo ponebant ut certum, aeternitati repugnare, quod aliquid esse incipiat.

*Confirm. 2.º* Creatio ex nihilo significat, rem antea non extitisse; sed quod rem antea non extitisse significat, aeternum non est, ut patet, quia aeternum excludit omne vel minimum momentum, quod praecesserit. Ergo

*Prob.*

*Prob. II. ex Augustino, qui cont. Felician. Arianum cap. 7. sic definit creaturam, ut ad ejus essentiam pertineat non esse ab aeterno. Creatura, inquit, est ex eo, quod aut adhuc non est, aut aliquando non fuit rei cujuscumque corruptibilis, quantum in se est, per omnipotentis Dei voluntatem facta substantia. Et Lib. XII. de Civ. Dei cap. 15. Quapropter si Deus semper (hoc est omni tempore) Dominus fuit, semper habuit creaturam suo dominatui servientem; verum tamen non de ipso genitam, sed ab ipso de nihilo factam, nec ei coaeternam. Erat quippe ante illam, quamvis nullo tempore sine illa (quia tempus cum creatura incepit) non eam spatio transcurrent, sed manente perpetuitate (sive aeternitate) praecedens. Similia docent Damascenus Lib. 1. cap. 8., Hugo Victorinus Lib. 1. de Trin. cap. 1., et alii. Ergo.*

### *Solvuntur Objectiones.*

*Obje. I. Deus ab aeterno existit, ab aeterno est omnipotens, ab aeterno operari potest, et quidem in instanti momento uno, sine motu, et successione. Ergo potuit ab aeterno cuncta creare.*

*R. Neg. cons.* Omnipotentia enim Dei, quae ab aeterno est, repugnantia efficere non potest, qualis est creatio rerum ab aeterno.

*Inst. 1.º* Nullam videtur involvere contradictionem creatio rerum ab aeterno. Nam *1.º* Augustinus *Lib. VI. de Trin. cap. 1.* docet, splendorem, qui gignitur ab igne, atque diffunditur, coaevum esse illi, et esse coaeternum, si esset ignis aeternus. *2.º* Si pes ab aeterno fuisset pulveri impressus, vestigium esset causae suae coaeternum: quo exemplo utebantur Platonici apud Augustinum *Lib. X. de Trin. cap. 31.* Ergo.

*R. Neg. ant.* et comparationes in confirmationem allatas. Recensiti enim effectus, scilicet splendoris, et vestigii, non sunt creationes ex nihilo. Creatio autem ex nihilo semper significat, rem antea non extitisse, ac  
pre-

proinde non esse aeternam. Adde quod ejusmodi exempla ignis, et pedis ab aeterno existentium, sunt τὸν ἀδύνατον, sive rerum impossibilium; ac proinde mirum non est si ex impossibili hypotesi impossibilis consequentia fluat.

*Inst. 2.* In divinis generatio Verbi ab aeterno non involvit contradictionem; quia licet Genitor sit Genito prior; non tamen prior est tempore, sed ordine, et origine. Ergo pariter creatio ex nihilo non involvit contradictionem; quia nihilum potest esse re creata prius non tempore, sed ordine.

*¶ Neg. cons. et parit.* Generatio enim Verbi cum non sit ex nihilo, sed ex substantia Patris, necessario debet esse Patri coaeterna, sicut et Verbum, quod est ipsius generationis terminus; quia Pater, ejusque generatio, et generationis terminus, ab essentia divina, quae aeterna est, non distinguuntur reipsa; atque ideo Pater non potest esse prior Filio, nisi ordine tantum, et origine. At contra creatio ex nihilo significat, rem ante non extitisse; quid est enim nihilum, nisi quod non extat? ac proinde creatio ostendit, nihilum fuisse prius non solum ordine, verum etiam tempore, sive aeternitate.

## C A P. IV.

*Utrum Deus creaturas ex necessitate produxerit.*

*Adv.* **N**onnulli, quorum meminit S. Thomas *I. P. Q. CIV. art. 3. in corp.* asseruerunt, Deum ex necessitate naturae res extra se produxisse: quorum error, fidei catholicae contrarius, refutandus est.

## P R O P O S I T I O.

*Dogma fidei est, Deum non ex necessitate, sed libera voluntate creaturas produxisse.*

*Prob. I. ex Scriptura. Ephes. I. 11. Deus operatur omnia secundum consilium voluntatis suae. Consilium autem voluntatis est voluntas non necessario, sed ex deliberatione agens. Et alibi dicitur, ideo res creasse, quia voluit, et si nolisset, non fuisse creaturum: quod ostendit, Deum nolle potuisse, atque ideo libere eas creasse. Ita ex. gr. Sap. XI. 26. Quomodo posset aliquid permanere, nisi tu voluisses? Ergo.*

*Prob. II. ex PP. Augustinus vel quivis auctor Lib. de fide cont. Manich. cap. 28. et 49. Nullam, inquit, necessitatem patitur Deus: neque necessitate facit, quae facit; sed summa, et ineffabili voluntate, ac potestate; decet enim Omnipotentem facere quae voluerit.*

*Prob. III. Quidquid Deus extra se vult, propter bonitatem suam. vult; ut diximus Lib. III. cap. 14. Quamvis autem bonitatem suam necessario amet; tamen ea, quae propter suam bonitatem vult, non potest velle, et amare necessario, nisi sint cum sua ipsius bonitate necessario connexa; h. e. nisi sint instrumenta ad eum finem necessaria. Atqui divina bonitas in seipsa perfecta est, et potest esse sine aliis, nec aliquid perfectionis a creaturis mutuatur. Non igitur eas voluit necessario.*

*Solvuntur Objecta.*

*Obje. I. In Deo omnia sunt unus, et necessario actus. Ergo etiam voluntas producendi creaturas necessaria est.*

*¶ Dist. cons. Est necessaria, si spectetur quoad substantiam, cono. non enim distinguitur reipsa voluntas a natura divina. Si spectetur quoad ejus relationem ad res extra Deum, neg. Idem ergo actus, scilicet divina voluntas, necessarius est in Deo, et liber; seu poterat Deus*



Deus illum referre tantum ad essentiam, et bonitatem suam; ad creaturas autem nullo modo.

*Objic. II.* Bonum ejus est naturae, ut seipsum diffundat (a) Ergo Deus, qui est ipsa bonitas, necessario debuit aliquando producere creaturas, in quas effunderet bonitatis suae divitias.

*¶. Neg. cons.* Cum enim dicitur, inquit Sylvius *I. P. Q. XIX. art. 3.*, quod bonum sit sui diffusivum, non significatur, quod actu se debeat aliis communicare, sed quod possit: ac proinde quamvis deceat divinam, bonitatem aliis se communicare actu, hoc tamen non arguit in Deo novam perfectionem, quod actualiter se communicet.

## C A P. V.

*Ostenditur, res a Deo creatas indigere assidua Dei conservatione, ut existant.*

*Adv.* **R**es a Deo creatas ab ipso assidue gubernari, atque cum ad finem dirigi, ad quem creatae sunt, ostendimus *Lib. III. cap. 15.* Videamus nunc, an creaturae, ut existant, praeter creationem, assidua Dei actione egeant; sicut lumen assidua indiget actione solis, qua cessante, illico evanescit. Haec autem assidua Dei actio, conservatio dicitur.

## P R O P O S I T I O

*Creaturas assidua Dei conservatione indigere, ut existant, dogma fidei est.*

*Prob. I. ex Script. Sap. XI. 26. Quomodo posset aliquid permanere, nisi tu voluisses? Joan. V. 17. Pater meus usque modo operatur, et ego operor. Quae verba exponens S. Thomas. I. P. Q. LXXIII. art. 2. ad 1. ait: Deus usque modo operatur servando, et administrando creaturam conditam. Act. XVII. 28. In ipso*

L

vi

---

(a) Scholast. *Est sui diffusivum.*

162 *Theologicarum Institut. Lib. V. Pars. I. Cap. V.*  
*vivimus, et movemur, et sumus. Colos. I. 17. Omnia*  
*in ipso constant. Heb. I. 3. Portans omnia verbo virtu-*  
*tis suae. Ergo.*

*Prob. II. ex. PP. 1.º Augustinus Lib. IV. de Gen.*  
*ad lit. cap. 12. Creatoris, inquit potentia, et Omnipot-*  
*entis, atque Omni tenentis virtus causa subsistendi est*  
*omni creaturae: quae virtus ab eis, quae creata sunt, re-*  
*gendis, si aliquando cessaret, simul et ipsorum cessaret*  
*species; omnisque natura concideret. 2.º Anselmus Mo-*  
*nolog. cap. 12. Dubium nonnisi irrationabili menti esse*  
*potest, quod cuncta, quae facta sunt, eodem ipso susti-*  
*nente vigent, et perseverant esse quod sunt, quo facien-*  
*te de nihilo habent esse quod sunt.*

*Prob. III. ratione. Creaturae cum ab aeterno non ex-*  
*tarent, sicut non potuissent existere, nisi Deus voluisset;*  
*ita non possunt diutius existere, quam quandiu voluit ab*  
*aeterno Deus, ut existerent. Atqui voluntas Dei, ut crea-*  
*turae aliquandiu existant, est ipsa conservatio. Ergo*  
*non possunt creaturae in existentia sua permanere sine Dei*  
*conservatione.*

### *Objectiones.*

*Obje. I. Si res creatae assidua Dei conservatione indi-*  
*gerent, dicendum esset, eas natura sua tendere in nihilum;*  
*ac proinde transitus rei in nihilum esset cuique rei crea-*  
*tae naturalis. Atqui hoc absurdum est; in tantum enim*  
*naturae rerum adversatur ejusmodi destructio, ut quid-*  
*libet ad sui conservationem tendat, nec possit in nihilum,*  
*nisi per potentiam infinitam reverti. Ergo.*

*II. Dist. maj. Transitus rei in nihilum esset cuilibet crea-*  
*turae naturalis, si creatura spectetur in seipsa, aut com-*  
*paretur cum creatis causis, neg. Si spectetur ut ens ex nihi-*  
*lo productum, et comparetur cum prima causa, a qua*  
*ex nihilo producta est, conc. Pari ratione dist. min. Na-*  
*turae rerum adversatur destructio, et transitus in nihilum,*  
*si res spectentur in seipsis, aut comparentur cum creatis*  
*causis, conc. Si spectentur ut res ex nihilo productae,*  
*et comparentur, cum Deo, a quo productae sunt ex*  
*nihilo, neg. Creaturae itaque cum non existant a se,*  
*sed ex omnipotentissima Dei voluntate, qui eas ex nihi-*  
lo

lo creavit, et voluit, ut in ea existentia permanerent, profecto nec a seipsis, nec ab aliis creatis causis redigi possunt in nihilum; alioquin aliqua creata causa posset obsistere voluntati Omnipotentis. Sed ex eo ipso, quod non existunt a se, consequens est, ut existentia non sit ipsis naturalis (alioquin essent necessario, et a se ipsis;) sed adveniat illis extrinsecus, hoc est a voluntate Dei; ac proinde si considerentur prout divinitus eductae sunt ex nihilo, tendunt in nihilum; et tandiu existunt, quandiu voluerit Deus, qui eas ex nihilo creavit. Hinc Gregorius M. *Lib. XVI. Moral. cap. 18. Omnia, inquit, tenderent in nihilum, nisi ea manus Omnipotentis conservaret.*

*Objic. II.* Possunt homines opera efficere, quae semel effecta pergunt existere; licet assidua artificis manu minime teneantur. Atqui Deus est qualibet creatura infinitè potentior. Ergo a fortiori potuit producere res ex nihilo, quae semel effectae non indigeant assidua actione ejus, ut pergant existere:

*¶. Neg. cons. et parit.* Homines enim non producant ex nihilo materiam, ex qua opera componunt; sed materia ipsa jam existit, et voluntate Dei conservatur; imo et secundum leges motus, quae ab ipso Deo servantur, non potest a seipsa moveri de loco, in quo ab artifice homine semel locata est; atque ideo opera ab hominibus effecta permanent sine nova ipsius hominis actione; conservantur enim per leges motus, et quietis: quae leges a Deo servantur, a quo statutae sunt. At Deus res omnes ab aeterno non existentes ex nihilo creavit, hoc est voluit, ut existerent; ac proinde tandiu possunt existere, quandiu Deus voluerit.

### Corollarium.

Conservatio igitur est continuata creatio; hoc est eadem illa actio, qua Deus ab aeterno voluit, ut creaturae existerent, voluit etiam, ut aliquandiu existerent. Haec autem voluntas in Deo permanens, conservatio rerum est. Sed jam expendendum est, utrum non solam ut existant, verum etiam ut agant, et operentur, assidua Dei actione, sive concursu res omnes creatae indigeant.

## C A P. VI.

*De actione, sive concursu Dei ad singulos creaturarum actus.*

**Adv. I.** *C*onkursus est actio, per quam Deus simul cum creaturis operatur, et singulos earum actus, atque motus producit. Duplex autem distinguitur concursus, *mediatus*; et *immediatus*, sive *simultaneus*; ut Scholae ajunt. Prior est ipsa vis agendi, creaturis iugenta. Alter est peculiaris Dei actio, qua creaturam ad singulos actus efficiendos adjuvat. Et de concursu quidem *mediato*, quin sit creaturis ad singulos actus necessarius, nemo est qui dubitet. Sed utrum concursus *simultaneus* sit ita necessarius, ut sine eo creaturae nec agere; nec ullo pacto, ne latum quidem unguem, moveri possint, inquirendum est.

II. Sunt autem nonnulli, praesertim Thomistae, qui non solum Dei concursum ad singulos creaturarum actus docent esse necessarium, sed physicam quandam *praemotionem* requirunt, qua Deus creaturas, jam omnino ad agendum dispositas, ipse per se moveat.

III. Nos creaturas omnes dividimus in classes duas, quarum altera est creaturarum intelligentium, quae ingenta vi actuosa, et libertate pollent; altera inertium corporum. Loquimur autem hic de actibus creaturarum naturalibus; nam de *supernaturalibus*, qui per gratiam Dei fiunt, alibi erit dicendi locus. Quibus rite distinctis, quid de hac celebri inter Philosophos, et Theologos controversia sentiamus, sequentibus, explicamus propositionibus.

## P R O P O S I T I O I.

*Conkursus Dei ad singulos creaturarum actus immediatus, cujuscumque illae sint generis, est certo necessarius.*

*Prob. I. ex Script. Act. XVII. 28. ait Paulus: in ipso: (Deo) vivimus, et movemur, et sumus. Quod ait in*

in ipso nos moveri, non significat creaturas in Deo moveri, quasi in loco; ut impie explicavit *Spinoza*, sed significat *ex ipso*, tamquam prima causa effectrice, ac movente; in ipso; enim, et *ex ipso* in Scripturis Novi Testamenti passim eodem sensu ponuntur, ut advertit *Grotius*; et patet ex ipso contextu *cit. cap. Act.* Dixerat enim antea Paulus: *cum ipse (Deus) det omnibus vitam, et inspirationem, et omnia*: et paucis interjectis, subdit: *in ipso enim vivimus, et movemur, et sumus*: unde manifestum est, eum pro causa efficiente, atque movente laudata verba posuisse. Ergo.

Praeterea pleni sunt Scripturarum libri ejusmodi testimoniis, quibus actiones, et motus creaturarum tum irrationalium, tum intelligentium ipsi Deo tribuuntur. Sic de creaturis irrationalibus legimus in Evangelio *Matth. VI. 26. Respicite volatilia caeli, quoniam non serunt, neque metunt, neque congregant in horrea: at Pater vester caelestis pascit illa. . . . foenum agri, quod hodie est, et cras in albanum mittitur, Deus sic vestit. Ea in Psalmo CIII. eleganti oratione repraesentatur Deus, ut Paterfamilias, qui unicuique vel minimae creaturae tribuit et motum, et escam. Denique omnia naturae effecta, venti, pluviae, tempestates, fulgura, tonitrua, et quidquid fieri in rerum universitate cernimus, Deus ipse efficere saepissime dicitur. De creaturis vero intelligentibus ait *Isaias cap. XXVI. 12. Domino. . . . omnia opera nostra operatus es nobis.**

*Prob. II. ratione.* Deus, ut supra ostendimus, singulis momentis creaturas conservat, sive eae sint in motu, sive in quiete: Atqui conservare creaturam in motu nihil est aliud nisi cum ejusdem motu, et actione concurrere. Ergo etc. Adde quod ex vulgari affato operari sequitur esse. Si ergo creaturae, ut sint, assiduo Dei concursu, et actione indigent; qua cessante, abirent in nihilum; hinc efficitur, eas, ut operentur, eodem concursu, et operatione indigere; qua cessante, ne latum quidem unguem moveri possent.

*Objectiones.*

*Objic. I.* Si creaturae in sigulis actionibus concursu Dei egerent, frustra Deus ipsis agendi vim, et potestatem indidisset. At hoc absurdum est. Ergo.

*¶ Neg. maj. et suppositum.* Supponit enim obiectio, Deum unicuique creaturae indidisse vim agendi, non pendentem ab ipso: quod falsum est; alioquin creaturae essent non *causae secundae*, sed *primae* suorum actuum. Tribuit ergo Deus creaturis vim agendi, quae creaturis conveniebat, hoc est a prima causa pendentem; haec autem agendi vis per concursum Dei ad singulos actus inanis non redditur, aut inutilis: imo tunc effectum producit suum.

*Inst. 1.º* Si creaturae tali instructae essent agendi vi, ut in singulis actibus concursu, et actione Dei egerent, dicendae essent merum Dei instrumentum. Atqui hoc falsum est; alioquin actiones non creaturarum essent, sed Dei; quia actio non instrumento; sed *causae*, quae instrumentum movet, attribuitur. Ergo.

*¶ Dist. maj.* Dicendae essent instrumentum *improprie*; *conc.* *Proprie*, *neg.* *Proprie* enim instrumentum dicitur, quod nulla vi agendi pollet, ut ascia in manu fabri. Improperie autem dicitur instrumentum, quod instructam quidem est agendi vi, sed quae ab alia causa pendeat. Hoc sensu creaturae improprie dici possunt Dei instrumenta, et revera ita dicuntur in Scripturis. *Vae Assur, virga furoris mei et baculus ipse est: Isaiæ X. 5.* Actio autem instrumenti proprie dicti non istrumento tribuitur; sed *causae* principi. Non ita tamen sentiendum est de actione ejus rei, quae instrumentum improprie dicitur.

*Inst. 2.º* Eo excellentius judicatur opus, et tanto nobilior habetur artifex, quanto minus machina indiget manu artificis, ut moveri pergat. Ergo si creaturae non indigerent assiduo Dei concursu, ut moverentur, non solum id nihil officeret potentiae Dei, sed magis eam commendaret.

*¶ Neg. cons. et. parit.* In eo est exempli dissimilitudo, quod artifex non est materiae conditor; sed id  
tan-

tantummodo propositum habet, ut partes machinae ita affabre componat, ut, conservante et concurrente Deo, possint eas vires exerere, quas ab ipso Deo acceperunt; hinc quo promptius eas vires exerunt, eo opus est excellentius, et nobilior artifex. At Deus cum sit rerum ex nihilo creator, non poterat creaturam efficere ab ipso non pendentem.

*Inst.* 3.<sup>o</sup> Recte servatur subjectio creaturarum primae causae, si nihil agant, quod non oriatur ab illa generali agendi potentia, quam a prima causa acceperunt; licet in singulis actibus speciali non egeant primae causae actione, atque concursu. Ergo.

*R. Neg. ant.* Cum enim, ut supra dictum est, concursus Dei ad singulos creaturarum actus nihil aliud sit nisi conservatio creaturarum in motu, si creaturae sine eo concursu moveri possent, atque agere, dicendum esset; creaturas in motu existentes non indigere saltem quoad actua-lem motum Dei conservatione; ideoque a prima causa ea in re non pendere.

*Objic.* II. Si Deus ad singulos creaturarum actus concurreret, profecto concurreret etiam ad actus impios, et scelestos. Sed hoc abhorret a bonitate, et sanctitate Dei. Ergo.

*R. Dist. maj.* Concurreret ad actus impios, atque scelestos, si spectentur quoad *physicum*, et *materiale* ut Scholae loquuntur, *conc.* Si spectentur quoad *formale*, *neg.* In peccato enim duo distinguenda sunt; nimirum 1.<sup>o</sup> ipse actus; quatenus ens aliquod est, quod *physicum*, et *materiale* peccati dicitur: 2.<sup>o</sup> ipsius actus *inordinatio*, quae est *formale* peccatum, neque ens aliquod positivum est, sed privatio recti ordinis in Deum, per quam creatura in seipsa, tamquam in ultimo fine consistit, ac quiescit. Sic in furto, aut homicidio, extensio manus, alique motus sunt *physicum*, et *materiale* peccatum: defectus vero recti ordinis horum actuum in finem, *formale* peccatum est. Atque haec non solum in externis actibus, verum etiam in interioribus voluntatis operationibus distinguenda sunt. Sic involuntate deliberatus homicidii appetitus, quatenus est motus quidam mentis ex intellectu, et voluntate procedens, *materiale* peccati est; quatenus autem motus hic *inordinatus* est, sistens in creatura tamquam in ultimo fine, *inordinatio* illa.

illa est *formale peccati*. His igitur ita distinctis, si considerentur actus illi, ut aliquid physicum, atque materiale, boni sunt; et secundum generales eveniunt naturae leges, quas Deus, utpote universalis rerum gubernator, constituit, et servat. Si vero consideretur in illis inordinatio, sunt utique peccata, non a Deo movente facta, sed a creata voluntate, quae ab ultimo fine deficiens, concursu Dei, qui bonus est, abutitur, ut in creatura tamquam in ultimo fine quiescat; qua de re queritur ipse Deus apud *Isaiam. XVIII. 24.* dicens; *servire me fecisti in peccatis tuis.*

*Inst. 1.º* Physicum, et formale peccatum non distinguuntur reipsa; vel saltem ita inter se conjuncta sunt, ut divelli a se invicem non possint. Sic in actibus interioribus, *ex gr.* in odio Dei, non potest reipsa distinguatur physicum, et formale peccatum; sed ipse physicus actus malus est. In actibus vero externis, *ex gr.* in homicidio, motus, qui ad illud perpetrandum adhibentur, ita conjuncti sunt cum formali peccato, ut nullo pacto separari ab illo possint. Ergo si Deus concurreret ad physicum peccati, etiam ad formale concurreret.

*R. Neg. cons.* Quando enim effectus aliquis a duabus causis pendet, quarum una perfecta est, altera vero imperfecta, atque deficiens; tunc defectus, et inordinatio, quae in effectui illo est, licet reipsa ab eo non distinguatur, vel separari non possit, non tamen est a causa perfecta, sed ab imperfecta, et deficiente. Ita si artifex excellentissimus pravo utatur instrumento, defectus certe, qui in opere est, licet ab opere ipso minime distinguatur, nec separari possit; non tamen ab artifice est, sed ab instrumento. Pari ratione quamquam animus est, qui pedem movet; claudicatio tamen non animo, sed male affectae tibiae tribuitur, ut *S. Thomas* advertit. Multo magis ergo cum peccatum procedat non ab instrumento inanimato, sed ab hominis voluntate libera, imperfecta, et deficiente, licet fiat concurrente Deo, causa perfectissima, neque in eo distinguatur reipsa *physicum*, et *formale*; tamen defectus, et inordinatio non est a Deo concurrente ad *physicum* actum, sed a voluntate creata.

*Inst. 2.º* Non licet concurrere cum alterius actione  
bo-



bona, cum qua necessario, vel saltem certe conjunctum est peccatum; haec enim esset illicita cum peccato alterius cooperatio. Ergo licet id, quod est *physicum* in peccato, non sit malum; tamen cum illud cum peccato *formali* conjunctum sit; non potest Deus ad illud concurrere.

¶ *Dist. ant.* Non licet personae privatae, atque iis in causis, quas, de charitate disputantes, explicabimus, *conc.* Non licet provisorii generali, nempe Deo, qui ad bonum totius universi, juxta generales naturae leges, cum omnibus creaturarum actibus concurrat, *neg.*

*Objic. III.* Si Deus cum omnibus creaturarum actibus concurreret, profecto concursus hic vel praecederet *determinationem* creaturae ad agendum, vel sequeretur. Sed neutrum dici potest. Non primum; alioquin concursus non differret a *physica praemotione*. Non alterum; tum quia absurdum est, Deum sequi *determinationem* causae secundae: imo in illo actu creatura esset causa prima; tum quia illa *determinatio*, si Dei concursum praecederet, sine ullo concursu Dei fieret; ideoque Deus non concurret cum omnibus creaturarum actibus. Ergo.

¶ Dei concursum nec praecedere creaturae *determinationem*, nec sequi; sed esse, ut ajunt, *simultaneum*; h. e. Deum creaturis agendi virtutem iudidisse, eamque singulis momentis conservare, etiam in illo instanti momento, quo *potentia* agendi exeritur, ac prodit in *actum*; conservatio autem ejus virtutis, dum de *potentia* transit in *actum*, concursus Dei est.

## PROPOSITIO II.

*In creaturis inertibus concursus Dei ad singulos earum actus non absurde dicitur physica praemotio, sive mediata, sive immediata.*

*Prob.* Creaturae inertes moveri non possunt, nisi ab alio motae. Si Ergo *immediate* a Deo moventur, erit haec *immediata praemotio physica*. Si vero moveantur ab alia causa, et haec ab alia, atque ita deinceps; deveniendum tandem erit ad primum auctorem Deum; tum quia cogitari non potest in motu progressus in infinitum

170 *Theologicarum Instint. Lib. V. Pars. I. Cap. VI.*  
tum ( alioquin motus esset impossibilis ); tum quia si  
non sistas tandem in Deo primo movente, dicendum es-  
set, esse aliam primam rerum causam praeter Deum,  
quod absurdum est. Ergo erit illa praemotio physica  
mediata.

### PROPOSITIO III.

*In creaturis actiuosa, vi pollentibus, quales sunt substan-  
tiae intelligentes, et liberae, praemotio physica agno-  
scenda est in iis actibus, quae bonum in genere respi-  
ciunt: in singularibus vero actibus, quae pertinent ad  
electionem cuiusque singularis boni, sufficit concursus  
Dei simultaneous in actibus naturalibus.*

*Prob. 1.<sup>o</sup> pars.* Nemo liber est in appetitu boni in  
genere, in quod unusquisque fertur, et inclinatur in-  
eluctabili necessitate. Ergo ad bonum illud appetendum  
physice praemouetur a Deo, qui creaturis rationalibus  
hoc veluti pondus in ipsa creatione indidit.

Alteram partem nonnulli probant duobus rationibus;  
1.<sup>o</sup> quidem, quia physica praemotio libertatem creaturae  
rationalis omnino destruit; 2.<sup>o</sup> quia facit Deum peccati  
auctorem, quippe qui physice praemouet creatam vo-  
luntatem ad actus malos. Sed utraque ratio infirma est: imo  
non decet calumniam adeo atrocem Scholae Thomista-  
rum, bene de Ecclesia merita, impingere. Nam, quod  
pertinet ad libertatem, si creata mens potest seipsam,  
et facultates suas movere juxta earundem facultatum na-  
turam, intellectum quidem necessario, voluntatem au-  
tem libere; multo magis Deus, qui mentem ipsam crea-  
uit, et est illi intimior, quam ipsa sibi, potest eam se-  
cundum ejusdem mentis naturam, illaesa ejusdem liberta-  
te, movere. Quod vero pertinet ad peccatum, nodus  
est, qui eodem modo ab auctoribus physicae praemo-  
tionis soluitur, quo a fautoribus simultanei concursus.  
His igitur rationibus omissis,

*Prob. 2.<sup>o</sup> pars.* Creata mens jam est ad bonum in  
genere ineluctabili necessitate inclinata. Ergo ut singu-  
lare bonum eligat, et amplectatur, non nova requiri-  
tur motio; sed sufficit, ut ei intellectus bonum osten-  
dat:

dat: quod quidem si ostendat ut generale bonum, voluntas illud necessario appetit; si vero ut bonum singulare, in quo species aliqua mali possit apprehendi, voluntas ita illud appetit, et eligit, ut possit non appetere: in quo libertas arbitrii sita est.

Practerea duplex est ratio, quae Thomistas impulit ad praemotionem physicam adstruendam: primo quidem, ut constet subjectio creatae mentis, ita ut pendeat a prima causa; deinde vero, ut voluntas, natura sua indifferens, determinari possit ad unum. Atqui haec subjectio, et determinatio rite servatur, posita generali illa impressione, ac motione voluntatis ad bonum, quam ei Deus primum indidit, et singulis momentis conservat. Cum enim omnis creatae voluntatis actus pendeat a generali illa, quam a Deo accepit, inclinatione in bonum, constat ejus subjectio, qua pendet a prima causa; cum vero ejus indifferentia non sit mere passiva, sed activa, potest seipsam ad bonum singulare, ex judicio intellectus, et generalit inclinatione in bonum determinare. Non est igitur physica praemotio ad singulos actus necessaria. Neque ab hac sententia S. Thomas videtur alienus. Ait enim 1. 2. Q. IX. art. 6. ad 3. *Deus movet voluntatem hominis, sicut universalis motor ad universale objectum voluntatis, quod est bonum; et sine hac universali motione homo non potest aliquid velle; sed homo per rationem determinat se ad volendum hoc, vel illud quod est vere bonum, vel apparens bonum. Sed interdum (quod diligenter advertendum est) specialiter Deus movet ad aliquid determinate volendum, quod est bonum; sicut in his, quos movet per gratiam.* Quibus verbis S. Thomas ad solos supernaturales actus specialem videtur adstruere Dei praemotionem. Quandocumque igitur Doctor acutissimus ait, causas secundas in naturalibus actionibus moveri a prima, Deum causas secundas inclinare, et cetera ejusdem generis, de praemotione generali ad bonum commode potest intelligi. Vide Laur. Berti Lib. IV. cap. 6.

*Solvuntur Objecta.*

*Objic. I.* Creata voluntas erga bona singularia indifferens est. Ergo non potest unum eligere, nisi moveatur ab alio, qui non potest esse, nisi Deus; si enim esset aliquid creatum, hoc rursus moveri deberet ab alio; et illud ab alio, atque ita in infinitum. Ergo.

*Dist. ant.* Est indifferens indifferentia activa, *conc.* Passiva, *neg.* Nimirum hoc interest inter indifferentiam inertium corporum, et liberae voluntatis, quod illa non acceperunt a Deo vim se movendi; ideoque eorum indifferentia passiva est; haec vero praedita divinitus est virtute agendi, et seipsam movendi ad unum, praecedente intellectus judicio.

*Inst.* Nemo dat; quod non habet. Atqui creata voluntas, antequam moveatur ad unum, non habet in se motionem illam. Ergo non potest eam sibi ipsa dare; alioquin novam perfectionem ex nihilo in seipsa produceret.

*Dist. maj.* Nemo dat quod non habet neque in potentia, neque in actu, *conc.* Quod non habet actu, sed habet in potentia, *neg.* Cum ergo creata voluntas praedita sit a Deo potentia seipsam movendi, ea potentia utitur, dum seipsam cum Dei conservantis concursu movet. Neque tunc novam perfectionem substantialem ex nihilo educit, sed novam quandam modificationem, cujus modificationis producendae virtutem habet a Deo.

*Objic. II.* In creatura agnoscenda est summa subjectio (a), qua pendeat a Deo tum in fieri, tum in esse, tum in operari, ut scholae ajunt. Atqui non esset summa subjectio, si non physice praemoveretur a Deo; posito enim concursu Dei, de quo supra dictum est, potest excogitari subjectio major, qua creatura a Conditoris suo pendeat, nempe physica praemotio. Ergo.

*Dist. maj.* Agnoscenda est summa subjectio, quae con-

---

(a) Scholast. Summa dependentio.

conveniat sapientiae Dei, et variae creaturarum naturae, *conc.* Summa absolute; *neg.* Cum ergo creaturae duplicis sint naturae; aliae quidem inertes, ut corpora; aliae liberae; omnium quidem subjectio, qua a Deo pendent, debet esse summa, sed non eadem omnium. Porro in creaturis libertate praeditis summa, quae excogitari possit, subiectio in actibus naturalibus est concursus Dei *simultaneus*.

*Objic. III.* Creaturae omnes etiam liberae in singulis actibus egent concursu Dei generali. Atqui concursus ille idem est, ac *physica praemotio*; nam, ut supra dictum est, concursus Dei est conservatio creaturae, et proprietatum ejus, dum est in motu. Atqui conservatio est quaedam continuata creatio, ut supra demonstratum est. Ergo concursus Dei est quaedam creatio rei, quae movetur; ac proinde est *physica praemotio*; qui enim rem creat in motu, utique eam praemovet.

¶ *Neg. min. Ad confirm. dist. maj.* Concursus est conservatio, quae potest dici continuata creatio; sed haec creatio potentiam respicit operandi, quam Deus creaturae indidit, *conc.* Respicit ipsum actum ejus potentiae, *neg.* Deus itaq. per concursum conservat in creatura illam agendi potentiam, quam ipsi indidit, et quidem eam conservat in eo instanti momento quo creatura est in motu; sed ipsa creatura utitur potentia illa, et seipsam ad agendum *determinat*. Itaque concursus Dei respicit potentiam agendi; *physica* vero *praemotio* respicit ipsum actum, quem Deus in creatura producit. Quod si Thomistae hoc ipsum per *praemotionem* se intelligere contendunt, quod alii per *concursum*, nos de nomine non solemus instituere controversias. Quapropter utantur quidem ipsi suo loquendi more, modo tamen et nos more nostro loqui patiantur.

## C A P. VII.

*Utrum aliquid a Deo creatum aliquando redigatur in nihilum.*

**Ad.** Posse Deum, quidquid creavit, in nihilum redigere, extra controversiam est; utrum autem id faciat, est inquirendum. Et de creaturis quidem spiritualibus, quod eas Deus numquam in nihilum redacturos sit, dicemus inferius, ubi de spirituum immortalitate pauca adjiciemus iis, quae dicta sunt in Metaphysicis. De animabus brutorum quidam curiosius quiesverunt, ad morientibus belluis, in nihilum redigantur; sed cum non constet, utrum eae spiritales sint, an corporeae (est enim hoc naturae arcanum) de iis disputare supervacaneum est. Restat ergo, ut expendamus, utrum mundum hunc spectabilem aliquando Deus in nihilum sit, saltem aliqua ex parte, redacturus.

## P R O P O S I T I O

*Verisimilius est, Deum nullam omnino creaturam redacturum esse in nihilum.*

*Prob. I. ex Script. Eccl. III. 14 Didici, quod omnia opera, quae fecit Deus, perseverent in perpetuum.*

*Prob. II. ratione D. Thomae I. P. Q. CIV. art. 4. Quidquid Deus facit, vel est in ordine naturae, vel supra naturam, ut sunt miracula. Atqui neutro modo Deus creaturas suas in nihilum rediget. Non quidem in ordine naturali; constat enim, nihil posse naturaliter in nihilum redigi; quia substantiae spirituales, quae non habent partes, nec corruptionis principium, sunt natura sua immortales: substantiae vero corporeae, licet corrumpi possint quoad formam; secundum materiam tamen, et prima elementa destrui non possunt. Sed nec in ordine supernaturali per miraculum. Supernaturalia enim pertinent ad gratiae Dei significationem, et commendationem, sed ad gratiam Dei non pertinet, quod res aliqua redigatur in nihilum, cum e contrario in eo ma-*

*magis divina potentia commendetur, quod res in esse conservat. Ergo.*

*Objie. I.* Nihil frustra facit Deus. Atqui post generalis iudicii diem frustra erit multarum rerum conservatio; nulli enim usui erit terra, aer, plantae etc. Ergo videtur fore ut Deus tunc ab earum rerum conservatione cesset; ideoq. eas in nihilum redigat.

*R. Neg. min.* Nescimus enim nunc, quam in formam haec omnia post fatalem conflagrationem mutabuntur, dicente Joanne *Apoc. XXI. Vidi caelum novum, et terram novam*: neque vero affirmamus, futuras tunc plantas, aliaque ad hominam, atque animalium vitam servandam, atque augendam instituta; ac proinde nescimus cui usui ea reservet Deus ad gloriam suam; sicut etiam nescimus cui usui inserviant innumerabiles corporum species, quae non solum in globo Lunae, ceterorumque planetarum, verum etiam in interioribus terrae nostrae visceribus continentur. Videbimus haec in patria, et mirabimur, et laudabimus Dominum.

*Objie. II.* In Sacramento Eucharistiae substantia panis, et vini redigitur in nihilum. Ergo.

*R. Neg. ant.* Quamvis enim in Eucharistia per transubstantiationem panis, et vinum in corpus, et sanguinem Christi convertantur; ea tamen conversio *annihilatio* dici non potest, ut ostendit S. Thomas 3. P. Q. LXXV. art. 3.

## P A R S II.

*De Creatione Angelorum, eorumque natura, proprietatibus, et ordinibus.*

**I**nter omnes creatas res primum merito sibi locum vindicant Angeli, veluti puriores luminis aeterni scintillae, et radii, nihil terrenae concretionis habentes, supremi rerum Imperatoris viciniore administri. Multa Scholastici subtilissime de Angelis disputarunt, praesertim D. Thomas: inter Dogmaticos autem Petavius copiosissime, atque eruditissime de hoc argumento disseruit. Nos iis, quae in Scriptura, et traditione fundamentum habent, breviter expositis, reliqua, ne praestitutos limites

*CHI.* Angelos, inquit, novimus ex fide, et multis apparuisse scriptum legimus, nec inde dubitare fas nobis est.

Etiam ex Pentateucho, quem Sadducei agnoscebant divinitus inspiratum, possunt ipsi evidenter revinci. *Genes. XVI. 7.* Cum invenisset eam (Agar) Angelus Domini juxta fontem aquae in solitudine. Ibid. cap. XIX. 1. Venerunt duo Angeli Sodomam, et sedente Lot in foribus civitatis. Ibid. cap. XXIV. 7. Dominus Deus coeli . . . ipse mittet Angelum suum coram te. Fit etiam eorum mentio *Exod. XIV. 19.*, *Num. XXII. 22.*, et alibi saepe, ut mira sit hac in parte Sadduceorum caecitas. Ergo.

Ex ratione etiam nonnulli conati sunt Angelorum existentiam ostendere; non quidem a priori, quia poterat Deus illos non creare; sed a posteriori, nempe ex admirandis effectis, quae supra humanam naturam cernuntur in energumenis, ut videre est apud Martinum del Rio, Tartarotum, Calmetum, Le Brunium, aliosque. Vide Henricum Morum *Enchirid. Metaphys. P. I. cap. 26.* Sed cum effecta ista, si sint bona, vel mala physica, possint ab ipso Deo fieri; mala vero moralia ab ipso energumeno; argumentum inde petitam, a revelatione sejunctum, non est nisi probabile, et conjecturale. Potius id evincitur ex consensione omnium gentium, et philosophorum, de qua vide Petavium, Huetium in *Alnetanis Lib. II. cap. 4.*, Vossium de *idololatria Lib. I. cap. 4.* Quippe non solum Graeci, verum etiam Aegyptii; Chaldaei, Sineses, aliaeque gentes substantias quasdam intelligentes, et invisibiles agnoverunt; quos *δαίμονες* dixere Graeci. Haec autem universalis consensio nonnisi ex pristina et perpetua traditione a primis hominibus divinitus edoctis ad omnes posteriores dimanare potuit. Fictitium autem Volterrii commentum facile esset refellere, non solum ex eo quod *Lib. I.* ostendimus, sacrarum scripturarum libros non ex hominum opinionibus concinnatos, sed inspiratos esse divinitus; verum etiam quia libri Chaldaeorum, atque Persarum, a quibus mentitur iste, Angelorum opinionem ad Hebraeos manasse, longe sunt Mosaicis, atque Propheticiis libris recentiores; ita ut quamvis fingamus, hos



non esse divinos, absurdum tamen esset, eorum auctores fuisse aliquid a Chaldaeis, aut Persis mutuatos. Sed nostrum non est cum scurra isto mendacissimo disputare.

*Dices pro Sadducæis.* Moyses rerum creationem in Genesi describens, de Angelis silet. Atqui eorum creationem praetermittere non debuisset, si revera existerent; ne forte Judæi ad idololatriam proni putarent, eos esse Spiritus non creatos, ac proinde Deos. Ergo quoties in Pentateucho ipse Moyses meminit Angelorum, non intelligit personas; sed ipsam Dei virtutem; quæ exteriori aliquo signo ejus voluntatem hominibus patefacit: cum praesertim nomen Angeli non personam aliquam, sed officium, et operationem designet, nempe *nuncium*, ut observat *Gregorius M.*; *Augustinus*, aliique Patres. Ergo etc.

*N. 1.º Dist. maj.* Silet de Angelis; h. e. non recenset eorum creationem *explicite*, *conc.* Non recenset *implicite* per ea verba *creavit caelum, et terram*: quæ comprehendunt quidquid caelo, terraque continetur, ut observat *S. Thomas I. P. Q. LXI. art. 1. ad 1. neg.*

*N. 12.º Neg. min.* Nam quia Hebraei nihil spiritale comprehendere valebant, ut ait *Chrysostomus Hom. II. in Gen.*, et aliunde proni erant ad idololatriam rerum sensibus objectarum; ideo necesse erat eos edocere, cuncta hæc visibilia a Deo creata esse; non oportebat autem de spiritualibus naturis initio libri mentionem fieri. Nec refert, quod Moyses postea Angelorum meminit; loquitur enim de iis, ut Dei ministris, ac nunciis, ut periculum idololatriæ non esset; unde non legimus, Judæos unquam Angelis divinum cultum exhibuisse. Nomen autem Angeli est nomen officii non *in abstracto*, sed *in persona*, quæ hoc officio fungitur. Sicut nomen Regis, oratoris, legati. Talibus autem characteribus Moyses Angelorum personas describit, ut eos revera personas non esse, sed virtutem Dei, ejusque auxilium, nulla ratione, ne poetice quidem, fingi possit.

## PROPOSITIO II.

*Maximus est Angelorum numerus.*

*Prob. I. Daniel. VII. 10. Millia millium ministrabant ei, et decies millies centena millia assistebant ei.* Quibus verbis, ut observat *Hieronymus*, non definitum aliquem numerum significare voluit Propheta, sed indefinitum; et immensum. Et *Heb. XII. 22. Accessistis ad Sion montem, et civitatem Dei viventis, Jerusalem coelestem; et multorum millium Angelorum frequentiam.* Et *Matth. XXVI. 53. An putas, quia non possum rogare Patrem meum, et exhibebit mihi modo plusquam duodecim legiones Angelorum?* At haec de Angelis bonis dicta sunt. Ergo si iis addatur immensus malorum Angelorum numerus, quorum in uno homine obsessio integra legio fuisse dicitur *Luc. VIII. 30.*, innumerabiles esse Angelos constabit.

*Prob. II. Concors est SS. PP. doctrina, Angelos esse innumeros.* Ita *Dionysius de Caelesti Hierarch. cap. 14.*, *Gregorius M. Lib. XVII. Mor. cap. 9.*, alique. Putat autem *S. Thomas*, numerum Angelorum longe excedere species rerum corporearum. Ergo etc.

Porro quantus Angelorum sit numerus, definire temerarium est.

## CAP. II.

*Quando, et ubi Angeli fuerint creati.*

*Adv. I.* **Q**UAMVIS fide certum sit, Angelos a Deo creatos esse, non tamen eadem fide constat quando, et ubi fuerint creati. *Origenes* quidem putabat, spirituales substantias longe ante Mundum creatas esse solas. Deinde, cum illae peccassent, Deum in earum poenam condidisse materiam, in qua veluti carcere inclusae sceleris sui poenas luerent. Dam-natus hic error est in Concilio Lateranensi IV. sub Innocentio III.; aliisque.

II. Patres nonnulli, praesertim Graeci docuerunt,  
M 2 AD-

180 *Theologicarum Institutionum Lib. V. Pars II. Cap. II.* Angelos ante Mundum corporeum a Deo fuisse conditos, ut Nazianzenus *Orat. XXXVIII.*, Damascenus *Lib. II. cap. 3.*, Auctor *de divinis Nominibus cap. 5.*, et alii plures, quorum testimonia recitat Petavius *Lib. I. de Ang. cap. 15.* Iis subscribunt ex Latinis Ambrosius *Lib. I. Hexamer.*, Isidorus *de Summo bono Lib. 1. cap. 12.*, Hieronymus *in cap. 1. ad Tit.* aliiq. Communior tamen apud Patres est contraria sententia, nempe Angelos simul cum mundo corporeo creatos esse. Duguetus *in explicatione Lib. Genes. Tom. I. cap. 1.* ita hanc sententiam communiorem sequitur, ut tamen uno saltem momento Angelorum creationem praecessisse asserat creationem corporum.

III. Sunt qui post *Ferrariensem* affirmant, definitum esse a Concilio Lateranensi ut dogma fidei, Angelos non ante Mundum corporeum fuisse conditos, iis verbis: *Creator omnium sua omnipotenti virtute simul ab initio temporis utranque de nihilo condidit naturam, spiritua-lem, et corporalem, Angelicam videlicet et mundanam.*

## P R O P O S I T I O I.

*Non est recedendum a sententia communiter apud Theologos recepta, Angelos simul cum mundo corporeo creatos esse. Ea tamen sententia dogma fidei non est.*

*Prob. 1a. pars. Genes. I. 1. In principio creavit Deus Coelum, et terram: et Psalm. CI. 26. Initio tu Domine terram fundasti.* Atqui si ante mundum corporeum creasset Angelos, non diceretur *in principio* creasse coelum, et terram, ut observat Augustinus *Lib. XI. de Civ. cap. 6.* Porro sacrae literae, maximeque veraces ita dicunt, *in principio* fecisse Deum caelum, et terram, ut nihil antea fecisse intelligatur; quia hoc potius *in principio* fecisse diceretur, si quid fecisset ante cetera cuncta, quae fecit. Praeterea *Exod. XX. 11. Sex diebus fecit Dominus caelum et terram, et mare, et omnia quae in eis sunt.* Ergo et Angeli, qui in caelo, terraque sunt, sex illis diebus creati fuerunt.

*Prob. II. ex PP. Epiphanius Haeres. LXV. Illud enim*

enim, inquit, evidenter divinus sermo declarat, neque post sidera productos Angelos, neque ante coelum, terraque constitutos. Concinit Teodoretus *Quaest. III.*, Augustinus tum loco supra laudato, tum *Lib. XXII. cont. Faustum* cap. 10., Gregorius M. *Lib. XXVIII. Moral.* cap. 7., Beda in *Hexameron*, aliique complures, quorum sententiam secutum videtur Lateranense Concilium verbis supra laudatis.

*Prob. III.* ratione S. Thomae. Angeli pertinent ad perfectionem totius universi. Non est ergo probabile, ut Deus, cujus perfecta sunt opera, ut dicitur *Deuter. XXXI.*, creaturam Angelicam seorsim ante alias creaturas creaverit, partem scilicet seorsim a toto.

*Prob. 2a. pars. 1.º* S. Thomas, qui utique post Concilium Lateranense floruit, verbis mox recitatis haec subjungit: *quamvis contrarium non sit reputandum erroneum, praecipue propter sententiam Gregorii Nazianzeni, cujus tanta est in doctrina Christiana auctoritas, ut nullus umquam ejus dictis calumniam inferre praesumpserit, ut Hieronymus dicit. Idem docent Vasquez Disput. CCXXIV., Juevin Dissert. I. de Ang. Quaest. 3., Laurentius Berti Lib. X. cap. 6., Petavius, aliique Catholici Auctores. 2.º* Praeterea non est credibile, Concilium damnare voluisse sententiam Nazianzen, aliorumque Patrum, cum propositum tantum ei esset damnare Manichaeorum haeresim, quae tunc grassabatur, scilicet, non omnia fuisse a Deo creata; aut etiam errorem Origenis, corpora videlicet creata esse a Deo ad poenam spirituum, qui peccaverant. Ergo verba illa, simul ab initio temporis, significare possunt, Deum esse aequae rerum spiritualium, atque corporearum, et quidem non ab aeterno, sed in tempore conditorem. Ergo.

### Solvuntur Objecta.

*Obje. I. cont. 1m. part.* Plures PP., ut Nazianzenus, aliique supra commemorati, non solum contrariam tenere sententiam; sed etiam congruam cur ita sentirent rationem subjecerunt; ne scilicet dicatur Deus ante hujus mundi creationem fuisse otiosus, tamquam non habens in quos bonitatis suae exerceret beneficia, solitarius, at-

182 *Theologicarum Institutionum Lib. V. Pars II. Cap. II.*  
atque ab omni munificentia alienus, ut ait Cassianus  
Collat. VIII. cap. 7. Addunt etiam ex Scripturis illud  
Job. XXXVIII. 7. Cum me laudarent simul astra matu-  
tina, et jubilarent omnes Filii Dei: quod a Cassiano  
juxta versionem LXX. legitur: Quando facta sunt si-  
mul sidera, laudaverunt me voce magna omnes Angeli  
mei. Erant ergo Angeli spectatores creationis Mundi.  
Deique laudatores; ac proinde jam antea creati fuerant.

*¶ Neg. cons.* Quod enim ad Patrum auctoritatem  
pertinet, cum non agatur de fidei dogmate, non est mi-  
rum, aliquos diversa sensisse. Imo vero in rebus fidei  
ante Ecclesiae definitionem potuerunt aliqui Patres erra-  
re, ut de Regno millenario, de baptismo haereticorum  
etc. Quod autem pertinet ad rationem oppositam, ea  
nimis probat; sequeretur enim hinc, Deum debuisse  
creare Angelos ab aeterno. Locus denique Jobi, licet  
juxta LXX. interpretes intelligatur de Angelis, negotium  
nobis non facessit. Angeli enim initio creationis rerum  
producti, in ipso suae creationis instanti momento lau-  
daverunt Deum, et in illa prima rerum creatione, et  
in sequentibus operibus, ut in productione siderum, de  
qua loquitur Job: quae quidem quarto tandem die ef-  
fecta est. Vide Estium *Comment. in hunc loc.*

*Objic. II.* cum *Duguet* loc. cit. Deus omnia ad glo-  
riam suam facit, non quidem interiorem, quae ipsi  
naturalis est, neque indiget creaturis; sed exteriorem,  
quae in admiratione, et laudibus creaturarum sita est.  
Ergo non est putandum, in opere tam stupendo crea-  
tionis rerum corporearum ex nihilo, nullas fuisse crea-  
turas intelligentes, quae Deum mirarentur, et lauda-  
rent; sed uno saltem momento creatio spirituum prae-  
vertere debuit creationem corporum.

*¶ Transeat cons.* Si enim dicamus, eodem momen-  
to creata esse corpora, et Angelos, jam constat in crea-  
tione corporum non defuisse creaturas laudantes Deum  
in ipso suae creationis momento. Si vero concedamus,  
in primo momento creatos Angelos, in altero vero cor-  
poreas creaturas; dummodo nullum fingamus interval-  
lum inter utramque creationem (alioquin statuere de-  
bemus, bis Deum cessasse ab opere, quod non congruit  
Scripturae dicenti, septimo tandem die requievisse Deum),

id

id nihil officit sententiae nostrae. Quae enim in duobus temporis momentis siue intervallo fiunt, ea simul fieri recte dicuntur.

*Scholion.*

Etsi dogma fidei non est sententia, quam propugnāvimus, recte tamen movent *Estius, Suaresius, Gonetius, Sylvius, Bannet*, alique, temeritatis notam non effugere eum, qui hodie contrarium doceret contra communem Theologorum sententiam, valde consentaneam verbis Concilii Lateranensis. Eadem tamen censura notanda non est sententia *Dugueti*, ut paulo ante diximus.

PROPOSITIO II.

*De loco, ubi Angeli creati sunt, nihil certi statui potest.*

*Prob.* In rebus Theologicis, de quibus Scriptura silet, Patrum vero non est constans sententia, quacunque non ab ipsa rerum natura, sed a libera Dei voluntate pendent, nihil certi definiri potest. Atqui hac de re Scriptura silet; nullus enim locus inveniri potuit, qui id definiret: Patrum vero constans sententia non est. Augustinus enim *Lib. III. de Genes. ad lit. cap. 10.* docet, creatos Angelos in superiore parte aeris. S. Thomas *I. P. Q. LXI. art. 4.* in caelo *empyreo*, seu supremo, quae sedes beatorum est. Alii in caelo quidem propter verba Christi *Luc. X. 18. videbam Satanam, sicut fulgur de caelo cadentem*: sed non in supremo caeli parte; alioquin, inquit, non dixisset Lucifer *Isaiae XIV. 13.* sub figura Regis Babylonis: *in caelum conscendam* etc. Denique res haec non ab ipsa natura, sed a libera Dei voluntate pendet. Ergo nihil hac de re certo statui potest. Praestat autem, ut quoniam satis de Angelorum creatione diximus, quatenus eorum natura sit, expendamus.

## C A P. III.

*De Natura Angelorum.*

**T**Ria in hoc capite disentienda sunt : 1.<sup>o</sup> utrum Angeli spirituales sint , an corporei ; 2.<sup>o</sup> utrum immortales ; 3.<sup>o</sup> utrum inter se specie , an numero differant.

## §. I.

*Utrum Angeli spirituales sint , an corporei.*

*Adv.* Potest aliquid duobus modis esse spirituale ; 1.<sup>o</sup> quidem , ut sit omnis omnino corporis , et materiae expers , sicut Deus : 2.<sup>o</sup> ut spiritale sit in nobiliori sui parte , ut homo , in quo est spiritus corpori conjunctus.

## P R O P O S I T I O

*Angeli spirituales sunt priori modo : h. e. ita sunt meri spiritus , ut nullum habeant corpus conjunctum.*

*Prob.* 1a. pars , nempe eos esse spirituales. 1.<sup>o</sup> Angeli hominibus nobiliores sunt ex *Psalino VIII.* , ubi de homine dicitur : *Minuisti eum paulo minus ab Angelis.* Atqui essent ignobiliores , si corporei essent. 2.<sup>o</sup> Substantia intelligens , et volens spiritalis est. Atqui Angelos intelligentia , et voluntate pollere , ex Scripturis est manifestum 3.<sup>o</sup> Concilium Laternanense cap. 1. *Deus* , inquit , *utramque condidit substantiam spiritalem , et corporalem ; Angelicam videlicet , et mundanam.* Ergo si qui ex veteribus videntur contrarium affirmare , vel commode interpretandi , vel hac in parte deserendi sunt.

*Prob.* 2a. pars. Scriptura vocat Angelos absolute spiritus *Ps. CIII. Qui facis Angelos tuos , Spiritus* : quae verba Apostolus *Heb. I. 7.* non de ventis , sed de Angelis intelligit ; ubi etiam de Angelis ait : *omnes sunt administratorii spiritus.* Atqui non dicerentur absolute spi-

*spiritus*, si ex corpore, et spiritu mixti essent; sicut hominem nemo dixerit absolute esse spiritum. Ergo.

*Prob. II.* Licet non pauci Patres vel asseruerint Angelos habere corpora quaedam aërea, et subtilissima, vel saltem hac de re dubitaverint; multo plures tamen eos omni prorsus corpore expertes statuunt. Ignatius in *Epist. ad Trallianos* vocat Angelos *incorporeas naturas*; ita et Nyssenus *Lib. XII. cont. Eunom.* eos appellat *incorpoream creaturam*. Eusebius Caesariensis *Demonstr. Evang. Lib. IV. cap. 1.* ait, Angelos, et Archangelos esse *incorporeas quasdam, et intelligentes, et divinas virtutes materia carentes, et puros omnino Spiritus*. Gregorius M. *Lib. IV. Mor. cap. 9.* Angelus namque *solummodo spiritus est; homo vero et spiritus, et caro*. Similia docent Chrysostomus *Hom. XXII, in Genes.*, Damascenus *Lib. II. de Fide cap. 3.*, alique Graeci, et Latini Patres, quos secutum Concilium Lateranense IV. docet, Deum condidisse ex nihilo substantiam spiritualem, sive Angelicam, et corporalem, deinde humanam, quasi communem ex spiritu, et corpore constitutam; ubi aperte substantiam spiritalem, vel Angelicam, distinguit a substantia constituta ex spiritu, et corpore: quae verba satis indicant communem Ecclesiae catholicae sensum. Unde post Concilium illud nullus est Theologus, qui contrarium sentiat, uno excepto *Cajetano*, qui ceuset, saltem daemones subtilissimis corporibus alligatos esse. Imo inter ipsos haereticos vix pauci corporatos putarunt Angelos, ut Radulphus Cudworthus in *System. Intellectuali cap. 5. sect. 3. §. 3.*, Loërsius in *Dissert. de Angelorum corporibus*, ab ipsis gregalibus suis confutati. Hinc etsi non est dogma fidei, Angelos non habere conjuncta corpora; temerarium tamen esset hodie contrarium asserere, ut observat *Estius in II. Dist. XIII. §. 4.*

### Solvuntur Objecta.

*Obje. I.* Multi Patres Graeci, Latiniq; docuerunt, Angelos habere corpora. Hinc Fulgentius, vel quivis auctor *Lib. de Trin. Plane, inquit, ex duplici eos esse substantia asserunt magni, et docti viri, idest ex spiritu*



186 *Theologicar Institution. Lib. V. Pars II. Cap. III.*  
*ritu incorporeo, et corpore.* Et quidem multi de Angelis intellexerunt illa verba *Genes. VI. 2. Videntes filii Dei filias hominum quod essent pulchrae, acceperunt sibi uxores ex omnibus, quas elegerant.* Ita Justinus *Dial. cum Tryph.*, Athenagoras in *Apolog.*, Clemens Alex. *Lib. XVIII. Strom.*, Lactantius *Instit. Lib. II. cap. 14.*, Ambrosius in *Apolog. David. cap. I.*, alii-  
 que. Nonnulli etiam docuerunt, solum Deum esse omnino corporis expertem, ut Cyrillus Alex. *Lib. IX. in Joan.*, Joannes Thessalonicensis in *Dialogo*, qui lectus est in septimo generali Concilio *Act. V.* Ipse Augustinus *Lib. II. de Trifl. cap. 7.* ait, Angelos corpus suum, cui non subdantur, sed subditum regunt, in species, quas velint, accommodatas vertere. Ergo saltem imitanda est modestia Bernardi, qui *Serm. V. in Cant.* satius duxit hac de re, quae ad salutem non pertinet, dubitare.

¶ *Neg. cons.* Fatemur enim, nonnullos Patres in contraria fuisse sententia, antequam communis totius Ecclesiae sensus innotesceret. Quod si accedit aliis in rebus, quae ad fidem pertinent, multo magis in hac accidere potuit, quae dogma fidei non est. Ceterum Patres, qui de Angelis intellexerunt laudatum *Genesis* locum, decepti ex nonnullis Codicibus Versionis LXX., ubi pro *filii Dei*, legebatur *Angeli Dei* (quos Codices mendosos fuisse observat Cyrillus *Lib. I. cont. Julian.*) manifeste errarunt. Angeli enim illi non poterant esse Angeli Sancti; tum quia beati erant, atque in eos peccatum caderē non poterat; tum quia *neque nubunt, neque nubentur*, ut habetur *Matth. XXII.*: nec poterant esse Angeli mali; quia immerito appellati essent *filii Dei, Angeli Dei* (a). Patres vero, qui solum Deum esse *ασώματον*, sive *incorporeum* dixerunt; *Incorporeum* utique pro eo usurparunt; quod ubique est; vel pro spiritu, in quo compositio ex substantia, et accidentibus nulla est. Sic Cassianus *Collat. VII. cap. 13.* ideo  
 ait,

---

(a) Vide Numerium in *Apparatu ad Bibl. PP.* ubi de *Tatiano*, et *Clemente Alexand.*; Calmet *Dissert. de Gigant. et de Lib. Henoch.*, Nat. Alex. *Dissert. VII. in L. Mundi Aetate.*

ait, solum Deum esse incorporeum, quia est ubique, et omnia penetrat. Hilarius *Lib. II. de Trin. Spiritus nec circumscribitur, nec tenetur, quia per naturae suae virtutem ubique est.* Denique multi ex iis, qui Angelos corporeos dixere, non opinando, sed dubitando locuti sunt; praesertim *Augustinus*, qui semper hac de re dubitavit, ut videre est in *Enchirid. cap. 59. ; Lib. I. Retract. cap. 26. Lib. III. de Genes. ad lit. cap. 6. Lib. XV. de Civ. cap. 23. et Lib. XXI. sap. 16. (a).*

*Objic. II.* In Concilio Nicaeno II. lectus, atque approbatus est *Dialogus Joannis Thessalonicensis*, in quo dicebatur, Angelos subtilia quaedam habere corpora, in propria specie apparuisse hominibus; ideoque pingi posse. Unde eo perfecto *Tarasius Constantinopolitanus* patriarcha dixit: *Ostendit Pater, etiam Angelos oportere pingi; quoniam circumscripti sunt, et hominum specie hominibus apparuerunt.* Quae verba Concilium universum probavit dicens: *Etiam Domine.* Ergo.

*R. Dist. ant.* Concilium probavit sententiam Joannis, et *Tarasii* quoad id, de quo tunc agebatur contra *Iconomachos*; h. e. probavit in eo quod dicebant, Angelos apparuisse hominibus in humana specie, ideoque pingi posse, *conc.* Probavit quoad omnia, h. e. etiam in eo quod dicebat *Joannes Thessalonicensis*, eos habere propria corpora, et in iis apparuisse, *neg.* Non enim omnia, quae recitantur in Conciliis, censeri debent approbata, sed ea tantum, quae pertinent ad dogma definiendum. Doctrina igitur illa probata est, nempe Angelos pingi posse: ratio vero *Joannis Tessalonicensis*, nempe quia Angeli corpus habent, nec revocata ad examen est, neque laudata.

*Objic. III.* Angelos saepenumero hominibus apparuisse, cum iis locutos esse, manducasse etc. ex Scripturis manifestum est. Atqui ista praestare non potuissent sine corpore. Ergo.

*R. Dist. maj.* Apparuerunt in specie aliena, *conc.* In proprio corpore, *neg.* Etiam Patres, qui corpora

An-

Angelis affinxerunt, non eos putarunt indutos crassiori corpore, sed aethereo, ac subtilissimo: unde, ad explicandas Angelorum visiones, ad corpus ab Angelis assumptum confugere debuerunt, ut patet ex Augustino *Lib. III. de Trin. cap. 1.* Ex iis vero, qui Angelos corpora habere negant, nonnulli docent, visiones illas omnes fuisse in hominum imaginatione, aut sensibus; h. e. sensus hominum sive internos, sive externos; ita fuisse affectos, ac si praesens adesset Angelus cum humano corpore. Haec tamen explicatio stare non potest; cum enim res ab omnibus, qui adsunt, eodem modo videtur, auditur, tangitur, non potest esse falsa corporis imago; alioquin probare non potuissent Apostoli, Christum in vero corpore resurrexisse: imo actum esset omnino de rerum veritate, earum, quae sensibus objectae percipiuntur. Alii ergo rectius docent, Angelos ex crassiori aëre corpus sibi, in quo apparuerunt, coaptasse. Sed quia in corpore illo assumpto non erat Angelus tamquam forma corporis; sicut est in humano corpore anima illud vivificans: sed tamquam gubernator: ideo comedendi, bibendi, loquendi, aliaque ejusdem generis actiones non erant vitales; nec cibus in corporis alimentum vertebatur; sicut S. Raphael Angelus Tobiae dixit: *videbar quidem vobiscum manducare . . . sed ego cibo invisibili . . . utor: Tob. XII. 19.*

## §. II.

### *Utrum Angeli sint immortales.*

*Adv.* Potest aliquid creatum dici immortale vel quia nullum in se habet corruptionis principium, vel quia numquam a Deo in nihilum redigetur. Prior immortalitas insita rei est, atque ab ipsa ejus natura proficiscitur; ideoque ab Scholasticis dicitur *ab intrinseco*: posterior extrinsecus accedit, diciturque in Scholis *ab extrinseco*.

## PROPOSITIO

*Angeli utroque modo immortales sunt, hoc est tum ab intrinseco, tum ab extrinseco.*

*Prob. 1a. pars.* Quod est spiritale, est immortale ab intrinseco, h. e. nullum habet in se corruptionis principium; ut de animo humano in Metaphysicis ostenditur. Atqui Angeli spirituales sunt, ut supra demonstratum est Ergo.

*Prob. 2a. pars,* quae est dogma fidei. Quod Deus in aeternum conservabit, est extrinsecus immortale. Atqui Deus Angelos in aeternum conservabit: malos, quidem in supplicium aeternum; bonos vero in vitam aeternam. Nam *Matth. XXV. 41. 46. ignis aeternus dicitur paratus diabolo, et Angelis ejus: vita vero aeterna justis;* ac, proinde etiam Angelis. Ergo.

*Objic. I.* Damascenus *Lib. II. de fid. Orth. cap. 3.* aliique Patres docent; Angelos esse immortales *non natura, sed gratia.* Ergo non sunt intrinsecus immortales. *R. Neg. cons.* Nomine enim *gratiae* intelligant ibi Patres non supernaturale donum, sed ipsam creationem h. e. docent, solum Deum habere immortalitatem a se ipso, sicut ait Apostolus *I. ad Tim. VI. 16. Qui solus habet immortalitatem:* Angelos vero immortalitatem habere beneficio Creatoris. *Quo modo;* inquit Hieronymus in *Epist. ad Tit., solus immortalitatem habere dicatur (cum et Angelos, et multas rationabiles fecerit creaturas, quibus dederit immortalitatem) ita solus dicitur verax; non quod et ceteri non immortales, et veritatis sint amatores, sed quod ille solus naturaliter sit immortalis, et verus: ceteri vero immortalitatem, et veritatem ex largitionis ipsius dono consequantur.*

*(Inst.* Quod non habet immortalitatem, nisi a Deo conservante, non habet intrinsecus immortalitatem; Atqui Angeli non nisi a Deo conservante immortalitatem habent; quia si Dei conservatio cessaret, abirent in nihilum. Ergo.

*R. Neg. maj.* Solus enim Deus ita immortalitatem habet intrinsecus, ut alio non indigeat; reliqua vero, si non

si non habent in se corruptionis principium, intrinsecus immortalia dicuntur, quia ipsa per se perire non possunt, nec ab ulla creata causa destrui; sed tantum a supremâ, atque omnipotenti potestate, nempe Deo, qui ea conservare cessat.

### §. III.

*Utrum Angeli differant inter se specie, an numero.*

*Adv.* Celebris est doctrina S. Thomae *I. P. Q. L. art. 4.* singulos Angelos inter se differre specie, non numero: quam doctrinam saepe alibi inculcat, in ea-que fuit adeo constans, ut diceret, impossibile esse, ac repugnans fingere duos ejusdem speciei Angelos. Reliqui Theologi dividuntur in partes duas: alii volunt, Angelos diversorum ordinum, de quibus ordinibus infra erit dicendi locus, inter se differre specie; ejusdem vero ordinis Angelos numero inter se differre: alii vero asserunt, omnes Angelos ejusdem esse speciei; differre autem inter se numero, et proprietatibus accidentalibus. Denique nonnulli rem incertam esse docent; secuti Augustinum, qui in *Enchirid. cap. 58.* nescire se fatetur, quae sint in suprema Angelorum societate differentiae personarum.

### PROPOSITIO

*Utrum Angeli specie, an numero inter se differant, quaestio valde implexa est, ad fidem non pertinens; congruentius tamen est modo loquendi Patrum, Angelos, saltem ejusdem ordinis, esse ejusdem speciei.*

*Prob. 1a. pars.* 1.<sup>a</sup> Auctoritas S. Thomae omnium Metaphysicorum acutissimi, unumquemque terrere debet, ne cito pronunciet, cum in hac metaphysica quaestione errasse. 2.<sup>o</sup> Ratio S. Thomae non levis est ponderis, si penitus inspicatur. Ait enim, principium individuationis, seu causam cur in eadem specie unum ab altero individuum differat, esse materiam, qua cum

An-

Angeli expertes sint, non possunt a se invicem in individuo differre; sed omnis inter eos distinctionis ratio ab ipsa forma repetenda est. Haec, inquam, ratio contemnenda non est; quia in iis, quae ex materia, et forma non sunt composita, quales sunt Angeli, non est nisi sola forma, sive natura materiae expers. Atqui fieri non potest, ut siut duae ejusdem speciei formae sine materia; ex. gr. duae albitudines: sed tantum esse possunt duo corpora alba. Ergo. Hinc doctissimus *Estius* doctrinam *S. Thomae* probabiliorē appellat; licet concedat, saltem divina potentia fieri posse, ut siut duo Angeli ejusdem speciei; quod *S. Thomas* meliori consequentia ex suis principiis negat, utpote contradictionem involvens. E contrario communis Theologorum doctrina, ab hac sententia abhorrens, gravi quoque ratione nititur; quia animae humanae, licet a corporibus separatae, remanent tamen ejusdem speciei, et numero tantum inter se differunt. Igitur obscura valde, et implexa quaestio est.

*Prob. 2a. pars.* Neque Scriptura, neque traditio, neque Ecclesia quidquam hac de re definiunt. Ergo ad fidem non pertinet.

*Prob. 3a. pars. 1.º* *Basilius Lib. III. cont. Eunomm.* Angeli omnes, ut appellationis unius, sic et naturae omnino sunt ejusdem invicem; nam et stella a stella differt in gloria; natura vero stellarum omnium est una. *2.º* *Cyrillus Alex. Lib. II. in Joan.* Angelus ab altero Angelo nulla re differt secundum id quod sunt Angeli, nempe pro eo, quod cum sint ejusdem omnes speciei, in unam naturam colligantur. Ergo.

Dixi in prop. saltem ejusdem ordinis; quia verisimilius videtur, Angelos diversorum ordinum specie differre. Si enim Deus in rebus corporeis ad pulchritudinem universi tot genera ac species multiplicavit, verisimilius est, idem fecisse in substantiis spiritalibus. Objectiones praetermittimus in quaestione momenti non magni. Jam explicata Angelorum natura, de eorum proprietatibus dicendum est.

## C A P. IV.

*De proprietatibus Angelorum naturalibus.*

*Adv.* CUM rationabilis quaelibet creatura, praeter naturalibus a Deo sit instructa donis, nos ut ordine procedamus, primo naturales, deinde supernaturales Angelorum proprietates explicabimus. Naturales autem eorum proprietates quatuor sunt: 1.<sup>o</sup> intellectus, ad quem pertinet etiam locutio, seu modus, quo unus alterius cogitationes sibi significatas intelligit; 2.<sup>o</sup> voluntas; 3.<sup>o</sup> locus, et de loco in locum mutatio: 4.<sup>o</sup> vis, atque potestas movendi corpora. De his gravissimae excitantur controversiae.

## §. I.

*De intellectu, et locutione Angelorum.*

*Adv.* Angelos esse intelligentia praeditos, ex sacris literis perspicuum est: quae quidem talia Angelis attribuant, quae sine intelligentia fieri non possunt; puta quod Deum in rerum creatione mirabundi laudaverint *Job. XXXVIII. 7.* ex versione LXX.: quod semper faciem Patris videant *Matth. XVIII. 10.*: quod sint administratorii spiritus etc. Sed quaeritur 1.<sup>o</sup> an Angelorum intellectus similis nostro sit, qui partim simplici intellectione, partim ratiocinatione cognoscimus: 2.<sup>o</sup> ad quanam se extendat *objecta*, utrum scilicet res omnes sive spirituales, sive corporeas videat: utrum arcana Dei: utrum futura libera: denique utrum secretas aliorum Angelorum, atque hominum cogitationes: quae hic singillatim expedienda sunt.

## PROPOSITIO I.

*Verisimilius est, Angelos non ratiocinatione, sed simplici intellectione cognoscere ea, quae naturaliter vident.*

*Prob. I. ex auctoritate S. Thomae I. P. Q. LVIII. art. 3. Inferiores, inquit, intellectus, scilicet hominum, per quemdam motum, et discursum intellectualis operationis perfectionem in cognitione veritatis adipiscuntur, dum scilicet ex uno cognito in aliud incognitum procedunt. Si autem statim in ipsa cognitione principii noti inspicerent, ut quasi notas, omnes conclusiones consequentes, in eis discursus locum non haberet. Fit hoc est in Angelis, quia statim in illis, quae primo naturaliter cognoscunt, inspiciunt omnia, quaecumque in eis cognosci possunt.*

*Prob. II. Videmus, homines, quo sunt ingenii praestantioris, eo plures in principiis sine ratiocinatione videre conclusiones. Atqui Angelorum intelligentia acutior, et vividior est humana. Ergo non videtur indigere ratiocinatione; sed statim in principiis cognoscere veritates, quae ex iis consequuntur, et in effectibus videre causas, et vicissim in causis effectus.*

*Dixi quae naturaliter vident, nam circa singularia, quorum notitiam acquirunt, eos uti ratiocinatione verisimile est; sicut ex miraculis Christi ratiocinando coniciebant, ipsum esse Messiam.*

## PROPOSITIO II.

*Angeli non vident omnia possibilia. Tamen omnium rerum existentium ideas a primo creationis momento impressas, et ingenitas habuere, saltem quoad earum species; simulque naturalem Dei cognitionem.*

*Prob. 1.º pars. Cognoscere omnia possibilia est divinam omnipotentiam, ideoque et essentiam divinam, quae reipsa ab omnipotentia non distinguitur, comprehendere.*

*Tom. II.*

*N*

*19*



re. Sed hoc solius mentis infinitae, sive Dei est. Ergo etc. Multa tamen possibilia possunt cognoscere; tum quia homines, licet Angelis inferiores, multa possibilia cognoscunt; tum quia cum Angeli sint administratorii spiritus, pertinet saepe ad eorum ministerium scire quid sit possibile, quid non.

*Prob. 2a. pars. 1.º* Angeli creati sunt a Deo perfecti: *Dei, enim, perfecta sunt opera: Deuter. XXXII. 4.* Atqui pertinet ad perfectionem naturae intelligentis cognitio rerum omnium existentium, saltem quoad species; nam numerum omnium singularium individuorum scire non est ad perfectionem intelligentis naturae necessarium. *2.º* Deus primo homini, eo quod aliorum caput, et doctor futurus erat, rerum naturalium scientiam indidit, ut infra docebimus. Ergo a fortiori Angelis, quibus sublimiora mysteria, et ipsorum hominum custodiam destinabat.

*Prob. 3.º pars.* Angeli, ut supra dictum est, vident sine ratiocinatione effectus in causis, et causas in effectibus. Atqui omnes creaturae, quarum Angeli ideas habent, sunt effectus primae causae, sive Dei. Ergo quocumque vertant mentis aciem, sive in seipsos sive in alias res creatas, semper iis occurret Deus, qui omnia ex nihilo creavit, et servat, et cum singulis earum actibus concurrat. Praeterea si homines sensibilibus rebus illecti, atque hebetati, ex creaturis Deum cognoverunt; a fortiori Angeli, qui majori pollent intelligentiae acumine, et nobiliora Dei opera conspiciunt.

### PROPOSITIO III.

*Praeter generales rerum omnium ideas, Angeli res ipsas praesentes vident; licet, quomodo id fiat, incertum sit.*

*Prob. 1a. pars.* Angeli, ut habetur *Job. XXXVIII. 7.* ex versione LXX.; in rerum creatione Deum laudant: sunt administratorii Spiritus in ministerium missi propter eos, qui incredulitatem capient salutis *Heb. I. 14.* Atqui nec Deum laudare poterant, nec ejus jussa facere; si res praesentes non viderent. Essent enim omnino  
cae-

caeci, et surdi, ignorantes omnia, quae circa ipsos sunt. Ergo.

*Prob. 2a. pars:* Licet homo sensus habeat, in quos agunt exteriora corpora, tamen adeo obscurum est, quomodo mens humana, quae spiritalis est, afficiatur a sensibus, ac praesentia corpora videat, ut nihil certi adhuc in Metaphysicis hac de re statui potuerit. Ergo a fortiori id obscurum erit de Angelis, quos omnino spiritales esse, et corporis expertes, supra docuimus. Hinc nonnulli docent, Angelos res praesentes videre in Deo, tamquam in speculo *intellectuali*; naturaliter illuminante rationales creaturas: quod etiam de hominibus assererat *Malebranchius*. Alii putant, Deum ipsum, qui generales rerum ideas Angelis in creatione indidit, occasione rerum praesentium ipsis immittere ideas rerum singularium, atque praesentium. Res obscura est. Qui Angelos subtilissimis corporibus indutos putabant, difficultatem non effugiebant; adhuc enim obscurum erat, quomodo subtilissima illa corpora in spiritus agerent.

#### PROPOSITIO IV.

*Arcana Dei, seu res supernaturales, et decreta Dei libera, quae pertinent ad mysteria Religionis, Angelis naturae viribus non vident. Vident tamen ex speciali revelatione, quae voluit Deus ipsis ostendere.*

*Prob. 1a. pars. 1.º I. Cor. II. 11. Quae Dei sunt, nemo cognovit; nisi Spiritus Dei. Et Marc. XIII. 32. De die autem illo vel hora nemo scit, neque Angeli in caelo. Ergo haec etiam propositio ad fidem pertinet. 2.º Inter naturales Angelicae intelligentiae vires, et res supernaturales nulla proportio est. Item inter Deum, quem Angeli naturaliter cognoscunt, et libera ejus decreta necessarius non est connexus. Ergo etc.*

*Prob. 2a. pars. 1.º Angeli antequam beatitudinem supernaturalem, et aeternam assequerentur, supernaturalia aliqua per fidem cognoverunt, alioquin naturali lumine ad supernaturalem finem pervenisissent. Ergo ea*

196 *Theologicarum Institut. Lib. V. Pars. II. Cap. IV.*  
per revelationem cognoverunt. Quatenus autem illa fuerint, inter Theologos non constat.

2.<sup>o</sup> Quae Deus hominibus Angelorum ministerio revelavit, cujusmodi fuerunt omnia, vel fere omnia quae Patriarchis, atque Prophetis revelata sunt, per revelationem innotuerunt Angelis.

3.<sup>o</sup> *Mysterium Incarnationis* nonnulli docent Angelos latuisse ante lapsum malorum, et beatitudinem bonorum, cum eorum gratia, et gloria ex meritis Christi non penderet. Alii vero post *S. Thomam* putant, a principio quidem fuisse imperfecte cognitum ab Angelis mysterium illud. Deinde plenius iis revelatum, saltem quoad ejus substantiam, cum beatitudinem assecuti sunt. Mox paulatim, prout tempus, et causa postulabat, etiam aliquas circumstantias iis innotuisse, cum scilicet circumstantiae illae, puta temporis, loci, etc. hominibus revelatae sunt. Tandem plenissime quoad omnes circumstantias mysterium illud Angelos didicisse in ipsa Ecclesiae institutione, juxta id, quod ait Apostolus *Ephes. III. 8.* Sibi datam esse gratiam in gentibus evangelizare investigabiles divitias Christi, et illuminare omnes, quae sit dispensatio Sacramenti absconditi a saeculis in Deo: . ut innotescat Principatibus, et Potestatibus in caelestibus per Ecclesiam multiformis sapientia Dei. Et *I. Tim. III. 16.* vocat incarnationem Verbi magnum sacramentum, quod manifestatum est in carne, justificatum est in spiritu, apparuit Angelis Unde Chrysostomus *Hom. IV. de Incomprehensib.* Vide, inquit, quantus honor humanae naturae est habitus, ut nobiscum, et per nos caelestes virtutes Regis arcana cognoverint. Non quod Angeli haec didicerint ab Apostolis, sed in Apostolis, ut observat *S. Thomas Comment. in cap. III. Ephes.*

## PROPOSITIO V.

*Futura libera, nisi Deo revelante, Angeli naturali lumine certo praenoscere non possunt. Dogma fidei est.*

*Prob. I. Deus Isaiae XVI. 23. hunc Divinitatis proprium characterem constituit, notitiam futurorum. Annun-*

nuntiate quae ventura sunt in futurum, et sciemus quid. Dii estis vos. Unde Tertullianus *Apolog. cap. 2.<sup>o</sup> idoneum*, inquit, *testimonium Divinitatis, veritas divinationis.*

*Prob. II.* Mens creata percipere non potest, nisi quae sunt aut in se ipsa, aut in causa. At futura libera non sunt in se ipsa, quia futura; non in causa, quia libera. Ergo non potest ea videre, nisi ut possibilia.

Dixi autem *futura libera*; quia quae ex naturalium causarum actione, et concursu necessario pendent, ut solis, lunaeque eclipses, tempestatum vicissitudines etc. Angeli, ut sunt ingenio acutissimi, praenoscent; licet etiam in eo falli possint, si Deus pro suprema potestate sua in res creatas naturae leges aliquando velit suspendere; ut ex. gr. cursum solis, orante Josue.

Dixi *certo*; nam conjectura assequi possunt quid quisque verisimilius sit facturus, spectato hominis ingenio, consuetudine, omnibusq. aliis circumstantiis; si enim id aliquando faciunt homines; multo magis Angeli, quorum intelligentia subtilior est, et experientia major.

### Objectiones.

*Obje. I.* Multa daemones praedixisse legimus apud Ethnicos, quae vera fuisse probavit eventus. Ideo enim toto fere orbe celeberrima fuerunt Oracula *Apollinis Pythii*, responsa *Ammonis*, *Sortes Praenestinae*, et alia falsorum numinum vaticinia, quae si nihil unquam praedixissent, aut si numquam praedictioni respondisset eventus, quis fuisset adeo demens, ut ea ulterius consuleret? Atqui illa non acceperunt ex Dei revelatione. Ergo praeviderunt naturali lumine.

*II. Dist. maj.* Praedixerunt futura necessaria ex naturalibus causis oritura; vel contingentia quidem, sed jam facta in remotissimis regionibus, quae hominibus id ignorantibus videbantur futura, *conc.* Praedixerunt futura libera, *subdist.* Praedixerunt certo, *neg.* Per conjecturam, et ambigue; ut responsio oraculi in utrumque sensum trahi posset, *conc.* Sciendum est, *Antonium Van-Dale Lib. de Oraculis*, corrogatis undique multis oraculorum historiis, asserere, omnia numinum vaticinia non a dae-

mo-

monibus fusa, sed conficta a Sacerdotibus; qui oracula venditantes, de stupida hominum credulitate quaestum faciebant. Ipsi Gentiles emunctae naris id videntur sensitisse; nam *Demosthenes* aiebat *Pythiam φιλιππιζειν*, hoc est muneribus *Philippi* corruptam pro eodem oracula fundere; et *Cicero* ait, ideo *Apollinem* *Pythium* sua aetate obmutuisse, quia homines minus creduli esse coeperunt. Sed licet fateamur, multa oracula conficta esse calliditate Sacerdotum, temere tamen id asseritur de omnibus contra constantem omnium Patrum doctrinam, qui vicinioreis iis temporibus, vaticinia illa aliqua ex parte daemonibus tribuunt. Quare ex proposita distinctione, dicimus, daemones, Dei accumulatores, affectasse semper, et venditasse praescientiam futurorum, quam sciebant minus veri Dei esse propriam, ut cultoribus suis suam quasi divinitatem commendarent, ut ait *Augustinus Lib. de Divinat. daemonum cap. 7.* Eos tamen praedicere non posse nisi 1.<sup>o</sup> effectus necessarios causarum naturalium: quae causae cum hominibus ignotae sint, ii pro vero vaticinio praedictionem accipiunt: 2.<sup>o</sup> pro summa celeritate, qua de loco in locum moveri queunt, edicere posse ut praesentia, vel futura, quae in regionibus remotissimis acciderunt: 3.<sup>o</sup> res vere contingentes, et liberas praedicere non posse, nisi ex conjectura plerumque fallaci; vel tali verborum ambiguitate, et involucrio, ut quicunque casus accidat, possit vaticinium eo trahi: quale fuit illud: *Aio te Haecida Romanos vincere posse*: item illud: *Craesus Alim superans magnam disperdet opum vim*, ut observat *Augustinus Lib. III. de Civ. cap. 17.*, *Lactantius Lib. II. cap. 14.*, et ipse *Cicero Lib. II. de divinat.*

Cacterum daemones futura libera ignorare, falsoque praedicere, patet ex Scripturis. Bis enim falso praedixit *Satanas*, *Jobum* peccaturum, si *Deus* illum calamitatibus probaret. Imo, ut observat *Ambrosius*, numquam diabolus superbissimus viros sanctos tentationibus impeteret, si se certo sciret ab iis turpiter vincendum, et maiorem iis meritorum cumulum ex victoria accessurum: *Lib. II. in Luc. 3.* Addit *Leo M. Serm. XI.* et *Augustinus in Psal. CXXX.* numquam diabolum suasurum fuisse *Judaeis* mortem *Christi*, si inde imperium suum de-

destruendum, et redimendum genus humanum praevidere potuisset.

*Objic. II.* Astra caeli signa sunt rerum futurarum. Ait enim Moyses, ea posita esse a Deo, ut essent in signa, et tempora, et dies, et annos *Gen. I. 14.* Et *Origenes* apud *Sixtum Senensem Biblioth. Lib. V. annot. 15.* ait, omnia in caelo esse scripta. Ergo ea legere possunt Angeli; alioquin frustra Deus posuisset signa, quae nemo cognosceret.

*¶. Dist. ant.* Sunt signa futurorum, quae necessario eveniunt ex illorum influxu, *conc.* Futurorum contingentium, et liberorum, *neg.* Adde quod Moyses de sole praesertim, et luna scribat ea esse in signa, et tempora, et dies, et annos, quae locutio Hebraismus est, idem valens, ac si dicas in signa temporum, dierum, et annorum. (a).

## PROPOSITIO VI.

*Angeli non possunt naturae lumine intimas hominum, et aliorum Angelorum cogitationes cognoscere.*

*Prob. cont. Durandum, aliosque Scholasticos. I.* Scriptura soli Deo tribuit scrutari cordium arcana; *III. Reg. VIII. 39.* Tu nosti solus cor omnium filiorum hominum. *Jerem. XVII. 9.* et *10.* Pravum est cor omnium, et inscrutabile: quis cognoscet illud? Ego Dominus scrutans cor, et probans renes. *Heb. IV. 12.* vocatur Deus discretor cogitationum et intentionum cordis.

*Prob. II. ex. PP. 1.º* Ambrosius in cap. V. *Luc.* Dominus, inquit, occultorum cognitione Deum se esse demonstrat. *2.º* Augustinus *Serm. XVI. de Divers. (b)* Cor videre Dei est, cujus oculis, inquit, cuncta subjecta sunt, et cui cordis cujuslibet profunditas patet. *3.º*

Hic

---

(a) Vide Buddeum *Introduct. ad Hist. Philos. Hebraeor.*, Hueticum in *Origen.*, Calmet in *Comment.*

(b) Nunc *Serm. XII.*

200 *Theologicarum Institut. Lib. V. Pars II. Cap. IV.*  
Hieronymus in *Psal. XVI.* Diabolus in anima intrinse-  
cus nescit, nisi per exteriores motus intelligat. Idem  
alii docent, ideoque probant (a) Christam, et Spiritum  
S. esse Deum, ex eo quod Scriptura ipsos arcana cordi-  
um cogitationes intueri docet.

*Prob. III. ratione S. Thomae I. P. Q. LVII. art. 4.*  
Nequit Angelus ea cognoscere, quibus non adest. Atqui  
Angeli non illabuntur cordibus hominum; aut aliis An-  
gelis; seu non pervadunt alios spiritus, nec ipsis intime  
adsunt; hoc enim solius Dei proprium est, in quo vi-  
vimus, movemur, et sumus. Ergo arcana cogitationes  
videre non possunt.

#### *Scholion.*

Quoniam in homine, ex conjunctione animi, et corpo-  
ris, interioribus mentis cogitationibus externae etiam in  
corpore mutationes respondent, quae aliquando etiam ab  
aliis hominibus cognoscuntur; aliquando vero non perci-  
piuntur ab hominibus, sed ab Angelis ingenio subtiliori-  
bus percipi possunt; hinc fit, ut Angeli saepe per ex-  
terna ista signa intimas hominum cogitationes vel cer-  
to, vel probabili conjectura assequantur.

### PROPOSITIO VII.

*Angelos secum invicem, et cum Deo; et animabus a  
corpore separatis loqui, hoc est cogitationes suas  
communicare; certum est; quomodo autem  
haec locutio fiat, incertum.*

*Prob. 1a. pars. ad fidem pertinens. Isaiae VI. 3. Se-  
raphim clamabant alter ad alterum. Simili ratione  
Dan. VIII. 13. et seq.; et Zach. I. 11. unus Angelus  
ad alterum loquitur: quod et in Apocalypsi frequenter*

---

(a) Origenes in *Job. I.*, Ambrosius *Orat. de obitu Theod.*  
et in *Luc.* Chrysostomus *Hom. XI. in Joan.* Cyrillus *Lib.*  
*II. in Joan. et alibi*, Damascenus *Lib. II. De fid. cap. 4.*  
Augustinus *De divin. daem. cap. 5.*, et Theophylactus in  
*Luc. V. etc.*

occurrit. Denique Apostolus *I. Cor. XIII. 1. Si linguis*, inquit, *hominum loquar, et Angelorum*. Ergo Heterodoxi, ut Beza *Comment. in Epist. ad Galat.*, qui Catholicos Theologos irrident, de lingua Angelorum tractantes, Scripturam Sacram irrident. Non tamen locutionem Angelorum suspicari debemus humanae similem, quæ per corporeos sonos efficitur; sed sublimiorem, et omnino spiritalem, ut advertit Gregorius M. *Lib. II. Moral. cap. 5.*

- *Prob. 2a. pars. 1.º* Quia Scriptura, et traditio hac de re omnino silent: humana vero ratio nihil certi de re supra sensus, et cogitationes nostras posita statuere potest, quod non gravibus urgeatur incommodis. *2.º* Ex ipsa Theologorum varia opinandi ratione. Nonnulli enim docent, vel eo dumtaxat, quod unus velit cogitationes suas vel uni, vel pluribus Angelis esse manifestas; statim illis innotescere, quantumcunque distantibus: quæ videtur sententia S. Thomæ *I. P. Q. CVII. art. 5.* Et hi iterum dividuntur in duas partes; alii enim volunt; ipsum Deum revelare cuique Angelo quidquid alius Angelus illi significare velit: alii putant, id fieri sine Dei revelatione; quia, inquit, voluntas cujusque Angeli est tamquam velum, secretas ejus cogitationes obtegens; ac proinde si ille velit, eas esse alteri manifestas, statim, quasi sublato velo, innotescere. Alii Theologi volunt, Angelos colloqui per signa quaedam, secundum nonnullos corporea, secundum alios spiritualia: quam sententiam post *Vasquesium*, et alios tuetur Laurentius Berti *Lib. X. cap. 11.*: nec ab ea videtur fuisse alienus S. Thomas *in II. Dist. II. Quaest. 2. art. 3.* Sunt qui cum *Okamo* volunt, unum Angelum alteri cogitationes suas imprimere. Nulla ex his sententiis solidum, atque evidens fundamentum habet, et unaquæque suis premitur incommodis. Quapropter præstat hic judicium suspendere, *ubi nec sensus corporis regit, nec perspicua ratio veritatis elucet, nec sacra divini eloquii auctoritas firmat, ut loquitur Augustinus Lib. III. de Trin. cap. 11.*



*Scholion.*

Haec Angelorum locutio, si continet veritatis autem ignotae, et supernaturalis significationem, *illuminatio* dicitur. Licet autem Angeli inferiores superiores Angelos, ipsumque Deum alloquantur, ut constat ex Scripturis; tamen superiores dumtaxat Angeli inferiores illuminant, atque docent ea, quae divinitus ipsis significanda accipiunt, ut post *Dionysium S. Thomas*, alique Theologi passim affirmant, quam quidem ordinatissimam rationem idem *S. Thomas* numquam inter Angelos perturbari docet; licet inter homines aliquando ad fovendam humilitatem, aliasque ob causas, velit Deus majores a minoribus illuminari. Unde *Bernardus* qui *Serm. I. in Evang. Missus est*, docuerat, Deum nulli beatorum Spirituum, antequam Virgini, suum revelasse consilium, excepto uno Gabriele Archangelo; admonitus ab *Hugone a S. Victore* quod ea res multos offenderat, respondit, se ista dubitanter protulisse. Porro Angeli saepe homines illuminant, et docent, ut ex Scripturis perspicuum est. Illuminant autem non infundendo cogitationes ipsas; et multo minus movendo voluntates: sed afficiendo sensus, et spiritus animales, ut docet *Bernardus Serm. V. in Cant. et alibi*.

## §. II.

*De voluntate Angelorum, et libero voluntatis arbitrio.*

*Adv. I.* Cum Deus omnes creaturas suas ad finem ultimum, atque optimum, hoc est ad seipsum ordinaverit, hinc unaquaeque res in hunc finem inclinatur; irrationalibus quidem creaturae per quandam extrinsecus ortam propensionem; rationabiles vero per voluntatem. Cum ergo Angeli intellectu praediti sint, eos etiam voluntatem habere necesse est.

*II.* Haec inclinatio in finem ultimum, cum ab ipso Deo sit indita creaturis omnibus, non potest esse libera, sed necessaria est. Hinc rationales creaturae,  
An-

Angeli nempe, et homines, finem ultimum, ipsam scilicet beatitudinem in genere, necessario appetunt. Sed cum ipsorum iudicio, et rationi relinquatur electio eorum, per quae ad beatitudinem pervenire possint, quaeque a Cicerone necessitates, ab Scholasticis *media ad finem* appellantur; *media* autem illa apparere possint intellectui vel utilia ad assequendum finem, vel noxia, vel inepta, vel certe non necessaria; sit hinc, ut voluntas possit illa vel eligere, vel rejicere. Haec itaque potestas eligendi, vel rejiciendi *media ad finem*, libertas est arbitrii, cujus radix, et origo est iudicium rationis, quo aliquid cernitur vel aptum, vel ineptum ad finem ultimum, vel saltem non necessarium. Licet autem ultimus finis, et beatitudo rationabilium creaturarum sit ipse Deus; tamen quia, intellectus, quoties Deum clare non videt, potest ipsum Deum mente concipere, non ut finem ultimum, sed ut *medium* ad beatitudinem consequendam, sequitur ut voluntas, quocumque etiam divinae gratiae auxilio incitata, libera etiam sit ad Deum ipsum vel diligendum, vel aversandum, donec illustrata lumine gloriae clare videat Deum esse beatitudinem illam, ad quam necessario tendit, illumque felici necessitate diligit.

III. Porro libertas arbitrii a Theologis dividitur in libertatem *contrarietatis*, qua possunt eligi duo contraria; bonum, et malum; et *contradictionis*; qua unum aliquid eligi potest, vel rejici sine electione contrarii. Haec autem posterior libertas iterum dividitur in libertatem *specificationis*, et *exercitii*. Illa est, qua inter varia *media*, quibus finis comparari posset, unum potest prae alio eligi; posterior vero, qua unum medium jam electum potest variis modis adhiberi, *ex gr.* majori; vel minori voluntatis impetu; citius, aut tardius etc.

IV. His explicatis, quae in sequentibus etiam libris usui esse possunt, omnes Theologi consentiunt, Angelos libertate arbitrii pollere; sed singularis est Thomistarum doctrina, Angelos libero quidem gaudere arbitrio ante electionem, et *determinationem* voluntatis; at post electionem natura sua esse inmutabiles, quae videtur esse ipsissima S. Thomae doctrina I. P. Q. LXIV. art. 2.

204 *Theologicarum Institut. Lib. V. Pars. II. Cap. IV.*  
*Liberum*, inquit, *hominis arbitrium flexibile est ad op-*  
*positum et ante electionem, et post; liberum vero arbi-*  
*trium Angeli flexibile est ad oppositum ante-electionem,*  
*sed non post.* Ab hac sententia ceteri omnes passim  
 Theologi recedunt, *Petavius Lib. I. de Angelis cap.*  
*11. Juveninus, Habert. etc.* Sed advertendum est cum  
*Sylvio*, qui rem hanc copiose versat, non ita intelli-  
 gendum esse *S. Thomam*, ut in quacunque electione  
 Angeli immutabiles sint; sed tantum in electione finis  
 ultimi; hoc est postquam semel finem ultimum vel in  
 Deo, vel in creatura statuerunt, ab eo amplius remo-  
 veri non posse: quo sensu explicata doctrina a veritate  
 non abhorret, ut infra videbimus. Numquam tamen  
 asseruit, Angelos non posse mutare consilium, sive  
 electionem *mediorum*, quae ad finem a se electum as-  
 sumunt.

## PROPOSITIO. I.

*Angeli libero pollent arbitrio. Est dogma fidei.*

*Prob. I.* Deus Angelos, qui peccaverunt, aeternis ad-  
 dixit suppliciis; bonos aeterna gloria donavit, ut infra  
 dicemus. Ergo liberi erant; quod enim quis necessario  
 facit, nec praemio, nec poena dignum est. Unde *Basi-*  
*lius Lib. de Spir. Sancto cap. 16. Impiorum*, inquit,  
*et adversariorum spirituum defectio id quod dicimus,*  
*approbat, juris sui, et potestatis esse invisibiles virtu-*  
*tes, et aequae in virtutem, et in vitium vergere.*

*Prob. II.* Quod ratione utitur, liberum est ad eli-  
 genda ea, quae ad finem ultimum ducunt; potest e-  
 nim illa cognoscere vel ut apta, vel ut inepta, vel  
 non necessaria. Id omne, quod ratione utitur, libertate  
 praeditum est, inquit *Damascenus Lib. II. de fid.*  
*Orth.* Ergo etc.

## PROPOSITIO II.

*Angeli quoad media, quae ad finem ducunt, liberi sunt et flexibiles ante, et post electionem. At circa finem ultimum ante electionem quidem erant ad utrumque flexibiles; post electionem vero immutabiles sunt, non quidem natura sua, sed ratione status vel gloriae, vel damnationis, qui electionem illam consecutus est.*

*Prob. 1a. pars.* Intellectus Angelicus falli potest in electione *mediorum*, erroremque suum post electionem delegere, vel divina revelatione, si bonus est; vel experientia, si malus. Ergo et voluntas post electionem mutari. *Ant. prob. ex Scripturis.* 1.<sup>o</sup> De Angelis bonis habemus *Dan. X. 13.* voluntates fuisse inter illos contrarias, cum divina nondum per revelationem innotuisset voluntas, scilicet Angelum Regni Persarum restituisse Angelo Judaeorum; ne isti a captivitate solverentur, donec, cognita Dei voluntate, omnes in idem consenserunt. 2.<sup>o</sup> De Angelis malis constat, eos in hominibus impugnandis varias adhibere artes, et cum experientia discunt, primum artificium non succedere, adhibere contrarium. Ita Satanas variis modis *Jobi* patientiam aggressus est. Idem cum vidisset primam artem, qua Christum tentavit, successu caruisse, alteram adhibuit *Matth. IV.*

*Prob. 2a. pars.* Angeli boni, ut infra dicemus, postquam libere perstiterunt in amore Dei, tamquam in ultimo fine; illustrati lumine gloriae, jam in malum converti amplius non possunt. Mali vero Angeli, postquam libere a Deo recesserunt, aeterno supplicio affecti, omnique destituti auxilio gratiae, sine qua charitas haberi non potest, jam in bonum amplius converti nequeunt. Ergo.

*Prob. 3a. pars.* Patres docent, immutabilitatem beatorum Angelorum esse eximium gratiae Dei munus. Fulgentius *Lib. de fide ad Petrum cap. 23.* Hoc ipsum, inquit, quod ab illo statu beatitudinis, in quo sunt, mutari

206 *Theologicarum Instit. Lib. V. Pars II. Cap. IV.*  
*tari in deterius nullatenus possunt, non est illis natu-*  
*raliter insitum; sed, postquam creati sunt, gratiae di-*  
*vinæ largitate collatum. Idem docuerat Augustinus Lib.*  
*de Corrept. et Grat. cap. 10. et Lib. XI. de Civ. cap.*  
*9. et alibi. Concinit S. Thomas I. P. Q. LXII. art.*  
*8. Angeli beati peccare non possunt, et ratio est, quia*  
*eorum beatitudo in hoc consistit, quod per essentiam*  
*Deum vident. Ergo non est naturalis illa Angelorum in*  
*bono stabilitas. Ergo.*

*Diluuntur Objecta.*

*Obicies I. cont. 2m. part. Sap. V. 3. damnati homi-*  
*nes ( et idem de daemonibus ferri debet iudicium ) poe-*  
*nitentiam peccatorum agent in die iudicii: dicentes in-*  
*tra se, poenitentiam agentes, et prae angustia spiritus*  
*gementes etc. Adde quod impossibile sit, daemones non*  
*poenitere peccati, cujus atrocissimam poenam experien-*  
*tur. Ergo.*

*W. Dist. ant. Agent poenitentiam peccati, quatenus*  
*causa est poenae, conc. Quatenus legi aeternae Dei con-*  
*trarium est, neg. Hoc autem non est malum detesta-*  
*ri, et poenitere culpa, sed tantum poenae. Non igitur*  
*eorum voluntati displicet peccatum, sed nollent inde*  
*poenam esse tam gravem consecutam. Apposite S. Tho-*  
*mas 2a. 2ae. Q. XIII. art. 4. Illi, inquit, qui sunt in in-*  
*ferno, retinebunt perversam voluntatem aversam a Dei*  
*justitia in hoc, quod diligunt ea, pro quibus puniun-*  
*tur, et vellent eis uti si possent, et odiunt poenas,*  
*quae pro huiusmodi peccatis infliguntur; quod quidem*  
*poenarum odium divinae justitiae detestatio est, novum-*  
*que peccatum. Vide et III. P. Q. LXXXVI. art. 1.*  
*Ceteras objectiones discutiemus ubi de aeternitate poe-*  
*narum disputabimus.*

*Objic. II. cont. 3m. part. Videtur ex ipsa natura vo-*  
*luntatis Angelicae oriri eorum immutabilitas post ele-*  
*ctionem ultimi finis. Ut enim arguit S. Thomas I. P.*  
*Q. LXIV. art. 2. voluntas ejus conditionis est, cujus*  
*intellectus. At intellectus Angelicus non per ratiocina-*  
*tionem res noscit, sed simplici intellectione; sicut ho-*  
*mi-*

mines prima principia; ac proinde intellectus Angelicus natura sua immutabilis est. Ergo et voluntas.

§. *Dist. min.* Intellectus Angelicus res noscit simplici intellectione, et in hoc errare potest, erroremque suum postea detegere, *trans.* Nam in multis eos rationatione uti, supra diximus. Et in hac intellectione falli non potest, *neg.* Detecto itaque errore, potest voluntas mutari natura sua, et revera mutatur aliquando in electione *mediorum*, Sed in electione ultimi finis, quominus mutetur, obstat conditio ejus status, in quo sunt Angeli boni, et mali. Quod pertinet ad auctoritatem *S. Thomae*, cum ipse discrete dicat, ut supra vidimus, rationem, cur Angeli boni peccare non possunt, esse lumen gloriæ, benigne interpretandus est; uti ejus sententiam commodè explicant *Sylvius Comment. in I. P. Q. LXIV.*, *Berti Lib. X. cap. 13.*, alique.

## §. III.

*De loco, et motu Angelorum.*

*Adv.* I. Cum Angeli non sint ubique, immensitas enim solius Dei est: patet, eos esse in loco, ut observat Theodoretus *Quæst. III. in Genes.* Sed cum non habeant corporeas dimensiones, quibus spatium impleant, non sunt in loco more corporum, hoc est *circumscriptive*, ut ajunt; ita ut singulis spatii partibus per extensionem respondeant; sed in loco sunt improprie, et more spirituum, sive *definitive*; hoc est ita sunt alicubi, ut alibi non sint. Quod evidenter insinuant Scripturæ, quæ sæpe docent, Angelos sanctos esse in Cælo; malos vero ita inde depulso, ut amplius ibi non sint, sed in inferno. *Apoc. XII. 8. Neque locus inventus est eorum amplius in cælo.* II. *Pet. II. 4 Deus illos rudentibus inferni detractos in tartarum tradidit cruciandos.*

II. Rursus Angelos non ita uni affixos esse loco, ut nunquam inde moveantur; sed de loco in locum sæpe transire, ex ipsis Scripturis manifestum est. *Matth. XXVIII. 2. Angelus enim Domini descendit de cælo.* *Luc. II. 15. Discesserunt a Pastoribus Angeli in cælum.*

Et

Et ipse Diabolus *Iobi I. 7.* ait: *circuivi terram, et perambulavi eam.* Haec certa apud omnes sunt.

III. Sed quaeritur inter Scholasticos 1.<sup>o</sup> quam ratione Angeli constituantur in loco; 2.<sup>o</sup> utrum unus possit simul esse in pluribus locis, aut plures in eodem loco; 3.<sup>o</sup> utrum de loco in locum transire possint, non pertranseundo medium, et alia ejusdem generis. In prima quaestione Scotistae a Thomistis dissentiunt. Illi enim docent, rationem, cur Angelus sit in loco, esse ipsam praesentiam, et (ut loquantur) *indistantiam* substantiae Angelicae a loco. Isti vero putant, Angelos in loco esse non per praesentiam substantiae, sed per operationem. Itaque Scotistae putant, praesentiam substantiae Angelicae esse rationem, cur Angelus in loco operetur: Thomistae ex adverso docent, operationem Angeli in loco esse rationem, cur ejus substantia sit loco illi praesens. Nos distinguendum putamus; si enim absolute quaeratur, quam ratione Angelus in loco sit; respondemus, verisimiliorem esse sententiam Scotistarum; hoc est, id non fieri per operationem, sed per ipsam Angelicae substantiae praesentiam. *Operari enim sequitur esse*; prius ergo mente concipiendum est aliquid in loco esse; deinde ibi operari. Si vero quaeratur, qua ratione Angelus tanto spatio sit, cum sit expertus extensionis, id fieri dicimus per operationem, sive per applicationem suae virtutis ad operandum; ita ut quanto amplius Angelus virtutem suam ad operandum extendat, tanto majori, et ampliori in loco sit; sicut eadem anima rationalis est in infantis corpusculo, et in eodem jam adulto; sed in infante virtutem suam minus extendit; ideoque minori est in spatio, quam in adulto. Hac distinctione Duhamel *Dissert. I. de Angelis cap. 4.* Scotistarum, ac Thomistarum sententiam in concordiam revocare studet; sed utrum illi his conditionibus pacem accipiant, ignoramus.

IV. Quod spectat ad quaestionem alteram, manifestum est, Angelum naturali sua virtute in pluribus locis simul esse non posse. Quod enim *definitive* est in loco, ita ibi est, ut alibi esse non possit. At id divina virtute, ac modo supernaturali nobis ignoto per miraculum fieri posse negare non debemus, licet, quomodo fieri queat,

queat, intelligere non valeamus. Sicut enim in Eucharistia idem Christi corpus supernaturali modo pluribus est in locis; ita posset Deus unum, eundemque Angelum pluribus simul locis praesentem sistere. Plures vero Angelos eodem in loco, licet minimo, esse posse, patet non solum ex eorum spiritali natura, verum etiam ex Evangelio, ex quo discimus, unum hominis corpus a legione dæmonum fuisse obsessum *Marci V.*

V. Denique in postrema quaestione Thomistae, qui contendunt, solam operationem constituere Angelos in loco, constanter docent, posse Angelum de loco in locum migrare, intacto medio; cum possit nunc hic, nunc alibi, etiam remotissimo in loco operari; licet non operetur in interjecto spatio. Sed in sententia Scotistarum id fieri naturaliter non potest. Hoc tamen certum est, Angelorum motum incredibili celeritate peragi. Unde Tertullianus *Apologet. cap. 22.* ait, dæmonem momento nunciare quae in locis remotissimis agebantur. Non tamen eorum motus sit in instanti; quidquid in contrarium nonnulli Scholastici commenti sunt. Haec autem, quae curiose magis, quam utiliter disputantur, non putavimus tractanda prolixius. Si quis hisce delectatur, Scholasticos adire poterit, *Gonetum Disp. IV. et seq.*, *Vasquesium*, alios.

## §. IV.

## De Angelorum vi, ac potestate movendi corpora.

*Adp. I.* Creaturas corporeas esse Angelis utpote naturae praestantiori, subjectas docent Patres. Certe Angelis naturalem esse potentiam movendi corpora, ex Sacris literis manifestum est. Inde enim constat, Angelum percussisse de exercitu *Sennacherib* centum octoginta quinque millia virorum *IV. Reg. XIX. 35.* et transtulisse *Philippum* ex via, quae *Gazam* ducebat, in *Azotum Act. VIII. 39.*; et *Habacuc* e *Judaea* in *Babylonem Dan. XIV. 35.*; ipsumque *Satanam Job. I.* ignem de caelo deduxisse, concussisse, et diruisse domum, in qua filii *Job* epulabantur; multisque modis eum obsessorum corpora movere, et vexare discimus ex Evangelio. Nec



mirum est, Spiritus movere corpora. Si enim Deus, qui maxime spiritalis est, maximam habet potentiam suo nutu universum orbem movendi; cur non potuit creaturis suis spiritalibus hujus potentiae minimam partem tribuere; sicut animae rationali potestatem indidit suo nutu movendi corpus; licet id, non secus ac multa naturae arcana, quomodo fiat, intelligere non possimus? Hanc Angelorum potentiam maximam esse, ex ipsis effectis intelligimus; sed quam Late pateat, scire non possumus, cum non constet, utrum ad ea efficienda, quae in Scripturis narrantur, omnes vires suas adhibuerint; an vero majora patrare possint vel ipsi, vel superioris ordinis Angeli. Unde Augustinus *Lib. III. de Trin. cap. 9.* Quid possint, inquit, per naturam, nec possint per prohibitionem, et quid per ipsius naturae suae conditionem facere non sinantur, homini explorare difficile est, imo vero impossibile.

II. Cum ergo omnes corporum utcumque mirabiles immutationes motu perficiantur; Angeli vero, praeter exquisitam totius naturae scientiam, maxima polleant vi movendi corpora; patet, eos multa patrare posse in hac visibili rerum universitate, quae longe superent hominum virtutem, multaque admirabilia, et portentosa de improvviso producere. Sed quaeritur hic inter Theologos, utrum Angeli naturali virtute vera miracula edere possint; quae virtus cum in Angelis malis non sit extincta, quaeritur etiam, utrum verum miraculum fieri possit ab Angelis sive bonis, sive malis.

III. Pendet hujus quaestionis explicatio ab ipsa definitione miraculi. Nam si cum Clarkio *de Relig. nat. et revel.* (quem sequuntur Tillotsonus, Lokius, Clericus, alijq.) miraculum definias effectum naturae ordini contrarium, a substantia intelligente; quae homine potentior sit, productum; perspicuum est, Angelos sive bonos, sive malos edere posse miracula. Sed cum nos *Lib. I. cap. 6.*, rejecta hae definitione; quae ab omnibus Theologis explosa est, et evertit veram miraculi notionem, illud definiverimus opus rarum, et supra naturae leges, superans omnes vires creatas; ex hac definitione manifestum est, Angelorum vires ad patranda miracula non posse pertingere. Sed cum ea definitio

ad rem praesentem translata, videatur ut certum ponere, quod est in controversia; inquirendum restat hic 1.<sup>o</sup> quodnam opus rarum, et mirabile creatas Angelorum vires excedat: 2.<sup>o</sup> utrum potentia illa, qua Angeli pollent, uti possint pro lubito: 3.<sup>o</sup> an sint aliqui characteres, quibus vera miracula, divina virtute patrata, distinguantur a falsis: quod postremum etiam *Lib. I. cap. VI.*, quantum necesse erat, attigimus.

## PROPOSITIO I.

*Angeli nec aliquid ex nihilo creare possunt, nec ex creata materia novum mundum constituere, nec aliquid moliri contra generales naturae leges, quibus mundus hic servatur, et regitur.*  
*Est dogma fidei.*

*Prob. 1a. pars.* Creatio rerum ex nihilo opus infinitae potestatis est, qualis requiritur ad infinitam distantiam superandam, quae inter nihilum, et esse intercedit. At potentia Angelorum finita est, utroque creata. Ergo.

*Prob. 2a. pars.* Ordinatissima totius mundani systematis constitutio nonniā a mente sapientiae, atque potentiae infinitae fieri potuit; unde Patres, ipsique Gentiles Philosophi ex admirabili hujus universi structura probabant esse Deum. Vide Tullium *Lib. II. de Nat. Deor.* Ergo ab Angelis fieri non potest.

*Prob. 3a. pars.* Generales naturae leges sunt ipsa Dei voluntas, quae statuit ab aeterno, ut corpora certo modo, certisque regulis moverentur. Atqui nulla creatura voluntatem Omnipotentis retractare, aut frustrari effectu suo valet. Nec dicas, Deum hanc potestatem creatis mentibus fecisse, ut leges a se latas suspendere, aut infringere valerent. Sapientissimum enim rerum Moderatorem, et principem non decet, ut ministris suis potestatem faciat leges, summa sapientia ad bonum universi latas, pro lubito abrogandi, aut mutandi. Ergo.

*Corollarium.*

Ergo quidquid miri patrare possunt Angeli, non est nisi secundum naturae leges, occultasque causas, et applicando, ut ajunt, *activa passivis*.

*Solvuntur Objecta.*

*Obje. 1.* Magi Pharaonis ope daemonum miracula Moysis imitati sunt: virgas suas mutarunt in serpentes, et aquam in sanguinem: ranas etiam subito emergere fecerunt. Sed hoc est contra naturae leges. Ergo.

*W. Jacobus Sercesius Tract. de Mirac.* (quem sequuntur *Turretinus*, aliique) putat, Magos Pharaonis fuisse ludiones quosdam mirae dexteritatis, qui sine ope daemonum supposuerunt virgis angues, aquam colore sanguineo infecerunt, ranas aliunde collectas sparserunt: quae si vera essent, prorsus evanesceret obiectio. Sed quia haec non satis congruunt sententiae Scripturarum; concedimus, adfuisse daemones praestigiis illis. Quare *resp. Dist. ant.* Et haec facta sunt a Magis revera, uti facta fuerant a Moyse, *neg.* Facta sunt subdole; et modo aliquo, qui non est contra naturae leges, nec daemonum potentiam superat; *conc.* Dicimus ergo cum *Augustino Lib. III. de Trin. cap. 8.* Magis virgas projicientibus, daemones mira celeritate, virgis sublati, supposuisse veros angues aliunde allatos. Ita infecisse aquam sanguineo colore: ranas vero vel aliunde attulisse, vel ex ovis, undique per Aegyptum sparsis, subito produxisse, applicando occultas naturae vires, quae ranarum ortum accelerarent.

*Obje. II.* Pythonissa *I. Reg. XXVIII. 11.*, rogante *Saule*, suscitavit a mortuis *Samuelem*, qui Regi totius exercitus cladem, ejusque mortem certo praedixit. At mortuorum suscitatio totius naturae legibus adversatur. Ergo.

*W. Missis variis celeberrimae hujus historiae explanationibus Theologorum, quorum alii volunt, non Samuelis animam, sed spectrum apparuisse Sauli; alii ipsum daemonem, quorum sententia non satis cohaeret cum eo, quod*

quod dicitur *Eccli. XLVI. 23.* Samuelem post mortem prophetasse; *Resp.* cum Augustino *Lib. I. ad Simplic.* Q. 3. *dist. maj.* Et id accidit virtute daemonis, *neg.* Voluntate, et potentia Dei, qui in poenam scelesti Regis voluit eum per Prophetam illum, cujus mandata spreverat, postrema, ac terribili sententia percutere; ideoque vel ipse Deus animam Samuelis adduxit: vel extraordinarie permisit, ut daemon supra virtutem suam pro ea vice id faceret, *conc.* Non ergo poterat *Pytho-nissa*, aut daemon a mortuis *Samuelem* evocare: nec illa hunc exitum incantationum suarum expectabat; ideoq. Scriptura refert, ipsam inopinato rei eventu exhorruisse. Sed ipse Deus id voluit, et fecit in poenam Saulis. Vide varias Interpretum de hoc facto opiniones apud Calmet *Dissert. de Samuele per visum Sauli objecto.*

## Corollarium.

Quae igitur narrantur a veteribus portentosae immutationes hominum in bruta; ut *ex.gr.* sociorum *Ulyssis* in porcos, et *Dionedis* in volucres, *Apuleji* in asinum, quae collegit Augustinus *Lib. XVIII. de Civ. cap. 16. et seq.* quasi daemonum virtute effectae; item Sagarum in varia animalia: eae vel fabulae sunt, vel deliramenta phantasiae magicis, venenatisque poculis perturbatae.

## PROPOSITIO II.

*Angeli naturali, quam habent, virtute movendi, immutandive corpora, non possunt pro lubito suo uti; sed tantum, quantum Deus pro sua sapientia, et justitia permittit. Est dogma fidei.*

*Prob.* Si angeli virtute illa pro lubito uti possent, profecto daemones, ut sunt hominibus insensissimi, aut brevi genus humanum pessumdarent; aut frequentissima ederent signa, ac portenta ut eos a vera abducerent religione, aut ad malum incitarent. Sed hoc fieri non videmus; futurum autem esse scimus ex Evangelio, et Apocalypsi in novissimis diebus, in quibus Satanas sol-

*velut modico tempore, et ejus ope Antichristus, ejusque ministri dabunt signa, et prodigia, ut in errorem inducantur, si fieri potest, etiam electi. Ergo etc. Hinc Augustinus Lib. III. de Trin. cap. 8. Non est, inquit, putandum, istis transgressoribus Angelis ad nutum servire hanc visibilium rerum materiam.*

### *Corollarium.*

Ex hac propositione ea quaestio finire potest, quae est magnis animis agitata, utrum extet Magia, non quidem naturalis, qua nonnulli Physicae periti, per causas vulgo ignotas, mirabilia quaedam efficiunt, ob quae in suspicionem aliquando veniunt; sed supernaturalis, et *daemoniaca*; hoc est scientia quaedam, per quam certis signis, verbis, aut carminibus compellantur daemones aut occulta prodere, aut futura praedicere, aut mirabilia facere. Nonnulli enim audacter docent, haec omnia commentitia esse: nullam esse, nec esse posse inter daemones, hominesque commercium. Magno conatu id adstruere conati sunt Baltassar Bekerus ( *in Mundo fascinato* ), Antonius Van-Dale *Lib. de Oracul. Ethn.* alique, quos magno numero recenset Joan. Oslander *Tract. de Magia*. Contra alii, quaecumque de Magia referuntur, sine delectu credunt. Hoc certum est, nefariam hanc doctrinam apud Aegyptios, Chaldaeos, Persas, Graecos, aliosque magno studio fuisse excultam, ipsosque magi nominis Philosophos, imprimis Platonicos ei nomen dedisse, eo quod putarent, mundum hunc, singulasque ejus partes a mediis quibusdam potestatibus, sive spiritibus regi, quos sacrificiis, carminibus, aliisque caeremoniis flectere nitentur, ut videre est apud Jamblicum ( *de Mysteriis* ), Preamulum ( *de Sacrificiis* ); et Porphyrium, quem refert Augustinus *Lib. X. de Civ. cap. 9.* Imo religio Christiana longe lateque propagata, atque idololatria fere abolita, non cessarunt inter Christianos malefieriati homines, qui impiae huic disciplinae nomen darent. Magiae historiam strictim refert Buddeus *de Atheismo, et superst. cap. 9. ad §. 3.* De illa ergo ita sentiendum. Primo quamvis nulla extaret magia, tamen gravissimi sceleris rei sunt, qui eam profitentur, eo

quod per disciplinam, quamvis vanam, cultum spiritibus nequissimis, Deique inimicis exhibent; vel saltem cum eis societatem incunt pacto siue expresso, siue implicito. Deinde si nomine Magiae intelligatur scientia, qua certo a daemonibus obtineantur supernaturales effectus, vana est, et commentitia; ut enim demonstravimus, non potest daemon certo polliceri, nec praestare etiam illa, quae suam potentiam non excedunt; sed totum a voluntate Dei pendet. Et hoc sibi volunt Patres, cum Magiam dicunt esse ludum, et fallaciam, ut Tertullianus *Lib. de Anima cap. 57*. Quid ergo, inquit, dicimus magiam? quod omnes pene, fallaciam: cui consentiunt Cyprianus *Lib. de idol.*, Arnobius *Lib. I.*, aliique. Denique si per Magiam significetur notitia, et usus signorum, quae aliquando Deus permittit in poenam scelestorum hominum, effectum non carere, spargens poenales caecitates super illicitas cupiditates: profecto hanc magiam extare constat ex Scripturis, in quibus referuntur portenta, quae suis incantationibus edidere Magi Pharaonis, Pythonissa, aliique. Unde cum Scipio Maffejus lucubrationem quandam suam de Magia Ludovico Muratorio misisset; noluit vir doctissimus eam calculo suo probare, veritus, ut ipse ait in *Epist. ad Maffejum*, testimonia Scripturarum; adeo temerarium ei visum est magiam omnino negare.

### PROPOSITIO III.

*Sunt certi characteres, quibus vera miracula discernuntur a falsis.*

*Prob. I.* Cum Deus ad homines erudiendos in veritate religionis miraculis utatur, ut diximus *Lib. I. cap. 6.*, deest ejus sapientiam talibus characteribus ea insignire, ut a falsis dignosci possint; alioquin essent inutilia. Ergo.

*Prob. II.* Eorum signorum enumeratione. 1.<sup>o</sup> Si opus aliquod mirum contrarium sit naturae legibus, omnium saeculorum experientia comprobatis, id, quia vires Angelorum excedit, ut supra dictum est, Deo auctori attribuentum. Talis est *ex. 6.* mortuorum suscitatio, 2.<sup>o</sup> Item si opus sit ex iis, quae supra diximus cognitionem An-

Angelicam superare, qualis est arcanorum cordis scrutatio, et praedictio futurorum libere contingentium. 3.<sup>o</sup>

Si opus tale sit, quod etiam Angeli patrare possent per occultas naturae causas, tunc aestimari debet divinum, aut magicum ex fine, modo, et effectibus. Et

1.<sup>o</sup> quidem ex fine; si enim opus efficitur ad Dei cultum, et pietatem augendam, et destruendum peccatum, et diaboli regnum, tunc non a daemone, sed divinitus effectum censi debet. Ut enim docet Christus in

Evangelio, non potest satanas adversus satanam pugnare *Matt. II. Marc. III.* E contrario si finis operis sit malus, aut omnino inutilis, Deoque indignus, daemoni erittribuendum. *Nemo in spiritu Dei loquens, dicit anathema Jesu I.: Cor. XII. 3. Et Deuteron. XIII. 1:*

*Si surrexerit in medio tui propheta, aut qui somnium vidisse se dicat, et praedixerit signum, atque portentum, et evenerit quod locutus est, et dixerit tibi: eamus et sequamur Deos alienos, quos ignoras, et serviamus eis: non audies vocem prophetae illius, aut somniatoris, quia tentat vos Dominus. Deus vester, ut palam fiat utrum diligatis eum, an non, in toto corde, et in tota anima vestra.* 2.<sup>o</sup> Ex modo, nempe si fiat arcanis carminibus, aut signis quibusdam, verbisque superstitiosis, tunc opus daemonis censi debet: idemque esto judicium, si quis post multa utcumque mirabilia, quae effecit, promittat, aliquod se patraturum, et tamen conatibus suis neu respondeat eventus; Dei enim omnipotentiae ista non conveniunt: si vero per invocationem nominis Dei, aut Jesu Christi, sive per probatas ab Ecclesia preces, divinum erit. 3.<sup>o</sup> Ex effectibus; si enim effectus sit bonus, et permanens, a Deo est; si malus, aut cito evanescens, a daemone. Hi autem characteres in veris miraculis debent simul omnes inveniri: at si unus deficiat, falsum putari debet.

His igitur signis facile fuit dignoscere vera miracula Moysis a falsis Magorum Aegyptiorum praestigiis, horum enim falsitas se prodebat 1.<sup>o</sup> ex pravo fine; fiebant enim ad impediendum veri Dei cultum, et augendam injustitiam Aegyptiorum in Hebraeos: 2.<sup>o</sup> ex modo; tum quia facta sunt, ut ait sacer textus, *incantationibus*; tum quia Magi in tertio signo defecerunt, et conati

imitari reliqua, non potuerunt; 3.<sup>o</sup> ex effectibus; ex gr. quia virga Moysis devoravit virgas eorum. Facile etiam erit in fine saeculorum distinguere vera miracula Christi, et Apostolorum a falsis Antichristi prodigiis. Sed quia tunc multorum fides infirma erit, et frigescens charitas, ideo multi seducentur, praesertim cum prodigia magna futura sint.

## C A P. V.

*De variis Angelorum ordinibus.*

*Adv. I.* **N**ON est dubium, quin Deus innumerabilium illam caelestium spirituum civitatem miro, ac sapientissimo ordine disposuerit, cum haec infima, et visibilia, omnia in numero, pondere, et mensura fecerit. Sed de ordine illo ita disserendum nobis esse, recte monet Estius in *II. Dist. IX. §. 1.*; ut meminerimus, istorum cognitionem a sensibus, atque experientia mortalium remotissimam esse, ac proinde de iis non humanis rationibus pronuntiandum, sed tantum asserendum, quantum Scripturae sacrae, et majorum auctoritas hic nobis praeclucet. Nam et Patres hanc rem sobrie sibi attingendam putarunt.

*II.* Novem autem Angelorum ordines Scriptura, et constans Patrum fere omnium sententia recenset, Angelos, Archangelos, Virtutes, Potestates, Principatus, Dominationes, Thronos, Cherubim, Seraphim. Licet non omnes Patres hunc numerandi ordinem sequantur. Hinc Angelorum nomen, licet omnibus commune sit; ad designandum tamen peculiarem ordinem, cumque infimum, coarctatur. Utrum vero praeter eos alii etiam sint, dubium esse putat Chrysostomus *Hom. IV. de Incompr.* Non solum isti, inquit, sunt coetus in caelis, verum infinitae gentes, et nationes ineffabiles, quas nulla explicare potest oratio. Ei adstipulantur Theodoretus *Comment. in Epist. ad Ephes. cap. 1.*, Theophylactus, et Occumenius.

*III.* Hos novem ordines Dionysius, vulgo Areopagita, auctor VI. saeculi, in tres Hierarchias distinguit; ita ut unaquaeque Hierarchia tribus constet ordinibus. Est autem



autem Hierarchia sacer principatus, seu ordo quidam, in quo alii aliis praesunt ad ea munia obeunda, quae in Dei gloriam cedunt; sicut in Ecclesia etiam est Hierarchia ex Episcopis, presbyteris, et ministris, ad Dei cultum ordinata. *Dionysium* sequuntur *S. Thomas*, ceterique Scholastici in hac hierarchiarum caelestium partitione.

IV. Rursus idem *Dionysius* Angelicos omnes ordines in *Assistentes*, et *Ministrantes* dispescit, nixus eo loco *Danielis cap. VII. 10. Millia millium ministrabant ei, et decies millies centena millia assistebant ei*: quo ex loco etiam *Gregorius M. Lib. XVII. Moral. cap. 9.* nec non *S. Thomas*, aliique Scholastici, in eandem opinionem sunt adducti. Hinc docent, supremas Hierarchiae Angelos; scilicet *Thronos*, *Cherubim*, ac *Seraphim* semper Deo adstare, nec umquam ad exteriora adhiberi ministeria, nisi forte aliquando, ut nonnulli concedunt, extra ordinem. Alios vero mitti ad varia ministeria, superiores ad maiora, inferiores ad minora, pro sui quemque ordinis dignitate. Caeterum numquam inferiores Angelos Deum *apertis immediate* mittere, sed eos *illuminare* per superiores, ita ut Dei voluntas primo superioribus Angelis revelata, per eos mox inferioribus denuntiatur. Haec igitur omnia cujus sint ponderis, et certitudinis, est hoc loco investigandum.

## PROPOSITIO I.

*Esse aliquam inter Angelos ordinum distinctionem, fide tenendum est.*

*Prob.* Scripturae 1.<sup>o</sup> non solos Angelos commemorant, sed Archangelos, Thronos, Dominationes etc. Quod frustra esset, si omnes essent ejusdem ordinis. 2.<sup>o</sup> *Daniel. X. 13. Michael* dicitur *unus de principibus primis*: ubi autem primi principes sunt, ibi ordinem aliquem esse, necesse est. 3.<sup>o</sup> *Raphael Tob. XII. 15.* dicitur *unus ex septem, qui astant ante Dominum*: quod manifeste distinctionem aliquam, et electionem ostendit, Hinc *Augustinus Lib. ad Orosium cap. 11. Esse, inquit, Sedes, Dominationes, Principatus, Potestates in cae-*

caelestibus apparatibus, firmissime credo, et differre inter se aliquid, indubitata fide teneo. Ergo.

## PROPOSITIO II.

*Esse novem Angelorum ordines, quos supra nominavimus, certum, sed non fidei dogma est; non est tamen adeo certum, quo ordine inter se sint dispositi.*

*Prob. 1a. pars. I. Scriptura novem illos ordines diserte recenset. Nam Isaias cap. VI. 2. meminit Seraphim: Seraphim stabant super illud . . . et clamabant alter ad alterum. Moyses Gen. III. 24. et Ezechiel X. 3. nominant Cherubim: Cherubim stabant a dextris domus. Apostolus septem alios ordines recenset, nempe Rom. VIII. 38. Angelos, Principatus, et Virtutes: Certus sum quia neque Angeli, neque Principatus, neque Virtutes etc. I. ad Thessal. IV. 15. Archangelos: ad Coloss. I. 16. Thronos, Dominationes, et Potestates; et iterum ad Ephes. I. 21. nominat Principatus, et Potestates, Virtutes, et Dominationes. Ergo.*

*Prob. II. Patres eundem Angelicorum ordinum numerum constanter recensent: scilicet Ignatius in Epist. ad Trallianos, Irenaeus Lib. II. cap. 54., Augustinus Lib. cont. Priscillian. cap. 11., Dionysius de Caelesti Hierarch. cap. 6., Chrysostomus Hom. IV. in Genes., Damascenus Lib. II. de fide orth. cap. 3., Gregorius Hom. XXXIV. in Evang., Bernardus Lib. V. de Consid. cap. 4. et alibi, S. Thomas, et concursus omnium Theologorum doctrina, cui etiam accedit Ecclesiae auctoritas, quae in Officio omnium Sanctorum eundem recenset numerum, ita ut eum negare cum Beza Comment. in cap. 1. ad Ephes. valde temerarium sit.*

*Prob. 2a. pars. 1.º Gregorius, et Bernardus a Dionysio, et Damasceno dissident circa locum quem occupant Virtutes. Illi enim Virtutes tertio loco constituunt; isti vero quinto; utrique autem Apostoli enumeratione nituntur, qui Epistola ad Ephesios Virtutes nominat inter Potestates, et Dominationes; at in Epist. ad Colos. inter Dominationes, et Potestates ponit Principatus, ita ut non videatur ordinis habuisse*

220 *Theolog. Institut. Lib. V. Pars II. Cap. V.*  
rationem. 2.<sup>o</sup> Alii Patres alium videntur ordinem secuti, ut Hieronymus *cont. Ruffin. Lib. I.*, et Ecclesia Romana in Officio omnium Sanctorum. Ergo etc.

### *Solvuntur Objecta.*

*Objic. I. cont. 1m. part.* Nonnulli Patres pauciores enumerant Angelorum ordines. Methodius enim *apud Epiph. in haeresi Origenis*, et Hieronymus *Lib. II. cont. Jovinian.* septem tantum recensent: quatuor vero Ambrosius *Lib. I. de Fide*, et Cyrillus Hierosol. *Catechesi VI.* Ergo.

*¶. Dist. ant.* Recensent minorem numerum, non excludendo reliquos ordines, *conc.* Eos excludendo, *neg.* Cum ergo non esset propositum illis Patribus Angelicorum ordinum numerum recensere, sufficiebat aliquos enumerare, dum reliquos non negarent. Ita Apostolus non omnes ordines simul nominat; sed nunc tres, nunc quatuor: et Ecclesia in hymno *Ambrosiano*, et in *Praefationibus* Missarum, tribus aut quatuor ordinibus commemoratis, reliquos non negat; sed vel omittit, vel generali quadam locutione comprehendit. Hac igitur ratione Hieronymus, etsi septem ordines numerat *Lib. II. cont. Jovin.*; addit tamen verba Apostoli: *et omne nomen, quod nominatur non solum in hoc saeculo, sed etiam in futuro*: et scribens contra *Ruffinum* plures recenset; idem de reliquis debet esse iudicium.

*Objic. II.* cum *Beza. Principatus, Potestates, Dominationes, Troni*, aliaque nomina, quibus utitur Apostolus tum in Epistola *ad Ephesios*, tum in aliis Epistolis, commodè intelligi possunt de imperiis, regnisque terrenis, quae variis illis vocabulis appellari possunt. Temere ergo ex iis finguntur varii Angelorum ordines.

*¶. Neg. ant.* Contrarium enim constat non solum ex perpetua traditione Patrum, verum etiam ex ipso Apostoli scopo. In Epistola enim *ad Ephesios* ait, Christum super omnes creaturas fuisse elevatum ad dexteram Patris in caelestibus, super omnem *Principatum, Potestatem* etc. Quod nisi de caelestibus Spiritibus intelligatur, non satis explicasset, ad quantum sublimitatis gradum Christus ascenderit. Licet enim terrenis imperiis praclatus,

his, potuisset tamen putari adhuc inferior Angelis secundum naturam Angelica minorem.

*Objic. III.* Nomina *Principatum*, *Potestatum*, *Dominationum*, *Virtutum*, *Thronorum* originem habent a Persis, a quibus adhibebantur ad designandos Regni proceres, et Magistratus, ut constat ex *Daniele cap. V.* et *XL*; itemque ex *Libris Esther*, et *Esdrae*. Ergo non significat Angelicos ordines, vel dicendum est cum impuro Auctore Libelli, cui titulus *Philosophia Historiae*, Hebraeos a Chaldaeis mutuatos esse hanc de Angelis philosophiam in captivitate Babylonica; cum ante id tempus nulla eorum ordinum mentio occurrat in Hebraeorum libris:

*Res. Neg. cons.* Etenim nominibus rerum visibilium invisibilium nobis revelavit Deus, imbecillitati mentis nostrae se accommodans, sicut ad explicandam Dei scientiam, potentiam, etc. oculos, manus, brachia etc. ipsi Deus per metaphoram tribuit. Quod autem non ante Babylonica captivitate in Sacris litteris mentio occurrat omnium ordinum Angelorum, nullius momenti est. Revelatio enim non tota simul facta est Synagogae; sed nova, prout tempus postulabat, Prophetis revelata sunt.

### PROPOSITIO III.

*Quae de tribus Angelorum Hierarchiis, et de distinctione Angelorum in assistentes, et ministrantes traduntur a Dionysio, non omnino explorata, nec certa sunt.*

*Prob. 1a. pars.* Neque Scriptura, neque antiquiores Patres hujusmodi distributionis meminerunt. Atqui, ut principio monuimus; nihil certi de ordinibus Angelorum asseverare possumus, quod non habeat in Scripturis, aut Traditione fundamentum. Ergo etc.

*Prob. 2a. pars.* Ex Scripturis videtur verisimilius, omnes Angelos etiam superiorum ordinum esse ministrantes; licet superiores Angeli ad majora mittantur: quod ex ipso nomine Angeli, idest nuncii, quod omnibus commune est, consequi videtur. *Heb. I. 14.* Omnes

sunt administratorii spiritus, in ministerium missi propter eos, qui haereditatem capiunt salutis. Genes. III. 24. Cherub. missus est ad custodiendam viam ligni vitae. Isaïc. VI. 6. Seraphim ad Prophetam volavit, ignitoque calculo, quem foreipe tulerat de altari, labia ejus tetigit. Tob. XII. 15. Raphael Angelus unus ex septem, qui astant ante Dominum (quod inter ceteros Angelos praecellentiam notat singularem) missus est ad Tobiam. Dan. X. 13. Michael unus de Principibus primis missus est in adiutorium populo Israel: et Luc. I. et Dan. IX. Gabriel, quem non infimum Angelorum esse, singulare nomen ostendit, missus est ad nuncianda ea, quae ad incarnationem, nativitatem, et mortem Christi pertinebant. Denique ipse Gregorius M.; qui Lib. XVII. Moral. cap. 9. eam distinctionem secutus erat inter assistentes, et ministrantes Angelos, ingenue fatetur, id esse dubium Hom. XXXIV. Sed quia, inquit, in quibusdam Scripturae locis quaedam per Cherubim, quaedam vero per Seraphim agi didicimus, utrum per se haec faciant, an per subjecta agmina agantur... nos affirmare nolumus, quod apertis testimoniis non approbamus. Imo maxima pars Theologorum, qui ob auctoritatem Dionysii, et S. Thomae (quarum nos non contemnimus) eam distinctionem agnoscunt, omnes tamen, cujuscumque ordinis Angelos, saltem extraordinarie, mitti fatentur.

Dices. Dan. VII. Millia millium ministrabant ei, et decies millies centena millia assistebant ei. Ergo distinctio inter ministrantes, et assistentes Angelos suum habet in Scripturis fundamentum.

¶ Neg. cons. Non enim pugnant inter se ministrare, atque assistere; imo qui ministrant, assidue Domino astant, expectantes ejus mandata, et ad ea exequenda parati. Apposite Chrysostomus Hom. III. de Job. Omne, inquit, ministerium assistentia vocatur, et Athanasius Orat. III. cont. Arian. Infinita millia Deo assistunt ministrorum, qui parati sunt, ut nantantur. Unde ipsa Ecclesia in orationibus eosdem esse ministrantes, et assistentes declarat, dicens: a quibus tibi ministrantibus in caelo semper assistitur, ab his in terra vita nostra munictur.

PRO.

## PROPOSITIO IV.

*Quaenam sit inter Angelicos ordines ratio discriminis, valde obscurum est; non est tamen contemnenda Patrum doctrina, qui ex ipsis ordinum nominibus eorum differentiam depromunt.*

*Prob. 1a. pars 1.º ex Augustino, qui Lib. cont. Priscillian! ad Oros. cap. 11. sic habet; Esse itaque sedes, dominationes, principatus, potestates in caelestibus apparatibus, firmissime credo, et indubitata fide teneo. Sed quo me contemnas, quem magnum putas esse doctorem, quaenam ista sint, et quid inter se differant, nescio. 2.º Ex silentio Scripturae, et Traditionis.*

*Prob. 2a. pars ratione, et auctoritate Bernardi Lib. V. de Consid. cap. 4. Ad quid caelestium nomina innotuerunt, si ne opinari quidem, salva fide, aliquid liceat de rebus; quarum nomina sunt? Immerito igitur, et imperite haeretici hac in re Patrum doctrinam irridunt.*

*Quaeres I. Quodnam igitur est ex PP. inter eos ordinis discrimen?*

*¶ Angeli sunt, qui minora nunciant, ex Gregorio, vel ex Bernardo, qui singulis hominibus dati sunt custodes. Archangeli, ex eisdem Patribus, qui majora nunciant: ex aliis vero, qui non in singulos homines, sed in populos, et Regna praefecturam habent, qui et Dan. X. Principes Regnorum dicuntur. Virtutes sunt, secundum Gregorium pariter, et Bernardum, ii, per quos signa, et miracula patrantur: atque ita explicant quod ipse Dominus loquens Matth. XXIV. 29. de Signis, et prodigiis, quae diem extremum praecedent, ait: Virtutes caelorum commovebuntur. Potestates, ex eisdem duobus Auctoribus, sunt ii, per quos potestas Principis tenebrarum, furorque comprimitur, ne quantum vult, noccat. Principatus, quorum moderamine, et sapientia omnis in terris principatus constituitur, regitur, limitatur, transfertur, mutilatur, mutatur, ut inquit Bernardus. Dominationes, qui ceteris ita supereminent, ut ad illos veluti ad Dominos, aut duces omnia inferiorum offi-*

officia referantur. Troni, in quibus sedet Deus; hoc est per quos omnia in maiestate, et tranquillitate iudicant. Cherubim, qui cunctos scientia antecellunt, eamque inferioribus per illuminationem tradunt. Denique Seraphim, in quibus maxime divina charitas exardescit. Sed meminerimus, has esse conjecturas.

*Quaeres II. Utrum in unòquoque ordine omnes Angeli pares inter se sint?*

*R.* Verisimilius videtur, in singulis etiam ordinibus, improprie inter se esse Angelos, ita ut mirabili quodam ordine ab infimo ad supremum ejusdem ordinis Angelum, majorem gradatim perfectionem indiderit Deus, ita ut supremus inferioris ordinis ad infimum superioris ordinis Angelum prope accedat. Ita docet post Magistrum sententiarum *S. Thomas*; tum quia etiam in rebus visibilibus hunc perfectionum gradatim crescentium ordinem observamus; tum quia alioquin non inveniretur inter omnes Angelos aliquis primus.

*Quaeres III. Quinam inter omnes Angelos Primus est?*

*R.* Communis est Patrum sententia, Luciferum, qui postea cecidit, fuisse inter omnes Angelos excellentissimum. Ita enim docent *Tertullianus Lib. II. cont. Marc.*, *Origenes Hom. IX. in Matth.*, *Hieronymus Comment. in Dan.*, *Gregorius M.*, *Chrysostomus*, *Augustinus*, *Isidorus*, *Bernardus*. Nam ut ipsi sentiunt, *Job. XI.* sub figura Behemot de Lucifero dicitur: Ipse est principium viarum Dei; hoc est inter ejus opera perfectissimum. Et *Ezech. XXXI.* sub figura Regis Assur de eodem dicitur: Cedri non fuerunt altiores illo in Paradiso Dei... Omne lignum Paradisi Dei non est assimilatum illi, et pulchritudini ejus.

Ea autem e caelis ob peccatum detruso Michaellem esse omnium Angelorum primum, ex Scripturis verisimilius est. Nam *Apocal. XII. 7.* Michael, et Angeli ejus praeliabantur cum Dragone (h. e. Lucifero); et draco pugnabat, et Angeli ejus, et non valuerunt, neque locus inventus est eorum, amplius in caelo. Ex quo sequitur, Michaellem omnium Angelorum veluti imperatorem videri: non solum quia alii dicuntur Angeli ejus; verum etiam quia verisimile non est; in arcana illa, et spiritali pugna inferiorem quemdam Angelum

lum pro gloria Dei certasse, dum supremi inertes eventus spectatores torpescerent. Nec quemquam moveat, Michaellem *Archangelum* dici, ex quo nonnulli post Dionysium *De Caelesti Hierarch. cap. 9*: putarunt, eum esse ex secundo ordine ifimae Hierarchiae; potuit enim hoc nomen sortiri non ex ordine, quasi unus ex Arcangelis; sed per excellentiam, quasi Angelorum omnium princeps. Vide Estium in *II. Dist. X. §. 5. et 6.*

*Quaeres IV. Haec. ordinum distinctio oritur ne a variis perfectionibus Angelorum naturalibus, an vero a donis supernaturalibus, aut officiis, ad quae missi sunt?*

*W.* A perfectionibus naturalibus; ideoque in Angelis, qui ceciderunt, ordinum distinctio remansit, ut dicemus inferius. Sed quia gratia naturam perficit, hinc Angelis superiorum ordinum majora gratiae dona largitus est Deus, majorisque momenti munia imponit; non quod natura ad gratiam disponat; sed quia ita Deo pro sua sapientia placuit. Ita docent Basilius *Lib. de Spiritu S. cap. 15.*, Damascenus *Lib. II. fid. Outh. cap. 3.*

## C A P. VI.

*De fine, ad quem Angeli, et omnes rationales creaturae sunt a Deo ordinatae, eorumque donis supernaturalibus.*

*Adv. I.* CERTUM est, Deum, qui *universa propter semetipsum operatus est*; *Prov XVI. 4.* non potuisse creaturam rationalem intelligentia, et voluntate praeditam condere, nisi ut ipsum cognosceret, et amaret.

*II.* Cum autem cognitio Dei possit esse duplex; vel in effectibus, sive in creaturis; vel clara, atque beata (a), ut *Lib. III.* diximus; in confesso est apud omnes Theologos, Deum creaturam rationalem ordinasse ad seipsum clare, ut in se est, videndum, et beato

Tom. II.

P

amo-

---

(a) Schol. Vel *abstractiva*, vel *intuitiva*.



amore persequendum; *Fecisti nos Domine ad te*, et inquietum est cor nostrum, donec requiescat in te, ut inquit Augustinus *Lib. I. Confess. cap. I.*

III. Porro catholici omnes fatentur, eum finem, sive beatitudinem esse creaturae rationali supernaturalem quoad media, quibus obtinetur, nosque id ostendimus *Lib. III. cap. 9. §. 2.* Sed controversia est in Scholis 1.<sup>o</sup> utrum finis ille, seu beatitudo sit quoad appetitum naturalis: 2.<sup>o</sup> utrum Deus a primo creationis momento Angelos beatitudine illa donaverit: 3.<sup>o</sup> utrum eis supernaturalia dona sit largitus, quibus ad eam pervenire possent: 4.<sup>o</sup> cujusmodi illa dona fuerint: 5.<sup>o</sup> denique utrum potuerit Deus rationales creaturas condere in puris naturalibus, hoc est ad finem aliquem naturalem, et sine alio supernaturali dono.

IV. Jam circa primam quaestionem Scotus in *IV. Dist. XLIX. q. 9. et 1.<sup>a</sup>*, et post eum Scotistae universi cum Mastro in *I. Disp. VI. q. 2.*, Durandus, Paludanus, Dominicus Soto, Ferrariensis, Bellelli, Berti, plurimique Augustinenses putant, beatam Dei visionem esse naturalem creaturae rationalis finem quoad appetitum: ejusdemque sententiae S. Thomas fuisse videtur apertissime. Contra Vasquez, Suarez, aliique non pauci volunt, esse omnino supernaturalem.

V. Quod pertinet ad quaestionem alteram, Theologi omnes, excepto Halensi, Ariminensi, paucisque aliis, consentiunt, Angelos initio suae creationis Deum in seipso non vidisse.

VI. In tertia vero quaestione Hugo Victorinus *Lib. I. de Sacram. P. V. cap. 18.*, Magister sententiarum *Lib. II. Dist. 3. et 4.*, Rupertus *Lib. XIII. in Matt.* negant, Angelos (idem dicas de homine) in primo creationis momento accepisse ullum supernaturale Dei donum; licet fateantur, donatos postea fuisse gratia vel omnes, vel saltem eos, qui ad beatam vitam pervenerunt. Eos sequuntur multi veterum Scholasticorum; ita ut, teste S. Thoma in *II. Dist. IV. Q. 2. art. 3.*, haec sententia fuerit sua actate communior. Contraria tamen doctrina Scripturae, et Patribus congruentior plerisque arrisit, imprimis ipsi S. Thomae *I. P. Q. LXII. art. 3.*, ita ut hodie communis sit inter Theologos.

VII. At in quaestione quarta Thomistae putant, non omnes Angelos pari auxilio adiutos esse divinitus; sed eos, qui steterunt, efficaci adjutorio praemotos ad bonum; reliquos, ut et primos homines ante lapsum, *sufficienti* tantum, et quo possent salvi esse, sed sine dubio caderent; ut revera ceciderunt. At alii Theologi tenent, omnes Angelos, primosque hominum parentes, a Deo adjutes auxilio quodam *versatili*; h. e. sine quo non potuissent in bono perseverare, non quo certo fieret, ut perseverarent; ideoque alios quidem stetisse, alios cecidisse. Sed postrema controversia, quae de *natura pura* saeculo superiori fuit acerrima, tractabitur inferius *Part. VI.*, ubi de hominis creatione disseremus.

VIII. Quoniam autem nonnulla, quae hic dicturi sumus pendent ab iis, quae in tractatu de Gratia explicantur uberius, supponimus hic, gratiam sanctificatam, seu habitualementem, esse supernaturalem, ac permanens Dei donum, quo creatura rationalis Deo grata fit, et amica; actuali vero gratiam esse supernaturalem, ac transeuntem Dei actionem in creaturam ipsam, qua illustratur ejus intellectus, et voluntas movetur. Nec omnia breviter expendemus.

## PROPOSITIO I.

*Nulla censura notanda est, imo verisimiliter defendi potest Scoti, Berti, aliorumque Theologorum sententia, qui docent, visionem Dei beatam esse creaturae rationalis finem naturalem quoad appetitum, supernaturalem quoad media.*

*Prob. 1.ª pars.* ex tot Theologis catholicis, Romanacque Ecclesiae addictissimis, qui eam doctrinam innoxie defendunt. Vide *Jatium Caesarem Recupitum* ex Societate Jesu, qui *Lib. VI. de Verit. Q. I. cap. 3.* eandem sententiam proluxa Disseratione defendit et ab omni censura liberat.

*Prob. 2.ª pars. I. ex Augustino*, qui contra Pelagianos, ex eo quod mens humana (idem dicas de Angelis) est natura sua imago Dei, constanter affirmat, non posse eam privari vita aeterna, siye Dei visione, ad

228 *Theologicarum Institut. Lib. V. Pars. II. Cap. VI.*  
 quam innato pondere ictur, si nullum habeat peccatum  
*Quaero, qua casa innocens imago Dei vitae privatione*  
*puniatur, si nullum peccatum ex humana generatione*  
*contrahitur?* inquit, *Lib. I. cont. Julian. cap. 5.*  
 Quod et saepissime repetit (a). vide *M. Bellelli*, qui  
 luculenter rem demonstrat in *Lib. cui titulus: Mens.*  
*Augustini.*

*Prob. II. auctoritate simul, et rationibus D. Thomae*  
*Lib. III. cont. Gent. cap. 5.º*, cujus textus integer  
 recitandus est, qui, si erit prolixior, cum rei dignitate  
 comparetur; ita brevior fortasse videbitur (b).  
*Non potest, inquit, esse, quod in tali cognitione (naturali)*  
*quiescat naturale desiderium animae separatae*  
*(idem dicas de Angelis). 1.º Omne enim, quod est*  
*imperfectum in aliqua specie, desiderat consequi perfectionem*  
*illius speciei. Qui enim habet opinionem de re aliqua,*  
*quae imperfecta illius rei est notitia, ex hoc ipso incitatur*  
*ad desiderandum illius rei scientiam. Praedicta autem*  
*cognitio, quam substantiae separatae habent de Deo,*  
*non cognoscentes illius substantiam, est imperfecta*  
*cognitionis species; non enim arbitramur, nos aliquid*  
*cognoscere; si ejus substantiam non cognoscamus unde et*  
*praecipuum in cognitione alicujus rei est scire de ea quid est.*  
*Ex hac igitur cognitione, quam habent substantiae*  
*separatae de Deo, non quiescit naturale desiderium,*  
*sed incitatur magis ad divinam substantiam videndam.*

2.º *Item. Ex cognitione effectuum incitatur desiderium*  
*ad cognoscendam causam, unde et homines philosophari inoeperunt,*  
*causas rerum inquirentes. Non quiescit igitur sciendi*  
*desiderium, naturaliter omnibus substantiis intellectualibus*  
*inditum, nisi, cognititis substantiis effectuum, etiam*  
*substantiam causae cognoscant. Per hoc igitur, quod*  
*substantiae separatae cognoscunt omnium rerum,*  
 qua-

---

(a) *Lib. V. cap. 11. & 11. Op. imperf. uu. 30., Lib. 11. De pecc. merit. cap. 30 et alibi saepe.*

(a) S. Praeceptorum videbitur, poterit una ex his S. Thomae rationibus esse contentus, reliquis praetermissis.

quarum substantias vident, esse Deum causam, non quiescit naturale desiderium in ipsis, nisi etiam ipsius Dei substantiam videant.

3.<sup>o</sup> *Adhuc.* Videmus quod videntes naturaliter quia est aliquid, scire desiderant quid est ipsum. Non igitur quietatur naturale sciendi desiderium in cognitione Dei, qua scitur de ipso solum quia est.

4.<sup>o</sup> *Amplius.* Nihil finitum, desiderium intellectus quietare potest; quod exinde ostenditur, quod intellectus, quolibet finito dato, aliquid ultra molitur apprehendere; unde qualibet linea finita data, aliquam majorem molitur apprehendere, et similiter in numeris, et haec est ratio infinitae additionis in numeris, et lineis mathematicis. Altitudo autem, et virtus est finita cujuslibet substantiae creatae. Non igitur intellectus substantiae separatae quiescit per hoc, quod cognoscit substantias creatas, quantumcumque eminentes; sed adhuc naturali desiderio tendit ad intelligendam substantiam, quae est altitudinis infinitae, ut in primo Libro ostensum est de substantia divina.

5.<sup>o</sup> *Praeterea.* Sicut naturale desiderium inest omnibus intellectualibus naturis ad sciendum; ita inest eis naturale desiderium ignorantiam, seu nescientiam pellendi. Substantiae autem separatae, sicut jam dictum est cap. praec., cognoscunt praedicto cognitionis modo, substantiam Dei esse supra se, et supra omne id, quod ab eis intelligitur, et per consequens sciunt, divinam substantiam sibi esse ignotam. Tendit igitur naturale ipsarum desiderium ad intelligendam divinam substantiam.

6.<sup>o</sup> *Item.* Quanto aliquid est fini propinquius, eo majori desiderio tendit ad finem. . . . Intellectus autem substantiarum separatarum propinquiore sunt divinae cognitioni, quam noster intellectus. Intensius igitur desiderant Dei cognitionem, quam nos. Nos autem quantumcumque sciamus, Deum esse, et alia, quae supra dicta sunt, non quiescimus desiderio; sed adhuc desideramus Deum per essentiam suam cognoscere. Multo igitur magis substantiae separatae hoc naturaliter desiderant. Non igitur in cognitione Dei praedicta eorum desiderium quietatur.

*Cum autem* (pergit cap. 51.) *impossibile sit, naturale desiderium esse inane: quod quidem esset, si non esset possibile pervenire ad divinam substantiam Dei intelligendam, quod naturaliter omnes mentes desiderant; necesse est dicere, quod possibile est substantiam Dei videri per intellectum, et a substantiis separatis intellectualibus, et animabus nostris. Eandem doctrinam non retractavit, sed confirmavit. S. Thom. in Summa I. P. Q. XII. art. 1. in corp., et 1. 2. Q. III. art. 8. ut mirum sit, Thomistas eum in contrariam partem invitum trahere voluisse, ut videre est ap. Gonet Dist. I. de Visione Dei art. 5.*

### *Solvuntur Objecta.*

*Objic. I.* Si visio Dei, ut in se est, naturalis finis esset creaturae rationalis, posset haec naturalibus viribus ad eam pervenire. Deus enim omnes creaturas instruxit viribus, quibus naturalem finem suum assequi possent. Falsum consequens, ut *Lib. III. cap. 9. §. 2.* demonstratum est. Ergo.

*¶ Neg. min. Non enim est,* inquit Bellarminus *Lib. de Grat. prim. hom. cap. 7., aut novum, aut hominis natura* (idem dicas de quacunque creatura rationali) *indignum, ut naturaliter appetat, quod nonnisi supernaturali auxilio consequi valeat. Non est, inquam, novum; siquidem animae hominum solutae corporibus naturalem habent ordinem, et propensionem ad corpora, quorum formae fuerunt: nec tamen iterum conjungi corporibus, sine supernaturali auxilio poterunt. Non est autem natura humana indignum, sed contra potius ad maximam ejus pertinet dignitatem, quod ad sublimiorem finem condita sit, quam ut eum solis naturae viribus attingere possit. Idem respondet Dom. Soto, alique Theologi. Unde ex eo, quod visio Dei naturalis finis est creaturae rationalis, non aliud sequitur, nisi Deum non denegare auxilium, sine quo ad eum finem perveniri non possit: sicut reuera non denegavit, ut infra dicemus. Quod autem auxilium illud naturale sit, aut supernaturale, nihil refert.*

*Objic. II.* Infidelis, praesertim si nihil de Evangelio

audivit, de visione Dei ne cogitat quidem, tantum abest, ut eam optet. Ergo non est hic finis, aut hoc desiderium rationali creaturae naturale; sed ab ipsa creatura elicitum, prae lucente fide.

R. *Dist. ant.* Non cogitat, neque optat *explicite, transeunt. Implicite, neg.* Desiderans enim beatitudinem, et in nullo alio bono conquiescens, *implicite* visionem Dei optat, quae sola ejus desiderium explere potest. Dixi *transeat*; quia etiam infidelis hic, videns mirabilia naturae, eorum auctorem cognoscere desiderat.

*Objic. III.* Haec propositio damnata est a SS. Pontificibus *Pio. V. et Gregorio XIII.* in *Baji* operibus, ex quibus haec propositio *num. XXVII.* damnata est: *Humanae naturae exaltatio, et sublimatio in consortium divinae naturae debita fuit integritati primae conditionis; ac proinde naturalis dicenda est, non supernaturalis.* Ergo.

R. *Neg. ant.* Tum quia tot Theologi Catholici nostram thesim post illos Pontifices tenuerunt, et tenent; tum quia inspicienti damnatae propositionis verba, et aliarum, quae cum illa connexae sunt, satis patet, eam toto caelo a nostra differre. Significat enim, visionem Dei esse finem naturalem rationalis creaturae et quoad appetitum, et quoad media: quod postremum nos refutavimus. Vide Laurentium Berti *Dissertat. II. Apolog.* cap. 1. §. 6. ut *Lib. XII. in Append.*

## PROPOSITIO II.

*Angeli non fuerunt ab initio suae creationis perfecte beati, seu non viderunt Dei naturam, ut in se est. Fuerunt tamen imperfecte beati, quantum eorum statui congruebat.*

*Prob. 1. a pars.* Ex Angelis nonnulli, ut infra dicemus, ceciderunt, alii steterunt. Atqui neutri ab initio potiti sunt visione Dei, et perfecta beatitudine. Non quidem ii, qui postea ceciderunt; quia perfecta beatitudo conjunctam habet *ἀναμαρτυρίαν*, sive *impeccatam*, et certitudinem non fallacem perpetuae durationis. Sed nec ii, qui steterunt. Nam constans est. Patrum, et

233 *Theologicarum Institutionum Lib. V. Pars. II. Cap. VI.*  
omnium Theologorum doctrina, vitam aeternam fuisse  
iis propositam, ut praemium per merita comparandum.  
Sufficiat pro omnibus Augustinus *Lib. de Corrept. et*  
*Grat. cap. 10.* Erat, inquit, quod eorum adderetur  
beatitudini, si per liberum arbitrium in veritate stetis-  
sent, donec istam summae beatitudinis plenitudinem tam-  
quam praemium ipsius permansionis acciperent. Ergo.

*Prob. 2a. pars.* Imperfecta beatitudo vel est naturalis,  
sita scilicet in ea perfectione, quam creatura rationalis  
virtute suae naturae assequi potest; vel supernaturalis,  
quae oritur ex corde puro, et conscientia bona; qui  
enim his donis praediti sunt, beati dicuntur in Scriptu-  
ris; licet adhuc sint in corpore mortis hujus, multisque  
premanantur calamitatibus. Atqui Angeli omnes utramque  
beatitudinem ab initio habuerunt. Primo enim habuerunt  
naturalem; Deus quippe, cujus perfecta sunt opera, om-  
nem perfectionem iis ab initio indidit, cujus eorum na-  
tura capax erat. Deinde habuerunt etiam supernaturalem,  
quae in charitate sita est, ut dicemus in sequenti *Prop.*  
et docet Augustinus *loc. cit. Diabolus, et Angeli ejus*  
*beati erant, antequam caderent.* Plenam beatitudinem  
non habebant; sed quia nesciebant suam futuram mise-  
riam, minore quidem, sed tamen beatitudine sine ullo  
vicio fruebantur. Ergo.

### PROPOSITIO III.

*Angeli omnes in gratia sanctificante conditi sunt*

*Prob. I. Ezech. XXVIII. 12.* Sub figura Regis Tyrri  
(ex communi Patrum interpretatione) de ipso Diabolo  
dicitur: *Tu signaculum similitudinis, plenus sapientia,*  
*et perfectus decore. In deliciis paradisi Dei fuisti. . .*  
*Tu Cherub extensus, et protegens, et posui te in mon-*  
*te sancto Dei. . . . Perfectus in viis tuis a die*  
*conditionis tuae, donec inventa est iniquitas in te. Et*  
*Joan. VIII. 44.* de eodem dicitur, quod in veritate  
non stetit; hoc est in accepta justitia non perseveravit.  
Ergo idem dicendum est de omnibus Angelis.

*Prob. II. ex PP. Augustinus Lib. XI. de Civ. cap.*  
*11.* Simul, inquit, ut facti sunt, tua facti sunt, non tamen  
ita



*ita tantum creati, ut quoquo modo essent, et quoquo modo viverent, sed etiam illuminati, ut sapienter, beateque viverent.* Et *Lib. XII. cap. 9.* *Istam bonam voluntatem in iis quis fecerat, nisi ille qui eos cum bona voluntate, idest cum amore casto, quo illi adhaerent, creavit, simul in eis et condens naturam, et largiens gratiam?* Idem repetit *Lib. de Corrept. et Grat. cap. 10.* In eandem sententiam loquuntur Basilius in *Psal. XXIII.*, Cyrillus *Lib. VI. in Joan cap. 6.* Idque probatur etiam ratione. Si enim Angeli sunt ad finem aeternae beatitudinis ordinati, profecto simul ac condita eorum est natura, non caruerunt gratia, sine qua beatitudinem illam promereri non poterant. Unde Catechismus Rom. *Perspicuum est, inquit, diabolum, reliquosque desertores Angelos, ab ortu sui initio gratia praeditos esse.*

### Solvuntur Objecta.

*Objic. I. Augustinus Lib. II. de Gen. ad lit. cap. 1.* ait, naturam Angelicam primo creatam esse informem, eamque intelligi per caelum primo creatum; postea vero esse formatam, et appellatam *lucem*. Ergo prius condita est natura; deinde superaddita gratia.

¶ *Dist. ant.* Ait, naturam Angelicam primo creatam esse *informem* ratione gloriae, et beatitudinis perfectae, *conc.* Ratione gratiae, *subd.* Prius ordine, sive natura, *conc.* Tempore, *neg.* Nam ex Augustino Angeli *simul ut facti sunt, lux facti sunt.* Sed quia gratia existentem supponit naturam, cui superadditur; idcirco ait Angelos primo informes, deinde luce superfusos.

*Objic. II. Gregorius M. Lib. XXXII. Moral. cap. 18.* *Primus, inquit Angelus capax charitatis est conditus, qua si repleti voluisset, potuisset.* Ergo non est conditus in charitate.

¶ *Neg. cons.* Loquitur enim Gregorius de charitate perfecta, et consummata per gloriam, qua *si repleti voluisset, potuisset.* Hujus consummatae charitatis capax conditus est Angelus.



## PROPOSITIO IV.

*Praeter gratiam sanctificantem, dedit Deus Angelis  
actuale auxilium gratiae, ut possent in accepta  
justitia perseverare.*

*Prob.* Angelica natura, ut ait Augustinus *Lib. de Cor. et Gr. cap. 11.*, non talis effecta erat, ut sine adjutorio Creatoris posset in accepta justitia permanere. Nam ut in ea permaneret, debebat primo momento, quo libere operari coepit, ad Deum converti, h. e. actum charitatis erga Deum elicere; alioquin peccasset, et creaturis adhaesisset. Charitas autem non nisi ex Deo est; ita ut si hoc adjutorium vel Angelo; vel homini cum primum facti sunt, defuisset, non utique sua culpa cecidissent ut ibidem Augustinus observat. Atqui Deus pro sua sapientia nulli creaturae id denegavit, sine quo permanere non poterat, et ad finem suum pervenire. Ergo nec Angelis denegavit actuale auxilium gratiae.

*Dices.* Charitas habitualis, qua Angeli fuerant donati, sufficiebat, ut actus charitatis elicerent; omnis enim habitus inclinatur ad actus sui generis. Ergo.

*R. Neg. ant.* Sicut oculus corporis, quamvis plenissime sanus, nisi candore lucis adjutus, non potest cernere, ita homo (et idem dicas de Angelo) quamvis perfectissime justificatus, nisi divinitus adjuvetur, recte non potest vivere, ut ait Augustinus *Lib. de Nat. et Gr. cap. 26.* Sed de hoc in Tractatu de Gratia erit uberius dicendi, locus.

## PROPOSITIO V.

*Hoc adjutorium non tale erat, ut certo moveret Angelorum voluntates; sed versatile, id est tale, ut sine eo non possent permanere; sed cum eo vel permanerent in justitia, vel caderent: sicut revera nonnulli ceciderunt, alii steterunt.*

*Prob. I. ex Augustino, cujus tanta est in rebus ad gratiam pertinentibus auctoritas, ut Romani Pontifices asseruerint, in ejus libris Ecclesiae Romanae doctrinam contineri, ut in tractatu de Gratia fusiùs dicemus. In Libro enim de Corrept. et Grät. cap. 12. duplex distinguit Dei adjutorium, unum sine quo, aliud quo. Ipsa adjutoria distinguenda sunt. Aliud est adjutorium, sine quo aliquid non fit; et aliud est adjutorium, quo aliquid fit. Nani sine alimentis non possumus vivere: nec tamen, cum adfuertint alimenta, eis fit, ut vivat qui mori voluerit. Ergo adjutorium alimentorum est sine quo non fit; non quo fit, ut vivamus. At vero beatitudo, quam non habet homo, cum data fuerit, continuo fit beatus. Adjutorium est enim non solum sine quo non fit, verum etiã quo fit, propter quod datur. Deinde docet, Angelis, et primò homini ante lapsum dedisse Deum, non adjutorium quo, sed adjutorium sine quo; ita ut per liberum arbitrium, hoc adjutorio instructum, possent permanere in accepta justitia, si vellent; possent et cadere: sicut revera alii permaserunt, alii ceciderunt: nec gratia determinaret. liberum arbitrium; sed liberum arbitrium uteretur gratia. Tunc ergo dederat homini Deus bonam voluntatem; in illa quippe eum fecerat, qui fecerat rectum. Dederat et adjutorium sine quo in ea non posset permanere, si vellet; ut autem vellet, in ejus libero reliquit arbitrio. . . . Sed quia noluit permanere, profecto ejus culpa est; cujus meritum fuisset, si permanere voluisset; sicut fecerant Angeli sancti, qui, cadentibus aliis per liberum arbitrium, per idem liberum arbitrium steterunt ipsi. Et cap. 1.<sup>o</sup> Credimus, Deum sic ordinasse Angelorum, et*

226 *Theologicarum Instit. Lib. V. Pars. II. Cap. VI.*  
*et hominum vitam; ut in ea prius ostenderet quid pos-*  
*set eorum liberum arbitrium: deinde quid posset suae*  
*gratiae beneficium, iustitiaeque iudicium. Nihil videtur*  
*clarius.*

*Prob. II.* Creatura rationalis in iis, quae naturalem ordinem non excedunt, non indiget *physica Dei praemotione*, ut supra ostendimus *Part. I. cap. 6.*; sed satis ei est, si Deus illam per naturalem adjuvet *simultaneum concursum*. Ergo per gratiam habitualement ad supernaturalem ordinem euecta, atque adiutorio actuali, quasi quadam potentia supernaturali instructa, non indiget, nisi *supernaturali Dei concursu*; ut *supernaturale bonum* operetur; nisi adsit contraria, ac rebellis cupiditas, tamquam naturae corruptae vitium, quae potentiori auxilio vincenda sit, ut suo loco explicabimus. Haec autem contraria cupiditas non erat in Angelis. Ergo etc.

*Objecta refutantur.*

*Obijc. I.* Absurdum est, Angelos, qui in veritate steterunt, potuisse gloriari adversus eos, qui ceciderunt. Quod enim ait Apostolus *I. Cor. IV. 7.* *Quis te discernit? quid autem habes quod non accepisti? si autem accepisti, quid gloriaris quasi non acceperis?* ad omnem creaturae statum extendendum est; ita ut *qui gloriatur, in Domino gloriatur*. Atqui si Angeli boni per liberum arbitrium bene usi essent versatili auxilio Dei, quo mali uti noverunt, potuissent adversus eos in seipsis, et non in Domino gloriari. Cum enim doceret *Pelagius*, Deum dedisse homini *posse bene agere*, ipsum vero *bene agere* pendere ex libero hominis arbitrio; Augustinus eum constanter refutat, eo quod si ita esset, posset homo in se, et non in Domino gloriari contra praeceptum Apostoli: imo melius esset quod homo haberet ex se, puta bene agere; quam quod haberat a Domino, posse scilicet bene agere: quod et nos in *Lib. VII. Tract. de Gratia* fusius dicturi sumus. Ergo a pari etc.

*¶. Neg. min. et parit.* Angeli enim a Domino acceperunt non solum *posse bene agere* per auxilium ver-

satile et liberum arbitrium; sed etiam voluntatem rectam, nulla rebellis concupiscentiae pugna turbatam; et habitualem gratiam, qua delectabantur in bono. Uten-tes ergo versatili gratia, quid habebant in se, quod non a Domino acceperant, et de quo in seipsis, et non in Domino gloriarentur? Numquid enim homo qui per naturales edendi facultates utitur cibo delectabili, quo alius uti non vult, ut fame se interimat, potest adversus illum in se, et non in Domino gloriari? At contra in praesenti hominum statu, de quo Augustinus contra Pelagium disputabat, *militia est vita hominis, Job. VII. 1. Alia lex est in membris nostris, repugnas legi mentis Rom. VII. 23.* Non adest boni, sed mali delectatio, atque cupiditas; ita ut ad bene agendum pugnandum sit adversus hostem validissimum, qui intra ipsius animae munitiones versatur, et omnibus inferioribus facultatibus jam est potitus. Hunc hostem qui per liberum arbitrium vicerit, gloriari utique poterit adversus eum, qui cum eodem libero arbitrio ceciderit. Diligenter hanc dissimilitudinem notat Augustinus *cit. Lib. de Corr. et grat.*

*Objic. II.* Idem Augustinus *Lib. XII. de Civ. cap. 9.* de Angelis ita loquitur: *Aut minorem acceperunt amoris divini gratiam (Angeli mali) quam illi qui in eadem perstiterunt; aut si utrique boni aequaliter creati sunt, illis mala voluntate cadentibus, illi amplius adjuti, ad eam beatitudinis plenitudinem, unde se nunquam casuros certissimi fierent, pervenerunt.* Ergo non ex libero arbitrio, et gratia versatili Angeli boni a malis discreti sunt, sed ex ampliori adjutorio, ac proinde ex efficaci motione gratiae.

*¶ Neg. cons.* Etenim nisi dicere velimus, apt Augustinum sibi ipsum contradixisse, quod est tanto Doctori injuriosum, aut in *Libro de Corr. et Gr.*, quem senior scripsit, retractasse quod in *cit. Lib. XII. de Civ.* dixerat; 1.<sup>o</sup> aequum non est, nec sanioris criticae regulis consentaneum, ex uno loco obscuriori, ubi auctor non ex professo, et dubitanter disserit, qualis est hic locus in objectione positus, tenebras offundere verbis meridiana luce clarioribus, ubi rem ex proposito, et copiosissime pertractat, ut facit Augustinus in *Lib. de Corr.*

238 *Theologicarum Institut. Lib. V. Pars. II. Cap. VI.*  
*et Grät. 2.º* Non quaerit ibi Augustinus, quomodo ex Angelis alii ceciderunt, alii steterunt, sed quomodo alii de sua beatitudine aeterna jam certi sint; alii vero, antequam caderent, sui casus praescii non fuerint, nec certi de suae beatitudinis duratione. 3.º Non ait Augustinus, Angelos bonos amplius adjutos perseverasse; sed amplius adjutos pervenisse ad plenissimam beatitudinem, unde certissimi fierent, se numquam casuros. Amplius igitur illud adjutorium ipsum est lumen gloriae, ut praemium perseverantiae datum, quo Angeli facti sunt plenissime beati, et de hujus beatitudinis aeterna duratione certissimi. Nam etsi beati erant; erat tamen quod eorum adderetur beatitudini, si per liberum arbitrium in veritate stetissent, donec istam summae beatitudinis plenitudinem, tamquam praemium ipsius permansionis acciperent, idest ut magna per Spiritum Sanctum data abundantia charitatis, cadere ulterius omnino non possent, et hoc de se certissime scirent: verba sunt ejusdem Augustini. Quod clariùs explicaverat *Lib. XI. de Civ. cap. 13.*, ad quem remittit lectorem loco in objectione laudato. Ait enim ibi: si pares fuerunt Angeli mali, et boni, post illorum ruinam, illis certa scientia suae felicitatis accessit. At patet, in ipsa malorum ruina bonos Angelos perseverasse. Igitur post perseverantiam uberiori lumine perfusi sunt. Adde quod si amplius adjutorium datum sit Angelis bonis ad perseverandum, gratis supponitur a Thomistis, illud fuisse absolute efficax, ac determinans voluntatem.

*Inst.* Augustini Discipuli Prosper, Fulgentius, S. Thomas adjutorium Angelis datum efficax fuisse docent Prosper quidem *Lib. Sentent. ex August. Collect. Sent. LXIII.* Divina, inquit, voluntas est prima, et suprema causa omnium corporalium, spiritualiumque motionum. Fulgentius *Lib. II. ad Trasimund. cap. 2.* Non alia stantem Angelum a ruina potuit custodire, nisi illa, quae lapsum hominum, et ruinam potuit reparare. Una est in utroque gratia operata, in hoc ut surgeret, in illo ne caderet. S. Thomas vero 1.º 2.º *Q. CIX. art. 2.* Homo in utroque statu indiget auxilio divino, ut ab ipso moveantur; ac proinde si homo in statu innocentiae

*siæ indiget hoc auxilio movente, eo etiam Angelus opus habuit.*

*¶ Neg. ant.* Laudati enim Patres ne verbo quidem tenus Dei motionem, et gratiam dicunt fuisse in Angelis, et homine innocente absolute efficacem. Fatemur ergo cum *Prospero*, et *S. Thoma*, divinam voluntatem esse primam causam omnium spiritualium motionum, et in utroque statu hominem divina motione opus habuisse; sed negamus, Deum eodem modo movere creaturam innocentem, et sanam (cui dederat liberrimam, et expeditissimam bene agendi, adjuvante gratia, potestatem) ac infirmam, imo et mortuam. *Fulgentius* quidem ait, eadem gratia stetisse Angelos, et reparatos homines, quod ultro damus; sed non ait, eam, gratiam eodem modo fuisse operatam.

*Objic. III.* Argumenta illa, quibus Thomistae necessitatem physicae præmotionis ad quemcumque actum etiam naturalem adstruere nituntur, subjectionem scilicet creaturae, qua pendet a prima causa, et arbitrii indifferentiam, quae nos supra dissolvimus *Part. I. cap. 6.* Indifferentia enim arbitrii non est *passiva*, ut in corporibus; sed *activa*. Subjectio vero creaturae recte constat, posita divini adjutorii necessitate, *sine quo* ad bonum moveri non potest.

## C A P VII.

*De merito, et peccato Angelorum.*

*Ado.* Angelos tot ornatos donis partim in accepta justitia perseverasse; partim, quod valde mirandum est, cecidisse (non quidem ignorantia; sed vel voluntario attentionis defectu, vel judicio practice falso; ideoque illos gloriam, hos poenam meritos esse, certum est ex Scripturis; magnoque id documento esse debet, ne quis altum sapiat, sed timeat. Quippe eorum qui ceciderunt, princeps *diabolus*, *satan*, hoc est adversarius, hostis; reliqui *daemones*, *daemonia*, *spiritus nequam*, *spiritus immundi* passim in sacris literis appellantur. Quantum autem inter Angelorum creationem, atque fruem vel gloriae, vel poenae intercesserit

temporis, incertum est (a); nisi quod constat, illud fuisse brevissimum, cum Angelorum ruina hominum peccatum praecesserit, quippe quod ex diaboli persuasione ortum habuit. Quaesitum quidem est anxie a Theologis, utrum Angeli in primo creationis momento mereri, et peccare potuerint, multumque ea de re inter Scotistas, atque Thomistas est disputatum. Sed hac minus utili praetermissa controversia, quaerimus hic: 1.<sup>o</sup> utrum Angelorum princeps, alique ejus peccati consortes revera in primo creationis momento peccaverint, 2.<sup>o</sup> cujus specie peccatum illud fuerit: 3.<sup>o</sup> utrum in eo sint adhuc obstinati: 4.<sup>o</sup> utrum post primum in nova semper peccata ruant: 5.<sup>o</sup> quot, et ex quibus ordinibus Angeli ceciderint.

### PROPOSITIO I.

*Angeli omnes, nullo excepto, in primo creationis momento, imo et in primo actu deliberato boni fuerunt.*

*Prob. I. De Diabolo (nam de bonis Angelis nulla quaestio est) Joan. VIII. 44. dicitur; Ille homicida erat ab initio, et in veritate non stetit: quae verba expendens Augustinus Lib. XI. de Civ. cap. 15. ait: oportet, ut hoc sic accipiamus, quod in veritate fuerit; sed non permanserit. imo et Ezech. XXVIII. 15. de Diabolo intelligunt Patres, quod sub figura Regis Tyri dicitur: Ambulasti perfectus in viis tuis a die conditionis tuae, donec inventa est iniquitas in te: quae verba secundum Scripturarum phrasim significant, eum recte se gessisse, antequam caderet.*

*Prob. II. Augustinus Lib. de Corr. et Grat. cap. 10. solam in bono perseverantiam Angelis malis defuisse affirmat, quam habuerunt boni; perseverantia autem ostendit, bonum fuisse vitae principium. Et S. Thomas I. P. Q. LXIII. art. 5. ad 4. aperte docet, omnes*

*An-*

---

(a) V. d. Estium in II, Dist. III. §. 13.

Angelos in primo momento meruisse; deinde quosdam hoc meritum peccato amisisse, alios vero illud perseverantia servasse. Concilium Bracarense I. *can. VII.* anathemate damnat eum, qui dixerit, diabolum a principio non fuisse Angelum bonum. Alia loca Patrum vide apud Estium in II. *Dist. II. §. 4.*

*Dices.* Ea fuit Angelorum conditio ex S. Thoma I. P. Q. *LXII. art. 5.*, ut per unum actum, quem ipse immutabilem putat, ut supra diximus *cap. 4.* ad beatitudinem pervenirent, Ergo si Diabolus in primo momento meruisset, pervenisset utique ad beatitudinem.

*R. Dist. ant.* Per unum actum consummatum, sive perseverantem usque ad terminum a Deo constitutum, *conc.* Per unum actum non perseverantem, *neg.* Unde idem S. Thomas I. P. Q. *LXIII. art. 5. ad 4.* postquam docuit, Angelos omnes in primo momento meruisse, addit: *sed quidam eorum statim impedimentum praestiterunt, suae beatitudinis praecedens meritum mortificantes; et ideo beatitudine, quam meruerunt, sunt privati.*

## PROPOSITIO II.

*Diaboli, et sociorum ejus peccatum fuit superbia.*

*Prob. I. Tob. IV. 14.* Superbiam numquam in tuo sensu, aut in tuo verbo dominari permittas, in ipsa enim initium sumpsit omnis perditio. *Eccli. X. 15.* Initium omnis peccati superbia. I. Tim. III. Ne in superbiam elatus, in judicium incidat diaboli; h.e. in eandem cum diabolo damnationem propter simile peccatum incidat.

*Prob. II. ex PP.* Augustinus *Lib. II. de Civ. cap.*

6. *Ab illo, qui summe est, aversi, ad se ipsos conversi sunt ... et hoc vitium quid aliud, quam superbia nuncupatur?* Idem alibi repetit. Concinnunt Patres alii, Hieronymus in *cap. XIV. Isaiae*, Chrysostomus *Homil. de Adam et Heva*, Nazianzenus *Orat. de Nativ. Christi*, Athanasius, Ambrosius etc. Ergo.

*Prob. III.* Substantia Angelica corporis expers non potuit in delectatione rerum sensibilibum, sed tantum

*Tom. II.*

Q

19



in seipsa, suaeque propria excellentia finem ultimum constituere: quod ad superbiam pertinet: *Diabolus ... utique non anavit pecuniam, sed propriam potestatem*, inquit Augustinus *Lib. XI. de Gen. ad lit. cap. 15.* Ergo.

*Dices. Irenaeus Lib. IV. cap. 78., Cyprianus, sive quis auctor Libri de zelo, aliiq. PP. docent, diabolum peccasse invidia humanae dignitatis: quod et probari videtur ex eo, quod dicitur Joan. VIII. Ille homicida erat ab initio: et Sap. II. 24. Invidia Diaboli mors introivit in orbem terrarum. Alii volunt, Diabolum peccasse odio Dei: alii ingrato animo in Deum: demum alii, ut Scotus, et Biel, luxuria quadam spiritali, seu nimio appetitu, et delectatione excellentiae. Ergo.*

*W. Dist. ant. Et haec omnia fuerunt effectus superbiae; conc. Fuerunt causae, neg. Sic de invidia inquit Augustinus Lib. XI. de Gen. ad lit. cap. 14. Nonnulli dicunt hunc diabolo fuisse casum a supernis sedibus, quod inviderit homini facto ad imaginem Dei: Sed invidia sequitur superbiam, non praecedit. Non enim causa superbiendi est invidentia, sed causa invidendi superbia. Idem dicas de odio, et ingrato erga Deum animo. Appetitus autem, et delectatio propriae excellentiae, si ordinatus est, peccatum non est; si autem inordinatus, non luxuria, sed superbia est.*

*Scholion.*

Quamvis constet, primum Diaboli peccatum fuisse superbiam; non est tamen aequè expeditum, in quo illa superbia sita fuerit. Augustinus *Tract. XVII. in Joan. et alibi docet, eum aequalitatem cum Deo appetiisse, eamque sententiam Prudentius, Isidorus, Bernardus, aliique sequuntur. Hanc opinionem defendit Scotus in II. Dist. VI. Q. 2. art. 2. Alii volunt, eum non aequalem, sed similem esse Deo voluisse; ita ut sui juris esset, nullique subditus; quod videtur sentire Gregorius *Lib. XXXIII. Moral. cap. ult.:* et hoc sensu intelligendos docent Augustinum, aliosque Patres pro priori sententia laudatos. Ita Helensis *Part. II. Q. 109. art. 2., Lyranus in cap. XIV, Isaiae, et alii. At S. Thomas**

utram-

utramque refellens sententiam *I. P. Q. LXIII. art. 3.* eo quod Diabolus utrumque impossibile esse evidentissime noverat, putat, in eo sitam Diaboli superbiam, vel quod viribus naturae ad beatitudinem pervenire voluerit; vel quod, rejecto fine supernaturalis gloriae, in fine inferiori, ad quem naturae suae virtute posset pertingere, conquieverit: atque hoc sensu appetierit Dei similitudinem, qui non alieno beneficio, sed sua natura beatus est. Omnes istae sententiae in eo conveniunt, quod Diabolus *ipse sibi ad beatam vitam sufficere co-  
luit*, ut ait Ambrosius in *Psal. CXVII.*, et Augustinus *Lib. XXII. de Civ. cap. 1.*, neque ex cognitione excellentiae suae in laudem Creatoris assurrexit. Putant etiam Theologi nonnulli, sed non satis firmo Scripturarum, et Patrum fundamento, noluisse Diabolum Christo homini, quem Deus ab initio iis revelaverat futurum omnium creaturarum caput, et principem, sub-  
jici, ac famulari.

Putidam autem multorum veterum fabulam; qui Angelos peccasse putarunt in eo, quod filias hominum adamaverint, et duxerint uxores, non putavimus hoc loco commemorandam. Nam praeter ea, quae supra diximus de spiritali Angelorum natura, constat, Angelos jamdiu ante id tempus et peccasse, et damnatos esse. Certe Philastrius *Lib. de haeres. cap. 108.* hanc sententiam inter haereses recenset, paulo latius fortasse, ut saepe alias, nomen haeresis usurpans.

### PROPOSITIO III.

*Diabolus, ceteriq. rebelles Angeli in peccato obdurati, et obstinati sunt, et omnis actus eorum deliberatus mortale peccatum est; licet hinc eorum demeritum, ac poena non augeatur.*

*Prob. 1a. pars*, quae est dogma fidei. Substantia spiritalis, ubi ad terminum pervenerit, mutari amplius non potest; non quia substantiae separatae, ut Thomistae contendunt, natura sua immutabiles sunt, sed quia in viae termino, vel lumine gloriae dobantur, quo ulterius cadere non possint; vel omnino privantur gratia, qua

244 Theolog. Institut. Lib. V. Pars II. Cap. VII.

converſi poſſint. Quod probant communiter ex cap. XI. Eccl. v. 3. *Si ceciderit lignum ad Austrum, aut ad Aquilonem, in quocumque loco ceciderit, ibi erit.* Atqui Angelis malis vel primum peccatum fuit eorum viae terminus, ut ait Daniſcenus *Lib. II. cap. 4.*; vel in peccato manſerunt uſque ad terminum a Deo praestitutum. Ergo.

*Prob. II. ex PP. Fulgentius Lib. de Fide ad Pet. cap. 3. De Angelis, inquit, hoc Deus disposuit, et implevit, ut si quis eorum bonitatem voluntatis perderet, numquam eam divino munere repararet, et mox: Omnes praevaricatores Angeli nec mala possunt umquam voluntate carere, nec poena. Idem docuerat Augustinus Epist. CXVII. al. CVII. in Lib. XI. de Civ. cap. 13., Gregorius Lib. II. Moral. cap. 4. unde ait S. Thomas I. P. Q. LXIV. art. 2. Firmiter tenendum est secundum fidem catholicam, quod et voluntas bonorum Angelorum confirmata est in bono, et voluntas Daemonum obstinata est in malo.*

*Prob. 2a. pars* Diaboli voluntas pessimo fini affixa, atque immutabilis adhaeret. Sed omnis actus deliberatus ex pessimo fine, grave peccatum est, ut suo loco dicemus. Ergo etc. Hinc Rupertus in illud Joan. VIII. cum loquitur mendacium ex propriis loquitur: Omne, inquit, quod loquitur Diabolus, mendacium est; etiamsi fiat, aut eveniat quod loquitur; nihil enim corde simplici, nihil omnino loquitur absque intentione fallendi. Vide S. Thomam Q. XVI. de malo art. 5. et 1a. 2ae. Q. LXXXIX. art. 4., ubi late de hoc disserit. Dixi autem actus deliberatus: quia ait idem S. Thomas. Actus daemonis naturalis bonus esse potest, et attestatur bonitati naturae, et tamen tali bono abutuntur ad malum.

*Prob. 3a. pars.* Cum substantia separata ad terminum pervenerit, mereri ulterius, aut demereri non potest. Ergo.

*Objic. cont. 2m. part.* Non omne quod facit homo peccator, peccatum est; damnata est enim a Pio V. et Greg. XIII. illa Baji prop. num. XXXVIII. *Omne quod facit peccator, vel servus peccati, peccatum est;* et item alia n. XL. *In omnibus suis actibus peccator servit dominanti cupiditati.* Ergo idem dicendum de Diabolo; praesertim cum Jacobus cap. II. 19. dicat: *Daemones cre-*

*credunt, et contremiscunt: et Apostolus Rom. XIV. 11. Omnis lingua confitebitur Deo: et Philipp. II. 10. in nomine Jesu omne genuflectatur caelestium, terrestrium, et infernorum: et Joannes Apoc. V. 13. Omnem creaturam, quae in caelo est; et super terram, et sub terra ... audivi, dicentes: Sedit in throno; et Agno benedictio, et honor, et gloria: qui utique actus boni sunt. Ergo.*

¶ *ad 1m. Neg. cons. et parit.* In homine peccatore, dum adhuc vivit; praeter actus non deliberatos, qui peccata non sunt, est aliquis actus etiam deliberatus, saltem ex gratia actuali, qui bonus est: utrumque autem *Bajus* negabat, ut suo loco dicemus. Nos autem hic agimus de solis actibus Diaboli deliberatis, quorum nullus ex actuali gratia, omnes ex pravo fine proficiuntur; ac proinde dispar est ratio. Quae autem Daemones faciunt in testimonium gloriae Dei et Christi, de quibus loquuntur recitata Scripturae loca, faciunt utique iuviti, et coacti; sicut victus victoris potentiam agnoscere cogitur. Unde *I. Cor. XV. 26.* dicitur omnes Christo subijciendos. Sed quia damnati frendentes, et indignabundi id faciunt, in hoc ipso peccant.

*Inst.* Quod liberum non est, non est peccatum. Quo posito; vel daemones in singulis operibus liberi sunt, vel non. Si primum dicas, ergo in aliquibus actibus possunt abstinere a peccato. Sin alterum, non peccant. Ergo.

¶ *Dist. 1m. prop.* Quod non est liberum libertate contrarietatis, *neg.* Libertate contradictionis, *conc.* Porro licet Diaboli voluntas immutabilis malo fini affixa sit; et in eo novum, ut nonnulli putant, non committat peccatum, cum sit unum continuum peccatum a principio libere admissum; in omni tamen electione *mediorum* libertatem habet contradictionis, quae ad peccatum sufficit. *Deus*, inquit *Estius in II. Dist. VII. §. 7.*, qui malum nec velle potest, nec facere, liberum, imo liberrimum habet arbitrium: quia quae vult, et facit, potest non velle, et non facere, et contra quae non vult, et non facit, potest velle, et facere; nec non inter res diversas unam velle, et facere potest, aliis omissis. Ad eundem modum Angelus, et homo facti ad imaginem Dei, liberum habent arbitrium, quia non ad unum agendi modum determinati sunt, sicut ea,

quae

quae naturaliter agunt; sed agere possunt, et non agere; atque in diversa media ad finem ordinabilia, quodlibet eligendi facultatem habent, quamvis ea media in bonis Angelis, sicut et in beatis animabus nonnisi bona sint; in malis Angelis, et in animabus damnatis, nonnisi mala. Quam doctrinam probat ex Augustinio, qui in *Ep. CCXVII. al. CVII. ad Vital.* ait Diabolum regere filios diffidentiae ad arbitrium suum: Quod tamen liberum non habet ad benefaciendum, sed ad maximam malevolentiam poena sui sceleris obduratum.

#### PROPOSITIO IV.

*Diabolus innumeros Angelos secum in peccatum, et ruinam pertraxit, qui vulgo daemones, aut daemonia dicuntur, et quidem ex variis ordinibus; maior tamen est numerus Angelorum, qui steterunt.*

*Prob. 1a. pars.* Diabolum alios Angelos vel suasionem, vel exemplo in idem secum traxisse peccatum, perspicuum est ex Scripturis *Matth. XXV. 41. Discedite in ignem aeternum, qui paratus est Diabolo, et Angelis ejus. Apoc. XII. 7. Draco pugnabat, et Angeli ejus.* Non enim isti dicerentur Angeli ejus, nisi, eo praecedente, in idem peccatum conspirassent, Ergo.

*Prob. 2a. pars;* nempe Angelos illos fuisse innumeros. *Apoc. XII. 4.* De dracone, sive Diabolo habetur: *Et cauda ejus trahebat tertiam partem stellarum Caeli, et misit eos in terram.* Atqui haec de Angelis in peccatum, et ruinam pertractis intelligenda esse, patet ex sequentibus, ubi dicitur, duce *Michael*e superatum draconem, et Angelos ejus: *draco ... projecus est in terram, et Angeli ejus cum illo missi sunt.* Ergo.

*Prob. 3a. pars.* Plurium ordinum nomina daemonibus tribuunt sacrae literae. *Rom. VIII. 38. Angeli, Principatus, Virtutes: I. Cor. XV. 24. Principatus, Potestates, Virtutes: Ephes. VI. 12. Principes, et Potestates.* Ergo etc. *Gregorius M. Hom. XXXIV. in Evang. et S. Thomas I. P. Q. LXIII. art. 9.* putant ex omnibus omnino ordinibus quosdam cecidisse, in quo in-

inquit S. Thomas, *magis comprobatur libertas arbitrii, quae secundum quemlibet gradum creaturae in malum flecti potest.* Et quidem cum primus supremi ordinis Angelus ceciderit, aliquos ex omnibus inferioribus ordinibus cecidisse, verisimile est; sed, silente Scriptura, et Traditione, incertum.

*Prob. 4a. pars* Ex illo *Apoc. XII. 4.*, ubi dicitur cecidisse tertia pars stellarum, h. e. minor numerus. Imo PP. tertiam partem sumendam hic docent non ad-amussum; sed ad significandum tantummodo, longe majorem Angelorum numerum in veritate stetisse, ut ait Augustinus *Lib. XI. de Civ. cap. 23.*

*Dices. cont. 1m. part.* Vel inferiores Angeli in idem cum Lucifero peccatum consenserunt, vel in aliud ceciderunt. Si primum dicas; repugnat, eos per superbiam subdi voluisse Lucifero potius, quam Deo. Sin posterius; non ceciderunt suasionem, vel exemplo Luciferi. Ergo sua sponte, non ab alio in ruinam impulsusunt.

*¶.* Omnes cecidisse per superbiam: nec mirum esset, eos se subjecisse Lucifero, utpote sub quo inordinate concupitum finem se posse consequi sperabant, sicut videmus in Republica aliquando, cives aliquos ob superbiam perduelli potius subdito, quam Regi obedire malle, ut observat S. Thomas *I. P. Q. LXIII. art. 8.* Sed putari etiam potest, eos invitos subjectos fuisse Lucifero, cujus superbiam imitati fuerant; sicut etiam peccantes homines diabolo vel inviti subjiuntur.

*Dices. II. cont. 3m. part.* Damascenus *Lib. II. de fide cap. 4.* duplicem distinguit Angelorum classem; *super caelestium* scilicet, quibus rerum caelestium ministeria mandata sunt; et *mundanorum*, quibus rerum terrestrium credita est cura. Ex hac posteriori classe docet cecidisse Angelos: ex priori nullum. Ergo.

*¶. Neg. cons.* Damasceni enim sententia, etsi non debet notari tamquam fidei contraria, ut docet S. Thomas *I. P. Q. LXIII. art. 7.*, improbabilis tamen est; cum ex Patrum doctrina Lucifer primus fuerit supremi ordinis, multoque magis alii vel ejusdem, vel inferiorum ordinum cadere potuerint. Unde Augustinus *Lib. XI. de Gen. ad lit. cap. 19. et 26.* duplicem hanc An-  
ge-

gelorum classem incertam esse docet, et *Lib. XI. de Civ. cap. 33. e caelis caelorum*, ait, Angelos ob superbiam cecidisse.

*Corollarium.*

Quoniam Angelicorum ordinum discrimen ex ipsa eorum natura, vel naturalibus proprietatibus oritur, ut supra diximus *cap. 5.*; natura autem per peccatum destructa non est: sequitur, inter daemones ordinum discrimen manere, ita ut alii praesint, alii subsint, sed quia haec praefectura non ad Dei cultum spectat; sed potius ad perturbandum ordinem a Deo statutum, ideo non dicitur Hierarchia, imo in inferno nullus ordo, sed sempiternus horror inhabitare dicitur *Job. X. 22.*

*Scholion.*

Licet tot millia ceciderint Angelorum, eorum tamen numerum supplevit Deus per homines beatos. Unde, inquit Augustinus *Lib. XXII. de Civ. cap. 1. Tantum populum gratia sua colligit, ut inde suppleat, et instauraret partem, quae lapsa est, Angelorum; ac sic illa dilecta, et superna civitas non fraudetur suorum numero civium: quin etiam fortasse et uberiore laetetur.* Sed de peccato hactenus: jam de poena videamus.

C A P. VII.

*De poena peccati Angelorum.*

*Adv. I.* **Q**uoniam Deus Angelis peccantibus non percutit, sed rudentibus inferni detractos in tartarum tradidit cruciandos, *II. Pet. II. 4.*, peccantesq; illico poena consecuta est, quam Scriptura ignem aeternum appellat, merito hic quaeritur 1.<sup>o</sup> utrum haec poena aeterna sit: 2.<sup>o</sup> utrum sit corporeus ignis: 3.<sup>o</sup> utrum infernus, ubi daemones peccati poenas luunt, in terrae visceribus situs sit.

*II.* Origenes, teste Epiphanio *Epist. ad Joan. Jerol.*, et Hieronymo *Epist. XXXV. ad Pammach.*, negavit, daemonum poenas aeternas fore, quippe post varias

annorum conversiones omnia in pristinum restituenda ex Platonis Philosophia docuit. Thomas Burnetius Anglus in libro *De statu mortuorum et resurgentium*, non ex Platonica rerum conversione, sed aliis argumentis hunc errorem adstruere conatus est. Ambrosius Catharinus ignem inferni, quo torquentur daemones, non esse corporeum, opinatur: quia in re nonnulli eum sequuntur Novatores. Tandem nonnulli veteres dubitarunt, utrum sub terra nostra, an aibi infernus esset.

## PROPOSITIO I.

*Ignem inferni, quo daemones torquentur, aeternum esse dogma fidei est.*

*Prob. I. ex Script. Matth. XXV. 41. Descendite a me maledicti in ignem aeternum, qui paratus est diabolo, et Angelis ejus . . . ibunt hi in supplicium aeternum; justi autem in vitam aeternam.* Ubi advertendum est, Dominum, postquam dixit *in ignem aeternum*, ne quis putaret, ignem quidem esse aeternum, damnatos vero in eo non mansuros in aeternum, sententiam suam conclusisse apertissime illis verbis: *ibunt hi in supplicium aeternum etc.* Erit ergo combustio aeterna sicut ignis, inquit Augustinus *Lib. de fide et Op. cap. 15.* Imo posuit hinc vitam aeternam, hinc supplicium aeternum: *dicere autem: vita aeterna sine fine erit, supplicium aeternum finem habebit, multum absurdum est, ut idem observat Lib. XXI. de Civ. c. 23.* Consonant alia Scripturae testimonia. Isaiae LXVI. 24. *Ignis eorum non extinguetur.* Dan. XII, 2. *Evilabunt alii in vitam aeternam, alii in opprobrium ut videant semper;* sed, ut habet textus originalis: *in opprobrium aeternum.* II. Thessat. I. 9. *Poenas dabunt . . . aeternas.* Apc XX. 10. *cruciabuntur die, ac nocte in saecula saeculorum.* Ergo

*Prob. II. ex constanti Patrum traditione.* Praeter Augustinum Fulgentius *Lib. de fide cap. 43. Firmissime, inquit, tene, omnes iniquos ituros in combustionem aeternam.* Idem docent Justinus *Apol. II.*, Tertullianus *Apol. cap. XLV.*, Cyprianus, Epiphanius, Am-  
bro-



250 *Theolog. Instit. Lib V. Pars II. Cap. II. VI*  
 brosius, aliique, quorum loci vide apud Petavium,  
 Natalem Alex. *Dissert. XXVII. in H. E. Saec. II.*  
 Unde in symbolo *Athanasii* hoc inter fidei ponitur ar-  
 ticulus: *qui mala egerunt, ibunt in ignem aeternum*;  
 Denique in synodo V. Oecumena contrarius *Origenis*  
 error damnatus est, uti contra *Petrum Alloxium*, a-  
 liosque *Origenis* patronos ostendi idem Natalis Alex.  
*Dissert. XVI. in H. E. Saec. III.*

*Prob. III. rationibus S. Thonae Sup. III. P. Q. XCIX. art. 1. 10.* Licet poenae acerbitas ex quantita-  
 te culpae metienda sit; nam *pro mensura peccati erit*  
*et plagarum modus Deut. XXV. 2.*; tamen poenae du-  
 ratio non ex quantitate, aut duntione mali actus, sed  
 ex qualitate peccati, et dispositione peccantis aestimari  
 debet. Quod enim pertinet ad peccati qualitatem; vide-  
 mus in civili societate crimina quaedam, licet momento  
 uno patrata, quia tamen vinculum humanae societatis  
 omnino destruunt, perpetua mulari poena; scilicet vel  
 morte, vel perpetuo exilio, quaedam vero, quae non  
 omnino destruunt societatis vinculum, temporali animad-  
 versione castigari, ut emendatus civis possit pacifice in  
 societate vivere. Sic ergo quaedam peccata omnino de-  
 struunt vinculum societatis sanctorum, quod est caritas;  
 cujusmodi sunt omnia peccata mortalia; ideoque meren-  
 tur perpetuum ab illa societate exilium: quaedam vero  
 non destruunt, ut venialia; ideoque ad tempus vel in  
 hac vita, vel in *Purgatorio* castigantur. Quod vero ad  
 dispositionem peccantis pertinet; qui ita est affectus, ut  
 numquam velit a peccato recedere, meretur ut num-  
 quam ejus finiatur poena, quae peccati comes est indi-  
 vidua. Talis est omnis, qui finem suum ultimum in  
 creatura constituit; vellet enim semper vivere, ut sem-  
 per creaturae inhaeret, aversus a Creatore, tota enim  
 vita ordinatur ad finem: nec huiusmodi peccatum per  
 naturae vires retractari potest.

2.º Peccatum mortale personam infinitae dignitatis of-  
 fendit; ideoque sive malitiam, sive offensam quodam-  
 modo continet infinitam, vel saltem superioris ordinis.  
 Cum ergo plecti non possit poena infinita quoad acer-  
 bitatem, cujus creatura capax non est, restat, ut poe-  
 na multetur infinita quoad durationem.

3.<sup>o</sup> Qui usque ad viae terminum in peccato perseveravit, in aeternum in peccato manet obstinatus; licet enim Deus possit illum per gratiam mutare: tamen praeter quam quod hanc gratiam Deus nulli debet, nec esset injustus, si eam omnibus peccatoribus etiam in hac vita negaret; decebat Dei sapientiam, et justitiam, ut terminum aliquem statueret, ultra quem nullus esset amplius gratiae locus, ne scelera, et flagitia, spe certissima gratiae Dei, in immensum crescerent, et inundarent quod malum majus esset quacumque poena. Ergo cum in aeternum daret peccatum, in aeternum durabit et poena. Vid. *Nat. Alexand.*, *Petavium*, *Huetium in Orig. Lib. II. Q. XI. Abb. Cordemoy etc.*

### *Diluuntur Objecta.*

*Objic. I.* Hebraicum nomen **עלמ** *holam aeternum* saepe in Scripturis usurpatur pro tempore diuturno, non tamen perpetuo; ut cum Deus circumcisionem, aliasque caeremonias legis Mosaicae ait esse *pactum sempiternum*. Idem dicas de Graeca voce *αιων* quae aliquando saeculum, aliquando ipsum mundum, aliquando longam durationem significat. Ergo ex eo quod daemones damnati dicuntur igne aeterno, non sequitur, eorum poenam perpetuo duraturam.

*R. Neg. cons.* Cum enim vox aliqua in Scripturis ambigua est, vel ex contextu orationis, vel ex traditione certus ejus eruendus est sensus. Porro ex his regulis certe scimus, ignem aeternum, quo impii damnati sunt, non solum diu, sed perpetuo duraturum. Nam 1.<sup>o</sup> Dicitur *ignis, qui non exstinguetur*: *Isaiae loc. cit.*: quod poenam sine fine significat, ut observat Augustinus *Lib. cont. Priscil. cap. 5.* 2.<sup>o</sup> Dicitur *aeternus*, sicut vita justorum *aeterna*. Sed haec, fatentibus adversariis, sine fine erit; ergo et ignis, et poena impiorum. 3.<sup>o</sup> Ita dicitur *aeternus*, ut qui in eo sunt, non possint umquam in locum, et sortem justorum transmeare: *Luc. XVI. 26.* 4.<sup>o</sup> Dicitur cruciatus impiorum duraturus *in saecula saeculorum*: *Apoc. XX. 10.* quae verba nunquam in Scripturis, nisi de aeterna duratione intelliguntur. 5.<sup>o</sup> Tandem ita intellexit, et docuit perpetua Patrum traditio.

*Objic.*

*Objic. II.* Ea verba *Psal. LXXVI.* Numquid in aeternum projiciet Deus ? ... aut obliviscetur misereri Deus ? aut continebit in ira sua misericordias suas ? Et *Psal. CII.* Non in perpetuum irascetur : neque in aeternum comminabitur. Et *Sap. XI. 24.* Misereris omnium Domine. Et *Rom. XI. 32.* Conclusit Deus omnia in incontinentia, ut omnium misereatur. Ergo ubi Scriptura ait, Deum punire in aeternum, intelligenda est de tempore diuturno.

*¶ Neg. cons.* Laudata enim Scripturae testimonia pertinent ad eos, qui adhuc in via sunt, ut legenti patet : omnium miseretur vasorum misericordiae, inquit Augustinus, non omnium omnino *Lib. XI. de Civ. c. 29.* Quod si ea ad omnes omnino creaturas velis extendere, adhuc verum est, Deum erga omnes non oblivisci misericordiae, nec continere in ira sua misericordias suas ; quia citra condignum puniens, relinquit in ipsa poena misericordiae locum, ut ait S. Thomas *Suppl. III. P. Q. XCIX. art. 1.*

*Objic. III.* Justitia Dei non patitur, ut poena excedat culpam. Unde dicitur *Luc. XII. 50.* impios non solvendo, donec reddant novissimum minutum. Quod manifeste ostendit futurum aliquando, ut poena cesset, reddito scilicet omni debito. Ideo etiam habetur *Apoc. XVIII. 7.* Quantum glorificavit se, et in deliciis fuit ; tantum date illi tormentum : et *Deut. XXV. 2.* pro mensura peccati erit et plagarum modus. Atqui poena aeterna quamcumque culpam excedit. Ergo.

*¶ Dist. maj.* Non patitur justitia, ut poena excedat culpam quoad intentionis acerbiteriam, *conc.* Quoad durationem, *neg.* ex rationibus supra explicatis.

*Objic. IV.* Hieronymus 1.<sup>o</sup> in *cap. LXIII.* *Isaias* in ea verba ; ignis eorum non exstinguetur, haec habet : Qui volunt supplicia aliquando finire, his utuntur testimoniis : et productis quibusdam Scripturae locis, hanc sententiam de fine suppliciorum non refellit : imo addit, eam occultandum esse iis, quibus utile est timore concuti : caeterum scientiae Dei hoc arcanum esse relinquendum. Et *Comment. in Ep. ad Gal.* ait, nullam rationabilium creaturarum perire in perpetuum, 2.<sup>o</sup> Temperare videtur hanc sententiam in *cap. I.* *Nahum* docens, saltem homines, qui dum viverent.

a Deo castigati sunt, ne ipsis quidem habitatoribus Sodomae exceptis, non puniendos in aeternum: ideo ad praesens reddidit supplicium, ne in aeternum puniret: quod probat ex verbis Prophetæ: *non consurget duplex tribulatio*. 3.<sup>o</sup> Tandem videtur hanc sententiam coarctasse ad solos Christianos, *Dial. I. cont. Pelagium* scribens: *Si Origenes Diabolo tribuit poenitentiam, quod ad nos, qui Diabolum dicimus perire perpetuo, et Christianos salvandos esse post poenas?* Nititur autem celebri loco *Epist. I. Cor. III.* qui docet, Christianos esse salvandos, sic tamen quasi per ignem: Ergo.

¶ *Ad 1m. Dist. ant.* Hanc sententiam Origenis Hieronymus refert, non probat, imo alibi refellit, *conc. Secus neg.* Nemo melior Hieronymi interpres, quam ipse Hieronymus, qui *Apol. I. cont. Rufin.* ita se purgat ab Origenianis erroribus, quos ei Rufinus objecerat, dicens non esse accusandum, qui in uno opere, quod edisserit, expositiones posuerit plurimorum. Et in *Epist. LXXV. al. XI. ad Augustin.* eadem ratione explicat quod scripserat in *Epist. ad Galat.* Caeterum supplicia impiorum aeterna fore, sicut vitam justorum, clare docet in *cap. XXV. Matth.*; et in *cap. I. Jonæ* refellens contrarium errorem, ait: *Sed hoc quia Scriptura non dicit, et evertit penitus timorem Dei, de nostris mentibus abjiciamus, et sciamus, peccatores mitti in ignem aeternum, qui paratus est Diabolo etc. de his dici: ignis eorum non exstinguetur: et mox: Si longos post circuitus restitutio fiet, quæ differentia erit inter matrem Domini, et victimas libidinum? Infinitas aetates congere: si finis omnium similis est, praeteritum omne pro nihilo est; quia non quærimus, quid fuerimus, sed quod semper futuri sumus.*

*Ad 2m. Dist. ant.* Docet, homines poenis in vita affectos, non puniendos in aeternum, si suppliciis admoniti poenitentiam egerint, *conc. Secus, neg.* Retundit enim Manichæos, qui calumpniabantur Deum his punire peccatores.

*Ad 3m. Dist. ant.* Docet, Christianos salvandos esse post poenas, si in peccato veniali decesserint, *conc. Si in mortali, neg.* Ait enim: *Christianos solvandos esse post poenas, nisi reatu graviorum criminum fue-*

*fuerint inquinati.* Caeterum hic non causam fidei agimus, sed solius *Hieronyni*. Si quis enim contentiose urgeat, illum in concertationibus cum *Rufino* priorem mutasse sententiam, nihil contra fidei dogma sequeretur; cum etiamsi sententiam non mutasset, nihil posset praevalere unus adversus omnes.

*Objic. V. cum Thomā Barnesio*, qui *Lib. de statu mortuorum, et resurg.* magno apparatu rationum, quas tamen *S. Thomas III. P. Sup. Q. XCIX.* viderat, et dissolverat, hoc fidei nostrae dogma praecipuum subvertere molitur. Aeternitas poenarum dedecet justitiam, sapientiam, et bonitatem Dei. Dedecet quidem justitiam, errorem in momento vitae brevis admissum, aeterno supplicio punire. Dedecet vero sapientiam; quia aeterna poenarum duratio inutilis est Deo, qui nullum inde capit emolumentum: inutilis et ipsis damnatis, qui, ut docent catholici, numquam corrigentur. Dedecet denique bonitatem; fugit enim animus, atque horret ipsa natura, Deum creaturae suae, quam condidit infirmam, imo praesciverat lapsuram, aeternas poenas, et quidem atrocissimas infligere, neque umquam misereri damnatorum: cum contra Patrem se amantissimum, et in misericordia divitem ubique praedicet, qui et Filium suum Unigenitum morti addixit, ut creaturas suas a malis averteret. Ergo.

*¶ Neg. ant. Ad 1m.* Duratio poenae non ex duratione mali actus metienda est; alioquin in civili societate nullum esset crimen, quod perpetuo exilio, aut morte plecti posset; sed ex qualitate peccati, et dispositione peccantis, ut supra diximus: quibus inspectis, justitia Dei poenas aeternas omnino exigit.

*¶ Ad 2m.* Poenarum aeternitas sapientiam Dei dedecet: non quia utilis est Deo, qui nullum ex creaturis commodum expectat, in seipso perfectus, atque beatus; sed quia id postulat ordo justitiae, quam Deus, utpote a se non distinctam, per seipsam diligit; et quia utilis est creaturis, quae adhuc in vita sunt, ut peccatum fugiant: quod malum majus est ipsa poena.

*Ad 3m.* Bonus quidem est Deus, summeque misericors; sed si non esset etiam justitiae locus, jam non bonus, sed malus esset, qui neglecto justitiae ordine,

via

vitia in immensum crescere sineret. Hinc recte Gregorius M. *Lib. IV. Dial. cap. 4. Omnipotens*, inquit, quia pius est, miserorum cruciatu non pascitur; sed quia justus est, ab iniquorum ultione in perpetuum non sedatur. Vide S. Thomam *Suppl. III. P. Q. XCIX.* Habes ista fusiùs apud Natalem Alex. *Dissert. XXVII. in Hist. Eccl. Saec. III. Huetium in Origenianis Lib. II. Q. XI.*; Berti *Lib. X. cap. 17.*, atque eos auctores, qui contra Socinianos scripserunt. Nam et hanc de fine poenarum haeresim Sociniani amplexi sunt, ut et Jo: Lokius, Baelius, Guil. Petersenius etc.

## PROPOSITIO II.

*Ignem inferni corporeum esse, certum est;  
non tamen ex fide.*

*Prob. 1a. pars.* Scripturae eisdem semper verbis utuntur ad explicandum damnatorum supplicium. *Eccli. XXI. 10. Consumatio illorum flamma ignis. Isaiae XXXIII. 14. Quis poterit habitare... cum igne devorante? ... cum ardoribus sempiternis?* Matth. V. 22. *Gehenna ignis.* Apoc. XXs 9. *Stagnum ignis.* Atqui Scriptura ad literae sensum intelligenda, atque explicanda est, cum aliis Scripturae locis non opponitur, ut docet Augustinus *Lib. III. de Doct. Christ. cap. 10.* Imo incredibile est, Christum judicem in sensu figurato explicare poenam, qua damnat impios, dicens; *discedite in ignem aeternum.* Ergo.

*Prob. II. ex PP. 1.º* Hieronymus *Epist. LIX.* reprehendit Origenem, quod ignem inferni per metaphoram explicaverit. *2.º* Gregorius M. *Lib. IV. Dialogor. cap. 29. ignem*, inquit, *inferni corpus esse, non ambigo.* *3.º* Augustinus *Lib. XXI. de Civ. cap. 10. Gehenna illa, quod etiam stagnum ignis, et sulphuris dictum est, corporeus ignis erit.* Idem habet plurium Patrum sententia, et communis Theologorum doctrina, et sensus fidelium: ita ut contraria sententia erronea, atque hodie scandalosa videatur. Ergo.

*Prob. 2a. pars. 1.º* Nulla extat hac de re Ecclesiae definitio, ut Petavius Vasquez, aliique observant *2.º*  
Ca-

256 *Theolog. Institut. Lib. V. Pars II. Cap. VIII.*  
*Catharinus* sequi videtur *Ambrosium*; qui ait *Lib.*  
*VII. in Luc. Neque ignis, neque vermis corporeus est:*  
nec ab Ecclesia damnatus est. Ergo.

### *Objectiones.*

*Objic. I. In Scripturis Is. LXVI. 24. . et Marc. IX.*  
43. haec duo conjunguntur ad explicandum damnato-  
rum supplicium, vermis, et ignis: *vermis eorum non*  
*moritur; et ignis non extinguitur.* Atqui vermis per  
metaphoram dictus est pro conscientiae stimulis. Ergo  
et ignis.

¶ *Transeat min. et Neg. cons. et parit. Dixi tran-*  
*seat minor;* quia non est omnino certum, vermes im-  
proprie intelligendos; cum *Basilius in Ps. XLII.*  
aliique Interpretes apud *Corn. a Lapide in cā. loc. Is.*  
in sensu proprio, et ad literam intelligant: nec di-  
vinæ potentiae impossibile sit, ut praeter ignem,  
etiam molestissima, et venenata animatia a nostris  
diversa, depascantur saltem corpora damnatorum.  
Certe *Eccl. VII. 19. habetur: Vindicta carnis impii,*  
*ignis et vermis: et Judith. XVI. 21. Dabis ignem, et*  
*vermes in carnes eorum, ut urantur, et sentiant usque in*  
*sempiternum.* Sed demus, vermes intelligendos improprie,  
non consequitur, idem dicendum esse de igne;  
vermis enim cum sit animal vivens, non aliter laedere  
potest, nisi partes alienae substantiae dilaniando, caret  
vero partibus substantiae spiritualis. At ignis potest aliter  
et corpus, et animum cruciare, ut infra videbimus:  
nec est credibile, Christum judicem sapientissimam po-  
stremam prolaturum sententiam sensu improprio. Dispar  
ergo est utriusque rei ratio: nec est in Scripturis insue-  
tum, ut in eodem cominate duae res diverso intelligen-  
tur sensu pro varia rerum natura

*Inst. Ignis materialis non potest agere in spiritus; eos-*  
*que cruciare. Ergo etc.* Haec ratio non habet locum in  
eorum sententia, qui docuerunt, Angelos non esse  
omnino corporis expertes.

¶ *Neg. ant.* Sicut enim potuit Deus animum hu-  
mano corpori ita conjungere, ut lacerato, aut combusto  
corpore, animus et sentiat, et doleat, cur non potuit  
spi-

spiritum ita alligare igni, ut eodem cruciatur? Quomodo id fiat, intelligere non possumus, sicut et alia naturae arcana; et tamen factum esse in conjunctione animi, et corporis, certissime scimus. Appositè Augustinus *Lib. XXI. de Civ. cap. 10.* ait: *Quamvis mris, tamen veris modis etiam spiritus incorporeos poena corporalis ignis affligi, si spiritus hominum, etiam ipsi incorporei, et nunc potuerunt includi corporalibus membris, et tunc poterunt corporum suorum vinculis insolubiliter alligari.*

*Objic. II.* Nonnulli Patres in contraria fuere sententia. 1.<sup>o</sup> Gregorius *Lib. XV. Moral. cap. 17.* *Gehennae ignis, cum sit incorporeus ... nec studio humano succenditur, nec lignis nutritur, sed creatus semel durat inextinguibilis.* 2.<sup>o</sup> Damascenus *Lib. IV. cap. 28.* ait; *ignem aeternum non materiale esse, qualis est apud nos.* 3.<sup>o</sup> Augustinus *Lib. XXI. de Civ. cap. 10.* talem, ait, *fuisse illam flammam, quales oculi divitis, et Lazari digitus; quae quidem per metaphoram intelligenda esse, patet.* 4.<sup>o</sup> Ambrosii verba jam supra recitata sunt. Ergo saltem nostra sententia ambigua est.

*R. Dist. ant.* In contraria fuere sententia verbo tenus; quia scilicet putarunt, ignem illum non esse nostro similem, sed tamen corporeum, *conc.* Ita intelligendus est Damascenus, ut patet ex ipso textu nobis opposito, et fusius ostendit *Clictoveus Commentar. in Damasc.* ita etiam Gregorius, et Augustinus, ut constat ex eorum verbis supra relatis. Revera putarunt, ignem illum esse per metaphoram dictum; *subdist.* Et si pauci sunt, eorumq. sententia minus est Scripturae consentanea, *conc.* Secus, *neg.* Fatemur, hac de re nonnullos dubitasse veteres, necdum Ecclesiam suam protulisse iudicium; ideoque contraria opinio haeretica non est. Nostra tamen sententia Scripturis, et Patribus congruentior est; et communi Theologorum, et fidelium sensu comprobatur. Vide haec fusius apud Berti *Lib. X. cap. 17.*, Petavium *Lib. III. de Ang. cap. 5. etc.*



*Scholion.*

Quod in *Prop.* diximus : non tamen ex *fide* : non eo sensu intelligendum , quasi liberum unicuique sit quam libuerit amplecti sententiam , cum contrariam *Catharini*, aliorumque doctrinam , ut temerariam , atque hodie scandalosam rejecerimus : imo nec desint Theologi , ut Card. Gotti *Q. IX. de Angel. Dub. 3.* aliique , qui putent , communem Patrum , Theologorum , atque fidelium sententiam ad veritatem catholicam , vel ad fidei dogma pertinere.

## P R O P O S I T I O. III.

*Locus poenae Daemonum , et hominum damnatorum , quem Scripturae infernum , abyssum , ἀδύς, τάρταρον, tenebras exteriores appellant , in terrae visceribus est. Multi tamen ex rebellibus Angelis adhuc per terrae superficiem , et per aëra vagantur usque ad extremum judicii diem.*

*Prob. 1a. pars. 1.º* Apostolus *Philipp. II. 10.* In nomine Jesu omne genu flectatur caelestium , terrestrium , et infernorum : Et *Apoc. V. 13.* Omnem creaturam , quae in caelo est , et super terram , et sub terra .... audivi dicentes etc. Quibus locis est manifestum , esse aliquas rationabiles creaturas in telluris viscera detrusas , quae nec boni Angeli , nec animae sanctorum esse possunt. Ergo sunt spiritus aeternae poenae addicti. *2.º* Praeterea nomen *abyssi* non de caliginoso hoc aere , sed de profundissimis terrae cavitatibus intelligendum esse , patet ex *cap. VIII. Lucae* , ubi daemones , qui jam in hoc aere , imo super terram erant , rogabant Jesum , ne mitteret eos in *abyssum*. *3o.* Nomen ipsum *inferni* , ἀδύς ; *tartari* , non potest esse nisi sub terra ; dicuntur enim in Scripturis eo detrudendi impii , qui jam in terra sunt. Sic dives *Luc. XVI. 21.* dicitur sepultus in inferno. Et de *Capharnaitis Matth. XI, 23.* Et tu Capharnaum , numquid usque in caelum exaltaberis ? usque in infernum descendes. Ergo.

*Prob.*

*Prob. II. ex PP. 1.º Irenaeus Lib. V. cap. 31. ait, Christum descendisse ad inferiora terrae, ubi erant animae. 2.º Tertullianus Apolog. cap. XLVII. ait, infernum esse subterraneum ignis arcani thesaurum. 3.º Augustinus Lib. II. Retract. cap. 24. De inferis magis mihi videor dicere debuisse quod sub terra sint, quam rationem reddere, cur sub terris esse credantur, sive dicantur, quasi non ita sit. Quibus verbis ostendit, hanc doctrinam esse apud Catholicos communem. Idem docent Hieronymus in cap. XIV. Is., Ambrosius in cap. IV. ad Ephes. Ergo.*

*Prob. 2a. pars. I. ex Script. Job. I. et II. Satan a Deo interrogatus: unde venis? respondit: Circuivi terram, et perambulavi eam. I. Pet. V. 8. Adversarius vester Diabolus tamquam leo rugiens circuit, quaerens quem devoret. Et Ephes. II. 2. Paulus Diabolum dicit esse Principem potestatis aeris hujus: et cap. VI. 12. vocat daemones mundi rectores tenebrarum harum: Non est, inquit, nobis colluctatio adversus carnem et sanguinem, sed . . . adversus mundi rectores tenebrarum horum, contra spiritualia nequitiae in caelestibus; idest in locis aëriis.*

*Prob. II. ex PP. Hieronymus in cap. VI. Ep. ad Ephes. ait, communem esse Doctorum opinionem, aërem istum esse contrariis fortitudinibus plenum. Idem docet Basilus Hom. IX., Augustinus saepissime Enchirid. cap. XXVIII., Lib. XI. de Civ. cap. 33., Lib. XI. de Gen. ad lit. cap. 26. et alibi.*

*Prob. III. ex obsessione, et tentatione daemonum, quam Scriptura aperte docet, et nos infra explicabimus. Ergo.*

### *Diluuntur Objecta.*

*Obje. I. cont. 1m. part. cum Calvino Lib. II. Instit. cap. 16. §. 9, et Beza in cap. II Act. Vox ἀδνα in Scripturis, uti et Hebraica שְׁחֹל Sehōl, quam Vulgata vertit infernum, sepulchrum significat; ut cum ait Jacob XLII. 38. deducetis canos meos cum dolore ad infernos. Ergo etc.*

*¶ Neg. ant. Graeci enim sepulchrum dicunt τάφος*

numquam vero ἀδης. Nec Robertus Stephanus. in Thesaurο in verbo ἀδης ullum testimonium profert Graecorum, quo ἀδης pro sepulchro usurpetur; Hebraicum vero nomen שְׁאֵל Schol voraginem notat, non sepulchrum. Certe Hieronymus Hebraice peritissimus ea verba Num. XVI. 33. *Descenderuntque vivi in infernum*: ubi in Hebraeo est Schol, intelligit de subterraneis damnatorum cavernis. Et Gen. cap. XXXVII. 35. usurpatur pro subterraneis terrae locis, ubi detinebantur animae piorum ante Christi adventum. Nam Jacob inspecta tunica Joseph, quem utique putavit non sepultum, sed a feris voratum, ait: *descendam ad filium meum lugens in infernum*. Unde potest eodem modo intelligi locus Gen. XLIII. in objectione recitatus.

¶ *Objic. II.* Tam variae sunt de loco inferorum opiniones Patrum, ut nihil certi videatur de eo affirmari posse. Nonnulli enim docent, infernum esse tenebricosum hunc aërem telluri vicinum, ut Nyssenus *Lib. de anima*, et *Resurrect.* Chrysostomus *Homil. de praemiis beator.*, et Auctor *Operis imperf. in Math. Homil. LIII.* Alii, quorum meminit ipse Chrysostomus *loc. cit.* et Gregorius M. *Lib. IV. Dial. cap. 42.* illum statuiebant in valle Josaphat, cui contermina erat vallis, quae dicebatur Gehenna: quo nomine saepe Christum infernum appellat. Alii infernum non aliud esse putarunt, quam conscientiam accusantem, ut Origenes apud Hieronymum *Epist. ad Avitum*. Denique non defuerunt, qui dicerent, infernum non esse corporeum aliquem locum ut Augustinus *Lib. XII. de Gen. cap. 33.* Ergo.

¶ *Neg. ant.* Licet enim pauci hac de re dubitaverint; non efficiunt tamen, quominus evidens sit haec de re, et constans Patrum, Theologorum, et fidelium sensus; et quidem Scripturis congruentior, ut supra vidimus. Origenis quidem opinio a Hieronymo, et ab Ecclesia reprehenditur. Augustinus *Lib. III. Retract. cap. 24.*, quod alibi dixerat, retractavit. Nyssenus, et Chrysostomus intelligendi sunt eo sensu, quo diximus, plures Daemones in tenebricoso isto aëre adhuc versari. Quod vero infernus sit in valle Josaphat, sententia est omnino singularis, et quae nullum probati nominis auctorem habet.

*Objic. III. cont. 2m. part.* Si plures Angeli adhuc in aere, aut super terram vagarentur, mitior esset istorum poena, quam illorum, qui jam in tartarum detrusi sunt. Atqui hoc in pari omnium causa absurdum est. Ergo vel dicendum est, omnes in judicium magni diei reservari, ut ait Judas, et Petrus *II Ep. cap. II. 4.* et interim a poena saltem ignis esse immunes. ut revera tenent aliqui Theologi post quosdam ex Patribus; eorumque sententiam Petavius *Lib. III. de Ang. cap. 4.* docet non esse damnatam, vel omnes omnino in inferis esse: et quidquid de Daemonum tentationibus, atque obsessionibus dicitur, nihil aliud esse nisi effectus male affectae, et perturbatae phantasiae, et credulitatis imperitorum, ut contendit *Bekerus*.

*¶. Neg. maj.* Sicut enim nihil officit beatitudini Angelorum mora in terris, dum vel homines custodiunt, vel alia jussa Dei faciunt; ita nihil minuit poenam daemonum eorum vagatio per aërem, aut tellurem. Secum enim ferunt non materiale ignem; sed ipsa tormenta poenalia: semperque eorum cogitationi adest ignis ille, cui se sciunt jam illigatos: quod vero Judas ait, et Petrus, eos in judicium reservari: item quod dicebant daemones a Christo ejecti *Matth. VIII. 29. Venisti ante tempus torquere nos*, quasi nondum essent damnati, intelligitur de sollemni, et publico judicio; quod vellet longius protrahi; tum quia auferretur tunc eis nocendi potestas, cujus ob invidiam cupidissimi sunt; tum quia nihil magis refugit eorum superbia, quam judicari, et damnari a Christo homine, et contemni ab hominibus sanctis, a quibus licet fragilibus victi sunt. Ad rem Beda in *cap. III. Jac. Diabolus, et Angeli ejus*, propter quos *Gehenna facta est, ubicumque vel in aere volitant, vel in terris, vel sub terris vagantur, sive detinentur, suarum semper secum ferunt tormenta flammarum*. Unde Bellarminus *Lib. I. de Sanctor. beatitud. cap. 6.* contrariam sententiam ab errore vindicari non posse docet. Et certe falsa, et erronea videtur. *Bekeri* autem audax et profana opinio. Scripturis sanctis adversa est.

## C A P. IX.

*De officiis bonorum Angelorum erga Deum, et homines;  
et de impugnatione daemonum.*

**Adv. I** DE omnibus Angelis beatis ait Apostolus *Heb. I. 14. Omnes sunt administratorii spiritus, in ministerium missi propter eos, qui haereditatem capient salutis.* Licet enim possit Deus omnia per seipsum omnipotentem suam voluntate facere; bonitatis tamen ejus est, ut ad nonnulla opera, quae sive ad salutem piorum, sive ad malorum vindictam pertinent, utatur ministerio creaturarum. Hinc dicitur etiam *Psal. CIII. Qui facis Angelos tuos spiritus*; et *Psal. CII. Benedicite Domino omnes Angeli ejus: potentes virtute, facientes verbum illius, ad audiendam vocem sermonum ejus. Benedicite Domino omnes virtutes ejus: ministri ejus, qui faciunt voluntatem ejus.* Et saepe numero Deum Angelis bonis non solum ad praesidium piorum, sed etiam ad impiorum poenam usum esse; iisdemq. usum in extremo mundi excidio, ex Scripturis est apertissimum.

**II.** Et contrario rebelles Angelos invidia tabescentes jam inde a principio humano generi bellum atrox indixisse, testatur Veritas, dicens *Joan. VIII. 44. Ille (Diabolus) homicida erat ab initio.* Et *Sap. II. 24. Invidia Diaboli mors introivit in orbem terrarum.* Plena est hujusmodi testimoniis Scriptura, et traditio; atque ideo satius est audire moneutem Apostolum. *Pet. V. 8. Sobrii estote, et vigilate: quia adversarius vester Diabolus tamquam leo rugiens circuit, quærens quem devoret, cui resistite fortes in fide*; quam de hujus rei veritate disputare cum incredulis.

**III.** Jam verò dari Angelos hominum custodes, dogma fidei est; idque sacrae literae, et perpetua traditio aperte testatur. Tantum igitur hic expendendum superest 1.<sup>o</sup> utrum singulis hominibus, Civitatibus, Regnis custodes Angeli a Deo mittantur; 2.<sup>o</sup> utrum etiam singulis malus Angelus destinatus sit, qui eum impugnet; 3.<sup>o</sup> utrum Diabolus eo usque aliquando hominem aggredia-

diatur, ut corpus ejus, aliasque potentias possideat, et agat. Hoc enim post *Bekerum* (a) negant ii, qui non in studio veritatis, sed in opinionum audacia gloriam esse ponendam putant.

IV. Calvinus in *Psal. XC.* ridet Catholicos, qui docent, singulis hominibus custodem Angelum a Deo destinari. E contrario Origenes *Hom. XII. in Luc.*, Casianus *Collat. XIII. cap. 12.*, P. Lombardus, et post eum aliqui Theologi docuerunt, singulis hominibus duos divinitus deputari Angelos, alterum bonum ad custodiam, alterum malum ad exercitationem et pugnam. Patres nonnulli, ut *Basilius in Psal. XLVIII.*, *Hilarius*, *Chrysostomus*, aliique custodiam Angelorum ad solos fideles coarctant.

### PROPOSITIO.

*Singulis fidelibus, praesertim electis, custodem Angelum a Deo mitti, certum est; probabilius etiam est, mitti singulis omnino hominibus, etiam infidelibus, imo singulis civitatibus, et regnis.*

*Nihil tamen horum dogma fidei est.*

*Prob. 1a. pars. I. ex Scriptura. Matth. XVIII. 10. De omnibus fidelibus pusillis ait Christus: Angeli eorum... semper vident faciem Patris 2.º Act. XII. 15. Petro, qui mirabiliter e carcere per Angelum eductus erat, pulsante januam, ubi discipuli congregati erant, putabant fideles, non esse Petrum, sed ejus Angelum. Angelus ejus est (b). 3.º In veteri quoque Testamento legimus Gen. XLVIII. 16. dixisse Jacob: Angelus, qui eruit me de cunctis malis: et Judith. XIII. 20. Ergo.*

*Prob.*

(a) *Beker* Le Monde enchanté.

(b) Frigidum est quod reponit *Ligfootus* in *Horis hebr.* verba illa *Angelus ejus est* significare Angelum, qui in forma Petri apparuerit: aut quod putat *Hammonius*, nuntium a Petro missum.

*Prob. II. ex PP. Chrysostomus in Cap. XVIII. Matth. Hinc manifestum est, inquit, quod omnes Sancti Angelos habeant: et Basilius in Psal. XLVIII. Cuilibet fidelium est Angelus assistens. Ergo.*

*Prob. 2a. pars. ex PP. 1.º Hieronymus in cap. XVIII. Matt. Magna, inquit, dignitas animarum, ut habeat unaquaeque ab ortu suae natiuitatis Angelum deputatum, 2.º Ambrosius in Psal. XXXVIII. Angelus in circuitu est hominis, qui praetendit, ne quis noceat ei. 3.º Bernardus Lib. V. de Consider. cap. 4. Putemus, Angelos dici qui singulis hominibus dati creduntur. Patres hi, aliiue laudati a Petavio Lib. II. de Angelis nullo discrimine docent, singulis hominibus Angelum tutelarem esse a Deo missum.*

*Prob. 3a. pars. Dan. X. 13. et 20. mentio sit Angeli Regni Graecorum, et Angeli Regni Persarum. Princeps Regni Persarum, ait Angelus, restitit mihi viginti et uno diebus. Et Josue V. 14. ait Angelus: Sum Princeps exercitus Domini. Unde ait Theodoretus Quæst. III. in Genes. Cuique genti Angelum praeesse, affirmat Scriptura: quae tamen commode intelligenda sunt; hoc nimirum sensu, quod satis clare fluit ex eo, quod affirmat Scriptura.*

*Prob. Denique 4a. pars. Quia nulla de hisce rebus extat Ecclesiae definitio.*

### *Refutantur Objecta*

*Objic. I. Apostolus Heb. I. 14. ait: Omnes sunt administratorii spiritus, in ministerium missi propter eos, qui haereditatem capient salutis. Ergo solis electis custodes Angeli mittuntur.*

*¶ Dist. ant. Propter eos, qui haereditatem capient. tamquam praecipua divinae bonitatis cura, et qui inde salutis emolumentum percipiunt, conc. Propter eos tantum, subdist. Quatenus ad eorum commodum omnia diriguntur, etiam Angeli, qui reprobis destinati sunt, conc. Quatenus ad eos tantum custodes Angeli mittuntur, neg. Licet ergo omnibus mittantur Angeli custodes; dicuntur tamen in Scripturis missi propter electos duobus ex causis. 1.º Quia electi sunt maxima, et prae-*  
*ei*

cipua Dei cura, et qui inde emolumentum aeternae salutis adipiscuntur: unde etiam Incarnatio, oratio, mors Christi ob eandem rationem videntur in Scripturis aliquando ad electorum gratiam coarctari; licet pro omnibus haec gesta sint. 2.<sup>o</sup> Quia omnia ad salutem electorum conducunt, ut ait Apostolus *Rom. VIII. 28.*: ipsi etiam Angeli reproborum, quos impediunt, quominus plus noceant, quam utilitas, et salus electorum pati possunt. Hinc recte observat *Estius* non dixisse Apostolum *loc. cit. Heb. I. ad eos*, qui haereditatem capient; sed *propter eos*.

*Objic. II.* De solis justis ait Propheta *Psal. XC. Angelis suis Deus mandavit de te, ut custodiant te.* Et Ecclesia inter Baptismi caeremonias Deum precatur, ut mittat Sanctum Angelum suum de caelis, qui baptizandum custodiat, ac proinde pro certo habet, eos saltem, qui baptizati non sunt, hac custodia destitutos. Ergo.

*¶. Dist. ant.* Et ea ita dicuntur de justis, et baptizatis, ut negentur impiis, et infidelibus, *neg.* Ut non negentur ceteris, *conc.* Cum ait Propheta, Deum mandasse Angelis custodiam justorum, et Ecclesia adprecatur baptizandis custodem Angelum, de singulari custodia modo loquuntur, quo justis, et praesertim electis in omnibus viis suis ita custodiuntur, ut nunquam offendant; vel saltem aut non cadant, aut cadentes resurgant; baptizandi autem ad gratiam baptismi perducantur. Vide haec fusius apud *Cotelerium* in notis ad *Hermam* et *Clementem*, *Coccium* in *Thesaurio Tom. I.*, *Petavium* etc. (a).

Scho-

---

(a) Etiam apud Gentiles Philosophis inveteravit haec doctrina de custodibus Angelis; quos ipsi *Genios*, aut *Δαιμόνας* appellabant, ut constat ex *Censorino* in *Lib. de die natali cap. 3.*; quem locum erudite illustrat *Lindebrogius* in notis; et ex *Menandro*, cujus versus *Clemens Alex.* recitat *Lib. V. Strom.* Huetius in *Athenais Lib. II. cap. 4.*, - *Pfannerus* in *System. theolog. gentil. cap. 6.* *Olearius* in *Dissert. de genio Socratis* apud *Stautelium* in *Histor. Philos.* multa undique de hoc genere collegerunt. Nos tamen non ex Philosophorum officinis, sed ex Sacris literis nostra desumpsimus, quas fortasse et ipsi Philosophi legerunt, nisi forte haec ex vetusta acceperint traditione.



## Scholion.

Angelorum Custodum munera sunt 10. A malis ingruentibus eripere: 2.<sup>o</sup> Dæmonem compescere, quominus pro suo lubito aggrediatur, et noceat: 3.<sup>o</sup> Pias cogitationes, et consilia suggerere: 4.<sup>o</sup> Preces hominum Deo deferre, suasque etiam addere pro eorum salute. Vide Estium in II. Dist. XI. §. 2. In hac autem hominum procuratione non hominibus Angeli proprie, sed Deo ministrant, ut advertit S. Thomas I. P. Q. CXII. art. 1. Nec a Dei contemplatione, et laudibus per exteriora isthaec ministeria avocantur. Quæ et ii imitari debent, quoad ejus fieri potest, qui exterioribus occupantur officiis, ut fuse Bernardus in libris de Consideratione prosequitur.

## P R O P O S I T I O II.

*Licet Deus aliquando etiam malis Angelis utatur ad vindictam impiorum, aut exercitum bonorum, permittendo, ut noceant; non est tamen putandum, singulis hominibus malum Angelum a Deo destinari: quod vero ab ipso Diabolo malus Angelus ad singulos homines impugnandos destinetur, improbable non est.*

*Prob. 1a. pars. De vindicta impiorum Ps. LXXVII. dicitur: Misit in eos iram indignationis suæ; indignationem, et iram, et tribulationem, immissiones per Angelos malos. De bonorum vero exercitatione res est manifesta ex Libro Job, in quem Deus permisit, Satanam horribili modo desævire. Et in Apocalypsi prædicatur, solvendum aliquandiu Satanam, ut longe lateque per universam terram ad malorum poenam, et bonorum exercitationem sæviat. Idem docent Patres. Ergo.*

*Prob. 2a. pars. Sicut Deus non potest esse mali auctor, ita nec ad malum incitator, unde dicitur Jac. I. 13. Deus intentator malorum est, ipse autem neminem tentat. Atqui casci ad malum incitator, si uniusque*

tentando malum Angelum mitteret; quod enim quis per alium facit, per seipsum videtur facere. Merito ergo contraria sententia videtur derivata potius ex fabulis ethnicorum, qui unicuique homini bonum, malumque *Genium* adesse fingebant; quam ex Dei verbo, in quo nullum fundamentum habet.

*Prob. 3a. pars.* Certum est, Diabolum omnium hominum bonis invidere, inhitare malis: imo et Deum aemulari, et imitari, quantum potest, ad omnium hominum ruinam. Probabile igitur est, eum singulis hominibus ad malum incitandis malum Angelum destinare. Nyssenus certe *Lib. I. de vita Moysis* ait: *Est sermo ex majorum traditione fidem sibi vindicans, qui dicit, postquam natura nostra in peccatum decidit, Deum hunc lapsum nostrum providentia sua minime destituisse; sed Angelum quendam ex iis, qui naturam corporis expertem sortiti sunt, adhibuisse ad uniuscujusque hominis tutelam, ac praesidium: at ex adverso naturae corruptorem pari machinatione contra niti, et pravo quodam, ac malefico adjuncto daemone, humanae vitae perniciem afferre.* Vide Laurentium Berti *Lib. X cap. 8. Prop. II.*, qui varia in hanc rem veterum testimonia congerit. Caeterum malus iste Angelus nihil omnino, nisi permittente Deo, aggredi potest ad hominum perniciem.

### PROPOSITIO III.

*Negare energumenorum, seu hominum a daemone possessorum existentiam, haereticum est: imo etiam, ex sola ratione naturali, valde temerarium. Pluries tamen in iis, qui energumeni dicuntur, nihil est, nisi errantis phantasiae ludibrium, aut etiam malitia, et fraus.*

*Prob. 1a. pars. I.* Tam multa, et tam clara sunt testimonia Scripturarum, quae id testantur, ut si liceret ea alio detorquere, nihil certi in sacris literis haberemus. 1.<sup>o</sup> Ipse Christus dicitur in Evangelio saepissime *daemonia ejecisse*. Longum esset referre omnia: illud vero celeberrimum, quod accidit in regione Gerasenorum

rum *Matth. VIII. 28.*, *Marc. V.*, *Luc. VIII.*, ubi daemones, qui homines duos invaserant; occurrentes Jesu, clamaverunt: quid nobis, et tibi, Jesu Fili Dei. Venisti huc ante tempus torquere nos? Erat autem non longe ab illis grex porcorum pascens. Daemones autem rogabant eum, dicentes: si ejicis nos hinc, mitte nos in gregem porcorum. Et ait illis; ite. At illi excurrentes abierunt in porcos, et ecce impetu abiit totus grex per praeceps in mare, et mortui sunt in aquis. 2.<sup>o</sup> Saepè Christus in Evangelio ad ipsos nefarios spiritus verba facit, eos interrogat, illis imperat, minatur, silere jubet, expellit; vereque daemones abcessisse, ipsa sanitate energumeno restituta demonstrat. 3.<sup>o</sup> Ex hac daemones ejiciendi potestate probat, se esse Messiam *Luc. VII. 20. 21. 40.* Ostendit, se non potestate Beelzebub ejicere daemonia, ut Pharisei calumniabantur; sed in digito Dei *Luc. XI. 5.* Dedit discipulis potestatem omnia daemonia ejiciendi *Matth. X. 1.*, *Marc. III. 15.*, *Luc. IX. 1.*: imo promittit hanc virtutem ceteris fidelibus *Marc. XVI. 17.* Signa autem eos, qui crediderint, haec sequentur: in nomine meo daemonia ejicient etc. 6.<sup>o</sup> Hac potestate saepissime Apostoli usi sunt et ante, et post Christi mortem. Ergo cum sit tam clarum, tam saepe repetitum in Scripturis, Christum, ejusque Discipulos ejecisse daemonia e corporibus energumenum, id negare haereticum est.

*Prob. II.* ex omnium Patrum doctrina, et Ecclesiae universae sensu, quae semper habuit *Exorcistas*, et *Exorcismos* ad daemones fugandos. Hunc consensum Patrum et Ecclesiae judicium non dissentitur adversari. Ergo.

*Prob. 2a pars.* Esse energumenos, non aliquorum e vulgo Christianorum opinio est; sed omnium non modo Catholicorum doctorum pariter et indoctorum, verum etiam Hebraeorum et Gentilium doctrina, Sadducæis, et Epicureis exceptis. De Catholicis res est manifesta. De Hebraeis constat ex Evangelio, et ex libris Rabbiorum. De Gentilibus vero habemus præter alia illustre *Tertulliani* testimonium, qui *Apolog. cap. XXIII.* hac ratione illos, quamvis suo modo sapientes, et Christianis insensissimos, provocare audet. Edatur hic aliquis  
sub

sub tribunalibus vestris, quem daemone agi constet: justus a quolibet Christiano spiritus ille, tam se daemonem confitebitur de vero, quam alibi Deum de falso. Et alibi: *Lib. ad Scapul. cap. II.* ait: daemones non tantum respuimus, verum et revincimus, et quotidie traducimus, et de hominibus expellimus. Nec esset profecto ausus Tertullianus ista scribere ad inimicos Christianae religionis, nisi existentia energumenum fuisset apud illos exploratissima. Atqui repugnare omnium Catholicorum, Judaeorum, Gentilium sensui valde temerarium est. Ergo.

*Prob. 3.<sup>o</sup> pars. ex ipsa experientia, qua docemur, multos, qui energumeni habebantur; tetro melancholice humore laborasse, qui phantasiam vitiaverat: quo humore vel opportunis medicamentis, vel solerti aliqua fraude curato, salva fuerunt omnia: nonnullos etiam ex malitia id venditasse; fraude vero detecta, ad saniores frugem rediisse. Ergo.*

*Solvuntur Objecta.*

*Objic. I. cont. 1.<sup>m</sup> et 2.<sup>m</sup> part. Spiritus non potest propria vi agere in corpus. Ergo.*

*¶ Neg. ant.* Cujus falsitas vel ex ipso commercio animi, et corporis humani manifesta est. Quomodo id fiat, obscurum est, et tamen fieri certissimum est.

*Objic. II. Non decet bonitatem Dei permittere, ut Diabolus humanum corpus insideat. Inde enim sequitur, non solum ipsius hominis summa miseria, verum etiam scandala innumera ob blasphemias, quas homines proferunt impune in Deum, resque divinas, aliaque valde indecora. Ergo:*

*¶ Dist. ant.* Non decet bonitatem Dei id permittere, si homo sit in statu innocentiae, in quo a Deo creatus est, *conc.* Si sit peccato obnoxius, *neg.* Deus non solum bonus, sed et justus est; ideoque aliquando permittit, daemonem atrocius saevire, ut boni in hoc corruptae naturae statu vel purgentur, vel exerceantur; mali vero puniantur. Si quis vero inde scandalum patitur, culpa sua est; deberet enim potius inde assurgere ad contemplandam Dei bonitatem erga se; malitiam, et odium daemonis adversus genus humanum. *Inscr.*

*Inst.* Nonnulli pueri recens baptizati, dicuntur energumeni; quos tamen certum est, nihil habere damnationis, ut ait Apostolus. Atqui repugnat bonitati, et iustitiae Dei, infantes istos jam ab omni labe purgatos tanta poena affligari. Ergo satius est dicere, eos morbo potius, quam a diabolo corripì, et agitari.

*¶. Transeat maj. quoad 1m. part. Dist. 2m. part.* Nihil damnationis est in parvulis recens baptizatis, hoc est nullum peccatum, *conc.* Nullae peccati poenalitates, quas Deus noluit abstergere per baptismum, *neg.* Dixi transeat major quoad 1m. partem; non enim asserimus, revera esse energumenos omnes, qui dicuntur. Sed etiam si demus, tales esse ejusmodi pueros; sicut Deus relinquit in illis post baptismum morbos, mortem, aliasque acriminas ob sapientissimas rationes, quas suo loco, quantum nostrae mentis imbecillitas sinit, exponemus; ita etiam permittere potest ut agitentur a daemone. Uno verbo: concedunt adversarii, parvulos esse quosdam post baptismum extraordinaria afflicti vi morbi: neque id repugnare bonitati, et iustitiae Dei. Cur ergo repugnat, si eadem illa calamitas non a morbo, sed a daemone inferatur?

*Objic. III.* Videmus, frequentiores esse energumenos iis in locis, in quibus major est superstitio, et ubi haec opinio de potestate diaboli invadendi hominum corpora altius animis hominum insedit; illos vero homines huic malo esse obnoxios, qui vel tetro humore abundant: vel phantasiae sunt vividioris. Ergo ex ipso phantasiae errantis ludibrio res ortum habet.

*¶. Transeat ant., neg. cons.* Non enim negamus, plerumque hic locum habere aut tetrum humorem, aut vitiatam phantasia, aut etiam malitiam, et fraudem. Ideoque Ecclesia antequam exorcismos adhibeat, mature expendi vult, utrum revera energumenus sit, qui dicitur. Sed asserere, semper id a phantasia oriri, id et Scripturae sacrae adversum, et valde temerarium est.

*Objic. IV.* Non sunt multiplicanda sine necessitate prodigia: et ridendus esset, qui statim ad supernaturales causas confugeret ad explicandos effectus, quorum naturales rationes ignorat. Ergo si energumenerum effecta

fecta per naturales causas, et morbos explicari possunt non est obtrudendum daemonis imperium.

¶ *Cōc. totum argumentum.* Cum enim suppetit aliqua ratio explicandi per naturales causas energumenum opera, eos energumenos non dicimus, nisi forte ex divina revelatione contrarium constaret. Sed quaedam sunt energumenorum effecta, quae naturalibus causis tribui non possunt, ut cum aliquis sanae mentis subito e statu suo dimovetur, caque agit, quae longe aliena sunt ab insita sibi indole, imo naturae suae vires superant; in altum sustollitur, arcana sibi ignota reserat, lingua peregrina, quam numquam audivit, aut didicit, recte loquitur, et alterum ea lingua loquentem recte intelligit. Quaedam vero sunt, quae naturali ex causa oriri potuissent; sed Scriptura, cujus divina auctoritas est, docet, facta a daemone; ut cum in Evangelio legimus, quosdam a Christo liberatos a daemone, qui eos reddiderat surdos, mutos, inclinos, furiosos etc. Haec quidem incommoda ex naturali morbo potuissent accidere; sed Evangelium nos edocet, illis hominibus non a morbo, sed a daemone fuisse illata, quo expulso, restituta est sanitas.

*Inst.* Scriptura saepe se accommodat receptis apud vulgus opinionibus, quas non corrigit, sed juxta eas loquitur; cum non sit facta revelatio, ut nos in philosophia instrueret, ut observat Augustinus *Lib. I. de actis cum Felice Manich. cap. 10.*; sed institueret ad pietatem. Atqui recepta erat apud vulgus Judaeorum, utpote rerum naturalium ignarum, haec opinio, morbos scire omnes a daemone inferri, ut videre est etiam in libris Rabinorum; nec ipsi Graeci philosophi ab hac opinione fuerunt alieni, cum physica disciplina non dum esset satis exulta, atque illustrata; unde Plato attribuit daemoni eum morbum, quem Galenus *Part. II. Op. Tract. 9.* repetit ab influxu Lunae. Ergo potuit Evangelium appellare daemoniacos, qui tales a vulgo habebantur; nec Christus eum errorem, utpote innoxium, corrigere voluit, sed rudi populo se accommodans, videbatur expellere daemonem, cum revera morbum divina virtute curaret.

¶ *Dist. maj.* Quando propositio aliquem verum sensum

sum habere potest, *conc.* Quando nihil nisi falsum significat, *subdist.* Quando Scriptura verba hominum *historice* narrat, *conc.* Quando Spiritus S. de suo loquitur, *neg.* Non potest summa veritas nisi vera loqui. Refert quidem aliquando Scriptura aliquas hominum sententias, licet falsas: quia verum est, homines eas protulisse. Accommodat etiam se aliquando hominum capta, quando propositio aliquem verum sensum pati potest; ut cum Lunam appellat luminare magnum, quia revera sic apparet oculis. At de energumenis non semel; nec obiter Evangelium loquitur, et Christus inde suam missionem divinam esse probat. Si ergo nulli essent energumeni, Christus non modo vulgi errorem non correxisset, sed cum verbo, et operibus confirmasset, auxisset, multaque fecisset ad decipiendos homines: quod absurdum est.

*Objec. V.* In Libro Tobiae legimus *cap. VI. 19. et VIII. 2.* fugatum daemonem *Asmodaeum* fumo ex jecore piscis; et in Regum historia *I. Reg. XVI. 23.* Davidem sono citharae spiritum malum a *Saul* expellere solitum. Refert Josephus *Lib. LIII. Antiq. cap. 2.* Salomonem carmina condidisse ad expellendos daemones. In *Actibus Apost. XIX. 14.* legimus *Filios Scevae*, qui Christiani non erant, energumenos exorcismis adjurasse. Imo ipse Christus concedit, fuisse inter Judaeos exorcistas: *Luc. XI. 19. Si ego in Beelzebub ejicio daemonia, filii vestri in quo ejiciunt?* Atqui si energumeni revera a nefario spiritu agitentur, frustra fumus, et carmina, et adjurationes ab hominibus institutae adhiberentur. Ergo.

*R. Dist. maj.* Et inter illos nonnulli erant vere energumeni, in quibus frustra excantationes adhibebantur: alii falso habebantur ut tales, in quibus aliquando humana remedia vim habebant, *conc.* Omnes erant veri; vel falsi energumeni, *neg.* *Dist. et min.* Si Deus aliquando non permitteret: justo judicio, ut superstitioni quidam ritus effectum habeant, *conc.* Secus, *neg.* Non contendimus, esse revera energumenos, qui vulgo tales existimantur. Itaque in iis, qui morbo potius laborabant, quam agitantur a daemone, humana remedia valere poterant vel ad morbum depellendum, vel ad corrigendos vitiatæ phantasiæ errores. Sed et in iis, qui vere a diabolo agitantur, aliquando magicæ ex-

cantationes valebant; non quia aliqua iis inesset virtus, sed quia ipse diabolus ad conciliandam magiae fidem, adhibitis superstitiosis ritibus, sponte abscedebat ab homine, Deo id permittente in poenam superstitiosorum hominum; videntes enim magicæ artis effectus, magis excaecabantur. Aliquando vero carmina illa, et superstitiosi ritus frustra adhibebantur, ut accidit filiis *Sœvæ*.

Atque hæc generatim dicta sunt. Quod vero pertinet 1.<sup>o</sup> ad fumum ex jecore piscis; dicimus, illum supernaturali virtute fuisse operatum, unde ait Tobias, non ipsum fumum, sed *Angelum apprehendisse daemonymum*, et religasse *Tob. VIII. 3.* 2.<sup>o</sup> Saulem nonnulli volunt gravi melancholia laborasse, quæ cum in furem agebat; facileque explicant, quomodo numerosis citharæ modis recrearetur. Musicos enim varios concentus ad sedandos, vel inflammandos motus animi, atque affectus plurimum valere, *Plutarchus*, *Seneca*, et e *Patribus Basilii*, alique docent, et probat experientia. Qui vero putant, *Saulem* a nefario spiritu exagitatum, respondent, illum ad sonitum citharæ recreatum; non quia sonus daemonem expellebat; sed vel quia David citharam pulsans, preces etiam fundebat ad Dominum; vel quia mutata per citharæ sonitum prava dispositione corporis in Saule, cessabat eum diabolus agitare. 3.<sup>o</sup> Quod ait Christus: *Filii vestri in quo ejiciunt?* Patres, ut *Chrysostomus Hom. XLII. in Mat.*, *Auctor Op. Imperf. Homil. XXIX.*, *Hilarius*, *Hieronymus*, et alii intelligunt de ipsis Apostolis, qui in nomine, et virtute Christi daemonia ejiciebant: unde subdit Christus: *ideo ipsi judices vestri erunt.* 4.<sup>o</sup> De filiis *Sœvæ*, et carminibus superstitiosis, jam satis dictum in generali responsione. Vide ista fusius apud interpretes, præcipue *Calmet Dissert. de Daemonibus*, an corpora possideant: *Dissert. in daemonem Asmodeum*; et in *Comment.* Ex professo etiam *Bekerum* refutarunt *Leidekerus*, *Markius*, *Poiretus* etc.

*Inst.* Euergumeni aliquando non curantur per Ecclesiæ exorcismos: imo illos palam irrident. Atqui si illi a daemone agerentur, Deus id non permetteret in contemptum Religionis. Ergo.

¶ *Transeat major. Dist. min.* Non permetteret, nisi  
Tom. II. S ali



aliquod inde bonum vellet eruere, *conc.* Non permitteret ullo modo, *neg.* Sicut permisit Christus, ut Apostoli lunaticum energumenum curare non possent, ut inde occasionem haberet eos admonendi, *hoc genus daemonicum non ejici, nisi in oratione, et jejuniis*; ita nunc permittit aliquando, nefarium spiritum non obedire exorcismis, ut inde adinoveantur exorcistae, ne mente impura, et fide parum firma ad exorcizandum accedant. Caeterum etsi ponamus, ejusmodi homines non agitari a daemone, eadem quaestionis est ratio, cur Deus illos permittat irridere exorcismos in Religionis dedecus.

Potest vero argumentum in adversarios retorqueri. Si energumeni illi numquam agitantur a daemone, sed a morbo, numquam per exorcismos curarentur: quae enim vis in exorcismis est ad morbum sanandum? Atqui saepissime sanati sunt: imo in veteri Ecclesia, cum frequentiora essent miracula, semper sanabantur. Ergo etc. Dixi *transeat maj.* quia certum non est, ejusmodi homines esse vere energumenos (a).

### P A R S III.

#### *De Mundi corporei Creatione, sive de saeculorum Opificio.*

Satis in prima Parte hujus Libri contra veteres Philosophos, et Manichaeos ostendimus, neque corporeum hunc mundum, neque materiam, unde constat, esse aeternam; aut ab Angelis, aut a malo aliquo principio procreatam. Varias autem tum veterum Poetarum et Philosophorum, tum recentiorum opiniones de modo, quo pulcherrima haec mundi moles secundum naturae leges in hanc, quam videmus, formam digesta fuerit, expendere, instituti nostri ratio non patitur. Illud Theologo ratum, fixumque esse oportet, quod monet

Au-

---

(a) Poterit haec altera Libri pars, in qua de Angelis disputatum est, si ita Praeceptorum aut brevitatis studium, aut temporis angustia suaserit, vel in tempus reservare commodius, vel excerptis illis, quae ad fidem pertinent, in reliquis omitti.

Augustinus *Lib. I. de Gen. ad lit. cap. 21.*, quidquid ab hominibus excogitatum narrationi Mosaicae divinitus inspiratae adversatur, id ut commentitium, et falsum esse rejiciendum. Quapropter de sensu tantum, quo divina haec historia accipienda, atque explicanda sit, et explicata a Patribus, et Theologis, disputandum nobis esset. Qua quidem in re plurimae sunt quaestiones longe illae, quidem jucundissimae, quas cum ista scriberem, explicavi; nunc autem studio brevitatis putavi rescandas. Unum igitur hic tantummodo expendemus.

## CAP. UNICUM

*Utrum Deus cuncta creaverit in momento, sive, ut ajunt, in instanti, an continuis sex diebus.*

**P**hilo Judaeus Platonicae Philosophiae sectator *Lib. I. Allegoriar. Legis, et Lib. de Mundi Opificio* omnia uno instanti a Deo creata esse docuit. Quod enim ait Moyses initio *Lib. Genes.* Deum cuncta singillatim, sex diebus creasse. ( et repetit tum alibi saepe, tum *Exod. XX. 11. Sex diebus fecit Deus caelum, et terram, et mare, et omnia, quae in eis sunt, et requievit in die septimo* ) per allegoriam intelligendum esse putavit. Rusticanae enim, inquit, simplicitatis, est, putare sex diebus mundum esse conditum. In eandem sententiam concessit Origenes *Lib. VI. cont. Celsum.*

II. Augustinus hanc quaestionem subtilissime versans in *Libris de Gen. ad lit. Lib. I. cap. 15., Lib. IV. cap. 8., et in Lib. XI. de Civ. cap. 9. etc.*, opinatus est, narrationem Mosaicam non per allegoriam, sed ad litteram significare, omnia in momento a Deo effecta esse. Etenim per lucem, quam Moyses ait primo die creatam, putat Augustinus, non intelligi ad litteram lucem hanc visibilem, et corpoream; sed invisibilem, ipsas scilicet Angelicas mentes, quae cum creaturas singillatim duplici modo cognoverint, in seipsis scilicet, et in Deo, factum est in eis *vespere, et mane*; cognitio scilicet obscurior, seu *vespertina*. qua creaturas in seipsis contemplati sunt, et *matutina*, qua in laudem

Dei assurgentes, clarius ipsas creaturas viderunt in Verbo. Cum ergo sex distinctis actibus varia creaturarum genera per vespertinam, et matutinam cognitionem inspexerint, factum est sexies vespere, et mane. Caeterum caelum quidem, terram, lucem, firmamentum, aridam, maria, et luminaria caeli uno, et indivisibili creationis actu condita esse docet: plantas vero, et animalia eodem illo actu creata esse in potentia propter vim scilicet genitalem rebus a Deo inditam; licet non eodem illo actu, sed postea nata sint. Non videtur tamen constans in ea sententia fuisse. Nam *Lib. II. Retract. cap. 24.* de libris *de Gen. ad lit.* ait, *plura ibi quaesita, quam inventa*: et alibi *Lib. de Catechizand. Rudibus cap. 27.* ait, sex diebus fecisse Deum caelum, et terram, et requievisse die septimo; etsi *poterat Omnipotens et uno momento temporis omnia facere.* S. Thomas *Opusc. XV. et VII.* in sententiam *Augustini* videtur inclinasse: at in summa *I. P. Q. LXXIV. art. 2.* rem in dubio relinquit. *Cajetanus* tamen in *Exposit. Gen. I.* aperte eam tuetur opinionem. Nec defuerunt alii ejusdem adstipulatores, quos in *Vindiciis August.* recenset *Norisius*; ita ut male *Cornelius a Lapide*, et in *Augustinum* iniquior *Molina*; aliique eam ut *erroneam*; et *Scripturae contrariam* notaverint.

## P R O P O S I T I O

*Augustini sententia de rerum Creatione uno simul momento, nulla potest censura notari; probabilius tamen videtur, revera sex distinctis diebus cuncta Deum creasse.*

*Prob. 1a: pars.* Illa sententia nulla potest notari censura, quam praeter magnum *Augustinum*, cujus maxima est in rebus Theologicis, et in explicatione Scripturarum auctoritas, quique rem ex professo, et diligenter tractavit, alii etiam tenuere Patres, summique Theologi; nec umquam Ecclesia proscripsit, aut notavit. Atqui talis est *Augustini* sententia de rerum creatione in uno simul momento. Eam enim tenuerunt ex veteribus, praeter *Origenem*, *Clemens Alexandrinus Lib.*

*VI. Strom.*, Isidorus *Lib. I. de Summo Bono cap. 8.*, Cassiodorus *Lib. I. Divin. Instit. cap. 22.* alique; ex recentioribus vero Cardinalis Cajetanus *cap. I. in Gen.*, et Franciscus Macedo *Tom. II. Coll. Col. VI. diff. 2.*, Cardinalis Norisius *Vindic. August. §. 9. cap. 4.* pluresque alii ex Augustinensi familia: imo Scholasticorum Principes illam saltem ut probabilem habuerunt, ut *Albertus Magnus* qui *I. P. Q. XII. art. 6.* ait: *videtur Augustino consentiendum: S. Thomas*, qui praeter loca superius laudata in *II. Dis. XII. Quaest. I. art. 2. opinio*, inquit; *Augustini plus mihi placet*; et in *Summa loc. cit. neutri sententiae praepjudicari voluit*. *Aegidius Romanus Hexam. I. P. cap. 26.* Ecclesia vero nulla eam notavit censura. Ergo tantum Ecclesiae Doctorem hac de causa accusare, magnae arrogantiae, et temeritatis est.

*Prob. 2a. pars. 1.º* Sensus obviu, et naturalis horum verborum: *tenebrae erant super faciem abyssi: dixit Deus: fiat lux. Et facta est lux. . . divisit lucem a tenebris. . . factumque est vespere et mane dies unus. . . dies secundus. . . dies tertius*: non utique alius est, nisi Deum revera creasse lucem hanc visibilem, ex qua divisa a tenebris, quae antea telluri incumbabant, factus est dies integer. Atqui incredibile est, Moysen rudi populo scribeutem, vel in ipso Libri exordio non esse locutum sensu obvio, atque nativo, qui statim legenti sese offert; sed studiosè sequutum esse sensum abstrusissimum, qui nonnisi per subtilissimas mentis meditationes potest intelligi. Ergo.

*2.º* Deus Sabatum custodiendum, et sanctificandum ea ratione praecepit *Exod. XX. 11. Sex enim diebus fecit Dominus caelum et terram, et mare, et omnia, quae in eis sunt, et requievit in die septimo, idcirco benedixit Dominus diei Sabati, et sanctificavit eum.* Atqui haec ratio non multum valeret, si non sex distinctis creasset Deus omnia. Ergo.

*3.º* In ipsa Mosaica narratione quaedam facta referuntur, quam simul in eodem momento esse non potuerunt, sed successionem temporis necessario postulant; *ex. gr.* erant tenebrae, et facta est lux: erat terra undique aquis obducta, et divisae sunt aquae ab arida.

Non

278 *Theol. Instit. Lib. V. Pars III. Cap. Unic.*

Non enim potuerunt simul esse eodem momento tenebrae, et lux; aquae ambientes omnem terram, atque a terra divisae. Ergo.

*Prob. II. ex PP.*, qui consensione moraliter unanimi inhaerentes simplici, et naturali verborum sensui, sex dies creationis pro veris, et naturalibus diebus intelligunt, et explicant. Ita Basilias *Hom. II. in Hexameron*, Epiphanius *Epist. cont. error. Orig. ap. Hieron.*, Ambrosius *Lib. I. Hexam. cap. 7. et Lib. VI. cap. 2.*, Chrysostomus, Gregorius M. et alii (a).

*Prob. III. ex servata etiam apud Gentiles traditione*, quam Hugo Grotius *Lib. de Verit. Relig. §. 14.* non solum apud Graecos, et Italos; sed etiam apud Celtas, et Indos extitisse probat ex *Josepho Lib. II. cont. Appion.*, *Clemente Alexandrino*, *Luciano*, *Philostrato*, *Dione Cassio*, et *Justino*. Gentes enim illae tempus partiri consueverant per hebdomadas, non secus ac Hebraei faciebant, ob memoriam dierum creationis. Ergo etc.

#### *Solvuntur Objecta.*

*Obje. I. cont. 2m. part. Eccli. XVIII. 1. Qui vivit in aeternum, creavit omnia simul. Ergo.*

*¶ Dist. ant.* Creavit omnia simul, idest pariter, universim, sine exceptione, conc. Simul, idest eodem tempore, subdist. Eodem tempore per sex dies distincto, conc. Eodem indivisibili temporis momento, et iterum subdist. Creavit eodem instanti ea, quae per veram creationem ex nihilo produxit, conc. Quae ex materia jam extante formavit, neg. Sensus ergo est, Deum omnia omnino creasse, nihilque esse quod non sit a Deo factum. Quod ex Graeco textu manifestum est, ubi habemus *εἰς τὸν χρόνον πάντα κοινῇ* creavit omnia communiter. Et similis est etiam phrasis in *Psal. XIII. Omnes*

---

(a) Chrysost. *Hom. III. super Gen.*, Gregorius M. *Lib. XXXII. Moral. cap. 10.*, Damascenus *Lib. II. de Fid. etc.*

*Omnēs declinaverunt, simul inutiles facti sunt.* Sed si adverbium *simul* de tempore velis intelligere, recte dicuntur creata simul, quae uno tempore per sex dies, nulla interjecta mora, creata sunt. Tandem concedi potest, eodem *instanti* creata esse quae per productionem ex nihilo facta sunt, scilicet ipsa materia, ex qua omnia formata sunt, non quae sex diebus ex praejacenti materia fuerunt condita.

*Objic. II. Gen. II. 4. Ista sunt generationes caeli et terrae, quando creata sunt, in die quo fecit Dominus Deus caelum et terram; et omne virgultum agri: ubi vides, plantas creatas esse saltem potentialiter eodem die, quo creavit Deus caelum, et terram, licet cap. I. creatae dicantur die tertio. Ergo idem de omnibus aliis dicendum est, quae aliis diebus creata referuntur cap. 1. ¶ Dist. ant. Et hic in die idem est, ac in tempore: quod frequentissime in Scripturis occurrit; con. Idem est, ac eodem momento, neg.*

*Objic. III. Athanasius Orat. III. cont. Arianos inde probat, Verbum non esse creaturam, quod si creatura esset, eodem instanti cum reliquis creatum esset; non autem dicretur Prov. VIII. genitum ante omnem creaturam. Nainque, inquit, dicendo ante omnia genuit me, se alium ab omnibus esse declarat, cum ex supradictis constet, nullam e rebus creatis prius altera factam esse; sed res omnes, factas uno eodemque mandato, simul extitisse. Ergo non solum ipse Athanasius in ea fuit opinione, ut fatetur Petavius Lib. I. de Op. sex dier. cap. 5.; sed etiam communis tunc erat a Catholicis pariter, atque haereticis recepta sententia; alioquin risu exceperissent Ariani hanc Athanasii argumentationem.*

*¶ Neg. cons. Non enim ait Athanasius, omnia omnino uno eodemque mandato facta esse; sed omnia in unoquoque genere ἀλλ' ἑκαστῶς ἀμα πάντα τα γένηενι, καὶ τῷ αὐτῷ πρ. σταγμῶνι ὑπἑσθη, sed simul omnia genera rerum uno eodemque mandato extitisse: sicut in eadem Oratione fusius ipse superius explicaverat, quem locum indicant illa verba: cum ex supradictis constet. Atque ideo recte Petrus Nannius in editione Basileensi Opp. S. Athanasii, licet in aliis fortasse non adeo accurata, ita Latine vertit Athanasii locum: Cum superius pro-*  
*ba-*

280 *Theol. Instit. Lib. V. Pars. III. Cap. Unic.*  
*batum sit, nihil ex rebus creatis ante alia sui generis*  
*conditum fuisse. Sensus ergo est, omnia, quæ unius,*  
*eiusdemque sunt generis, uno eodemque imperio a Deo*  
*facta sunt: ex. gr. omnia simul astra, omnia simul*  
*animalia, etc. Atqui Verbum genitum est ante omnes*  
*creaturas. Ergo alterius est generis, ac proinde creatu-*  
*ra non est. Quod autem S. Doctor diversa creaturarum*  
*genera distinctis diebus facta crediderit, manifestum*  
*est ex hac ipsa Oratione. III. Ait enim: Jam quod di-*  
*citur: In principio Deus fecit, idem esse ac si diceret:*  
*incepit facere; idem Moyses declarat, cum post omnia*  
*opera perfecta subiungit: et benedixit Dominus septi-*  
*mæ diei, eo quod in illa ab omnibus operibus re-*  
*quievisset Deus, quæ facere inceperat. Miror, hæc*  
*non vidisse Petavium; a quo deceptus Laurentius Ber-*  
*ti plus acquo urget laudatum Athanasii locum, neque*  
*Norisii imitatus est prudentiam, qui ab eo recitando*  
*sapienter abstinuit.*

*Objic. IV. Creatio rerum non potest esse, nisi in in-*  
*stanti. Ergo.*

*R. Dist. ant. Creatio ex nihilo, qualis fuit ea, quæ*  
*Deus primo die caelum, terramque produxit, et mate-*  
*riam, ex qua omnia postmodum formata sunt, conc.*  
*Creatio ex jam extante materia, qualis fuit creatio re-*  
*rum, quæ singulis sex diebus conditæ sunt, neg.*

*Inst. Divinam majestatem, et potentiam dedecet,*  
*etiam in rebus ex materia jam existente formandis,*  
*tempus aliquod vel brevissimum insumere. Ergo.*

*R. Dist. ant. Si non essent rationes, quibus infinita*  
*eius sapientia sic melius, et decentius esse vidit, conc.*  
*Secus, neg. Voluit enim edocere nos Deus ordinem,*  
*quem in operando imitaremur, incipiendo scilicet a lu-*  
*ce, sive rerum cognitione; id inde paulatim ab imper-*  
*fectis ad perfectiora procedendo, donec ingrederemur in*  
*illam requiem, in qua toti in Dei contemplatione, et*  
*laude maneremus. Alias etiã rationes reperies apud*  
*Patres (a). Sed etsi nullam nos rationem ejus rei vi-*  
*de-*

---

(a) V. Ambros. *Lib. I. Hexamet. cap. 7.*, Augustin. *Lib. de Catechizand. rud. cap. 17.*, et *Lib. cont. advers. Leg. et Proph. cap. 8.*

deremus ; tamen id sapientissime a Deo factum , certissime tenendum esset.

## P A R S IV.

## De homine.

**P**ostrema haec pars , omnium nobilissima , Theologo maxime necessaria est. Magni enim refert nosse primam hominis conditionem , et statum , in quo a Creatore conditus est ; atque eum , in quem culpa sua cecidit. Quocirca nobis in eam incumbendum est paulo accuratius.

## C A P. I.

*De hominis natura , ejusque creatione quoad corpus , et animam.*

**Ado. I.** **H**ominem praeter corpus habere etiam animam spiritalem , atque immortalem , jam ponimus ut certum , et in Metaphysicis demonstratum adversus atheos , et Epicurcos. Quod et Moyses aperte indicat , cum ait : *Formavit Deus hominem de limo terrae , et inspiravit in faciem ejus spiraculum vitae , et factus est homo in animam viventem* : hoc est ex corpore de limo compacto , et anima ex nihilo a Deo creata , et infusa factus est homo. Quo testimonio , inquit Augustinus *Lib. X. de Gen. ad lit. cap. 19. sane satis admonemur , ex nihilo Deum fecisse animam , quam primo homini dedit , non ex aliqua jam facta creatura , sicut corpus ex terra*. Compositus est ergo homo ex duplici principio , corporeo scilicet , et spiritali , *tamquam vinculum visibilis , et invisibilis naturae* , ut ait Damascenus *Lib. II. de Fide cap. 12.*

**II.** Hic tantum addendum est , immortalitatem animorum fidei dogma esse , cum aperte Scriptura dicat , supplicium impiorum , et praemia bonorum sempiterna fore , ut *Matth. XXV. 46. Ibunt hi in supplicium aeternum ; justi autem in vitam aeternam* : et alibi saepe : ita ut contraria doctrina sine dubio haeretica sit. At

non



non certo constat inter Theologos, utrum haerescos notari debeat, qui diceret animam corpoream; cum nonnulli Patres id innoxie dixisse videantur, ut *Tertullianus*, *Cassianus*, *Gennadius*, et quod magis mirum est, *Joannes Thessalonicensis* in Concilio VII. Oecuménico, ne verbo quidem a Patribus ejus Concilii reprehensus. Probabile quidem est, Patres illos nomine corporis intellexisse quaecumque substantiam a Deo creatam, ut de Angelis diximus. Caeterum *Estius in II. Dist. XVII. §. 6.* eam doctrinam magnae dumtaxat temeritatis, et inscitiae notat. Addi potest, eam esse erroneam, scandalosam, haeresi proximam, et ad Episcureismum ducentem. Estii quidem Adnotator, aliiq. eam non dubitant erroneam, et haereticam appellare. Definitio tamen Ecclesiae aperta *Estio* visa non est. Quod enim assertur, ex Concilio Lateranensi IV. non continere docet definitionem fidei:

III. Corpus ergo hominis formavit Deus ex limo terrae, in quo et sapientiam ostendit suam, qui tantum opus effecit ex materia tam vili; et hominem docuit, ne qua cum superbia tentaret: *Quid superbit terra, et cinis? Eccli. X. 9.* Verum constitutio humani corporis longe corpora brutorum antecellit, non solum meliori humorum temperamento; veram etiam aptiori membrorum dispositione ad quaecumque opera efficienda, figura decora, vultu in caelum erecto; ita ut etiam exterius majestatem quandam, et imperium ostendat. Fuit porro corpus hoc perfectum, quale est hominis in aetate virili; Dei enim opera fuerunt ab initio perfecta: statura vero procerior, quam nostra, ut ostendit *Masochius* de omnibus praeis hominibus, praesertim ante diluvium *Spicil. Tom. I. Dist. 3. p. 2.*, non tamen Gigantea; ut Rabbini somniarunt.

IV. De animae vero creatione ait *Moses*: *inspiravit in faciem ejus* (Heb. in nares ejus) *spiraculum vitae, et factus est homo in animam viventem*: hoc est, ut ait *Augustinus Lib. XIII. de Civit. cap. 24.*; et *Lib. VII. de Gen. ad lit. c. 2. et 3.* non de sua substantia particulam aliquam in eum immisit ut Gnostici, et Manichaei docuerunt; in quem errorem declinare videtur *Lactantius*: sed cum anima respirationem ei dedit, quae ipsius animae et vitae certum indicium est. Si enim anima ex Dei substantia

esset, vel ipsa anima Deus esset, vel Deus mutabilis esset; ideoque Deus non esset. Factus est autem homo in animam viventem, seu animal vivens; hoc est cibo, somno, aliisque adjumentis indigens, quibus cetera animalia; unde Apostolus *I. Cor. XV. 45. Factus est, inquit, primus homo Adam in animam viventem, novissimus Adam, seu Christus, in spiritum vivificantem*; vitam scilicet habens, ac tribuens ex Spiritu Sancto spiritalem.

V. Animam non fuisse ante corpus creatam, sed creando infusam, contra *Origenistas* ostendemus inferius. Utrum autem corpus primo sit formatum inanimatum, cui deinde anima infusa sit, contrariae sunt sententiae Patrum, nec liquido constat ex Mosaica narratione. *Nyssen* *Lib. II. de homine cap. 29. 30.*, *Damascenus Lib. II. de fide cap. 12.*, *S. Thomas I. P. Q. XCI. art. 4. ad 3.* utrumque simul factum arbitrantur: *Chrysostomus vero Hom. XII. et XIII.*, et Auctor apocryphus *Lib. IV. Esdrae cap. 3.* prius formatum inanimatum corpus. Utraque tamen sententia conciliari potest, si dicamus, materiam et quasdam ejus dispositiones praevisse animae creationem; sed simul ac corpus ultimam dispositionem adeptum est, animam ei esse infusam.

VI. Denique *Hevam* ex dormientis *Adae* costa fuisse formatam tradit *Moyses*, quod quidem figura erat Ecclesiae e latere Christi nasciturae, ut docent Patres ex Apostolo *Ephes. V.* Sed non propterea neganda est historiae veritas, ut facit *Cajetanus* per allegoriam explicans mulieris formationem. Vide *Nat. Alex. Tom. I. Dissert. III.*, et *Petavium Lib. II. de Opif. cap. 8.*

## C A P. II.

## De origine animarum.

*Adv. I.* CUM homo ex corpore, et anima sit compositus, non est quaestio, quomodo ex Adam omne genus humanum propagandum esset quoad corpus, de quo *Augustinus* contra Manichaeos disputat; sed valde torsit veterum ingenia illa quaestio, undenam in singu-

gulis animae oriantur? Pythagorici *μετεμψυχισμῶν* seu transmigrationem animorum de corpore in corpus committenti sunt. Origenes *Lib. I. Periarch. c. 7.*, et Priscillianus ex Platonica disciplina docuerunt, Deum principio solas creasse spirituales substantias, sed cum illae peccassent, ideo in earum supplicium creasse corporeum hunc mundum, et in eo corpus humanum, in quod veluti in carcerem animam detrusit; atque ita in singula corpora ex primo illo homine progenita singulas animas detrudere, ut praeteritorum peccatorum poenas luant, diversas pro vario ante actae vitae merito.

II. Hac sententia inter errores *Origenis* rejecta, duo tantum restant, quae dici possunt, ut aut singulae animae ex nihilo creentur a Deo in singulis Adae posteris; aut traducantur a parentibus. Utrum ex his duobus verum sit, dubitavere veteres Patres, praesertim *Augustinus*, qui usque ad mortem in ea dubitatione permansit, ut patet ex ejus *Libris duobus de Anima, et ejus origine*, aliisque (a) locis. Item *Gregorius M. Lib. VII. Ep. 53.* *Eucherius in illud Gen. II. Inspiravit in faciem etc.* *Cassiodorus Lib. de anima cap. 14.* *Rabanus Maurus Lib. II. de Instit. Clericor. cap. 57.* Quaestionis autem status non erat utrum animae traducantur ex corpore, aut ex particula aliqua animae parentum: quod utrumque absurdum esset; sed utrum aliquo spirituali modo nobis ignoto ex anima parentum, sine ulla partitione, aut immixtione, animae aliorum orirentur. Major tamen SS. Patrum pars, et concursus hodie sententia Theologorum tenet, animas in singulis hominibus a Deo creari ex nihilo, ut infra dicemus.

## PRO-

---

(a) *Lib. II. de Peccat. merit. cap. 26. et Lib. III. cap. 20. Lib. V. cont. Julian. cap. 9. Lib. ad Orosium cont. Priscillian. Ep. 165. al. 28. ad Hieron. Lib. I. Retract. cap. 1. et Lib. II. cap. 45 et 56. Lib. X. de Gen. ad lit. per totum.*

## PROPOSITIO I.

*Asserere, animas omnes creatas ante corpora, in ea de-  
trudi velut in carceres, haereticum est.*

*Prob. 1a. pars.* Apostolus Rom. IX. 11. de Jacob et Esau ait: *Cum nondum nati fuissent, aut aliquid boni egissent, aut mali.* 2.<sup>o</sup> Idem Rom. V. 12. ait, per unum hominem intrasse peccatum in mundum, in quo omnes peccaverunt; homines autem ante primum hoc peccatum fuisse innocentes, et sanctos, Scriptura nos edocet: quod verum non esset si unaquaeque anima ante corpus peccasset 3.<sup>o</sup> Unusquisque ante Tribunal Christi sisti debet, ut referat vel praemia, vel poenas pro iis, quae gessit in corpore II. Cor. V. 10.; ex quo patet, nihil ante corpus gessisse. 4.<sup>o</sup> Denique si omnes animae ante corpus extiterint, ac peccaverint, idem de anima Christi dicendum esset: quod absurdum est, atque impium. Ergo etc.

*Prob. 2a. pars.* 1.<sup>o</sup> Apostolus II. Cor. V. 4. corpus vocat non carcerem, sed tabernaculum, et indumentum, quo anima spoliari nollet: *Nam qui sumus in hoc tabernaculo, ingemiscimus gravati, eo quod nolumus expoliari, sed supervestiri; ut absorbeatur quod mortale est a vita.* 2.<sup>o</sup> Apoc. VI. 1.<sup>o</sup> Animae Sanctorum resurrectionem corporum exoptant, et votis accelerant: *Usquequo Domine non judicas? Ergo.*

*Prob. II. utraq. pars* ex unanimi SS. Patrum consensu, qui contrarium Origenis errorem damnarunt: Hieronymi *Epist. ad Pammach. cont. errores Joan. Hieresol. et alibi* (a), Chrisostomi *Hom. V. in Genes. Leonis M. Epist. XI. et XCIII.* qui hoc dogma ait ad Catholicam fidem pertinere: *Catholica, inquit, fides constanter praedicat, atque veraciter, quod animae hominum, priusquam suis inspirarentur corporibus, non fuerint: Concilii Bracarensis Can. VI., item Viennensis cap.*

---

(a) *Ep. XXVII. ab Augustin. Epist. ad Demeu.*

cap. un. de summa Trin., et Lateranensis Sess. VIII. in quibus definitum est, animam esse natura sua formam corporis, et aliorum (a).

### Objectiones.

*Objic. I.* Scriptura, et Patres docent; corpus esse animae carcerem, et sarcinam, quae naturales ejus facultates aggravat, atque hebetat. *Sap. IX. 15. Corpus, quod corrumpitur, aggravat animam, et terrena inhabitatio deprimit sensum multa cogitantem.* *Psal. CXXI. Educ de custodia animam meam.* Unde Lactantius *Lib. II. Instit. div. cap. 8.* ait, hominem teneri corpore quasi carcere septum, ne libero, ac soluto sensu veritatem cernat; eo quod, ut ait *Lib. VII. cap. 5.* anima, et corpus inter se contraria sunt: quae etiam est *Prudentii* sententia. Ergo.

*¶ Dist. ant.* Corpus ex originali peccato vitiatum, mentique rebelle, est carcer animae, eique contrarium, *conc.* Corpus, quale formatum est a Deo in homine primo, et quale etiam fuisset in posteris, si ille non peccasset, *neg.*

*Objic. II.* *Sap. VIII. 20.* Anima in hominis natiuitate venit ad corpus: *veni ad corpus incoinquinatum:* et *Eccl. XII. 7.* moriente homine pulvis revertitur in terram suam; unde erat, et spiritus redit ad Deum, qui dedit illum. Ergo erat ante corpus.

*¶ Neg. cons.* Venire enim dicitur in Scripturis, quod alicubi esse incipit, licet antea non esset, ut in *Psal. LIV. timor et tremor venerunt super me.* Redire vero ad Deum dicuntur animae, quia non ex materia educatae, sed ab ipso Deo ex nihilo creatae sunt.

*Objic. III.* Augustinus *Lib. I. De libero arbitr. cap.*

12.

---

(a) Cy-III. in illud Joann. erat lux vera: Damascenus *Lib. II. de Fid. cap. 12.*, Bernardus *Serm. II. de Nat. Dom.*, S. Thomas in II. *Dist. XVII. Q. 2. art. 2. et Dist. III. Q. 1. art. 4. ad 1.*, Augustinus *Lib. XII. de Civ. cap. 13. Lib. XII. de Trin. cap. 15. Lib. I. Retract. cap. 1. 4. 8.*

12. *Utrum*; inquit, ante consortium hujus corporis alia vita vixerit animus, et an aliquando sapienter vixerit, magna quaestio est. Hanc quaestionem *Conc. VIII. in Ps. CXVIII.* appellat profundissimam, de qua, inquit, nihil audeo definire. Imo nonnullis in locis in sententiam *Origenis* inclinat *Lib. II. cont. Academ. cap. 9., Exposit. Psal. VII., Lib. II. Soliloq. cap. 20., Lib. de quant. animae cap. 20.* Ergo.

¶ *Dist. ant.* Et hanc dubitationem tandem *Augustinus* abiecit, sententiamque catholicam docuit, *conc. Secus, neg.* Patet enim *Augustini* doctrina praecipue ex *Lib. I. Retract. cap. 1. 48.* (ubi corrigit quod dixerat *Lib. II. contr. Academic. In soliloquiis, et in Lib. de Quant. animae*), et ex alijs ejus testimonijs *Lib. XII. de civ. cap. 13. etc.*

¶ *Objic. IV.* *Hieronymus in Epist. ad Ephes. cap. 1.* ait, animas hominum fecisse quaedam in altera vita, unde a Deo aut eligerentur ad vitam, aut rejicerentur; eoque spectare verba Apostoli: *elegit nos ante mundi constitutionem*; et, *qui ante speravimus in ipso.* *Ruffinus vero (in Epist. ad Anastasium Papam)* rem dubiam esse dicit. Ergo.

¶ *Neg. cons.* *Ruffini* enim *Origenistae* auctoritatem nihil moramur. *Hieronymus* vero, ut ipse se explicat, solet in Commentarijs aliorum referre sententias, quas nec probat, nec rejicit. Optandum quidem esset, ut quid ex suo, quid ex aliorum sensu loqueretur, ostendisset. Sed vel id neglexerit, vel signa ab eo posita incuria Librarij perierint; non possumus id ei vitio vertere, cura instituti sui rationem explicaverit.

## PROPOSITIO II.

*Animas a parentibus modo corporeo traduci, certissimus est error. Catholicis autem hodie certum est, eas singillatim a Deo immediate ex nihilo creari.*

*Prob. 1a. pars. 1º.* Ex ipsa animae spiritali natura quam absurdum est per corpora produci, aut traduci  
 2º. Ex auctoritate *Augustini*, qui hunc errorem in *Tertul-*

tulliano reprehendit *Ep. CX.* al. *CLVII.* ad Optat. Nam et illi, qui animas ex una propagari asserunt, quam Deus primò homini dedit, atque ita ex parentibus, trahi dicunt, si Tertulliani opinionem sequuntur, profecto eas non spiritus, sed corpora esse contendunt, et corpulentis seminibus oriri. Quo perversius quid dici potest? 3.<sup>o</sup> Ex S. Thoma, qui non dubitat hunc errorem hæreticum appellare *I. P. Q. CXVIII.* art. 2. ponere ergo animam intellectivam a generante causari, nihil est aliud, quam ponere eam non subsistentem, et per consequens corrumpi eam cum corpore. Et ideo hæreticum est dicere, quod anima intellectiva traducatur cum sentine.

*Prob. 2.a pars. 1.<sup>o</sup> ex Script. Psal. XXXII.* Qui finxit singillatim corda eorum; patet enim nomine cordis animam in Scripturis designari, *Zach. XII. 7.* Fingens spiritum hominis in eo. *Eccl. XII. 7.* Spiritus redeat ad Deum, qui dedit illum: et *Heb. XII. 9.* Deus dicitur Pater spirituum. Quae quidem Scripturae non certe rem definiunt. Respondebat enim Augustinus *Ep. CLXVI.* al. *XXVIII.* ad Hieron. et alibi, Deum fingere hominum animas, esse Patrem Spirituum etc. sed hinc non effici, illas singillatim creare ex nihilo quia etiam ex Scripturis Deus fingit oculos, aures, aliaque hominis membra, nec tamen sequitur, ea ex nihilo in singulis hominibus creare. Nec vim facit vox *singillatim*, quae habetur in *Psal. XXXII.* Hebraice enim est *puriter*, hoc est generatim, sine ulla exceptione. Sed saltem probabile suppeditant loca illa argumentum, praesertim locus *Ecclesiastae*, ubi spiritus in eo opponitur corpori, quod hoc revertatur in terram, unde sumptum est; ille vero redit ad Deum. Ergo.

*Prob. II. ex PP.* Excepto enim Augustino, et Gregorio, qui non asserunt contrarium, sed tantum dubitant, negari non potest, Patres, qui nostram sententiam non ut dubiam, sed ut certissimam tenent, majoris esse numeri, et auctoritatis iis, qui contrarium asseruerunt. 1.<sup>o</sup> Hilarius *Lib. X. de Trin.* ait: Anima hominis opus est Dei: carnis vero generatio semper ex carne est. 2.<sup>o</sup> Ambrosius *Lib. de Noë, et Arca cap. 4.* Ex nullo homine generantur animae. Et *Lib. de Para-*  
diso

dito cap. 11. loquens de formatione Hevae: *Non anima*, inquit, *ex anima*, sed *os ex ossibus*, et *caro de carne*. 3.<sup>o</sup> Chrysostomus *Hom. XXIII. in Matth. Anima nec generatur*, nec ullum agnoscit patrem, praeter eum, cuius voluntate creata est. Idem docent Hieronymus, Theodoretus, Cyrillus, alique (a.) His accedit omnium Scholasticorum consensus, quem aperte sequitur, licet rem non definiat, Concilium Lateranense sub Leone X. Sess. XIII., ubi definit, singulas animas corporibus singulis infundi: quod verbum creationem significat. Ergo.

*Prob. III. ratione.* Anima est substantia spiritalis, et simplex, propriam operationem habens; ac proinde, nascente homine, incipit esse substantia, quae prius non erat: et in hoc differt nativitas animae a nativitate corporum, quae, antequam nascerentur, erant in alia forma. Atqui substantia esse incipiens, quae prius non erat, non fit nisi per creationem, quae solius Dei opus est. Ergo etc. Alias rationes vide apud Hugonem Victorinum, et S. Thomam, qui pluribus in locis copiose hanc questionem versat (b). Unde concludit Estius in II. Dist. XVII. §. 15. quod licet Veteres nonnulli de hac re dubitaverint; nunc tamen post tot gravissimas et de re Theologorum Scholasticorum disputationes, re diligenter excussa, omnibusque in unam sententiam indubitanter cunctibus, non poterit profecto maximae temeritatis notam effugere, si quis princeps vel diversam opinionem elegerit. vel adhuc dubitandum putaverit. Quod iudicium sequitur etiam Nat. Alexander *Hist. Eccl. Saec. Tom. II.*

T

V.

(a) Hieronymus *Ep. ad Pammach.*, Nyssenus *Lib. de Anima cap. 6.*, Theodoretus *Lib. V. ad Graecos*, Cyrillus *Lib. I. in Ioan. cap. 9.*, Athanasius *Lib. I. cont. Gentil.*, Gennadius de *Eccl. dogm. cap. 14*, Prudentius *Carm. de natura animae*, Damascenus *Lib. II. de Fid. cap. 12.*, Bernardus de *Nat. Dom.*, Magister Sent. II. Dist. XVII. Hugo Victorinus *Lib. I. de Sacr. Part. VII. cap. 30. et Quaest. CV. in Epist. ad Haeb.*, S. Thomas I. P. Q. XC. art. 2.

(b) I. P. Q. XC. art. 2. et Q. CXIII. art. 2. in II. Dist. XVII. Q. 2. art. 2. et 2. de Potentia Q. 3. art. 9. Quodlibet XII. art. 11, cont. Gent. Lib. II, cap. 85. et seq.



V. cap. 4. art. 3. §. 10. Bellarminus, alique; atque ideo quod ait Norisius in *Vindictis Augustini* cap. IV. §. 3., cui subscribit Bertius; *Suspenderet igitur etiam nunc assensum Augustinus*: divinando dicit de tanto Doctore.

### Solvuntur Objectiones.

*Objic. I. Gen. II. 3. et Exod. XX. 11.* Deus die septimo *requievit ab omni opere, quod patrarat*; quia licet res omnes assidue conservet; ut ait Christus *Ioan. V. 17. Pater meus usque modo operatur*; tamen cessavit a creatione, dans ipsis animantibus potentiam gignendi sibi simile, sicut de Adam dicitur *Gen. V. 3. Genuit ad imaginem, et similitudinem suam*; quod praecipue intelligendum est de anima, per quam homo homini similis est; alioquin homo non hominem gigneret, sed corpus inanimum. Ergo non est agnoscenda nova animarum creatio.

¶ *Dist. ant.* Requievit ab omni opere co. sensu, quod novas inde rerum species non creavit, *conc.* Quod non efficiat ultra aliquid ad conservationem rerum jam iam creatarum, *neg.* Creatio autem animarum pertinet ad conservationem humanae speciei, ut notat ipse Augustinus *Lib. X. de Gen. ad lit. cap. 3.* Nec inde sequitur, hominem non gignere sibi simile; quia cum Deus corpori jam disposito secundum legem ab ipso statutam necessario infundat rationalem animam, ipse homo est causa secunda conjunctionis animae, et corporis, per quam filius, qui terminus generationis est, similis est patri. Cum ergo ex homine non nascatur corpus inanimum, sed homo; recte dicitur Adam, alique homines gignere ad imaginem, et similitudinem suam.

*Objic. II. Gen. XII. 5. Abraham, et Loth dicuntur talisse animas, quas fecerunt in Haran: et Gen. XLVI. 26. sexaginta sex animae egressae de Jacob.* Ergo.

¶ *Neg. cons.* Anima enim ibi, sicut et saepe in Scripturis, per *Synecdochē* dicitur de homine.

*Objic. III. Augustinus, Gregorius, alique supra memorati maluerunt de hac re dubitare, quam quidquam definire.* Non est autem discipulus supra Magistrum.

Era

Ergo prudenter et nos de hac re debemus dubitare.

*¶ Dist. ant.* Dubitare maluerunt, re nondum satis excussa, nec unanimi Doctorum catholicorum consensione firmata, *conc.* Secus, *neg.* *Augustinus* licet semper de hac quaestione dubitaverit; tamen rem in dies magis, ac magis exequens, in posterioribus suis libris valde in sententiam nostram inclinavit, ut patet ex *Lib. V. cont. Julian. cap. 3.* Imo in *Epist. ad Hieron.* *Licet*, inquit, *nemo faciat optando, ut verum sit quod verum non est; tamen, si fieri posset, optarem, ut haec sententia* (de nova singularum animarum creatione) *vera esset.* Unicus ipsi restabat scrupulus, quem si abjecisset, sine dubio in eam sententiam pedibus ivisset; quomodo scilicet, posita creatione animarum, peccatum originale salva Dei bonitate, ac justitia traducatur in parvulos. Sed cum Zosimus Papa in *Epist. ad Orbis Episc.* damnaverit Pelagianos asserentes, peccatum originale non contrahi, nisi anima traducatur ex Adam, quod et hodie universa damnat Ecclesia, et ipse Augustinus fateatur *Lib. V. cont. Julian. cap. 3.*, fortasse hodie tantus Doctor a communi Catholicorum sententia non recederet. Sed si adhuc hodie dubitaret, ut credit *Norisius*, non esset aequum inhaerere potius dubitationi unius, aut alterius quamvis maximi Doctoris, quam communi omnium doctrinae tot rationibus firmatae.

*Objic. IV.* Posita animarum creatione, intelligi non potest, quomodo peccatum originale traducatur ex Adam, et quomodo constet justitia, et bonitas Dei, qui innocentes animas infundit corporibus, in quibus peccatum, et infinitam malorum seriem contrahant. Ergo.

*¶ Transeat ant., neg. cons.* Quia non sunt neganda, aut in dubium revocanda fidei dogmata, eo quod nescimus quomodo eveniant. Dixi *transeat*; quia, ut infra ostendemus, potest id aliqua ratione explicari.

## C A P. III.

*De dotibus primi hominis naturalibus quoad animum.*

**Adv.** **D**otes naturales, quibus Deus primum hominem exornavit, vel pertinent ad animum, scilicet ad ejus intellectum, et voluntatem; vel ad corpus. De prioribus hic breviter disputandum est; de posterioribus enim jam diximus cap. I. quantum satis esse videbatur.

## P R O P O S I T I O I.

*Deus intellectui Adam infudit omnium rerum notitiam, quae ad vitam tum naturalem, tum moralem pertinebant.*

**Prob. I.** Deus hominem constituit 1.<sup>o</sup> totius ferme naturae principem: ut praesit piscibus maris, volatilibus caeli et bestiis, universaeque terrae. Ergo decebat, ut ei earum rerum notitiam infunderet, quibus cum praeesse voluit. 2.<sup>o</sup> ducem, et magistrum totius humani generis, ergo scire debuit, quae doceret: 3.<sup>o</sup> boni, malique moralis capacem; ergo naturae legem nosse debuit, qua inter bonum, malamque discerneret. Hinc dicitur *Eccli. XVII. 5. Disciplina intellectus replevit illos. Creavit illis scientiam spiritus, sensu implevit cor illorum, et mala et bona ostendit illis. Posuit oculum suum super corda illorum, ostendere illis magnalia operum suorum.*

**Prob. II.** Adam *Gen. II. 19.* cunctis animalibus propria nomina imposuit. Atqui hoc opus summæ sapientiae est, ut ait Plato in *Cratilo*, et ante eum Pythagoras ap. *Cicer. Lib. I. Tuscul.* Ergo.

**Obje.** Adam credidit serpenti, se pomum vetitum comedendo futurum ut Deum, scientem bonum, et malum: *Eritis sicut Dii, scientes bonum, et malum. Gen. III. 5.* Atqui hic crassissimus error est, summam notans rerum insipientiam. Ergo.

**Neg. maj.** At enim Apostolus *I. Tim. II. 14.* *Adam non est seductus, mulier autem seducta ... fuit.*

non

non quia et ipsa non habuit saltem aliquod sufficiens rationis lumen, quo fraudes inimici posset detegere; sed quia jam sibi placendo peccaverat, et obscuratum erat prae superbia cor illius. Peccavit ergo Adam sciens, et prudens, ut placeret uxori; sicut et Salomon omnium sapientissimus, ut infra dicemus.

*Scholion.*

Ex verbis Apostoli *I. Tim. II. 14.* paulo ante recitatis sequi videtur, non tantam in *Heva* fuisse scientiam, quantam in *Adam*; nec profecto tanta illi necessaria erat.

PROPOSITIO II.

*Voluntas hominis libero arbitrio praedita est.*

*Est dogma fidei.*

*Prob. I. ex Scriptura. Eccl. XV. 14. Deus ab initio constituit hominem, et reliquit illum in manu consilii sui. Adjecit mandata, et praecepta sua. Si volueris mandata servare, conservabunt te . . . Apposuit tibi aquam et ignem: ad quod volueris porrige manum tuam. Ante hominem vita et mors, bonum et malum: quod placuerit ei, dabitur illi. Nihil clarius.*

*Prob. II. ex Patribus. Augustinus Enchir. cap. 25. Mortis, inquit, supplicium Dominus homini comminatus fuerat, si peccaret; sic eum munerans libero arbitrio, ut tamen regeret imperio, terreret exitio. Item pluribus libris idipsum contra Manichaeos ostendit. Supervacaneum est aliorum Patrum sententias proferre. Caeterum quae suo loco *Lib. VII.* proferentur pro libero hominis arbitrio post peccatum, a fortiori probant, illud valuisse ante peccatum.*

*Prob. III. ratione. 1.° Deus Adam praecepit, ne de ligno scientiae boni, et mali comederet; poenamque intulit pro violatione praecepti. Atqui is, qui libertate arbitrii caret, nec praecepti capax est; cum necessario agat; nec peccati, nec poenae. Ergo. 2.° Voluntas hominis ad finem ultimum, seu ad universale bonum neces-*

cessario determinata est, sed in electione boni particularis, seu *mediorum ad finem*, sequitur rationis iudicium. Atqui omnia bona particularia ratio non concepit ut bonum universale; sed ita iudicat bona, et utilia ad finem ultimum, ut possit iudicare vel mala, vel inutilia, vel non necessaria. Ergo voluntas non potest illa necessario appetere; ac proinde libera est.

*Dices.* Voluntas Adami, imo et cujuslibet hominis, non poterat appetere malum, quatenus malum est. Ergo cum ratio aliquid malum iudicabat, non poterat voluntas illud appetere; et vicissim quando aliquid iudicabat bonum, non poterat illud voluntas rejicere, ac proinde libera non erat.

¶ *Neg. cons.* Cum enim res aliqua iudicatur ut particulare bonum, potest voluntas intellectum movere, ut aliquem in eo bono defectum consideret, propter quem vel majus bonum impediat, vel saltem in peculiaribus temporis, loci, et personae circumstantiis non bonum, sed malum videatur. Et idem contraria ratione dicas de eo, quod iudicatur particulare malum. Licet enim voluntas non moveatur, nisi intellectu quodam modo factum praefereute; ipse tamen intellectus mirum in modum voluntati blanditur in eo, quod ei placere videt.

### PROPOSITIO III.

*Erant in voluntate primorum parentum aliquae passionēs, illae scilicet, quae ordinantur ad bonum; non erant tamen in eo statu, in quo fuerunt, et sunt hodie post peccatum.*

*Prob. 1a. pars.* Si nullae in Adamo fuissent passionēs, ac illae quidem, quae ad bonum diriguntur, ex. gr. amor et gaudium de bono praesenti; odium ac detestatio mali, desiderium et spes boni absentis: tunc non homo, sed truncus quodammodo fuisset, carens iis adiumentis, quibus ad bonum prosequendum, malumque fugiendum incitaretur. Ergo.

*Prob. 2a. pars.* Hujusmodi passionēs, ut sunt in nobis, fueruntque in Adamo post peccatum, rationem praeveniunt, eique reluctantur; ideoque passionēs di-

cuntur.

euntur; quia scilicet eas patimur inviti. Atqui in Adamo ante peccatum hujusmodi inordinatio non erat, ut dicemus infra de justitia originali. Ergo etc.

Dixi aliquas passiones in primis parentibus fuisse. Illae enim, quae miseriam, et molestiam afferunt, in illo statu felicitatis non fuerunt; ut ex dicendis constat.

## C A P. IV.

De imagine, et similitudine Dei in homine.

Adv. I. **Q**uod ait Dominus *Gen. I. 26. Faciamus hominem ad imaginem, et similitudinem nostram*, Antropomorphitae corporeum fingentes Deum, ita intelligebant, ut in corpore hominis imago Dei esset, Hos refutavimus *Lib. III.*

II. Licet Patres unanimi consensu doceant, imaginem, et similitudinem Dei non esse in corpore hominis, sed in anima; non uno tamen modo id explicant. Nonnulli enim rationem imaginis ponunt in intellectu, ut Augustinus *Lib. VI. de Gen. ad lit. cap. 12. et alibi*; alii in libero arbitrio, ut Basiliius *Hom. IX. Hexam.*, Ambrosius *Lib. VI. Hexam. cap. 8.* aliique (a): alii in dominatu super terrenas creaturas, ut Chrysostomus *Hom. VIII. et IX. in Genes.* alii denique in tribus hisce simul, ut Nyssenius *Lib. de Creation. hom. cap. 17.*, Damascenus *Lib. II. de fid. cap. 12.*

III. Nonnulli etiam ex Patribus imaginem a similitudine volunt esse distinctam; ita ut imago quidem in donis naturalibus, similitudo vero in ornamentis gratiae sita sit. Ita sentiunt Irenaeus *Lib. III. cap. 20.*, Basiliius *Hom. X. Hexamer.* aliique (b).

PRO-

(a) Hieronymus *Epist. ad Damas.*, Bernardus *Serm. de annuntiat. Dom.*

(b) Origenes *Lib. III. Periarch. cap. 6.*, Ambros. *Lib. VI. Hexamer. cap. 7. et 8.*, Hieronymus *in cap. XXVIII. Ezech.*, Chrysostomus *Hom. IX. in Gen.*, Theodoretus *Quaest.*

## PROPOSITIO I.

*Imago Dei in anima hominis ponenda est, in triplici scilicet facultate, intellectu, libera voluntate, et dominatione in res creatas.*

*Prob. 1a. pars. 1.º* Ad hoc dicitur homo factus ad imaginem, et similitudinem Dei, ut praesit piscibus maris, volatilibus caeli etc. Atqui haec praestantia, ac praefectura non in corpore, sed in animo constat; tum quia dominari, ac praeesse animi est; tum quia falsum est, hominem corporis robore cunctis animantibus praestare. Ergo. *2.º* Apostolus Coloss. III. 9. hortans fideles, ut imaginem Dei in se renovent, illam renovationem utique in anima constituit: *expe- liantes vos veterem hominem cum actibus suis, et induentes novum, eum, qui renovatur ad agnitionem, secundum imaginem ejus, qui creavit illum.* *3.º Spiritus est Deus. Joan. IV. 24.* quod nos Lib. III. demonstravimus. Ergo Dei imago non potest esse in corpore: idque confirmatur ex omnium Patrum, et Theologorum consensu.

*Prob. 2a. pars. 1.º* Deus est spiritus intelligens, libere volens, omnibus dominans. Ergo si in anima hominis sita est imago Dei, utique in intellectu, voluntate, et dominatu sita est. *2.º* Deus creavit hominem ad imaginem suam, ut praesit etc. Atqui praestantia haec et dominatio necessario secum requirunt intellectum, et liberam voluntatem; et contra substantia spiritalis, et intelligens necessario habet etiam liberam voluntatem, et dominium aliquod (saltem suorum actuum). Ergo in his tribus homo ad imaginem Dei factus est. *3.º* In hominis creatione ipsa SS. Trinitas operata est, et ad imaginem ipsius SS. Trinitatis conditus est homo, ut colligitur ex iis verbis: *faciamus hominem ad imaginem, et similitudinem nostram*: quibus verbis et naturae unitatem, et plures personas indicari, demonstravimus Lib. IV. Atqui non in solo intellectu, nec in sola voluntate, nec in potentia sola, sed in tribus hisce constat ratio imaginis SS. Trinitatis, ut in Libris de Trinitate fuse disserit Augustinus. Ergo.

Co

## Corollaria.

I. Ergo etiam Angeli ad imaginem Dei facti sunt : imo tanto perfectius , quanto in ipsis est praestantior intellectus , voluntas etc. , ut observat Gregorius *Hom. XXXV. in Evang.* ideoq. *Ezech. XXVIII.* Angelus dicitur *signaculum similitudinis.*

II. Ergo falso Auctor *Quaest. Vet. et Nov. Test. Quaest. XXI. et XXIV. ap. Augustin.* , et Auctor *Commentarii in Paulum Ambrosio* perperam tributi in *I. Cor. XI.* putant , mulierem non fuisse ad imaginem Dei formatam. 1.<sup>o</sup> Etenim et mulier intellectu , voluntate , et dominatu aliquo praedita est. 2.<sup>o</sup> Id docent SS. Patres , Basilius *Hom. X. Hexam.* , Ambrosius *Lib. VI. Hexam. cap. 8.* , Augustinus *Lib. XII. de Trin. cap. 7.* et aperte docet ipsa Scriptura ; cum enim dicit *Gen. I. 27. ad imaginem Dei creavit illum* : statim addit ; *masculum , et feminam creavit eos.* Et *cap. IX. 6.* prohibens homicidium , addit : *ad imaginem quippe Dei factus est homo* , quod de viro pariter , et muliere dictum est. Quod autem ait Apostolus *I. Cor. XI. 7. Vir imago , et gloria Dei est ; mulier autem gloria viri est* , eum habet sensum ; 1.<sup>o</sup> quod vir immediate ad imaginem Dei factus est ; mulier , interveniente viro , ex quo formata est : quo sensu Adam *Gen. V. 3.* dicitur genuisse *ad imaginem , et similitudinem suam* ; licet filius etiam fuerit , mediante Adam , ad imaginem , et similitudinem Dei : 2.<sup>o</sup> quia viro magis , quam mulieri competit dominatio in res creatas , quia ipsa mulier naturaliter viro subjecta est. Vide S. Thomam *I. P. Q. XCIII. art. 1. ad 1.*

III. Ergo imago Dei non est in homine abolita per peccatum , sicut nec in Angelis , cum sita sit in ipsa spiritali natura. Est tamen valde deformata , tum propter jaecturam gratiae , quae eam ornat ; tum propter caecitatem intellectus , pravitatem voluntatis , et ipsius dominationis coarctatos limites , ut infra dicemus ; ideoque Apostolus nos admonet , ut renovemur ad imaginem Dei. *Non est tamen usque adeo detrita imago Dei* , ut ait Augustinus , *ut nulla in ea lineamenta remanserint Lib. de Spiritu , et lit. cap. 27.* Si quando ergo Pa-



Patres scribunt, peccato hominis imaginem Dei esse de-  
letam, vel improprie loquuntur; vel imaginem usur-  
pant pro accidentalibus ejus ornamentis, sive donis su-  
pernaturalibus.

*Scholion.*

I. Homo dicitur creatus ad imaginem Dei, in quo  
distinguitur a Verbo Dei, quod est imago Patris in-  
creata, et perfectissima, *splendor gloriæ, et figura*  
*substantiæ ejus. Heb. I. 3. Vide Augustinum Lib. XV.*  
*de Trin. cap. 2. et 3.*

II. Licet imago Dei in animo constet; in ipso tamen  
corpore divina imago quodammodo relucet; ut obser-  
vat Augustinus *Lib. VI. de Gen. ad lit. cap. 12. et I.*  
*de Genes. cont. Manich. cap. 17.*

*Pronaque cum spectent animalia cetera terram;*  
*Os homini sublime dedit, caelumque tueri*  
*Jussit, et erectos ad sidera tollere vultus;*  
ut ait Poeta.

PROPOSITIO II.

*Licet similitudo Dei in homine intelligi possit de ipsa*  
*imagine; non absurde tamen SS. Patres eam*  
*in donis supernaturalibus constituunt.*

*Prob. 1a. pars. 1.º Gen. I. 26. Postquam dictum est*  
*faciamus hominem ad imaginem, et similitudinem no-*  
*stram, paucis interjectis subiungitur: ad imaginem Dei*  
*creavit illum: et contra Gen. V. 1. sola similitudo me-*  
*moratur: ad similitudinem Dei fecit illum; quod satis*  
*insinuat, idem esse imaginem, ac similitudinem. 2.º*  
*Gen. IX. 6. et Eccli. XVII. 1. sola imago nomina-*  
*tur: ad imaginem quippe Dei factus est homo: et con-*  
*tra Jac. III. 9. sola similitudo: ad similitudinem Dei*  
*facti sunt homines. 3.º Si similitudo accipi debet pro*  
*gratiæ donis, etiam imago idem significat I. Cor. XV.*  
*49. sicut portavimus imaginem terreni, portemus et*  
*imaginem caelestis. Ergo etc.*

*Prob. 2a. pars. I. ex ipsa auctoritate Patrum, quos*  
*supra citavimus, quibus addimus Cyprianum (sive Au-*  
*cto-*

ctorem *Lib. de Patientia* Nyssenum (sive alium Auctorem *Lib. de Creatione hominis*) Damascenum *Lib. II. de fide cap. 12.*, Eucherium *Lib. I. in Genes.*, Rupertum, Bernardum, Magistrum *Sententiarum*, S. Thomam.

*Prob. II.* Nullum in Scriptura verbum supervacaneum est; sed saltem est ad maiorem rei explicationem positum; ergo *imago*, et *similitudo*, seu ut dicitur *Sap. II. 23. imago similitudinis* non quaecumque significat imaginem, sed valde similem prototypo. Sed homo gratiae donis spoliatus non est utique imago valde Deo similis. Ergo *similitudo*, praeter naturae proprietates, gratiae etiam dona significat.

### Corollarium.

Ergo si accipitur similitudo pro ipsa imagine, sicut non periit per peccatum imago Dei in homine, ita nec similitudo: si vero pro donis supernaturalibus, dicendum est, periisse in homine per peccatum similitudinem Dei; permansisse vero imaginem.

## C A P. V.

### De iustitia originali.

*Ado. I.* **N**omine iustitiae originalis duo veniunt necessario intelligenda, tamquam essentialia; alia vero duo, tamquam priorum consecutaria. Necessaria, et essentialia sunt 1.<sup>o</sup> perfectissimus ordo partium, quae hominem componunt; ita ut corpus, et quaecumque inferiores potentiae subjectae sint spiritui, nec ullus sit inordinatus concupiscentiae motus, rationem praevergens: 2.<sup>o</sup> gratia sanctificans, et quae eam ordine praecedunt fides, spes, charitas: quaeque sequantur virtutes scilicet morales infusae, dona Spiritus Sancti, et actuale auxilium, sine quo iustitia servari non potest. Consecutaria vero hujus iustitiae sunt 1.<sup>o</sup> felicitas, et beatitudo, non quidem consummata per gloriam, sed omnem miseriam animi, et corporis excludens: 2.<sup>o</sup> corporis immortalitas. Quarendum ergo, utrum primi parentes cum hac iustitia a Deo creati sint.

II.

II. Omnes Catholici docent, Deum hanc originalem justitiam Adamo fuisse largitum contra Pelagianos, qui asserebant, Adamum in eo statu fuisse creatum, in quo nunc homines nascuntur, concupiscentiae, miseriae, morti obnoxii, omniique gratia Dei vacui, quibus similia docent Sociniani. At non convenit inter Catholicos, utrum Deus gratiam sanctificantem Adae donaverit in ipso creationis instanti momento, an postea. Veteres nonnulli Scholastici, ut *Alensis*, *Bonaventura*, *Aegidius Romanus*, ejusque Commentator *Gavardus* docuerunt, Adam non in ipso creationis actu, sed paulo post fuisse gratiae donis exornatum.

III. E contrario Lutherus in cap. III. *Gen.* commentus est, originalem justitiam non solum in ipso creationis momento fuisse Adamo inditam, sed etiam fuisse ei naturalem; sicut naturale est oculo videre lumen. *Statuamus*, inquit, *justitiam non fuisse quoddam donum, quod ab extra accederet, separatum a natura hominis, sed fuisse vere naturalem, ut natura Adae esset diligere Deum, credere Deo, agnoscere Deum. Haec tam naturalia fuere in Adamo, quam naturale est, quod oculi lumen recipiant.* Unde refert, originalem justitiam esse de natura hominis: *ea autem per peccatum amissa, non mansisse integra naturalia, ut Scholastici delirant.* Hunc errorem in Bajo etiam damnarunt *Pius V.* anno MDLXVII., *Greg. XIII.* anno MDLXXIX., et *Urbanus VIII.* in ea propositione num. XXVII. *Integritas primae conditionis non fuit indebita naturae humanae exaltatio, sed naturalis ejus conditio cum aliis, quae eodem collineant, nempe XXI. Humanae naturae exaltatio, et sublimatio in consortium divinae naturae debita fuit integritati primae conditionis, ac proinde naturalis dicenda est, non supernaturalis, et aliis similibus, quas propositiones ipse Bajus publico scripto revocavit, agente Francisco Toledo, qui postea Cardinalis creatus est.*

IV. Estius in II. *Dist. XXV. §. 6.* media ingressus est via. Cum enim justitia originalis duo complectatur essentialia, gratiam, scilicet, et rectum ordinem partium; fatetur quidem, gratiam fuisse donum supernaturale; sed probabili ratione dici posse ait, *rectitudinem sive re-*

etum ordinem partium, quo in primo homine inferiora superioribus subdebantur sine ullo rebellis concupiscentiae motu, fuisse naturalem, sive ipsi naturae debitam proprietatem.

V. Ne autem in ambiguo laboremus, advertendum est 1.<sup>o</sup> aliquid dici posse, naturale duplici ratione; vel quia ipsius naturae proprietas est; vel quia in ipsa naturae creatione a Deo donatum est, naturamque ipsam exornat, et perficit: 2.<sup>o</sup> nomine concupiscentiae duo etiam posse significari; scilicet vel appetitum boni sensibilis juxta ordinem rationis, ut appetitus cibi ad vitam necessarij; vel appetitus inordinatus cujuscumque rei contra ordinem rationis: in quo posteriori sensu hic a nobis usurpatur. Utrum ergo Deus justitiam originalem in ipsa creatione primis parentibus dederit, videbimus hic; utrum vero fuerit illa naturalis, in sequenti capite.

#### PROPOSITIO I.

*In ipso creationis momento Deus homini largitus est originalem justitiam, seu gratiam sanctificantem, cum donis ipsi adnexis, rectitudinem partium, seu immunitatem ab omni inordinato concupiscentiae motu.*

*Prob. 1a.* pars de gratia sanctificante, et ex consequenti etiam de donis, quae in *Lib. VII.* Tractatu de Gratia docebimus, numquam a gratia sanctificante divelli. 1.<sup>o</sup> ex *Script. Eccl. VII. 30.* Deus fecit hominem rectum. Hanc autem rectitudinem, sive rectum ordinem intelligendum etiam de justitia, et sanctitate, ostendit Apostolus *Ephes. IV. 23.*, ubi ait: *Renovamini spiritu mentis vestrae, et induite novum hominem, qui secundum Deum creatus est in justitia, et sanctitate veritatis.*

*Prob. II.* ex *PP.* quos supra diximus, similitudinem Dei in homine intellexisse de donis supernaturalibus gratiae sanctificantis. Quippe illi ex consequenti docent, sicut in primo creationis momento factus est Adam ad imaginem, et similitudinem Dei, ita simul gratiam sanctificantem accepisse. Quibus unum hic addere sufficiat

erat Augustinum *Lib. de Corr. et gr. cap. II. n. 32.* Tunc ergo, inquit, dederat homini Deus bonam voluntatem: in illa quippe eum fecerat, qui fecerat rectum. Bona autem voluntas Augustino charitas est. Quasi vero, inquit *Lib. I. de Gratia Christi cap. 21.* aliud sit bona voluntas, quam charitas, quam Scriptura nobis esse clamât ex Deo, et à Patre datam, ut filii ejus essemus.

*Prob. III. ex Concilio Tridentino Sess. V. can. 10.* Si quis non confitetur, primum hominem Adam, cum mandatum Dei in paradiso fuisset transgressus, statim sanctitatem, et justitiam, in qua constitutus fuerat, amisisse .... anathema sit. Ex quibus Concilii verbis Jansenius quidem *Lib. I. de Grat. Primi hom. cap. I.* imo et M. Bellelli *Lib. Mens Augustini etc.* infert, dogma fidei esse, Adamum in ipso creationis actu exornatum sanctificante gratia; sed male; Aliud est enim, inquit Estius in *II. Dist. XXV. §. 1.*, conditum esse in gratia, aliud in ea constitutum. Imo cum ante in decreto positum esset, Adam conditum esse in sanctitate, illud verbum deletum est, suffectumque constitutum, ne veterum Scholasticorum sententia damnaretur, ut testantur Historici. Vide ipsum Estium in *II. Dist. XXV. §. 1.*

*Prob. 2a. pars de concupiscentia, tum ex ipsis verbis Eccl. VII. Deus fecit hominem rectum; tum ex I. Jo. II. 15. Concupiscentia .... non est ex Patre, sed ex mundo est; tam ex Apostolo; qui Rom. VIII. et alibi saepe vocat eam peccatum; quia scilicet ex peccato producta est, ut explicant omnes Catholici post Tridentinum Sess. V. can. 5: ac proinde non erat ante peccatum, tum denique ex aliis argumentis, quibus infra probabimus, ipsam concupiscentiam materialiter malam esse.*

*Prob. II. ex Augustino Lib. II. de peccator. mer. et remiss. cap. 22. Hanc ergo obedientiam priusquam violassent, placebant Deo, et placebat eis Deus; et quamvis corpus animale gestarent, nihil inobediens in illo adversum se moveri sentiebant. Faciebat quippe hoc ordo justitiae; ut quia eorum anima famulum corpus a Domino acceperat: sicut ipsa eidem Domino suq̃ ita illi corpus obediret, atque exhiberet vitae illi congruum*

gruum sine ulla resistentia summatum. Hinc et nudè erant, et non confundebantur. Quod quidem Augustinus millies repetit, et inculcat contra Pelagianos, qui concupiscentiam in Paradiso fuisse comminisciebantur. Ergo.

Porro cum Scriptura, et Patres omnem concupiscentiam e Paradiso ablegant, non solum intelligendi sunt de concupiscentia carnis, sed etiam de concupiscentia spiritus; hoc est de quocunque inordinato appetitu, aut laudis, aut vanæ gloriæ, aut scientiæ. Joannes enim loc. cit. omnem concupiscentiam complexus est cum ait: *Omne, quod est in mundo, concupiscentia carnis est, et concupiscentia oculorum, et superbia vitæ, quæ non est ex Patre; sed ex mundo.* Hinc perperam Molina in *Concordia Disp. IV.* ejusque discipuli Suarez *Lib. X. de Grat. cap. 6. 15. et al. a Lapide in Genes.* aliique putant, saltem tentationem superbiæ ab Adamo, et ipsis Angelis ante peccatum fuisse sustinendam, ac vincendam. Ipsa igitur *φλαυρία*, sive sui ipsius amor adversus rationem non surgebat.

*Objicies.* Augustinus *Lib. II. de Genes. cont. Manich. cap. 8. n. 10.* Nondum, ait, spirituales hominem debemus intelligere, qui factus est in animam viventem, sed adhuc animale. Tunc enim spiritalis effectus est, cum in Paradiso, hoc est in beata vita constitutus; præceptum etiam perfectionis accepit, ut verbo Dei consummaretur. Simile quid docent Cyprianus *Epist. LXXIV. ad Pompejum*, et Nyssenius *Orat. I. in ea verba, faciamus hominem ad imaginem etc.* ex illo Apostoli *I. Cor. XV. 46.* non prius quod spiritale est, sed quod animale deinde quod spiritale. Ergo non in ipso creationis actu justitia originali fuit Adam exornatus.

*¶ 1.º Dist. ant.* Augustinus, Cyprianus, Nyssenius docent, prius hominem factum animale, postea spiritalem ratione ordinis, *conc.* Ratione temporis, *neg.*

*¶ 2.º* Augustinum *Lib. I. Retract. cap. 10.* retractasse quod in loco citato dixerat: *Nec illud, inquit, Apostoli factus est primus homo Adam in animam viventem, sicut ille voluit, intellexi.* Apostolus enim ad hoc adhibuit illud testimonium, ut doceret esse corpus animale: ego autem, hinc putavi, hoc esse monstrandum,

304 *Theolog. Institut. Lib. V. Pars IV. Cap. V.*  
*animalem factum prius hominem, non corpus hominis*  
*solum. Igitur ex Augustino, aliisque Patribus prius fuit*  
*animale, postea spiritale in sensu Apostoli, hoc est po-*  
*stea erit spiritale in resurrectione corporum, conc. Po-*  
*stea fuit spiritale propter gratiam Adamo superadditam,*  
*neg.*

## PROPOSITIO II.

*Dogma fidei est, habuisse etiam Adam immortalitatem*  
*corporis, non eo sensu quod non posset mori;*  
*sed quod posset non mori. Habuit etiam*  
*et inchoatam beatitudinem, quae omnem*  
*ab illo statu ablegaret*  
*miseriam.*

*Prob. 1a. pars I. ex Scriptura 1.º Deus mortem*  
*minatus est, tamquam peccati poenam Gen. II. 17. in*  
*quocumque die comederis ex eo, morte morieris. 2.º Sap.*  
*I. 13. Deus mortem non fecit. Et cap. II. 23. Deus*  
*creavit hominem inextinguibilem, et ad imaginem si-*  
*mitudinis suae fecit illum. Invidia autem diaboli mors*  
*introivit in orbem terrarum. 3.º Rom. V. 12. Per*  
*unum hominem peccatum in hunc mundum intravit, et*  
*per peccatum mors. Quae testimonia inepte Pelagiani de*  
*morte animae interpretabantur. De ea enim morte in-*  
*telligenda sunt, qua Deus revera damnavit Adam post*  
*peccatum iis verbis: pulvis es, et in pulverem reverteris.*  
*Vide Augustinum Lib. I. de peccat. merit. et rem.*  
*cap. 5. Ergo.*

*Prob. II. ex Ecclesiae definitionibus. Placuit, inquit,*  
*Concilium Milevitanum II. Can. 1., ut quicumque di-*  
*cit, Adam primum hominem mortalem factum; ita ut sive*  
*peccaret, sive non peccaret, moreretur in corpore, hoc*  
*est de corpore exiret, non peccati merito, sed necessitate*  
*naturae, anathema sit. Quod Concilium confirmarunt In-*  
*nocentius I. Epist. XXVI. et Caecilius Epist. ad E-*  
*piscopos Galliae. Idem definiunt Arausicanum II. Can.*  
*2. probatum a Bonifacio II. Epist. ad Caesar. Arelat.*  
*cap. Sirmond. Tom. Concil. Galliae, atque ab Ecclesia*  
*universa; et Tridentinum Sess. V. cap. 2. Patrum loca*  
*prae-*

praetermittimus, ut in re apertissima (a); ita ut mirum sit, extitisse qui se catholicum profiteretur, et tamen id negaret, Franciscum Garassium in *Summa Theol. Lib. III. p. 700.*

Prob. 2a. pars. ex Augustino *Lib. VI. de Gen. ad lit. cap. 25. Illud Adae corpus ante peccatum et mortale secundum aliam, et immortale secundum aliam causam dici poterat: idest mortale, quia poterat mori; immortale, quia poterat non mori.* Quod autem de morte dictum est, idem dicas de quacumque aegritudine, aut miseria tum corporis, tum animi. Quid mirum, inquit idem Augustinus *Lib. II. de Gen. cont. Manich. cap. 7., si corpus potuit ab omnipotente artifice tale fieri, ut nulla molestia, nulla indigentia cruciaret hominem ante peccatum, et nulla corruptione tabesceret? Ergo.*

Prob. 3a. pars, quae ex duabus prioribus consequitur. Homo enim tantis gratiae donis cumulatus, tanta luce et naturali, et supernaturali perfusus, nulla miseria afflictus, nullo mortis metu perterrefactus, utique inchoata fruebatur beatitudine. *Hoc gaudium, ait Augustinus Lib. I. de lib. arbitr. cap. 13., quod hujus boni adeptione gignitur, cum tranquille, et quiete atque constanter erigit animum, beata vita dicitur; nisi tu putet, aliud esse beate vivere, quam veris bonis, certisque gaudere.* Et *Lib. I. de lib. arb. cap. 11. Quamquam credamus, hominem tunc perfecte conditum a Deo, et in beata vita constitutum, ut ad aerumnas mortalis vitae ipse inde propria voluntate delapsus sit. Ergo etc.*

---

(a) V. Augustinum *Lib. I. de peccat. meritis et remis a cap. 2. ad 9. Lib. XIII. de Civ. cap. 5. et 23. Enchirid. cap. 25. et 26. et al., Prosperum Respons. ad V. Object. Vincensianae Gregorium Lib. IV. Moral. l. 26., aliosque, qui in laudata Scripturae loca ediderunt commentaria,*



*Objectiones diluuntur.*

*Objic.* I. Corpora primorum parentum ex contrariis composita sunt elementis, sicut et aliorum animantium corpora. Ergo sicut haec ex pugna elementorum paulatim senescunt, donec intereant; ita et illa.

*R. Neg. cons.* Quia ex omnipotenti Dei voluntate hic effectus id homine non sequebatur ex elementorum pugna. Si enim Deus per annos quadraginta potuit ita regere populum in deserto ut nec vestimenta nec calceamenta detrita sint, cur non potuit ita servare corpus hominis incolumem, ut numquam periret? quo exemplo utitur Augustinus *Lib. I. de pecc. mer. et remis. cap. 3.* Utrum autem hoc oriretur ab ipsa proportionem et apta temperatione humorum in corpore humano, ut sentire videtur Augustinus *Lib. I. de Pecc. merit. cap. 16. et al.* et Bonaventura in *II. Dest. XIX. art. 2*; an ex vigore quodam supernaturali ipsi animae indito, ut putat S. Thomas *I. P. Q. XCVII. art. 1.*; an denique ex naturali, vel supernaturali virtute ligni vitae, alia quaestio est.

*Objic.* II. Si vis extrinsecus corpori Adae fuisset adhibita, ex. gr. si lapis in caput decidisset, si venenum hausisset, si ferro guttur, aut pectus fuisset transverberatum, siue dubio laesum, imo et mortuum esset, nisi continua miracula velimus adstruere in ipso naturali rerum ordine. Ergo.

*R. Neg. cons.* Providentia enim Dei, cui omnes causae subiiciuntur, ita hominem innocentem protexisset, ut nihil tale ei accideret,

*Objic.* III. Ambrosius *Lib. de fide resurrectionis cap. 6.* ait, mortem nobis esse naturalem: imo non in poenam, sed tamquam remedium datam. Ergo.

*R. Dist. ant.* Ait, mortem esse naturalem, quia post peccatum versa est in naturam, et aliquando etiam remedium tot malorum, quae per peccatum invecata sunt, conc. Quia fuit originalis conditio etiam hominis innocentis, neg. Sic Apostolus *Ephes. II. 3.* ait; *Eramus natura filii irae* non quia natura mala est; sed quia *vitium pro natura inolevit*, ut explicat Augustinus *Tract. IV: in Joan.* Hanc autem esse Ambrosii mentem, patet

ex cap. 9. ejusdem libri, ubi ait: *mors in natura non fuit, sed conversa in naturam est.*

*Objic.* VI. Finis ultimus omnis creaturae rationalis, ideoque ipsius hominis, est beata Dei visio, ut supra de Angelis ostensum est. Atqui si Adam in aeternum vixisset, nunquam hunc finem fuisset essecutus. Ergo.

*W. Neg. min.* Fuisset enim translatus in gloriam sine morte; sicut et nos *ingemiscimus gravati, eo quod nolumus expoliari, sed supervestiri, ut absorbeatur quod mortale est a vita;* ut inquit Apostolus II. Cor. V. 4.

### PROPOSITIO III.

*Praeter gratiam habitualement, instructus etiam fuit Adam actuali auxilio ad perseverandum, non quidem efficaci, sed versatili.*

*Prob.* 1a. pars contra Gregorium Ariminensem in II. Dist. XXIX. q. 1. concl. 3. ex iis; quae supra diximus de Angelis *Hoc adjutorium, inquit Augustinus Lib. de Corr. et gr. cap. XI. num. 32. si vel Angelò, vel homini cum primum facti sunt, defuisset; quoniam non talis natura facta erat, ut sine divino adjutorio posset manere, si vellet; non utique sua culpa cecidissent; adjutorium quippe defuisset, sine quo manere non possent (a).* Absurdum autem est, Deum ita deseruisse hominem, ut sine sua culpa laberetur. Ergo.

*Prob.* 2a. pars ex eodem Augustino, qui eod. Lib. de corr. et gr. cap. 11. postquam duplex distinxit adjutorium, quo, et sine quo, docet, Angelis, primoque homini datum adjutorium sine quo, ut supra de Angelis diximus cap. VI. Quibus hic addimus, unam Augustino fuisse rationem, cur post Adae lapsum opus sit adjutorio quo, sive efficaci, infirmitatem scilicet depravatae naturae, qua infirmitate cum careret Adam ante peccatum, ejusmodi adjutorio non egebat; sed permanere, vel non permanere in gratia, in ejus libero relinque-

(a) V. et Enchir, cap. 206. Epist. CVI, ad Paulin.

308 *Theol. Instit. Lib. V. Pars IV. Cap. V.*  
 tur arbitrio. Quid ergo? inquit cap. 11., *Adam non habuit gratiam? Imo habuit magnam; sed disparem.*  
 Integra duo capita 11. et 12 laudati libri essent hic exscribenda, sed sufficiunt quae allata sunt. Ergo.

### O bjectiones.

*Objic. I. cont. 2. m. part. Augustinus Lib. de Nat. et Grat. cap. 51. Si iste, inquit, (Pelagius) qui hunc librum scripsit, de illa hominis natura loqueretur, quae primo inculpata, et salva condita est, utcumque acceptaretur hoc dictum.* Atqui Pelagius non aliam gratiam agnoscebat, ut suo loco dicemus, praeter liberum arbitrium, legem, doctrinam, illustrationem intellectus. Ergo concedit *Augustinus*, posse ista dici de Adamo innocente. Hoc argumento moti *Petavius, Tournely*, alique volunt, Adami gratiam actualem in sola mentis illustratione fuisse positam. Atqui sola illustratio mentis non constituit gratiae naturam, ut suo loco dicemus. Ergo.

¶ *Neg. cons.* Non enim ait *Augustinus*, defendi posse Pelagianum dogma, si sermo sit de homine innocente; sed *utcumque acceptaretur hoc dictum*, hoc est tolerabilior esset error ille, de quo ibi contra Pelagium disputabat, ut fusius dicemus *Lib. VII. cap. 7. prop. 2.* propter majores liberi arbitrii vires: Caeterum ex *Augustino Lib. XVI. de Civ. cap. 13.* voluntas Adae etiam ante peccatum illustrabatur, ut videret; et accendebatur, ut amaret.

*Objic. II. cont. 2. m. part. Augustinus Lib. III. de Trin. cap. 4.* docet, omnes creaturarum motus a Deo fieri quod et probat *S. Thomas 1a. 2ae. Q. CIX. art. 1. 2. et 9.* Et *Lib. III. cont. Gent. cap. 98. et 149.* ex ratione primae causae, et primi moventis infert, Deum esse, qui primo creaturas omnes ad agendum moveat. Ergo.

¶ *Neg. cons.* Nam ut diximus *Part. I. hujus Lib.* constat, omnes creaturarum motus a Deo tamquam prima causa oriri; licet nonnullis creaturis virtutem dederit, qua se libere possint ad agendum movere, quod ex ipso *S. Thoma* fusius ibi explicavimus. Caeterum in ea ipsa *Quaest. CIX. art. 10. ad 3.* ait Angelicus Doctor

etor

etor : *Dicendum*, quod sicut Augustinus dicit in *Lib. de Corr. et grat.* homo in primo statu accepit donum, per quod perseverare posset, non autem accepit, ut perseveraret : nunc autem per gratiam Christi multi accipiunt donum gratiae, quo perseverare possunt, et ulterius eis datur quo perseverent.

*Objic.* III. Haec doctrina nova est, et a Jansenio primum excogitata. Ergo uti suspecta rejicienda est.

*R. Neg. ant.* Non solum enim traditur ab Augustino quem S. Thomas sequitur loco mox laudato; verum etiam a veteribus Scholasticis, ut ait Bellarminus *Lib. de Gratia primi hom. cap. 4.*, ubi exposita Augustini doctrina : *Neque ab hac sententia, inquit, dissentiunt Scholastici, ut videre est apud Magistrum Lib. II. Sent. Dist. XXIV. §. 4., S. Bonaventuram in ead. Dist. Quaest. 2., Gregorium Ariminensem Dist. XXIX. Quaest. I. artic. 1. concl. 3., et S. Thomam 1. 2. Q. CIX art. 9.* Quibus adde eos Theologos, qui ne in hoc quidem naturae corruptae statu agnoscunt auxilium per seipsum efficax. Unde ait Tournely *De Grat. Q. 2. art. 1.* *Observandum, nihil in Jansenio reprehendendum fore quantum ad praesens institutum, si per famosam distinctionem auxilii quo, et sine quo, hoc unum contenderet, Adamum scilicet innocentem opus tantum habuisse ad bene agendum, et perseverandum auxilio gratiae sufficientis, sine quo; non vero auxilio gratiae efficaci, seu quo.*

Alias objectiones supra dissolvimus, ubi de Angelis diximus. Quae vero ex Scripturis opponunt, in quibus omnia bona opera a Deo fieri dicuntur qui dat velle et perficere etc. manifeste de homine lapso dicta sunt.

## C A P. VI.

*Utrum justitia originalis fuerit in primis parentibus naturalis.*

*Adv. I.* JAM diximus, duplici ratione posse aliquid dici naturale; vel quia naturae proprietates est ita ut si desit, natura ipsa manca sit; vel quia ab ipsa natura

nativitate datum est, naturamque ipsam exornat, et perficit.

II. Hic addendum; triplici etiam ratione posse aliquid dici supernaturale; vel per se, ut ajunt *entitative*, quia naturam omnem creatam, imo et possibilem superat, ut beata Dei visio; vel per *accidens*, et quoad modum, quia scilicet modo supernaturali datum est, ut vita Lazaro, visus caeco divinitus restitutus, licet utrumque esset naturae proprietas; vel denique *relative*, quia scilicet superat alicujus naturae vires; licet non superet vires naturae superioris, ut locutio asinae Balaam.

III. His explicatis, certum est, justitiam originalem posse dici naturalem, quia ab ipsa nativitate collata est; et supernaturalem, quia supernaturali modo data est. Sed quaestio est, utrum dici eam oporteat naturalem priori sensu, quia scilicet naturae proprietas fuerit; an supernaturalem per se, et *entitative*.

#### PROPOSITIO I.

*Si justitia originalis adaequate accipiatur, quatenus scilicet complectebatur etiam gratiae dona, immortalitatem, et quae ex iis consequeretur, inchoatam beatitudinem; dogma fidei est, eam fuisse per se supernaturalem.*

*Prob. 1a. pars. 1.º* Gratia est donum creaturae indbitum: alioquin gratia jam non esset gratia, ut ait Apostolus Rom. XI. 6. Sed quod est naturale, est naturae ipsi debitum. Ergo. 2.º Gratia creaturam elevat in consortium divinae naturae, ut ait Petrus Epist. II. cap. I. 4., atque a conditione servili extollit in adoptionem filiorum Dei. Atqui hoc naturam omnem exsuperat. Ergo. Hinc Cyrillus Lib. I. in Joan. cap. 9. *Participatione*, inquit, *luminis splendet Adam super naturam suam glorificantis Dei gratia, variis donorum ornamentis ascendens.* Et cap. 13. *Creatura cum serva sit, nutu solum, et voluntate Patris ad supernaturalia vocatur.*

*Prob. 2a. pars. I.* Ipsa natura corporis ex contrariis elementis compacti ad dissolutionem tendit: quod in-

nu-

nuunt illa verba: *pulvis es, et in pulverem reverteris* Gen. III. 19. et *Eccli. XL. 11. omnia, quae de terra sunt, in terram convertentur*. Ergo nisi supernaturali virtute fuisset roborata, naturaliter periisset. Licet enim ponamus in ligno vitae naturalem virtutem protrahendi vitam ad tempus valde diuturnum, quod consequi videtur ex iis, quae post peccatum Adae dixit Dominus: *videte ne sumat de ligno vitae, et vivat in aeternum*; tamen sine peculiari protectione Dei, arcentis omnes mortiferos causarum naturalium incursus, perpetuam vitam fructus ille dare non poterat.

*Prob. II. ex Augustino supra laudato Lib. VI. de Gen. ad lit. cap. 25. Mortalis ergo erat conditio corporis animalis, immortalis beneficio Conditoris (a).*

*Prob. III. utraque pars ex Constitutionibus Pii V., Gregorii XIII. et Urbani VIII., a quibus istae propositiones in Bajo damnatae sunt: XXVII. Integritas primae conditionis non fuit indebita naturae humanae exaltatio, sed naturalis ejus conditio. LXXVIII. Immortalitas primi hominis non erat gratiae beneficium, sed naturalis conditio. Ergo.*

### *Diluuntur Objecta.*

*Objic. I. cont. 1m. part. Plures sunt Patres, qui dicunt, similitudinem Dei in homine, quam distinguunt ab imagine, et in gratiae donis constituunt, esse naturalem hominis conditionem, ad quam per peccatum perditam nos reformat gratia Salvatoris. Ita Leo M. Serm. I. de Jejunio X. mens. ait, hanc esse naturalem nostri generis dignitatem, si in nobis quasi in quodam speculo divinae benignitatis forma resplendat: quibus similia docent Fulgentius, Prosper, aliique Ergo.*

*¶ Dist. ant. Dicunt, esse conditionem naturalem eo-*  
*sen-*

---

(a) V. et Lib. XI. de Civ. cap. 20., Cyrillum Alex. Lib. I. in Joan. cap. 15 et Lib. IV. cont. Julian. Magistrum Sent. Lib. II. Diss. XIX.

sensu, quod ab ipsa nativitate data sit, naturamque ipsam exornet, atque perficiat, *conc.* Quod ex naturae principiis fluat, naturaeq. ipsi sit debita, *neg.*

*Inst.* 1.<sup>o</sup> Homo non solum ab ipsa nativitate, sed naturaliter est ad imaginem Dei. Atqui imago Dei constare non potest sine charitate. Ergo.

*R.* *Dist. min.* Imago quoad *accidentalitatem* non potest constare sine charitate, *conc.* Quoad ipsam *essentiam*, *neg.* Essentia enim imaginis in facultate intelligendi, et volendi sita est, ut supra docuimus. Dona autem charitatis, spei, etc. *accidentalitatem* sunt.

*Inst.* 2.<sup>o</sup> Nonnulli Patres docent, per peccatum deletam esse imaginem Dei in homine. Atqui non est deleta facultas intelligendi, atque volendi, licet multum fuerint intellectus, et voluntatis vires attritae; sed amissa penitus gratia est. Ergo imago Dei praecipue, et naturaliter in donis gratiae sita est.

*R.* 1.<sup>o</sup> Retorquendo argumentum. Per peccatum non est deleta hominis natura. Atqui per peccatum amissa est gratia sanctificans. Ergo non erat haec naturalis.

*R.* 2.<sup>o</sup> *Dist. maj.* Docent, deletam esse imaginem Dei quoad *accidentalem* ejus ornatum, *conc.* Quoad *essentiam*; *neg.* Hinc Augustinus *Lib. II. Retract. cap. 24.* explicat, quod alibi dixerat, imaginem Dei peccato fuisse deletam: Quod dixi, inquit, posteriore loco, Adam imaginem Dei, secundum quam factus est, perdidisse peccato, non sic accipiendum, tamquam in eo nulla remanserit; sed quod iam deformis, ut reformatione opus habeat.

*Inst.* 3.<sup>o</sup> Augustinus *Lib. de corrept. et grat. cap. 11.* ait, vitam aeternam primo homini, si in charitate permansisset, futuram fuisse mercedem meriti, quae nunc est donum gratiae. Ergo charitas, sine qua meritum esse non potest, non erat in primo homine donum gratiae, sed naturae conditio.

*R.* *Neg. cons.* Nihil enim est Augustino magis contrarium. Ait enim *Enchir. cap. 106.* de Adam: Neo ipsum Deus esse voluit sine gratia sua. Et in eod. *Lib. de Cerr. et grat. cap. 11.* ait, primum hominem habuisse gratiam magnam, sed disparem; hoc est gratiam primi hominis ante lapsum fuisse ad nutum liberi ar-

bitri versatilem; ideoque vitam aeternam futuram ei fuisse mercedem meriti; nunc autem indigere hominem, ut ipsa ejus voluntas a gratia inclinetur, ac moveatur ad bonum; ideoque vitam aeternam esse ei donum gratiae. Vide *cap. 11. et 12 lib. de Corr. et grat.* Sed de hoc fusius dicemus *Lib. VII.*

*Obje. II. cont. 2m. part.* Scriptura, Patres, et Concilia constanter docent mortem homini illatam esse tamquam peccati poenam, non tanquam naturae conditionem, ut patet ex locis supra productis *cap. praec. prop. 2.* Unde Augustinus *Lib. XIII. de Civ. cap. 15. Constat,* inquit, *inter Christianos veraciter catholicam tenentes fidem, etiam ipsam nobis corporis mortem non lege naturae . . . sed merito inflictam esse peccati.* Et Concilium Milevitanum *Can. 1.* damnat eos, qui mortem referunt ad naturae necessitatem; et Arausicanum *II. Can. 2.* ait, eos, qui ita sentiunt, injustitiam Deo tribuere. Ergo.

*¶. Dist. ant.* Et Scriptura, Patres, Concilia, ut certum ponunt (quod dogma fidei est) immortalitatis donum jam homini a Deo concessum fuisse ante peccatum, *conc. Secus, neg.* Posito enim hoc, quod Deus immortalitatis donum homini contulerat; non poterat ille eo sine sua culpa spoliari. Quapropter merito dampnati Pelagiani, qui dicebant, mortem non poenam peccati, sed necessitatem esse naturae. Haec enim haeretica opinatio injustitiam Deo tribuit, non quidem proprie; nulla enim inter Deum, et creaturam esse justitia potest proprie dicta; sed improprie, quia non decebat sapientiam, bonitatem, et providentiam Dei spoliare hominem sine ulla culpa donis jam gratuita bonitate collatis; *sine poenitentia enim sunt dona Dei Rom. XI. 29.* Imo addunt Theologi, qui naturam puram, ut dicemus inferius, impossibilem esse putant, non decuisse Dei sapientiam, bonitatem, providentiam, ut immortalitatem homini innocenti non donaret, eoque sensu Patres esse intelligendos.

*Obje. III.* Sapientis est artificis materiam eligere aptam naturae, et dignitati formae. Quis enim, nisi stultus, opus nobilissimum, et perpetuo duraturum conficiet ex luto, aliave fragili materia? Atqui  
anti-



314 *Theol. Instit. Lib. V. Pars. IV. Cap. VI.*

anima natura sua est forma corporis, ut supra diximus. Ergo cum illa sit natura sua immortalis, debuit ei corpus aptari natura sua immortale.

*¶ Dist. maj.* Sapientis est artificis materiam eligere formae aptam, si inveniri potest, vel si non potest, ipsi materiae ineptae extrinsecus eam dare dispositionem, aut virtutem, qua apta reddatur, *conc.* Eligere semper materiam natura sua aptam, *neg.* Imo eo sapientiore se prodit artifex, cum materiam natura sua ineptam arte reddit aptam; ut si quis ex argilla conficeret statuam, quae nulla hominum, aut naturae vi confringi, aut loco dimoveri possit, nisi cum placet artifice. Cum ergo anima sit sua natura forma corporis, hoc est materiam exigat natura sua mortalem, in hoc sapientiam, et potentiam suam maxime ostendit Deus, quod materiae isti immortalitatem dedit, qua redderetur apta accipiendae formae immortalis; sibi tamen reservavit, ut eam immortalitate spoliaret, quando id opus esset in animae ipsius supplicium. Ita fere S. Thomas *I. P. Q. LXXVI. art. 5. ad. 1. (a).* *Inst.*

(a) Hanc, inquit, objectionem aliquis forte vellet evadere per hoc quod diceret, corpus hominis ante peccatum incorruptibile fuisse. Sed haec responsio non videretur sufficiens; quia corpus hominis ante peccatum immortale fuit non per naturam, sed per gratiae divinae donum: alioquin immortalitas ejus per peccatum sublata non esset, sicut nec immortalitas daemonis. Et ideo aliter dicendum est, quod in materia duplex conditio invenitur, una, quae eligitur ad hoc, quod sit conveniens formae; alia quae ex necessitate consequitur priorem dispositionem sicut artifex ad formam serrae eligit materiam ferream aptam ad secundum dura; sed quod dentes serrae hebetari possint et rubiginem contrahere, sequitur ex necessitate materiae. Sic igitur et animae intellectivae debetur corpus, quod sit aequalis complexionis. Ex hoc autem de necessitate materiae sequitur, quod sit corruptibile. Si quis vero dicat, quod potuit Deus hanc necessitatem vitare, dicendum est, quod in constitutione rerum naturalium non consideratur quid Deus facere possit; sed quid naturae rerum conveniat, ut dicit Augustinus Lib. II. Sup. Gen. ad liter. Providit tamen Deus adhibendo remedium contra mortem.

*Inst.* Anima naturaliter horret, ac refugit mortem, cum sit naturalis pars totius compositi, quod est homo vivens; ac proinde naturaliter appetit semper corpori esse conjuncta. Atqui naturali huic appetitui nihil potest esse magis adversum, quam eam paucis annis informare corpus; deinde ab eo sejungi in aeternum; resurrectio enim naturalis non est. Ergo etc. Adde his 1.<sup>o</sup> non decere sapientiam Dei, ut opus efficiat ex duabus partibus, quarum altera mortalis, altera immortalis sit, et ambo sejunctae imperfectae sint. 2.<sup>o</sup> Hominem a Deo factum naturaliter miserum, subjectum scilicet naturae suae necessitati moriendi, qua nihil est terribilius. Ergo.

*W.* Haec facile ex superiori responsione dissolvitur. Deus enim homini innocenti immortale corpus dederat, licet non a natura, sed Dei beneficio immortalitas illa oriretur. Quod autem postea fuerit necessariae morti obnoxius, non est natura, seu prima conditio instituti hominis, sed poena damnati.

## PROPOSITIO II.

*Si justitia originalis intelligatur de sola subjectione corporis, et potentiarum inferiorum imperio rationis, dogma fidei non est, eam fuisse homini innocenti supernaturalem.*

*Prob.* Illud dogma fidei non est, de quo Catholici Theologi disputant in utramque partem rationibus utriusque gravissimis, nec est adhuc ab Ecclesia definitum. Atqui talis est ea quaestio, utrum rectus ille ordo, quo inferiora rationi subdebantur, in homine innocente naturalis, an supernaturalis fuerit. Ergo ad fidem non pertinet.

*Prob. min.* Et 1.<sup>o</sup> quidem de ea Theologi catholici disputant in utramque partem. Nam major quidem Scholasticorum pars tenet, rectitudinem illam fuisse supernaturalem. At Henricus Gandavensis *Quod lib. VI. quaest. 11.*, et Gregorius Arimincensis *in II. Sent. volunt fuisse naturalem*. Estius vero *in II. Dist. XXV. §. 6.* productis utriusque partis argumentis, judicium suum

suum ita suspendit, ut potius inclinet in sententiam posterioriorem, eamque ait esse Augustini: *Multum*, inquit, *hanc sententiam commendat auctoritas Augustini*; quod et fatetur Bartholomaeus Medina 1a. 2ae. Q. CIX. art. 2. dicens: *quae tamen opinio sine dubio videtur esse Augustini.*

2.<sup>o</sup> Rationes utriusque partis gravissimae sunt. Priori sententia novem argumenta producit *Estius*: pro posteriori octodecim. Praecipuae autem prioris partis rationes hae sunt. 1.<sup>o</sup> Homo ex carne, et spiritu compositus partim cum Angelis, partim cum belluis communem habet naturam. Atqui naturae belluinae naturale est inclinari in bonum sensibile, ac delectabile. Ergo quod in homine appetitus hic contra rationem non pugnaret, supra naturam erat. 2.<sup>o</sup> Ablata gratia Dei per peccatum, statim concupiscentia secuta est, unde homines erubescere inceperunt. Atqui non producta est a Deo; quia I. Joan. II. 16. *concupiscentia non est ex Patre*: non ab ipso homine; quia eam passus est invitus: non denique a diabolo, qui suavitatem quidem peccatum, sed non punivit. Ergo ab ipsa conditione naturae sensibilis, quae per gratiam veluti fraeno coercebatur, quo sublato, statim in libidinem exarsit. Hinc Augustinus Lib. III. cont. Julian. cap. ult. ait: *Gratia quippe ibi magna erat; ubi terrenum, et animale corpus bestialem libidinem non habebat. Qui ergo vestitus gratia non habebat in corpore suo quod puderet; spoliatus gratia sensit quod operire deberet* 3.<sup>o</sup> Augustinus Lib. I. Retract. cap. 9. probat quae scripserat Lib. III. de lib. arb. cap. 20. *Si ignorantia, et difficultas essent hominis primordia naturalia, non esset culpandus, sed laudandus Deus.* Et S. Thomas, cujus maxima est auctoritas I. P. Q. XCV. art. 1. *Manifestum est*, inquit, *quod illa subjectio corporis ad animam, et inferiorum virium ad rationem, non erat naturalis*; alioquin post peccatum mansisset, cum etiam in daemonibus dona naturalia post peccatum permanserint. Et addit: *Quod si, gratia deserente, soluta est obedientia carnis ad animam; Ergo per gratiam in anima existentem inferiora ei subdebantur.* Angelico autem Doctori major Scholasticorum pars subseribit.

E con-

E contrario 1.<sup>o</sup> Concupiscentia, de qua hic loquimur, nempe inordinata inclinatio ad delectabilia contra imperium rationis, mala est; quia ex peccato est, et ad peccatum inclinatur, ut saepe docet Augustinus (a), et post eum Theologi complures (b): idque Bellarminus ut dogma catholicum defendit contra Pelagianos *Lib. VI. de Amiss. Grat. et statu pecc. cap. 14.* Atqui cuncta opera naturae, quae fecit Deus, bona sunt. Ergo concupiscentia a natura non est: non est ex Patre, a quo natura creata est: ac proinde naturale est bonum ei contrarium. 2.<sup>o</sup> Si concupiscentia naturalis esset, homo esset natura infelicissimus. Cur enim exclamat Apostolus: *Infelix ego homo, quis me liberabit de corpore mortis hujus? Rom. VII. 24.* nisi propter concupiscentiam? 3.<sup>o</sup> Esset natura sua ita effectus; ut non posset diu abstinere a peccato, et damnationem aeternam evadere. Alias rationes vide apud Estium, aliosque Theologos.

3.<sup>o</sup> Ecclesia nihil adhuc definivit. Quod enim opponitur ex Bullis Pii. V., et Greg. XIII., qui damnaverunt hanc thesim XXVII. inter Bajanæ *Integritas primæ conditionis non fuit indebita humanæ naturæ exaltatio, sed naturalis ejus conditio*: non obsistit huic sententiæ, inquit Estius; loquitur enim articulus ille de integritate prima, quatenus comprehendit gratiam, imo quatenus in gratia præcipue consistit, de quo jam supra ostendimus, non fuisse naturalem primo homini, sed supernaturalem. Patet hic sensus manifeste ex doctrinæ Auctoris in eo capite, cujus titulus, seu summarium ab

Au-

(a) Augustinus *Lib. de peccat. orig. dap. 24, et seq. Lib. I. de Nup. et Conc. cap. 22. Lib. I. cont. 2. Epist. Pelag. cap. 15. et seqq. Lib. II. cons. Julian. cap. 7. Lib. VI. et V. contra Julian. Lib. VI. cont. Julian. cap. 5.*

(b) Noris. *Vindic. cap. 2. § 2.*, Aureolus *In II. Dist. XXX. art. 2.*, Ariminensis *ibid. Q. I. art. 2.*; P. Macedo *Lib. IV. de Clavibus Pet. cap. 10.*, P. Bagotius *Lib. V. Demonst. Dogm. Chriss. Disp. VII. cap. 1. §. 4.* Esparza *Q. VII. de Grat.*; Bellarminus *loc. sup. cit.*, Contensonus *Tom. II. Diss. I. cap. 1.*; Du Hamel. *Tom. III. L'Herminier Diss. de Peccatis*, Petavius *Lib. XIII. de Incarn. cap. §. 20.* et alii præter omnes Augustinianos.

318 *Theol. Institut. Lib. V. Pars. IV. Cap. VII.*

*Auctore praemissum, idem est cum articulo. Nam ibi praecipue agit de gratia, quae nimirum absolute justum, et rectum hominem constituit. Idem patet ex articulis. XXI. XXIII. et XXIV. praecedentibus, qui sunt ejusdem argumenti; et loquuntur tantum de dono gratiae adoptantis hominem in filium Dei. Denique id liquet ex declaratione Facultatis Theologicae Lovaniensis in scripto quodam super dictis articulis edito. Ergo haec quaestio ad fidem non pertinet, et posset utrumque salva fide defendi. Sed nos a communi Catholicorum doctrina Theologorum non putamus hac in parte recedendum. Vide Berti T. V. Dissert. II. cap. 1. §. 7.*

C A P. VII.

*Utrum status purae naturae sit possibilis.*

*Adv. I.* **C**eleberrima est haec quaestio inter Theologos, utrum potuerit Deus condere hominem in statu *purae naturae*; hoc est non ordinatum ad finem gloriae, sine ulla gratia, concupiscentiae, mortis, aliisque aerumnis obnoxium.

*II.* *Lutherus*, et *Bajus*, ut supra diximus, putarunt, hoc non potuisse a Deo fieri, eo quod censebant, originalem justitiam, etiam prout gratiam, et immortalitatem complectebatur, naturalem fuisse hominis proprietatem, atque ideo naturae debitam.

*III.* Hac haeresi damnata tum a Concilio Tridentino, tum a SS. Pontificibus *Pio V. et Greg. XIII.* Theologi catholici in tres partes dividuntur. Nonnulli enim affirmant, statum naturae purae impossibilem esse, non in sensu *Lutheri*, et *Baji*, quasi scilicet gratia, et immortalitas naturae ipsi debita proprietates esset; sed quia non decebat bonitatem, sapientiam, et providentiam Dei. Alii ex adverso docent, statum illum esse omni ex parte possibilem; atque hi rursus dividuntur in duas classes; nonnulli enim docent, statum illum purae naturae potuisse semper durare; nonnulli vero dicunt, non potuisse in perpetuum, imo

imo nec ad tempus diuturnum manere. Alii denique media quadam incedunt via, asserentes possibilem quidem esse statum illum, excepta concupiscentia, quam ut supra diximus, docent esse non naturalem proprietatem, sed naturae ipsius vitium.

## PROPOSITIO.

*Quamvis Deus potentia sua absoluta potuisset creare hominem sine ullo supernaturali dono; probabiliter tamen defendi potest sententia Norisii, Berti, Contensoni, aliorumque Theologorum; scilicet, statum purae naturae esse impossibilem, non quidem in sensu Lutheri, aut Baji, sed in sensu catholico; hoc est quia non decebat Dei bonitatem, sapientiam, providentiam.*

*Prima pars. patet; Quia quod supernaturale est, indebitum est naturae; et quidquid contradictionem, ac rerum repugnantiam non involvit, id absoluta Dei potentia fieri potest.*

*Prob. 2a. pars. Status purae naturae condiciones complectitur quatuor. 1.º Quod homo non sit ordinatus ad gloriam, quae in visione Dei est. 2.º Quod omni careat supernaturali gratia. 3.º Quod obnoxius sit concupiscentiae. 4.º Quod subjaceat morti, aliisque aerumnis. Atqui non decebat bonitatem, sapientiam, ac providentiam Dei hujusmodi creare hominem. Nam 1.º finis naturalis cujuscumque rationalis creaturae est beata Dei visio, et gloria, ut supra verisimile esse demonstravimus: naturalis, inquam, quoad appetitum, licet supernaturalis sit quoad media, quibus illum assequatur. 2.º Posito hoc naturali ordine humanae naturae ad gloriam, non decebat bonitatem, sapientiam, et providentiam Dei denegare adjumenta, quibus posset ad finem illum perveniri, gratiam scilicet habitualement, vel saltem actualement. Imo etsi ponamus, naturalem hominis finem esse visionem Dei naturalem, ejusque amorem ut auctoris naturae, ad hoc ipsum necessaria erat gratia Dei, quae coerceret in homine φιλαυτιαν, seu amorem sui ipsius, et cupiditatem. Quibus accedit, quod*

quod quaecumque fingatur naturalis beatitudo, ad quam homo necessario inclinatur, non potest illa constare sine securitate numquam amplius eam amittendi. Quae securitas cum sine gratia, esse nequeat; quia nemo naturae viribus certus esse potest, se numquam in aeternum peccaturum: perspicuum videtur, in statu naturae purae impossibilem esse quamcumque beatitudinem; ideoque in statu illo ejus esse hominem conditionis, ut numquam finem suum, quicumque tandem ille sit, possit attingere: quod sapientiam Dei, bonitatem, providentiam non decet. 3.<sup>o</sup> Concupiscentia, utpote per se *materialiter* mala, ac vitium, vel non est a natura, ut docent nonnulli Theologi, de quibus supra diximus *cap. praec.*; vel saltem maximum est impedimentum, quominus homo finem suum assequatur. Imo in statu purae naturae, exclusa gratia Dei, qua concupiscentia fraenatur, ac vincitur, omnes homines sine dubio praeveritatores effecisset praecepti illius, quod Deus non poterat homini non imponere, scilicet ut ipsum Deum, saltem ut naturae auctorem, super omnia diligeret; ideoque omnes homines ad damnationem ipse adduxisset: quod Dei bonitatem, sapientiam, et providentiam non decebat. *In natura hominis ante peccatum pacem decebat esse, non bellum*, inquit Augustinus *Lib. III. cont. Julian. cap. 11.* 4.<sup>o</sup> Ipsa concupiscentia, ut et mors, aliaeque hujus vitae aeternae, magnae miseriae sunt argumentum; unde exclamabat Apostolus: *Infelix ego homo*. Atqui id non decebat bonitatem, sapientiam, et providentiam, Dei, qui rationales creaturas non ad miseriam, sed ad felicitatem condidit; unde illud axioma Augustini *Lib. I. Op. Imperf. conct. Julian. Sub Deo justo nemo miser esse potest, nisi mereatur*. Quo in axioma, ut et in aliis Augustini sententiis, *justum* non de stricta justitia, quae inter Deum, et creaturam intercedere nequit, accipiendum est; sed de eo quod Dei sapientiam decet, bonitatem, providentiam. Ergo status naturae purae, posita bonitate Dei, erat omni ex parte impossibilis.

*Prob. II. ex Augustino*, qui statum purae naturae pluribus in locis demonstrat impossibilem contra Pelagium

gium, qui assererat, revera Adamum in eo statu fuisse conditum, atque in eodem statu nunc nasci homines. Id S. Doctor refellit non solum ex Scriptura, sed ex ipsis rationibus paulo ante allatis. Unde concludit *Lib. IV. cont. Julian. cap. ult. Quid restat, nisi ut causa istorum malorum sit aut iniquitas, aut impotentia Dei, aut poena peccati? Sed quia nec injustus, nec impotens est Deus, restat, quod grave jugum super filios Adam non fuisset, nisi delicti meritum praecessisset. Et Lib. IV. cont. Julian. cap. 3. Bonam dicis hominis naturam, quae talis gratiae opitulationem meretur: quod gratanter audirem; si hoc propterea, quia rationalis creatura est, diceret; neque enim gratia Dei per Jesum Christum Dominum nostrum lapidibus, aut lignis, pecoribusque praestatur; sed quia imago Dei est, meretur hanc gratiam.*

*Prob. III. ex S. Thoma in II. Dist. III. Q. 1. art. 1. ubi ait: Oportuit, naturam humanam taliter institui, ut non solum haberet illud, quod sibi ex principiis naturalibus debebatur; sed etiam aliquid ultra, per quod facile in finem perveniret. Et Lib. IV. cont. Gent. cap. 52. Considerando divinam providentiam, et dignitatem superioris humanae naturae, satis probabiliter probari potest, hujusmodi defectus concupiscentiae, mortis etc. esse poenales; et sic colligi potest, humanam naturam peccato aliquo esse infectam.*

Ex quibus, aliisque, quae susius tractantur a Theologis, concludit Aegidius Romanus in *II. Dist. XXX. Q. I. art. 1. Cogimur dicere, fuisse quandam opportunitatem, et quandam necessitatem, et quoddam debitum, quod natura humana in sui institutione fuerit cum dono quodam supernaturali, et gratuito: sed hujusmodi necessitas non potest esse absolute, et simpliciter; quia tunc gratia non esset gratia. Ergo licet Deus naturae humanae nihil debeat, debebat tamen sibi ipsi, suaeque sapientiae, bonitati, ac providentiae naturam humanam justitia originali adornare; ac proinde status purae naturae impossibilis est. Vide Norisium in *Vindiciis August.*, Fulgentium Bellelli in *Lib. qui titulus Tom. II.**



*Mens Augustini*, aliosque ex Augustiniana schola Theologos, *Lafosse*, *Clenaertium*, alios, quibus adde ex Thomistis *Contensonium*, *Zumel*, alios.

### Scholion.

Rationes, quae testatum naturae purae in homine impossibilem fuisse concludunt, etiam in Angelis impossibilem fuisse probant, exceptis iis, quae de morte, aliisque vitae mortalis aerumnis sunt homini peculiares; neque ullum possunt in Angelis habere locum.

### Solvuntur Objectiones.

*Objic. I. Pius V. et Gregorius XIII. damnarunt hanc Baji propositionem num. LV. Deus non potuisset a principio talem creare hominem, qualis nunc nascitur.* Ergo contraria propositio vera est; ac proinde possibilis est status purae naturae.

*Dist. ant.* Damnarunt hanc propositionem in sensu *Baji*, conc. In sensu *Augustini*, *S. Thomae*, et catholicorum Theologorum, qui illam ante, et post laudatos Pontifices innoxie defenderunt; ac defendunt, neg. Sciendum ergo est, summos illos Pontifices non damnassee theses ex *Bajo* excerptas in quocumque sensu; alioquin dicendum esset, Deum potuisse a principio creare hominem in peccato, qualis nunc nascitur, quod absurdum est; sed in sensu auctoris; ajunt enim post recensitas theses: *Quas quidem sententias . . . quamquam nonnullae aliquo pacto sustineri possent; in rigore, et proprio sensu ab assertoribus intento . . . damnamus etc.* Et hoc Theologi omnes fatentur. Sensus autem *Baji* erat, originalem justitiam, etiam quatenus gratiam, et immortalitatem complectebatur, proprie gratiam vocari non posse, sed fuisse naturae proprietatem, eoque titulo ipsi debitam; ita ut si Deus illam homini denegasset, maneam quodammodo condidisset naturam. Patet autem hic sensus non solum ex aliis propositionibus ibi damnatis; sed etiam ex Libris ejus Auctoris, ut fuse ostendit *Laurentius Berti Tom. V. Dissert. III.*, et fatetur *Bellarminus Lib. De Gratia Primi hom.*  
cap.

cap. 1., ubi postquam retulit Lutheri sententiam, qui docebat, tam naturale fuisse primo homini diligere Deum, credere Deo etc. quam naturale est, quod oculi lumen recipiant, subjungit: *Huc etiam referri debent articuli ante paucos annos a duobus summis Pontificibus damnati Pio V. et Gregorio XIII.* Caeterum tam aperte hodie demonstrata est differentia sententiarum Augustinianae a damnatis articulis, per scripta Norisii, Bellelli, Berti, quae sedes Romana probavit, ut haec objectio jam obsolverit.

*Obje. II.* Augustinus *Lib. I. Retract.* cap. 9. confirmans quod dixerat *Lib. III. de Lib. arb. cap. 20.* ait: *Quamvis ignorantia, et difficultas essent hominis primordia naturalia, non culpandus, sed laudandus esset Deus.* Ergo possibilis est status purae naturae.

*R. Neg. cons.* Arguit enim ibi S. Doctor contra Manichaeos, qui contendebant, ignorantiam, et concupiscentiam, uti nunc sunt, non esse peccati effectus, sed primordia naturae: ex quibus inferebant, esse Deum malum, nec Scripturas admittebant *Vet. Testamenti*, ex quibus constat, Deum fecisse hominem rectum; per peccatum autem seipsum hominem infinitis quaestionibus miscuisse. Respondet Augustinus, id non sequi ex falsa illa Manichaeorum hypothesis; quia si ignorantia, et difficultas primordia naturae essent, dedisset Deus homini gratiam, qua utrumque malum vinceret, et in virtute proficeret; ac proinde culpandus non esset Deus. At a statu purae naturae excluditur gratia. Non ergo Augustinus statum illum possibilem agnovit,

*Inst. 1.º* Idem Augustinus *Lib. III. de lib. arb. cap. 20.* Si anima, inquit, altera esse coepit ante peccatum, qualis post vitam culpabilem facta est, non parvum bonum habet, unde Creatori suo gratias agat. Non enim medioeria bona sunt, non solum quod anima est, sed etiam quod facultatem habet, ut, adjuvante Creatore, seipsam excolat, et pio studio possit omnes capere virtutes, per quas et a difficultate cruciante, et ab ignorantia caecante liberetur. Ergo potuerunt esse in anima ante peccatum ignorantia, et difficultas, quales sunt post peccatum.

*n. Dist. cons.* In hypothesi purae naturae, *neg.* In hypothesi falsa, atque impossibili Manichaeorum, *conc.* Docet enim ibi *Augustinus*, in illa hypothesi non defuturam fuisse homini gratiam, per quam, adjuvante Creatore, posset omnes virtutes acquirere, et liberari pio studio ab ignorantia caecante, et difficultate cruciante; ideoque etiam in illa Manichaeorum hypothesi non esse culpandum; sed laudandum Deum. Sed haec gratia non ponitur in hypothesi purae naturae.

*Inst. 2.<sup>o</sup>* Gratia, quam *Augustinus* agnovit in illa Manichaeorum hypothesi, est ordinis naturalis. Ait enim; Non parum est acceperisse naturale iudicium, quo sapientiam praeponat errori, et quietem difficultati, ut ad haec non nascendo, sed studendo, perveniat. Ergo in illa hypothesi status fuisset purae naturae.

*n. Neg. subs.* Conceptis enim verbis ait, naturale iudicium potuisse ad ea bona pervenire, adjuvante Creatore. Cuius autem generis esset illud adiutorium, non necesse erat tunc inquirere; satis enim ibi erat refellere Manichaeos, qui ex ignorantia, et difficultate concludebant, esse aliquod primum mali principium, Deo coaeternum. Sed disputatus contra Pelagianos, ex ignorantia, et difficultate necessitatem ostendit supernaturalis auxilii; et quidem efficacis, ut suo loco videbimus. Adde his, quod ibidem *Augustinus* ait, naturale hoc iudicium, adjuvante Creatore, posse acquirere virtutes omnes, et ad ipsam beatitudinem pervenire. Ignorantia vero, et difficultas, si naturalis est, inde incipit anima proficere, et ad cognitionem, et requiem, donec in ea perficiatur vita beata, promoveri. Quae nemo dixerit per naturale auxilium ex *Augustino* fieri potuisse.

*Obje. III.* *Augustinus Lib. XIII. de Civ. cap. 19. et Lib. XIII. Confes. cap. 3.* docet, immortalitatem, aliasque iustitiae originalis dotes fuisse gratuita Dei dona, et prorsus indebita: Ergo sine illis poterat Deus hominem condere.

*n. Conc. ant.* Non enim negamus cum *Luthero*, ac *Bajo*, iustitiam originale fuisse supernaturale Dei donum *Dist. cons.* Ex potentia absoluta, *conc.* Ex potentia conjuncta cum bonitate, sapientia, providentia, *neg.*

*Inst.*

*Inst.* 1.<sup>o</sup> Idem S. Doctor in *Psal. LXX.* ait: *quis diceret Deo; quid fecisti? si damnaret justum.* Ergo si ex Augustino posset Deus, pro absoluto suo in creaturas dominatu, damnare etiam aeternis cruciatibus hominem justum; a fortiori condere hominem posset in puris naturalibus, obnoxium malis longe minoribus.

*¶ Neg. cons.* 1.<sup>o</sup> Quia mendosus est *Augustini* locus, ut ostendunt *Maurini PP.*, legendum enim est, *si damnaret injustum*; ita ut ea sententia sit, neminem de Deo queri potuisse, si omnes homines damnare, neminem liberare voluisset, quia omnes injusti. 2.<sup>o</sup> Quia aliud est quaerere, quid possit Deus ex absoluta potentia; aliud quid possit ex sua sapientia, bonitate, providentia.

*Inst.* 2.<sup>o</sup> Absurdum est, Deum posse aliquid operari ex sola potentia sine sapientia, bonitate, providentia, cum inseparabilia sint attributa Dei, imo omnia sint unum simplicissimum. Ergo quando dicitur Deus aliquid posse, non solum de potentia, sed de omnibus simul attributis intelligendum est.

*¶ Neg. suppositum* Cum enim dicimus, aliquid fieri posse ex potentia Dei absoluta, sensus non est, qui in objectionem ponitur, Deum posse ex uno attributo sine alio operari, quod absurdum est, sed cum sit inter attributa Dei distinctio *virtualis*, potest mens nostra distinguere quid conveniat potentiae Dei, quid misericordiae, justitiae, sapientiae etc. Cum ergo omnipotentia Dei, seorsim considerata, possit quidquid contradictionem non involvit, recte dicimus, fieri posse ex absoluta Dei potentia quod rerum naturae non repugnat: licet fieri non possit, quia Dei potentia simul cum aliis ejus attributis operatur.

*Obje.* IV. Quod non repugnat possibile est. Atqui non repugnat, Deum creare hominem ad finem aliquem naturalem, nempe visionem ipsius Dei naturalem, et quidem cum concupiscentia non adeo effraeni, ac rebelli, qualis hodie est, quam concupiscentiam posset homo naturalibus rationibus vincere, ne cum impediret, quominus Deum diligeret ut naturae auctorem, et finem suum consequeretur; denique subjectum morbis, ac mor-

ti non ut poenae, sed ut necessario defectui naturae materialis. Ergo.

*W. Dist. maj.* Quod non repugnat, possibile est *absolute conc.* Posita Dei bonitate, sapientia, providentia, *neg.* Nam etiam in illa hypothese magna esset miseria creaturae rationalis sine sua culpa, non solum propter morbos et mortem, qua nihil est seusui horribilius (quamvis non poena, sed defectus esse diceretur) verum etiam, quia concupiscentia quantumcumque ponatur levis, tamen eum sit assidua, tandem aliquando morali quadam necessitate in peccatum trahit, si non gratia Dei vincatur; nec umquam sine Dei gratia haberi posset non peccandi securitas, sine qua non potest vita beata constare.

Jam quomodo e gradu tam sublimi, de quo hucusque diximus, homo ceciderit; videamus.

### C A P. VIII.

#### *De peccato primorum parentum.*

*Adv. I.* **L**icet Deus primos homines multis exornaverit donis; non tamen eos effecerat natura *ἀναπαύτως*; sive *impeccabiles*; quia nihil praeter Deum immutabile esse potest, ut ait Hieronymus *Lib. II. cont. Pelag.* Cuicumque creaturae rationali, inquit Augustinus *Lib. II. cont. Maximin. cap. 12.*; praestatur, ut peccare non possit, non est hoc naturae propriae, sed Dei gratiae: quam gratiam reservaverat Deus homini ut perseverantiae praemium. Poterat quidem efficere Deus per efficacem gratiam, ut certissime perseveraret; sed ut non acciperet hoc donum Dei, id est in bono perseverantiam primus homo; sed perseverare, vel non perseverare in ejus relinqueretur arbitrio, tales vires habebat ejus voluntas, quae sine ullo fuerat instituta peccato, et nihil illi ex seipsa concupiscentialiter resistebat, ut digne tantae bonitati, et bene agendi facilitati perseverandi committeretur arbitrium, ut loquitur idem S. Doctor *Lib. de Corr. et grat. cap. 12.*

*II.* Cur autem Deus hominem, quem praeviderat peccaturum, creaverit, non est explicatu difficile; non enim

enim praescientia peccati impedire Deum debuit, quominus divitias bonitatis suae in creaturam effunderet. At cur tentari permiserit, investigare non possumus. Certissimum est tamen, nulla interiori concupiscentia hominem fuisse pulsatum; sed tantum externa tentatione, eaque adeo levi, ut nos ipsi in hac corruptae naturae faece miremur, eam adversus fortissimos praevalere potuisse. 2.<sup>o</sup> Hanc Deum non fuisse permissurum, nisi fuisset sapientiae suae convenientissimum, et nisi ipse sciret, et posset, et vellet bona facere de malis, sicut homo de bonis mala facturus erat. *Si quaeritur*, inquit *Augustinus Lib. XI. de Gen. ad lit. cap. 4., cur Deus tentari permiserit hominem, quem tentatori consensurum esse praesciebat, altitudinem quidem consilii ejus penetrare non possum, et longe supra vires meas hoc esse confiteor.* Nostrum est hic tantum exponere Dei praeceptum, diaboli tentationem, hominis casum.

## PROPOSITIO I.

*Lex a Domino imposita Adae, ne comederet unius arboris fructum, fuit aequissima.*  
*Est dogma fidei.*

*Prob. ratione Augustini Lib. XIV. de Civ. cap. 12. et Lib. II. de Pecc. merit. cap. 21. 1.<sup>o</sup> Ratio aequitatis id postulabat, ut creatura Creatori suo subiceretur, eique obtemperaret. Atqui ad hoc lata fuit illa lex. Ergo etc. 2.<sup>o</sup> Maximum bonum, magnaue virtus est obedientia. Ergo ut illam exerceret homo in tanta sublimitate constitutus, sapientissime, et aequissime Deus illi praeceptum imposuit. 3.<sup>o</sup> Denique certum, est, a Deo justo legem injustam juberi non posse. Ergo.*

## PROPOSITIO II.

*Diabolus ad transgressionem aequissimi hujus præcepti incitator, ac suasor fuit, usus serpente tamquam instrumento.*

*Prob. 1a. pars, quæ ad fidem pertinet. Sap. II. 24. Invidia diaboli mors introivit in orbem terrarum. Joan. VIII. 44. de diabolo dicitur: Ille homicida fuit ab initio. Et Apoc. XII. 9. et XX. 2. idem appellatur serpens antiquus. 2.º Non poterat solus serpens per se loqui, et suadere peccatum adeo callida insinuatione. Ergo a spiritu nequam movebatur.*

*Prob. 2a. pars ex ipso Scripturae textu. Gen. III. 1. Sed et serpens erat callidior cunctis animantibus terræ, quæ fecerat Dominus Deus. Quæ dixit ad mulierem etc. Ergo.*

*Quæres 1.º Cur Diabolus serpente usus sit, et non potius transfiguravit se in Angelum lucis?*

*R. Non permisit Deum, ut Diabolus quam vellet, speciem assumeret, sed tantum belluæ, ut tentatio esset omnium levissima, et fraus a quocumque, etiam plumbei ingenii facile detegi, et vitari posset. Ita fere Augustinus Lib. XI. de Gen. ad lit. cap. 3.*

*Quæres 2.º Fuit ne verus, an apparens ille serpens?*

*R. Variæ sunt hæc de re sententiæ Patrum. Cyrillus Alex. Lib. III. con. Julian. putat, non fuisse verum serpentem, sed serpentis simulacrum. Communis tamen Patrum sententia est, fuisse serpentem verum, per quem diabolus locutus est; sicut postea locutus est Angelus per asinam Balaam Num. XXII. 28. Ita docent Basilus Hom. ult. Hexam. Chrysostomus Hom. XVI. et XVII. in Gen., Ambrosius Lib. de Paradiso cap. 2., Augustinus Lib. XI. de Gen. ad lit. cap. 2. et seq. et al. alique plurimi (a). Unde rejicienda sententia Ori-*  
ge-

---

(a) Epiphanius in hæresi Ophitarum. Theodoretus Quæst. XXXI. et XXXII. in Gen., Damascenus Lib. II. de fide cap. 10., Beda, Rupertus, Magister sent., et omnes Scho- lastici.

*gents*, quem secutus est Cajetanus. *Comment. in Gen.* totam hanc tentationis historiam ad allegoriam detorquens. non solum contra communem Patrum doctrinam, sed etiam contra apertum Scripturae sensum. Dicitur autem serpens callidior cunctis animantibus vel propter naturalem quendam instinctum, quo callidus, et prudens videtur; unde illud *Matth. X. 16 Estote prudentes sicut serpentes*, ut multi Patres sentiunt; vel quia instrumentum diaboli erat; sicut lingua dolosa dicitur, non quod ipsa dolum habeat, sed quod eam mens dolosa moveat, ut explicat Augustinus *Lib. XI. de Gen. ad lit. cap. 29.*; vel denique propter utramque causam; quia scilicet, diabolus natura vaser, tali usus est instrumento, quod propter naturalem calliditatem ad suas machinationes videbatur aptum.

### PROPOSITIO III.

*Peccatum primorum parentum, licet non ex objecto, ex circumstantiis tamen fuit gravissimum, pluraque simul peccata complectens.*

*Prob. 1a. pars.* Sunt alia peccata ex objecto graviora peccato Adae; ut ex. gr. odium Dei, blasphemia, homicidium. Ergo.

*Prob. 2a. pars* enumeratione circumstantiarum; quae peccatum illud comitatae sunt. Prima est. praecepti facilitas. *Hoc itaque*, inquit Augustinus *Lib. XIV. de Civ. cap. 12.*, de uno cibi genere non edendo, ubi aliorum tanta copia subiacebat, tam leve praeceptum ad observandum, tam breve ad memoria retinendum, ubi praesertim nondum voluntati cupiditas resistebat, quod de poena transgressionis postea subsecutum est, tanto maiore iniustitia violatum est, quanto faciliore posset observantia custodiri.

Altera est sublimis peccantium dignitas. *Frustra*, inquit idem S. Doctor *Lib. VI. Op. imperf. cont. Julian. cap. 22.*, peccato Adae peccata filiorum ejus quantumlibet magna, et horrenda, vel aequare, vel etiam praeferre conaris. Illius quippe natura, quanto magis sublimiter stabat, tanto magis graviter cecidit.

Ter-



Tertia est bonum, quo gaudebant, et gratia, qua ornati erant, quae bona peccando abjecerunt. Quanto magis homo fruebatur Deo, tanto maiore impietate de reliquit Deum, et factus est malo dignus aeterno, ait. idem *Lib. XXI. de Civ. cap. 12.*

Quarta est contemptus Dei, et grandis erga eum ingrati animi significatio. Quia ergo contemptus est Deus jubens, qui hominem creaverat, qui ad suam imaginem eum fecerat, qui ceteris animalibus praeposuerat, qui in paradiso constituerat, qui rerum omnium copiam, salutisque praestiterat, qui praeceptis nec pluribus, nec grandibus, nec difficilibus oneraverat, justa damnatio subsequuta est etc. *Lib. XIV. de Civ. cap. 15.*

Quinta est effectus, qui ex peccato illo secuturus erat; totius nimirum humani generis ruina, totaque peccatorum colluvies, quae universum orbem usque ad finem mundi contaminatura erat, ob effraenem cupiditatem ex primo illo peccato exortam.

*Prob. 3a. pars. ex eodem Augustino Enchirid. cap. 45. Et superbia est illic, quia homo in sua potius esse, quam in Dei potestate dilexit. Et sacrilegium, quia Deo non credidit. Et homicidium, quia se praecipitavit in mortem. Et fornicatio spiritualis, qua integritas mentis humanae serpentina suasionem corrupta est. Et furtum, quia cibus prohibitus usurpatus est. Et avaritia, quia plusquam illi sufficere debuit, appetivit. Praeter haec, quae fuerunt utrique peccanti communia, in Heva etiam fuit scandalum, quo virum in peccatum impulit: eoque nomine peccatum ejus gravius fuit, unde dicitur *Eccli. XXV. 33. A muliere initium peccati, et per illam omnes morimur*; licet ratione dignitatis, cognitionis, effectus, peccatum Adae gravius videatur. Si pensentur conditiones ex parte peccantis, gravius peccavit vir, quam mulier, tum propter donorum praecellentiam, tum propter gradus praeeminentiam. . . . Si autem pensentur conditiones ex parte peccati, gravius peccavit mulier, quam vir, tum propter impietatem in Deum, tum propter iniquitatem in proximum, inquit Bonaventura in *II. Dist. XXII. art. 1. q. 3. Ergo.**

## Scholion.

I. Hevae peccatum fuit etiam contra fidem, non vero peccatum Adae. Unde Augustinus *Lib. XIV. de Civ. cap. 13.* *Si voluntas*, inquit, *ip amore superioris immutabilis boni, a quo illustrabatur, ut videret; et accendebatur, ut amaret, stabilis permaneret, non inde ad sibi placendum averteretur, et ex hoc tenebresceret; et frigeret, ut vel illa verum crederet dixisse serpentem, vel ille Dei mandato uxoris praeponeret voluntatem, putaretque, se venialiter transgressorem esse praecepti, si vitae suae sociam non desereret etiam in societate peccati.* Non desunt tamen qui volunt, ipsum Adam usque adeo excacatum, ut veram promissionem serpentis crediderit, et contra fidem peccaverit, ut ait Tertullianus *Lib. II. cont. Marcion. cap. 2.* *Quis dubitabit, ipsum illud Adae delictum haeresim pronunciarere?* Ideo autem dici putant ab Apostolo Adam non seductum, quia non prior seductus est, ut Heva. Illud certum est, licet non peccasset contra fidem, tamen merito peccati amisisse fidem, ut infra dicemus.

II. Ex verbis Augustini, quibus ait, Adamum putasse se venialiter transgressorem esse praecepti, oritur quaestio inter Scholasticos, utrum primi parentes in statu innocentiae potuerint peccare venialiter. Scotus quidem in *II. Dist. XXI. Q. 1.*, Antissiodorensis in *Summa Lib. II. tract. X. cap. 3. q. 4.* alique id affirmant. *Si enim*, inquit Scotus, *donum innocentiae, vel justitiae originalis non obstat, quominus potuisset peccare mortaliter, multo minus obstitisset peccato veniali.* Contra vero S. Thomas 2a. 2ae. *Q. LXXXIX. art. 3. et in II. Dist. XXI.*, Alexander Halensis *P. II. Q. 104. n. 6.*, Albertus M., Bonaventura, Richardus, Durandus, et major, graviorque Theologorum pars id negat; tum, quia nullum veniale peccatum fieri potest, nisi ex aliquo inordinato animi affectu in creaturas, quae inordinatio ab illo statu exulabat, tum quia nulla erat eo in statu poena, et miseria: peccatum autem veniale magnam inferebat calamitatem; omne enim peccatum meretur poenam: imo ipsum peccatum est miseria omni poena gravior

332 *Theol. Instit. Lib. V. Pars. IV. Cap. IX.*  
vior. Haec altera sententia probabilis est ; sed *Sco<sup>ti</sup>* ratio  
gravioris videtur ponderis.

## C A P. XI.

*De poena peccati primorum parentum.*

*Adv.* **Q**Uoniam peccati comes individua est miseria ,  
et poena , ne *universalis pulchritudo turpe-*  
*tur , ut sit in ea peccati dedecus , sine decore*  
*vindictae ,* ut inquit Augustinus *Lib. III. de lib. arb.*  
*cap. 15. ;* videamus peccatum Adae quae poena secuta sit.

## P R O P O S I T I O

*Poena peccati primorum parentum fuit amissio justitiae  
originalis , debitum poenae aeternae , ignorantia in in-*  
*tellectu , difficultas bene agendi in voluntate , con-*  
*cupiscentia in inferioribus potentiis , mors , et*  
*omnes corporis infirmitates , aliaeque omnes*  
*aerumnae , ut aeris intemperies , terrae*  
*sterilitas etc. Prop. ad fidem*  
*pertinet.*

*Prob. 1a. pars.* Justitia et peccatum simul in anima  
esse non possunt : *Spiritus enim Sanctus disciplinae ef-*  
*fugiet fictum . . . nec habitabit in corpore subdito pec-*  
*catis.* *Sap. I. 5. et 4.* Et Concilium Trid. *Sess. V.*  
*can. 5.* definit , primum hominem Adam , cum manda-  
tum Dei in paradiso fuisset transgressus , statim sanctita-  
tem , et justitiam , in qua fuerat constitutus , amisisse.

*Prob. 2a. pars.* Peccato mortali aeterna debetur  
poena , ut supra diximus de poena peccati Angelorum.  
Ergo.

*Prob. 3a. pars.* Scientia Adae alia erat supernaturalis ,  
alia naturalis. Atqui supernaturalem scientiam , ipsam-  
que fidem eum amisisse , docent Patres. *Perdidit Adam*  
*fidem perdidit charitatem ,* inquit Prosper *Lib. cont.*  
*Collator. cap. 19. ;* eique consentiunt Ambrosius in *cap.*  
*10. Luc. ,* Augustinus *Lib. XIV. de Civ. cap. 17. ,*  
Ful-

Fulgentius *Lib. de Incarn. et grat. cap. 13.* Scientiam vero naturalem, licet omnino non amiserit, multum tamen obscuratam, multisque erroribus obnoxiam habuit, ut saepe docet Augustinus: *approbare, inquit, falsa pro veris; ut erret invitus; non est natura institui hominis, sed poena damnati; et alibi, nolentibus subintravit ignorantia rerum agendarum. Ergo.*

*Prob. 4a. et 5a. pars.* Cum mens hominis per peccatum a Deo defecerit, cui subjecta esse debuit, justo Dei judicio factum est, ut omnes facultates, quae menti subjectae esse debuerant, ab ipsa deficerent, eique aperta rebellionem reluctarentur: imo ipsa mens sibi metipsa contraria per inordinatum sui ipsius amorem, quem Graeci *φιλανθίαν* vocant, in boni electione sibi metipsa impedimento esset. Hoc autem ita in primis parentibus per peccatum accidisse, patet 1.<sup>o</sup> ex Scriptura, quae refert, eos post peccatum pudore nuditatis correptos consuisse sibi folia ficus, et fecisse sibi perizomata: 2.<sup>o</sup> ex Augustino, qui milites docet, ex peccato Adae secutam concupiscentiam, et difficultatem bene agendi: 3.<sup>o</sup> ex eo quod Augustinus ipse, alique Patres docent, Adam per peccatum amisisse liberum arbitrium, hoc est libertatem a difficultate, nam libertatem a necessitate, quae creaturae rationali essentialis est, nec amisit, ut suo loco ostendemus, nec amittere potuit. *Libero arbitrio male utens homo et sese perdidit, et ipsum ... cum libero peccaretur arbitrio, victore peccato, amissum est liberum arbitrium.* Quod saepe repetit ipse, alique Patres. (a). Unde tritum est illud apud Augustinum. *Sunt omni animae peccanti ista duo poenalia, ignorantia, et difficultas: quae difficultas ex cupiditate effraeni oritur. Ergo.*

*Prob. denique 6a. pars* ex ipsa Dei sententia, quae Hevae dixit: *multiplicabo aerumnas tuas, in dolore pa-*

(a) *Enchirid. cap. 20. Epist. 217. et 107. ad Vital. Serm. 13. et 2. de verb. Apost. cap. 6.; Prosper Sentent. 152. Chrysostomus Hom. XXIII. in Matth., Concil. Arausic. II. can. 13., Bernad. de Grat. et lib. arb. et alii.*

ries filios etc. Adae vero: maledicta terra in opere tuo in laboribus comedes ex ea cunctis vitae tuae diebus: spinas et tribulos germinabit tibi; et comedes herbam terrae: in sudore vultus tui vesceris pane; donec revertaris in terram, de qua sumtus es; quia pulvis es: et in pulverem reverteris: quibus verbis omnes vitae mortalis aerumnas complexus est Dominus. Ergo.

## Corollarium

Merito ergo Patres docent, hominem peccati merito non solum fuisse supernaturalibus donis spoliatum, sed etiam vulneratum in naturalibus: et eo sensu explicant parabolam hominis, qui a latronibus spoliatus, vulneratus, ac semivivus relictus est in via *Luc. X.* Ita docent Ambrosius in *Luc. X.*, Augustinus *Lib. II. Quæst. Evang. 9. 19.* Beda in *Luc.* aliq. Unde Magister *Lib. II. Dist. XXX.* Per illud, inquit, peccatum naturalia bona in homine corrupta sunt, et gratuita detracta. Falluntur ergo qui cum Medina 1a. 2ae. *Q. LXXXV. art. 3. et al.* docent, solis supernaturalibus donis spoliatum hominem, eum catholica doctrina sit, ipsam naturam per peccatum fuisse mutata in deterius. Vulnera autem naturae inflieta quatuor recenset, et explicat S. Thomas 1a. 2ae. *Q. LXXXV. art. 3.* secundum quatuor præcipuas naturae dotes, intellectum, voluntatem, concupiscibile, et irascibile. Vide Bellarminum *Lib. de Grat. prim. kom. cap. 5. et Lib. VI. de amiss. Grat. cap. 8.*, Gonet *De statu naturae lapsae Disp. IV. art. 3.*

Dices cont. 3m. part. Fides non amittitur, nisi per peccatum infidelitatis, ut definit Concilium Trid. *Sess. VI. can. 27. et al. contra Novatores.* Atqui non constat, Adam peccasse contra fidem, ut supra diximus. Ergo saltem Adam non amisit fidem.

\* *Dist. maj.* In statu naturae lapsae, conc. In statu naturae integrae, in quo peccavit Adam, neg. misericordiae igitur Dei est, quod hodie homini peccanti fidem non auferat, quod iuste facere posset, ut docet Augustinus *Lib. III. de lib. arb. cap. 18.*; et aliquando facit, ut ait Apostolus *I. Tim. I. 19.* de quibusdam, qui circa fidem naufragarunt, eo quod bonam conscientiam repule-

lerunt; et *Cap. VI.* de iis, qui avaritiam appetentes erraverunt a fide. At hanc misericordiam non merebatur Adam in tanta rerum supernaturalium scientia delinquens. Justum enim est apud Deum, ut qui sciens recta, non facit, ipsam recti scientiam amittat, ut loquitur *Augustinus*.

*Inst.* Si primi parentes amisissent fidem, non potuissent ad Deum converti, cum fides sit justificationis exordium: ut dicemus suo loco. Atqui revera conversi sunt post peccatum. Ergo.

*¶. Dist. maj.* Non potuissent converti, si Deus ex meritis Christi non dedisset eis iterum gratiam fidei, *conc.* Secus, *neg.* Gratiam igitur fidei, quam beneficio Creatoris acceptam amiserant, restituit eis gratia Redemptoris.

*Obje. II. contra totam prop.* Nimis durum videtur, et dedecens bonitatem Dei propter unius pomi gustum tam magnam irrogare poenam. Ergo.

*¶. Dist. ant.* Si non consideretur magnitudo illius peccati, *Transeat.* Secus, *neg.* Quisquis hujusmodi damnationem vel nimiam, vel injustam putat, metiri profecto nescit quanta fuerit iniquitas in peccando, ubi tanta erat non peccandi facilitas. Sicut enim Abraham non immerito magna obedientia praedicatur, quia ut occideret filium res difficillima est imperata; ita et in paradiso tanto major inobedientia fuit, quanto id quod praeceptum est, nullius difficultatis fuit. Et sicut obedientia secundi hominis eo praedicabilior, quo factus est obediens usque ad mortem; ita inobedientia primi hominis eo detestabilior, quo factus est inobediens usque ad mortem. Ubi enim magna est inobedientiae poena proposita, et res a Creatore facilis imperata, quisnam satis explicet, quantum malum sit non obedire in re facili, et tantae potestatis imperio, et tanto terrenti supplicio? *Augustinus Lib. XIV. de Civ. cap. 15.*

## C A P. X.

*De primorum parentum respicientia ,  
et salute.*

*Adv.* **D**Eus peccantem hominem non deseruit; sed ipsam damnationis sententiam temperavit promissione Redemptoris ex muliere nascituri, qui caput serpentis, id est diaboli ipsius superbiam contereret. *Gen. III. 15. Inimicitias, inquit ad serpentem, ponam inter te et mulierem, et semen tuum et semen illius, ipsa conteret caput tuum; seu ut habet textus Hebraicus, ipsum (semen) conteret caput tuum.* Ex hujus promissionis fide omnium hominum salutem pendere voluit. Quaeritur ergo, utrum ipsi primi parentes ex fide Redemptoris justificati, et salvi facti sint. Fuerunt enim haeretici Eucratitae, qui, Tatiano praecunte, Adamum saluum esse negarunt secundo Ecclesiae sacculo. *Rupertus Abbas* ea de re dubitavit, licet cum aliqui conati sint excusare; vel quia aliorum, non suam sententiam protulit, vel quia nondum constabat apud omnes auctoritas Libri Sapientiae, unde praecipuum eruitur pro salute Adae argumentum.

## P R O P O S I T I O

*Adam per poenitentiam salutem consecutus est.  
Idem dicendum est de Heva.*

*Prop. I Sap. X. 1. Haec illum, qui primus formatus est a Deo pater orbis terrarum . . . custodivit, et eduxit illum a delicto suo. Ergo.*

*Prob. II. ex Traditione. Irenaeus Lib. III. cap. 34., Tertullianus Lib. II. cont. Marcion cap. 25., aliique Patres (a) uno ore Tatianum, et Encratitas in hoc capi-*

---

(a) Origenes *Hom. XXXV. in Matth.* Epiphanius *Haeres. XL. 1.*, Eusebius *Lib. IV. Hist. cap. 29. aliq.*

pute confutarunt. Unde Augustinus *Epist. ad Evod. XCIX. nunc CLXIV.* Et de illo quidem primo homine, quod ibidem solverit (Christus) *Ecclesia fere tota consentit.* Et in Litanis S. Mariae Majoris Romae, teste *Laurentio Berti*, inter alia dicitur: *Sancte Adam, ora pro nobis.* Vide Bellarminum *Lib. III. de Amiss. gr. cap. 12.*, et Natalem Alexandrum *Sacc. II. Dissert. XVII.*

*Prob. III. rationibus Irenaei.* Quarum praecipuae sunt 1.<sup>o</sup> Deus non maledixit Adae, et Hevae, sicut serpenti: 2.<sup>o</sup> potuisset diabolus gloriari, se non fuisse perfecte a Christo victum, si primi homines non fuissent ab ejus jugo liberati: 3.<sup>o</sup> ipse Adam Abel, et alios filios suos sacrificiorum rationem, totamque religionem edocuit. Ergo etc. Addi potest vetus traditio, cujus testes Cyprianus *Lib. de Resurr. Christi*, Origenes (*loc. cit.*) et alii (a): Adam scilicet sepultum in ipso Calvariae monte, ubi crucifixus est Dominus, ut secundus Adam primi delicta dilueret. Sed quia de hac traditione Hieronymus in *cap. XXVII. Matth.* dubitat, licet alibi eam sequatur *Epist. ad Marcellam*, non illa est ad propositum necessaria.

### Objectiones solvuntur..

*Objic. I.* Verba ex *Lib. Sapientiae* depromta non probant Adami poenitentiam, et salutem; 1.<sup>o</sup> quia nonnulli codices habent *eduxit illum de limo terrae*, non *a delicto suo*; 2.<sup>o</sup> quia statim additur: *et dedit illi virtutem continendi omnia*: quae verba Christo potius, quam Adamo conveniunt. Ergo.

*R. Neg. ant. et ad 1m.* respondeo, melioris notae Codices tum Graccos, tum Latinos, et Patres, qui eundem locum recitant, Vulgatae nostrae lectionem probare. *Ad 2m. virtutem continendi omnia* esse ipsam dominationem Adamo datam super res omnes terrenas; ac proinde ea verba etiam Adae convenire.

*Tom. II.*

*Y*

*Objic.*

---

(a) Epiphanius *Lib. I. adv. haeres.* Chrysostomus *Hom. LXXXIV. in Joan.* Vide Bellarminum *loc. cit.*



*Objic. II. Heb. XI. 4.* Apostolus primum inter justos locum dat *Abeli*, non *Adae*; atque ipsum *Abel* velut initium Ecclesiae statuit. Atqui si *Adam* salutem esset consecutus, primo erat loco numerandus. Ergo.

R. *Dist. maj.* Dat *Abeli* primum locum inter justos, qui pro justitia subire mortem, vel peculiari fide fuerunt insignes, *conc.* Dat primum locum absolute, *neg.*

*Objic. III. Bernardus Lib. de modo beate vivendi: Adam, inquit, in infernum cecidit, quia inobediens fuit. Ergo.*

R. 1.<sup>o</sup> *Neg. ant.* Liber enim ille *Bernardi* non est, ut ostendunt eruditi. 2.<sup>o</sup> *Dist. ant.* Cecidit in infernum quatenus id peccato suo meruit, *conc.* Cecidit actu, *Subdist.* Si nomine inferni intelligas sepulcrum, sive mortem, in quam *Adam* incidit propter inobedientiam, *conc.* Si intelligas ipsum damnatorum carcerem, *neg.*

*Objic. IV. Deus Angelis peccantibus non pepercit. Ergo multo minus homini.*

R. *Neg. cons.* Cur *Deus* homines, non Angelos redimere, et liberare voluerit, varias causas tradidere Patres; vel quia humana natura imbecillior erat; vel quia minoribus cumulata donis; vel aliam ob causam nobis ignotam, ita ut agere potius Deo gratias pro ejus misericordia, quam ejus consilia scrutari debeamus, et interim exclamare cum Apostolo: *O altitudo divitiarum sapientiae, et scientiae Dei! Rom. XI. 33.*

## C A P. XI.

*De transfusione peccati Adae in ejus posteros, sive de peccato originali.*

*Adv. I.* **P**rimum hominem per peccatum sibi soli, et non ejus propagini nocuisse, docuerunt *Manichaei*, *Pelagiani*, *Sociniani*, *Anabaptistae*, atque omnes increduli. *Pelagiani* tamen aliquando ut sententiam temperarent, monstrosius errant, docentes, mortem quidem, aliasque poenas ex *Adam* derivatas esse in posteros, nullo modo peccatum, ita ut irrogetur a Deo poena sine culpa: quem errorem *Zwingliani* etiam profes-

fessi sunt, et in eundem ipse Erasmus inclinare visus est.

II. Contra ea praecipuum est Ecclesiae catholicae dogma, ex Adam in omnes ex illo natos peccatum, et damnationem; ex Christo vero in omnes ex illo renatos justitiam, et vitam aeternam derivari. Expendendum igitur hic est accuratius 1.<sup>o</sup> utrum revera originale peccatum sit: 2.<sup>o</sup> quid sit: 3.<sup>o</sup> quomodo traducatur. 4.<sup>o</sup> an aliquis a communi lege fuerit exceptus: 5.<sup>o</sup> quaenam ejus peccati sint poenae tum in ista, tum in altera vita.

## §. I.

*Demonstratur, peccatum originale in omnes Adae posteros derivari.*

## P R O P O S I T I O

*Omnes homines per Adae peccatum nasci peccato, morti, aliisque miseriis obnoxios, dogma fidei est.*

*Prob. I. ex Scriptura* 1.<sup>o</sup> Rom. V. 12. *Per unum hominem peccatum in hunc mundum intravit, et per peccatum mors, et ita in omnes homines mors pertransiit, in quo omnes peccaverunt;* et v. 19. *per inobedientiam unius hominis peccatares constituti sunt multi.* 2.<sup>o</sup> Psal. L. *Ecce enim in iniquitatibus conceptus sum: et in peccatis concepit me mater mea.* 3.<sup>o</sup> Job. XIV. 4. *Quis potest facere mundum de immundo conceptum semine?* quod clarius in versione LXX. sic habet: *nemo mundus a sorde, nec infans, cujus est unius diei vita super terram:* quibus verbis hic locus saepe citatur a veteribus. 4.<sup>o</sup> II. Cor. V. 24. *Si unus pro omnibus mortuus est, ergo omnes mortui sunt.* Et Ephes. II. 3. *Eramus naturae filii irae, sicut et ceteri.* Ergo.

*Prob. II. ex PP. De Augustino nullum est dubium, qui hoc dogma pluribus in libris contra haereticos fortius asseruit. ut in libris contra Julianum, Lib. de peccato originali, Lib. contra duas Epist. Pelagianor., et*

*alibi.* Patres autem Augustinō antiquiores ipse S. Doctor profert contra Pelagianos, quorum praecipui sunt hi, Irenaeus, Cyprianus, Hilarius, Gregorius Nazianzenus, Basilius, Ambrosius, Chrysostomus, Hieronymus. Ex quibus concludit: Non aliud de peccato originali, ex quo Christi Ecclesia constituta est, divina. rum Scripturarum Tractatores scripserunt, non aliud a majoribus acceperunt, non aliud posteris tradiderunt. De iis vero, qui Augustinum secuti sunt, res est manifesta. Sufficiat pro omnibus Fulgentius *Lib. de Fide ad Pet. cap. 26* Firmissime tene, et nullatenus dubites, omnem hominem ... cum peccato originali nasci, impietati subditum, mortique subjectum, et ob hoc natura irae filium. Idem docent SS. Pontifices Innocentius I. in *Epist. ad Conc. Carthaginense et Milevitanum*, Zosimus in *Epist. ad diversos orbis Episcopos*, Leo M., Gregorius M. et alii (a).

*Prob. III.* ex Conciliis Diospolitano, Cartaginensi, cui interfuit Augustinus, Milevitano, Arausicano II., Ephesino, Florentino, quorum definitiones et verba secutum Tridentinum *Sess. V. can. 2.* inquit: Si quis Adae praevaricationem sibi soli, et non ejus propaginē asserit nocuisse ... aut inquinatum illum per inobedientiae peccatum, mortem, et poenas corporis tantum in genus humanum transfudisse, non autem & peccatum, quod est mors animae, anathema sit.

*Prob. IV. ratione Theologica.* 1.<sup>o</sup> Parvuli baptizantur ex Apostolica traditione: imo sollicitè semper cavet Ecclesia, ne quis eorum sine baptismo moreretur. Atqui

---

(a) Ignatius *Epist. ad Trallens.* Justinus *Dial. cum Tryph.*, Irenaeus *Lib. V, cap. 17.*, Tertullianus *Lib. de anima cap. 40.* Cyprianus *Epist. ad Fidum*, Hilarius in *Psal. CXVIII.*, Basil. in *Ps. XXXI.* et al. Ambrosius in *Apolog. David*, et alibi apud August. Cyrillus Hieros. *Cateches. II.* Nazianzenus *Orat. III. de pace*, et al. Hieronymus in *cap. 6. Osee*, et al., Syricius *Epist. 1. ad Himer.*, Chrysostom. *Homil. ad Neoph. et al.*, Reticius, et Olympius ap. Augustin. *Lib. contr. Julian. cap. 2. eto.*

qui baptizantur in remissionem peccatorum. Baptismus enim lavacrum est, quo homines peccato moriuntur, ut consepulti cum Christo, in novam renascantur vitam, ut ait Apostolus *Rom. VI*. Unde Cyprianus *Ep. ad Fidum*: prohiberi, inquit, a baptismo non debet infans, qui nihil peccavit, nisi quod ex Adam carnaliter natus, contagium mortis antiquae propria nativitate contraxit. Et Concilium Milevitauum *Can. 2*. Placuit, ut quicumque parvulos recentes ab uteris matrum baptizandos negat, aut dicit in remissionem peccatorum eos quidem baptizari, sed nihil ex Adam trahere originalis peccati, quod lavacro regenerationis expiatur, anathema sit. 2.<sup>o</sup> In administratione Baptismi Ecclesia semper adhibuit exorcismum, exufflationem, ut diabolum ab anima baptizandi foras expellat. Atqui si parvuli nullum haberent peccatum, ex quo potestati satanae subjecti essent, hic ritus esset superstitiosus, imo naturae auctori Deo injuriosus. His argumentis Augustinus ubique urget, et ad incitas redigit Pelagianos, qui Apostolicam hanc traditionem, et consuetudinem vetustate robustam reprehendere non audebant, nec poterant. 3.<sup>o</sup> Tanta est hujus vitae miseria cum tanta dignitate humanae naturae conjuncta, ut homo ipsis ethnicis philosophis aenigma visus sit. Supra autem docuimus, non decuisse divinam sapientiam, bonitatem, providentiam tantis malis innocentem hominem obruere. Unde Augustinus *Lib. IV. cont. Julian. cap. ult.* enumeratis vitae mortalis aerumnis: Quid igitur, inquit, restat, nisi ut causa istorum malorum sit aut iniquitas, vel impotentia Dei, aut poena primi, veterisque peccati? Et S. Thomas *Lib. IV. cont. Gen. cap. 52*. Considerando, inquit, divinam providentiam, et dignitatem superioris partis humanae naturae, satis probabiliter probari potest, causam hujusmodi defectus esse poenalem, et sic colligi potest, humanum genus peccato aliquo originali esse infectum. Quod autem ait, satis probabiliter, significat probationem, quae ad revincendos gentiles, contra quos scribebat, satis idonea videatur. Haec probatio valet etiam in hypothese naturae purae. Fatentur enim ejus patroni, non tanta futura fuisse in illo statu mala, quanta in isto experimur. Ergo etc. Vide haec fusius apud Bellarminum

Lib.

*Objectiones solvantur.*

*Objic. I.* Verba illa Apostoli *Rom. V. 12.* intelligi possunt eo sensu, quod Adam pessimum dedit inobedientiae exemplum; atque ita per ipsum intravit peccatum in mundum. Ergo nihil probant de peccato originali. Hinc *Erasmus* cum Apostoli locum sic latine reddidit: *propter unum hominem peccatum in mundum introiit . . . et sic in omnes homines mors pervasit, quatenus omnes peccaverunt.*

*¶ Neg. ant. 1.º* Quia Ecclesia catholica semper eum locum de peccato originis, non de peccato imitationis explicavit; et ita prorsus intelligendum definiivit Concilium Milevitanum *Can. 2.* et Tridentinum *Sess. V. Can. 4. 2.º* Quia Apostolus ibi Adamum Christo opponit, ita ut sicut a Christo justitia, ita ab Adamo peccatum derivetur. At a Christo non solum exemplo, sed etiam interiori gratiae inspiratione justitia derivatur in reatos. Ergo et ab Adamo peccatum. *3.º* Quia si Apostolus de exemplo tantum locutus esset, potius dicere debuisset per diabolum, quam per Adam peccatum intrasse in mundum, cum ille primus fuerit peccati auctor. *4.º* Quia Apostolus peccatum, et mortem peccati effectum, ait, ex Adamo in posteros pervasisse. At mors regnat etiam in parvulis, qui Adamum nullo pacto nosse, aut imitari potuerunt. Ergo loquitur de peccato in omnes homines ex Adam transfuso *occultâ tabificatione naturae*, ut ait *Augustinus*, per quod omnes moriuntur. *Erasmi* autem versio pluribus peccat; *1.º* quia quod est in Graeco *δια εως ανθρωπων* vertit *propter unum hominem*; cum praepositio *δια* cum genitivo significet *per*, non *propter*; *2.º* quia nulla ratione verbum *διηλθεν* vertit *pervasit*, pro *pertransiit*; et verba *εφ ω* in quo vertit *quatenus*; licet etiam sic explicata eundem habeant sensum.

*Inst. 1.º* Apostolus ibidem *v. 19.* explicans, quo sensu per unum hominem peccatum in mundum intravit, subdit: *sicut per unius inobedientiam peccatores constitui*

*luti sunt multi.* Atqui si de peccato loqueretur originis, non diceret *multi*, sed *omnes*. Ergo loquitur de peccato imitationis.

R. *Dist. maj.* Et in laudato textu idem est *multi*, quod *omnes*, *conc.* Aliud est, *neg.* Ait enim: *sicut per unius delictum in omnes homines in condemnationem; sic et per unius justitiam in omnes homines in justificationem vitae.* Sicut enim per inobedientiam unius hominis peccatores constituti sunt *multi*: ita et per unius obeditionem *justi* constituentur *multi*. Ergo quos prius dixerat *omnes*, postea dicit *multos*; quia revera omnes illi *multi* sunt: quod in aliis Scripturae locis observare licet. Vide Augustinum *Lib. VI. cont. Julian. cap. 12.*

*Inst. 2.º* Ex Apostolo sicut ex Adam in omnes transiit damnatio, ita ex Christo justitia. Atqui justitia ex Christo non in omnes homines transiit; sed tantum in eos, qui mortem Christi per baptismum imitantur. Ergo non in omnes transit Adae peccatum; sed in ejus dumtaxat imitatores.

R. *Dist. maj.* Ita ex Christo justitia transit in renatos ex Christo, *conc.* In alios, *neg.* Sensus ergo est sicut peccatum transit in omnes, qui carnali generatione nascuntur ex Adam; ita justitia in omnes, qui spiritali regeneratione renascuntur ex Christo.

*Inst. 3.º* Addit Apostolus *ibid.* Si unius delicto *multi* mortui sunt: multo magis gratia Dei. . . In plures abundavit. Atqui gratia non abundat in omnes homines. Ergo multo minus Adae peccatum.

R. *Neg. cons.* Quod enim in vulgata est *plures*, in Graeco est *πᾶσι* *multos*: unde plures illi non comparative accipiendi sunt, quasi pluresificentur ex Christo, quam inficiantur ex Adam; sed absolute pro multis. Illud autem *multo magis* non est referendum ad *plures*, sed ad verbum *abundavit*: hoc est multo magis gratia Dei abundavit in multos. Vide Estium in hunc Pauli locum, et S. Thomam in *Comment.*

*Objic. II. Ezech. XVIII. 20. Filius non portabit iniquitatem patris.* Ergo.

R. *Dist. ant.* Non portabit iniquitatem patris originalem, quae infecit naturam et patris, et filii, ideoque est propria etiam ipsius filii, *neg. Personalem, conc.* Quod

Quod enim Deus minatus fuerat, se visitaturum iniquitatem patrum in filios usque ad tertiam, et quartam generationem, promittit hic, se non facturum in novo Testamento; sed peccata *actualia*, et *personalia* ipsi animae peccanti, non filiis, si parentes non imitentur, imputaturum. At peccatum originale ita est in parentibus, ut fiat etiam generatione proprium filiorum. *Parentum peccata*, inquit Augustinus *Lib. VI. cont. Julian. cap. 4.*, modo quodam dicuntur *aliena*, et rursus modo quodam reperiuntur et *nostra*. *Aliena* quippe proprietate sunt actionis, et *nostra* sunt contagione propaginis. Quod si falsum esset, profecto grave jugum super filios Adam a die exitus de ventre matris eorum nullo modo justum esset.

*Objic. III. Rom. V. 14.* Regnavit mors ab Adam usque ad Moysen etiam in eos, qui non peccaverunt in similitudinem praevaricationis Adae. Ergo non omnes in Adam peccaverunt.

*¶ Neg. cons.* Sensus enim est, etiam eos, qui non sunt transgressi propria voluntate legem ab ipsis cognitam, sicut transgressus est Adam, fuisse morti obnoxios; quia jam in omnes peccatum Adae transmissum fuerat, et per peccatum mors.

*Objic. IV. II. Cor. V. 1.º* Omnes nos manifestari oportet ante Tribunal Christi, ut referat unusquisque propria corporis, prout gessit, sive bonum, sive malum. Ergo nemo ob alienum factum vel praemio afficietur, vel poena; ac proinde nullum est originale peccatum.

*¶ Neg. cons.* Nam, ut arguit Augustinus *Lib. VI. cont. Jul. cap. 4* vel parvuli sistuntur ante Christi tribunal, vel non. Si non sistuntur, ergo haec Apostoli sententia de adultis tantum intelligitur, qui etiam de peccatis propria voluntate admissis rationem reddent. Si vero sistuntur; cum non sint illi priorum actuum capaces, id gessisse censentur, quod aliena voluntate contraxerunt; hoc est vel peccatum ex inobedientia Adae, ex quo nati sunt; vel justitiam ex obedientia Christi, ex quo sunt renati; alioquin dicendum esset, eos in tribunali Christi, nec bono, nec malo afficiendos, quod absurdum est; etiam in sententia adversariorum, qui contendebant, eos vita aeterna donandos.

*Objic. V.* cum Calvinistis. Saltem negari non potest, ex Apostolo filios fidelium nasci a peccato originali immunes; ait enim *I. Cor. VII. 14. Sanctificatus est vir infidelis per mulierem fidelem, et sanctificata est mulier infidelis per virum fidelem; alioquin filii vestri immundi essent, nunc autem sancti sunt.* Quem locum indicat Tertullianus cum ait *Lib. de Anima cap. 39. Nulla ferme nativitas munda est, utique Ethnicorum. Hinc enim et Apostolus ex sanctificato alterutro sexu sanctos procreari ait, tam ex seminis prae-rogativa, quam ex institutionis disciplina. Ergo.*

*¶ N. Neg. ant. Ad confirm. dist. ant.* Nunc autem sancti sunt, quia ad sanctitatem per baptismum pervenerunt, *conc.* Quia nati sunt sancti, *neg.* Vult ergo Apostolus, non separari conjuges, si alteruter Christianus fiat; quia saepe accidit, ut alter alterum ad veram religionem adducat, atque ita ipsi filii per baptismum sanctificentur, qui alioquin in peccato remansissent. *Tertullianus* vero non vult, filios fidelium absolute nasci sanctos; subdit enim: *quasi designatos tamen sanctitati, ac per hoc etiam salutem; intelligi volens fidelium filios... ut hujus spei pignore matrimonii, quae retinenda censuerat, patrocinaretur. Alioquin meminerat dominicae definitionis, nisi quis nasceretur ex aqua, et Spiritu, non ibit in Regnum Dei; idest non erit sanctus: Ita omnis anima eousque in Adam censetur, donec in Christo recenseatur, tandiu immunda quamdiu recenseatur. Vult ergo esse sanctos, si cum infidelium filiis comparentur; hi enim cum idololatria obstetrice nascentur, jam in partu Lucinae, Dianaeque devoentur; illi vero quasi ab ipsa nativitatis conditione, et parentum institutione sanctitati devoentur.*

*Inst. Idem Tertullianus Lib. de Baptismo cap. 18. Quid festinat, inquit, innocens aetas ad remissionem peccatorum? Ergo parvulos habuit ut innocentes; ideoque non baptizandos, nisi adultos.*

*¶ Dist. cons.* Habuit ut innocentes, quatenus actualia peccata propria voluntate nondum admiserunt, *conc.* Quatenus omni peccato immunes sint, *neg.* Vult ergo, utilius esse baptismum differre non solum parvulis, verum etiam adultis, donec quadam maturitate roboren-  
tur



tur, tum ut adolescentiae peccata omnia abluant, tum ut baptismi leges, et Christianae religionis officia noscant. Quam *Tertulliani* rationem, reprobavit semper Ecclesia. *Parvulos innocentes merito nuncupamus, secundum id quod ait Apostolus, nondum natos nihil egisse boni, sive mali; non secundum id quod ait: per unius inobedientiam peccatores constituti sunt multi, ut inquit Augustinus Lib. I. cont. Julian. cap. 6.*

*Objic. VI. Chrysostomus Homil. ad Neophytos ait: Infantes baptizamus, cum non sint coinquinati peccato, ut eis addatur sanctitas (a). Ergo non imperio Erasmus, Dallaeus, aliique sentiunt, Chrysostomum, docuisse non culpam, sed poenam ex Adamo trahi.*

*¶ Dist. ant. Quamvis non sint coinquinati peccato actuali; conc. Originali, neg. Peccata dixit, parvulos non habere, sed propria, inquit Augustinus, respondens Juliano Chrysostomi auctoritatem opponenti Lib. I. cont. Julian. cap. 6.: quod et probat ex Graeco textu, in quo non dicitur, parvulos non esse peccato inquinatos, sed non habere peccata τα παιδια βαπτίζομεν καὶ οὐκ ἀμαρτωλά ex έχοντα quod proprie actualia peccata significat. Absit, absit, hoc malum de tanto viro credere, aut dicere; absit inquam, ut Constantinopolitanus Joannes tot, ac tantis Coepiscopis suis, maximeque Romano Innocentio, Carthaginensi Cypriano, Cappadoci Basilio, Nazianzeno Gregorio, Gallo Hilario, M-diolanensi resistat Ambrosio, inquit Augustinus Lib. I. cont. Jul. cap. 2. Quae enim meus Chrysostomi fuerit, patet non*

---

(a) Ita prorsus habet *Chrysostomus* tum in editione Basi. leensi anni MDXXXV., tum in Parisiensi anni MDLXXXVIII.; Graecus enim ejus Homiliae textus fortasse perit, excerptis fragmentis ab *Augustino*, aliisque recitatis; neque a *Savino*, *Morellio*, *Montfauconi* editus est. Quamvis enim in priori editione ita posuerimus: *ut eis detur, vel addatur sanctitas*; non ideo tamen id fecimus, quasi utrumque verbum *Chrysostomus* adhibuerit, dubitans, utrum *primam*, an *secundam* gratiam, parvuli per baptismum accipiant; sed ut significarem idem esse *detur*, quod *addatur*. Addatur, inquam, gratia naturae, et remissioni originalis peccati.

non solum ex aliis locis ab *Augustino* recitatis verum etiam ex hac ipsa Homilia ad Neophytos: *Venit*, inquit, *semel Christus*, invenit nostrum *chirographum paternum*, quod scripsit *Adam*. Ille initium induxit debiti; nos faenus auximus posterioribus peccatis. Numquid, insert *Augustinus*, contentus fuit dicere paternum *chirographum*, nisi adderet nostrum, ut sciremus, antequam foenus posterioribus peccatis augcremus, jam illius *chirographi paterni* ad nos debitum pertinere?

*Inst. 1.º* *Chrysostomus* ut eos refellat, qui dicebant, baptismum ad solam peccatorum remissionem valere, utitur exemplo parvulorum, qui baptizantur, licet peccata non habeant. Atqui hoc exemplum nihil valeret, si parvulis etiam peccatum aliquod in baptismo remitteretur. Ergo.

*N. Dist. maj.* Ut refellat eos, qui dicebant, baptismum valere ad solam remissionem peccatorum per extrinsecus factam condonationem injuriae, *conc.* Per internam maculae ablutionem, quae fit per infusionem gratiae, *neg.* Eos ergo confutat ibi *S. Doctor*, qui asserebant, ad hoc tantum valere baptismum, ut Deus injuriam, culpamque condonet: quae quidem exterior condonatio, cum non possit habere locum nisi in actuali peccato, recte opponit exemplum parvulorum, qui actualia peccata non habent; et tamen baptizantur, ut, infusa gratia, maculam abluant originalis peccati, fiantque sancti, haeredes Dei, cohaeredes Christi etc. Itaque enumerat ibi decem baptismi effectus: liberari a peccato, gratiam sanctificantem accipere, justum reddi, adoptari in filium Dei, jus adipisci ad haereditatem, fieri Christi fratrem, cohaeredem, membrum, templum, et instrumentum Spiritus Sancti. Quibus recensitis, ait: *Vides quot sint baptismi largitates. Multis quidem videtur, caelestem gratiam in peccatorum tantum remissione consistere. Nos autem honores computavimus decem* (in quibus primum locum habet liberari a peccato) *Hac de causa et infantes baptizamus etc.*

*Inst. 2.º* *Chrysostomus* saepe dicit, mortem, non peccatum ex Adamo in nos derivatam. Sic in *Hom. X. in Epist. ad Rom.* in illa verba: *sicut per inobedientiam unius hominis peccatores constituti sunt multi*: quae

quaestionem inuens, qui fieri possit, ut, uno peccante, alius peccatum incurrat, quod dicit esse absurdum, eam sic solvit: Quid igitur hoc loco verbum hoc peccatores significat? Mihi videtur, tantundem significare, quantum illud; supplicio obnoxii, ac mortis rei. Ergo.

¶ *Dist. ant.* Mortem, non peccatum actuale, *cons.* Non peccatum habituale, quod Chrysostomus peccatum radicale appellat, *neg.* Vult scilicet Chrysostomus, absurdum esse, ut uno peccante, alter peccare dicatur, quod de peccato actuali verum est. Sed cum ait, omnes per Adam factos esse obnoxios supplicio, reos mortis, fatetur, homines ex Adam alterius generis peccatum contrahere, propter quod iustum supplicium mortis subeunt, cum mortis rei sint. Inquit enim eadem *Homil. X. in Epist. ad Rom.* Quod Christo crux et sepulchrum, hoc nobis baptisma fuit, quamvis non iisdem in rebus. Ille enim carni et mortuus, et sepultus est, nos autem peccato utrumque. Et *Homil. XL. in I. ad Cor.* Deus in regenerationis lavacro mentem gratia tangit; radicale peccatum evellit etc.

*Inst. 3.º* Idem Chrysostomus *Hom. XLII. in Epist. I. ad Cor.* ait: Quid igitur faciam, inquis, propter illum pereo? Minime propter illum. Neque enim tu sine peccato permansisti. Quod si non idem peccatum, tamen aliud commisisti. Et *Homil. XXXIX. in I. Cor.* explicans illud: sicut in Adam omnes moriuntur; Quid igitur, dic mihi, num omnes in Adam mortui sunt? Quomodo ergo Noë justus saeculo suo fuit? etc. itaque si hoc de corpore dictum esse velimus, constabit oratio; si autem de justitia, et peccato, nequaquam. Ergo semper Chrysostomus mortem ex Adamo derivatam concedit, peccatum negat.

¶ *Neg. cons. 1.º* Quia loquitur Chrysostomus de baptizatis, in quibus mortalitas quidem ex Adamo remanet; peccatum autem nullo modo, ac proinde si pereunt, non propter Adam, sed propria voluntate pereunt. 2.º Quia loquitur non de morte peccati temporali, et reparabili per gratiam Dei, sed de morte perpetua. Ideo ait, non omnes mori in Adam, quia multi salvi fiunt, ut Noë, Abraham, aliique; ideoque qui morti aeternae

ad-

addicitur, culpa sua perit. Adde, ista dici a *Chrysostomo* vehementius, more oratorum, ad excutiendam populi socordiam. Vide *Berti Lib. XIII. cap. 2.*

*Objic. VII.* Gregorius Nissenus *Orat. de infant.* Nec ab initio quidem (infans) prorsus in animum morbum admisit. Et Theodoretus *Lib. V. haeretic. fab. cap. 18.* Quorsum infantes baptizamus, qui peccatum nondum gustarunt? Ergo.

*R. Dist. ant.* Nyssenus, et Theodoretus negant, parvulos admisisse peccatum actuale, *conc. Originale, neg.* Nyssenus enim in *Psalms cap. 16.* aperte dicit: *Sordes hominis peccatum est, quod una cum humana orditur natura, quoniam in peccatis concepit me mater mea.* Theodoretus vero in *cap. V. Epist. ad Rom.* Dicit itaque divinus Apostolus, quod cum Adam peccavisset, et mortalis factus esset, utrumque ad genus pervenit, id est peccatum, et mors. Ad omnes mors pervasit, in quo omnes peccaverunt. Non enim propter primi parentis peccatum, sed propter suum unusquisque mortis decretum suscipit; etiam parvuli, qui actualis peccati rei non sunt propter suum peccatum moriuntur, quia Adae peccatum sit nascendo unicuique proprium, ut explicat Tridentinum.

*Objic. VIII.* Clemens Alexandrinus *Lib. III. Strom.* Dicant ergo, inquit, nobis, ubi fornicatus est infans natus? vel quando sub Adae cecidit execrationem qui nihil est operatus? Deinde loca Scripturae, quae peccatum originale probant, alio sensu explicat, dicens: *Et quando dixit David: in peccatis conceptus sum: dicit quidem prophetice matrem suam, sed Heva fuit mater viventium; et si in peccatis fuit conceptus, non est ipse in peccato, neque vero ipse peccatum etc.* Ergo.

*R. 1.º* Adeo obscurus est iste locus Clementis, ut Bellarminus de *amiss. grat. Lib. IV. cap. 9.* putet, in eo non sententiam contineri Clementis, sed objectionem Julii Cassiani, contra quem ibi disputat, quae tamen Bellarmini responsio contextui non cohaeret. Si dicamus cum Vossio, et aliis, Clementem non satis percepisse doctrinam de originali peccato, nihil mutat catholica veritas; quid enim unus adeo obscure loquens praevale-  
re poterit adversus Scripturas, et perpetuam omnium

Patrum, et totius Ecclesiae catholicae traditionem? Sed his omissis.

¶ 2.<sup>o</sup> *Dist. ant.* Ex *Clemente* infans non cecidit sub *Adae* execrationem, non est in peccato in sensu haereticorum, quos ibi confutat, *conc.* In sensu catholicorum, *neg.* Disputat enim ibi *Clemens* contra *Julium Cassianum* e grege *Encratitarum*, qui dicebant, nuptias esse a malo Deo institutas; ipsamque generationem peccatum esse, ad eumque sensum detorquebant verba *Psalmi L. in peccatis concepit me mater mea*; ipsam denique naturam humanam esse secundum corpus malam, Deoque execrabilem; secundum animam vero esse contaminatam peccatis in altera vita, quam fingeant, commissis. Hoc igitur negat *Clemens*, aitque 1.<sup>o</sup> infantem nihil unquam fuisse operatum: 2.<sup>o</sup> quod ait *David in peccatis concepit me mater mea*, referendum esse ad *Hevam*, quae mater fuit cunctorum viventium; quia ab illa primum commissum est peccatum, quod ab *Adamo* postea perpetratum, universum genus humanum infecit. Ceterum quod *Clemens* peccatum originale agnoverit, ex eo patet, quod *Lib. I. Paedagogi cap. 6.* vocat baptismum *regenerationem, et lavacrum, per quod peccata abstergantur*; non ignorabat autem, baptismum ex Apostolica traditione etiam parvulis ministrari.

*Objic.* IX. Origenes Clementis discipulus in *Commentario in Epist. ad Rom.* ait verba Apostoli: *per unum hominem peccatum introivit in mundum*, ita esse intelligenda, ut per mundum significantur homines mundani, atque carnales, qui praevaricationem *Adae* imitantur. Ergo negat originale peccatum, quod praecipue ex hoc Apostoli loco probatur.

¶ *Trans. ant.* De Origene enim nos non multum oportet esse sollicitos, utpote qui sine dubio Pelagianis praeclusit. Unde quamvis multa ejus testimonia Theologi congerant pro peccato originali, ut est illud *Lib. IV. cont. Cels. In Adamo omnes moriuntur, et damnati sunt in similitudinem praevaricationis Adami, nec tam de uno quopiam, quam de toto humano genere Scriptura divina loquitur*; tamen etsi demus, cum errasse in hac parte, nihil nobis auctoritas ejus incommodaret. Ceterum non negabat, nasci homines in peccatis,

tis, quae animae admiserant antequam detruderentur in corpora, atque eorum peccatorum remissionem ablui baptismo. Ob quem errorem a nobis supra refutatum, non idem omnino sentiebat, quod Pelagiani.

*Objic. X.* Omne peccatum est voluntarium; et hoc, ut fateatur *Augustinus*, adeo verum est, ut nullo modo sit peccatum, si voluntarium non sit: hinc peccatum ab ipso *Augustino* definitur: *dictum, vel factum, vel concupitum contra legem aeternam Dei*. Atqui animae recens creatae non est voluntarium peccatum Adae, nec ipsi ullo modo notum; alioquin ejus peccatum esset actuale. Ergo illam contrahere peccatum originale, contrarium est rationi, ac proinde falsum.

*¶. Dist. maj.* Omne peccatum est voluntarium eo modo, quo peccatum est, *conc.* Alio modo, *neg.* Omne igitur peccatum voluntarium est, dispari tamen ratione; peccatum enim *actuale*, et *personale* voluntarium, imo et liberum est, voluntate actuali, et personali; originale vero peccatum voluntarium est, et liberum voluntate originali, ipsius scilicet hominis, a quo natura humana habet originem.

*Instit. 1.º* Repugnat voluntarium voluntate originali; voluntarium enim est a principio interiori cognoscente singula. Atqui voluntas Adae est aliena, et ignota animae infantis post tot saecula nati, aut nascituri. Ergo.

*¶. Neg. subs. et Dist. maj.* Voluntarium est a principio interno cognoscente singula, si est voluntarium *actuale*, et *personale*, *conc.* Si est voluntarium *habitua-*  
*le*, et *originale*, *neg.* Quemadmodum enim non repugnat, multa vitia non solum corporea, ut morbi, podagra, phthisis; sed etiam spiritalia, ut superbia, iracundia etc. a parentibus in filios traduci, ita etiam non repugnat, ab Adamo in universum genus humanum traductum esse hoc vitium originale, quo ipse se voluntarie maculavit, atque in seipso tamquam in radice naturam humanam vitiavit, atque corripit.

*Inst. 2.º* Haec vitia, quae a parentibus in filios traducuntur, non sunt in iis peccata, nisi cum in aetate adulta voluntarie iis servire incipiunt, alioquin incidemus in *prop. LII.* a Summis PP. *Pio V.* et *Greg. XIII.*

in

in *Bajo* damnatam: omne scelus ejus est conditionis, ut suum auctorem, et posteros eo modo inficere possit, quo infecit prima transgressio. Ergo a pari quodcumque vitium ab Adamo transfusum non potest in posteris ejus esse peccatum.

¶ *Neg. cons. et parit.* Ratio discriminis in eo est, quod proximorum parentum vitia non ipsam naturam humanam inficiunt, sed illam jam originali labe vitiatam, reddunt ad unum, aut aliud actuale peccatum proclivius: cum ergo actuale peccatum esse non possit, nisi voluntarium, et liberum actuali, et personali voluntate, sequitur, ea vitia non esse in pueris peccata, donec iis voluntarie in adulta aetate consentiant. Contra vero peccatum Adae ipsam naturam vitiavit, et habitu aversam reddidit ab universa lege naturae, et Dei, ut clarius explicabimus infra, ubi agemus de modo, quo peccatum originale traducitur.

*Inst. 3.º* Hoc facile persuaderi posset, si anima traduceretur a parentibus; sed cum haec innocens a Deo creetur; fieri non potest, ut corpori infusa habitualement, et veram noxam contrahat, cum nondum propriorum actuum sit capax. Ideo *Augustinus* in quaestione de origine animae semper fluctuavit; quia scilicet videbat, eam cum doctrina de peccato originali ita connexam, ut si animae de novo in singulis crearentur hominibus, peccatum originale explicari non posset. *Hujus damnationis*, inquit *Epist. CLXVI. al. XXVIII. ad Hieron.*, in parvulis causam requiro; quia neque animarum, si novae fiunt singulis singulae, video esse ullum in illa aetate peccatum, nec a Deo damnari aliquem credo, quam videt nullum habere peccatum. Vide totam Epistolam ad *Hieron.* nec non *Epist. CXC. al. CLVII. ad Optatum, Libros de Anima, et de origine Animae.* Ergo.

¶ *Neg. ant. 1.º* Quia non est negandum, quod fide certum est, quia quomodo id fiat, nescimus. Unde ipse *Augustinus Lib. III. de peccat. mer. cap. 4. Ego autem*, inquit, nisi refellere istorum argumenta non valeam, video tamen inhaerendum esse iis, quae in scripturis sunt apertissima. *2.º* Quia etiam, posito dogmate ho-

hodie apud Theologos certo de creatione animarum in singulis, explicari potest traductio peccati originalis, ea ratione, quam suppeditat ipse *Augustinus*; et nos fusius explicabimus suo loco; quia scilicet anima corpori infusa *tamquam in vase vitiato corrumpitur Lib. I. cont. Julian. cap. 4.* non quidem actuali voluntate, sed *habituali* vitio, quo concupiscentiis carnis fit subdita. Nec dubitavit *Augustinus*, quo pacto anima recens creata, et infusa corpori *habituali* vitium contraheret; sed quomodo id non esset contrarium justitiae Dei, qui animam infundit corpori, ubi certe peccatum contrahit: unde ait *loc. cit. Profecto aut utrumque vitiatum ex homine trahitur, aut alterum in altero tamquam in vase vitiato corrumpitur, ubi occulta justitia divinae legis includitur.*

*Inst. 4.º* Ergo saltem originale peccatum conciliari non potest cum justitia Dei, qui animas recens creatas infundit corporibus, in quibus peccato, et deterrimis peccati poenis subjiciuntur. Ergo etc.

¶ *Neg. ant.* Cum enim Deus ab aeterno constituerit, ut disposito corpori infundatur anima, non debuit ob *Adae* culpam creationis ordinem suspendere. *Praevaricatio hominum dispositae a saeculis creationis ordinem turbare non potuit*, inquit *Prosper Resp. ad Object. Vincent. IV.* Permittit enim, ut universalis provisor, malum, ex quo majus bonum eruit, et cui praestantissimum remedium redemptionis opposuit. Caeterum *occultam justitiam* dicit *Augustinus*; quia licet justitiae Dei rationem aliqua in re intelligere non valeamus; tamen quin *justissime Deus* agat, dubitare non possumus.

*Inst. 5.º* Si Deus ipse immittit animam in corpus, in quo certe maculatur, vel Deus ipse est peccati auctor, vel damnandae cum *Manichaeis* nuptiae, ex quibus tantum producit malum. Atqui falsum consequens. Ergo.

¶ *Neg. seq. maj.* Neutrum sequitur ex doctrina de originali peccato. Deus enim naturam creavit bonam, quae se ipsa maculavit; ejus autem culpa universalem creationis ordinem suspendere non debuit. *Non ex creatione Dei est vitium, quod voluntario motu natura collegit, sed etiam de vitiosa per seipsam natura Deus*  
*Tom. II. Z in*



354 *Theolog. Instit. Lib. V. Pars IV. Cap. XI.*  
*institutionem suae creationis exequitur, inquit Gelasius*  
*Epist. VII.*

*Inst. 6.º Non peccat ille qui condidit, non peccat*  
*ille qui genuit, non peccat iste, qui nascitur; per quas*  
*ergo rimas peccatum ingreditur? Ergo.*

*¶. Cum Augustino Lib. II. de nupt. cap. 27. et*  
*Lib. III. cont. Julian: cap. 24. Quid quaerit latentem*  
*rimam, cum habeat apertissimam januam? per unum*  
*hominem, ait Apostolus: per unius debitum; ait Apo-*  
*stolus: per inobedientiam unius hominis, ait Apostolus:*  
*quid quaerit amplius? quid quaerit apertius? Per pec-*  
*catum itaque Adae vitiatam naturam, ille, qui nascitur,*  
*non peccat, sed habituale peccatum contrahit.*

*Inst. 7.º Nemo dat, quod non habet. Atqui parentes*  
*baptizati originale peccatum non habent. Ergo saltem*  
*illorum filii illud non contrahunt.*

*¶. Dist. min. Non habent originale peccatum, sed*  
*habent adhuc vitiatam naturam, quae in ipsis peccatum*  
*non est propter baptismi gratiam, conc. Secus, neg.*  
*Naturam igitur, quam ab Adamo vitiatam acceperunt,*  
*vitiatam quoque filiis communicant: sed in ipsis qui-*  
*dem haec corrupta natura, peccatum non habet; quia*  
*in baptismo deletum est: in parvulis peccatum habet;*  
*quia nondum est baptismo deletum. Explicat id Augu-*  
*stinus exemplo oleae, cujus semen non oleam, sed*  
*oleastrum producit; aliisque similibus, nosque clarius*  
*explicabimus inferius.*

## §. II.

### *De peccati originalis natura.*

*Adv. I. Etsi certissimum est originale peccatum,*  
*incerta tamen ejus natura est; sicut multa certo novi-*  
*mus; quorum naturam ignoramus. Inter haereticos Il-*  
*lyricus Lutheranus Lib. de Just. Orig. putat, illud es-*  
*se substantiam quandam malam, ita ut ipsa animae sub-*  
*stantia per diaboli fraudem de bona in malam mutata*  
*sit. Ceteri vero Lutherani, et Calvinistae volunt, non*  
*aliud esse formaliter, nisi ipsam concupiscentiam, quae*  
*cum*

cum in baptizatis remaneat, hinc inferunt, non deleri, sed tegi per baptismum originale peccatum.

II. Inter Catholicos quatuor sententiae sunt. 1.<sup>o</sup> *Albertus Pighius*, et *Catharinus* tenent, originale peccatum esse extrinsecus petitam denominationem ab actuali Adae peccato. 2.<sup>o</sup> Recentiores Scholastici post *Anselmum Lib. de Conc. Virg. cap. 2.* docent, esse privationem justitiae originalis *inadequate* acceptae pro gratia sanctificante; 3.<sup>o</sup> *Gregorius Ariminensis in II. Dist. XXX. q. 2. art. 1.*, *Henricus Gandavensis (Ibid. q. 1. art. 2.) Juveninus, Estius*, Theologique omnes ex Augustiniana Schola affirmant, originale peccatum *materialiter* quidem esse ipsam concupiscentiam, quam *Ariminensis morbidam qualitatem* appellat; *formaliter* vero esse concupiscentiae ipsius reatum: quo nomine non intelligunt obligationem subeundae poenae, sed dominatum in animam, ejusque voluntatem, propter quem dominatum anima rea est poenae. 4.<sup>o</sup> Thomistae cum *Goneto, Contensonio, Gottio*, aliisque docent, *materialiter* esse concupiscentiam, *formaliter* vero privationem justitiae originalis, sive sanctificantis gratiae: quae sententia non multum recedit a doctrina Augustinianorum, et fortasse nonnisi verbis differt; ideo enim inest animae *realis*, sive concupiscentiae dominatus, quia deest illi gratia sanctificans, qua habitu convertatur ad Deum.

III. Ne tamen in obscuro laboremus, observandum est, concupiscentiam quadruplici sensu intelligi posse: 1.<sup>o</sup> pro actibus inordinatis, qui contra rationem insurgunt: 2.<sup>o</sup> pro habituali appetitu sensibili rerum naturae congruentium, servato rationis ordine: 3.<sup>o</sup> pro habituali propensione ad voluptates sensibiles contra rationis ordinem: 4.<sup>o</sup> pro vitio omnium animae virium, et facultatum, seu *habituali* propensione ad quodcumque malum. Porro *hæc* dixerit, concupiscentiam, tribus prioribus modis intellectam, peccatum originale constituere: non primo: quia actus illi sunt effectus originalis culpae: non secundo; quia appetitus ille bonus est: non tertio; quia cupiditas illa vitiosa rerum sensibilibus, pars quaedam est mali, sed non totum malum sola constituit. Itaque cum concupiscentiam hic nominabimus, eam quarto tantum sensu intelligimus, quo

sensu eam intellexit Apostolus *Gal. V. 19.* qui postquam dixit, carnem concupiscere adversum spiritum, enumerans opera carnis, omne genus peccatorum recenset. Atque ita illam saepe intelligit *Augustinus*, et *S. Thomas (a)*.

IV. Denique illud etiam animadvertendum est, veteres quosdam Scholasticos concupiscentiam putasse qualitatem quandam, ab anima reipsa distinctam, sive ut ajunt *positivam entitatem*: quae opinio multis rationibus explodenda est. Nos itaque concupiscentiam dicimus vitium quoddam, morbum, atque languorem, ut saepe loquitur *Augustinus*. Nunc singula expendamus.

## P R O P O S I T I O I.

*Peccatum originale non est substantia mala, ut asserit Illyricus. Est fidei dogma.*

*Prob.* Omnis substantia bona est, quia a Deo est, ita ut nullum possit esse *ens*, nulla substantia, nisi bona, ipseque diabolus quoad substantiam bonus sit. Ergo peccatum originale non est substantia, sed potius defectio ab ipsa substantia, quae Deus est. Adde, hunc errorem incidere in Manichaeorum haeresim, qui ideo statuebant principium quoddam malum, quia peccatum non in defectu, sed in substantia mala ponebant: ex quo sequebatur, agnoscendam esse primam aliquam substantiam malam, quae peccati prima causa foret. Ergo.

### *Diluuntur Objecta.*

*Obje. I.* Habitus vitiosi mali sunt. Atqui non distinguuntur reipsa a substantia animae. Ergo ipsa animae substantia, habitibus illis depravata, mala est.

✱.

---

(a) *Augustinus Lib. XIV. de Civ. cap. 2. et seq. et Lib. XV. cap. 7. Lib. II. cont. Julian. cap. 8.* Hieronymus *Q. 2. ad Algasiam*, S. Thomas 1. 2. Q. *LXXXII. art. 2.*

*W. Dist. maj.* Mali sunt, quatenus per illos substantia animae deficit a recto ordine, *conc.* Mali sunt propter aliquid *positivum*, et *substantiale*, *neg.* Malitia ergo, quae in vitiosis est habitibus, non substantia, sed defectio a substantia dici debet.

*Objic. II.* Homo per peccatum ex filio Dei factus est filius diaboli; ideoque ad impios dicebat Christus: *Vos ex patre diabolo estis Joan. VIII. 44.* Ipsa igitur ejus substantia per peccatum mutata est.

*W. Dist. ant.* Factus est filius diaboli per imitationem, *conc.* Per substantiam, *neg.* Imitatio autem illa, per quam homo, qui ad imaginem Dei factus est, similis fit diabolo, non est aliqua substantia, sed substantiae ipsius defectus. Caeterum ipsa substantia diaboli mala non est.

*Inst.* Imago Dei in homine substantia est. Atqui peccatum destruit in homine imaginem Dei, et diaboli imaginem inducit. Ergo.

*W. Dist. min.* Peccatum destruit in homine imaginem Dei quoad accidentia, sive dona supernaturalia, et rectum ordinem, *conc.* Destruit imaginem *substantialem*, quae sita est in ipsa natura animae rationalis, *neg.* Idem dicas de imagine diaboli, quae per peccatum inducitur, Imago enim illa *accidentalis* est, quatenus ipsam animae substantiam, quae bona remanet, privat recto ordine, quem habebat.

## PROPOSITIO II.

*Peccatum originale non esse formaliter ipsam concupiscentiam, dogma fidei est.*

*Prob. I.* Concupiscentia remanet in baptizatis. Atqui in iis non remanet peccatum Nam 1.<sup>a</sup> Apostolus *Rom. VI. 4. et 2. confert destructionem peccati, et renovationem animae, quae fit in Baptismo, cum morte, et resurrectione Christi: Consepulti, inquit, sumus cum illo per baptismum in mortem: ut quomodo Christus surrexit a mortuis per gloriam Patris, ita et nos in novitate vitae ambulemus. . . . qui mortui sumus peccato, quomodo adhuc vivemus in illo? Et Rom. VIII. 1:*

Ni-

Nihil ergo nunc damnationis est eis, qui sunt in Christo Jesu, 2.<sup>o</sup> Joannes Ep. I. cap. 1. 7. Sanguis, inquit, Jesu Christi Filii ejus emundat nos ab omni peccato. Ergo concupiscentia non est formaliter ipsum originale peccatum. Quod et confirmatur apertius ex illo Jac. I. 15. Concupiscentia cum conceperit, parit peccatum. Non est ergo ipsa per se peccatum.

Prob. II. Augustinus Lib. I. de Nupt. et conc. cap. 23. Concupiscentia non est peccatum in regeneratis, quando illi ad illicita opera non consentitur. . . Sic autem vocatur peccatum, quia peccato facta est, cum jam in regeneratis non sit ipsa peccatum; sicut vocatur lingua locutio, quam facit lingua, et manus vocatur scriptura, quam facit manus. Itemque sic vocatur peccatum, quia peccatum, si vicerit, facit; sicut vocatur frigus pigrum, non quod a pigris fiat, sed quod pigris faciat. Quibus apertissimis Augustini sententiis victus Calvinus Lib. III. Institut. cap. III. §. 10. Inter illum Augustinum, et nos, inquit, hoc discriminis videri potest interesse, quod ipse quidem cum fideles concedat, quamdiu in corpore mortali habitant, sic illigatos teneri concupiscentia, ut non possint non concupiscere, eum tamen morbum peccatum vocare non audeat, sed . . . tunc demum fieri peccatum docet. . . quando primæ appetitioni cedit voluntas; nos autem illud ipsum pro peccato habemus.

Prob. III. ex omnium Catholicorum consensu, et definitione Concilii Trid. quod Sess. V. can. 5. Si quis, inquit, per Jesu Christi Domini nostri gratiam, quæ in baptismo confertur, reatum originalis peccati remitti negat; aut etiam asserit, non tolli totum id, quod veram, et propriam peccati rationem habet; sed illud dicit tantum rati, aut non imputari: anathema sit. . . Manere autem in baptizatis concupiscentiam, vel fomittem, hæc Sancta Synodus fatetur, et sentit: quia cum ad agonem relicta sit, nocere non consentientibus, sed viriliter per Christi Jesu gratiam repugnantibus, non valet. . . Hanc concupiscentiam, quam aliquando Apostolus peccatum appellat, Sancta Synodus declarat, Ecclesiam catholicam nunquam intellexisse peccatum appellari, quod vere, et proprie in renatis peccatum sit, sed

*sed quia ex peccato est, et ad peccatum inclinatur. Si quis autem contrarium senserit, anathema sit.*

### Objectiones.

*Objic. I. Apostolus Rom. VII. in persona hominis regenerati ( ut fatetur, et probat Augustinus ) loquens, vocat concupiscentiam peccatum: Non ego operor illud, sed quod habitat in me, peccatum; legem membrorum, legem carnis, legem peccati repugnantem legi Dei; Video aliam legem in membris meis, repugnantem legi mentis meae, et captivantem me in lege peccati. Atqui, ut inquit Calvinus Ibid. §. 11. quis repugnantiam adversus legem Dei malam esse neget? quis impedimentum justitiae neget esse peccatum? Ergo ipsa concupiscentia, qua homo per Adae peccatum implicatus nascitur, originale peccatum est.*

*¶ Dist. maj. Ex Augustino, et Tridentino supra laudatis, Apostolus concupiscentiam appellat peccatum per metaphoram, quia ex peccato est, ad peccatum inclinatur, et peccatum, cum vicerit, seu cum conceperit, facit, conc. Vere, et proprie, neg. Dist. etiam min. Repugnantia adversus legem Dei, et impedimentum justitiae malum est materiale, conc. Formale, subdist. cum voluntas illi servit, conc. Cum reluctatur, neg. Non negamus, malum esse, hoc est pravitatem quandam, *αταξίαν*, seu inordinationem, ut inferiora superioribus non subiciantur; sed cum peccatum nonnisi in voluntate sit, si illa a rebellantibus potentiis non vincitur, non potest in ea esse peccatum.*

*Inst. 1.º Concupiscentia odio habetur, et prohibetur a Deo, praecepto illo: non concupisces. Atqui nihil odio habetur a Deo praeter peccatum proprie dictum. Ergo.*

*¶ Dist. maj. Odio habetur a Deo tamquam materialis quaedam pravitas, et *αταξία*, conc. Tamquam formale peccatum, subdist. Si voluntas ei serviat, conc. Si resistat, neg. Cum ergo praecepta non dentur, nisi voluntati; hinc sequitur, praecepto illo non concupisces id solum vetari, ne concupiscentiae serviatur; quod aliter alio in loco dicitur, *Eccli. XVIII. 30. Post concupiscentias tuas non eas; id vero praecipi, ut quantum possu-*  
*mus.**

mus, per corporis afflictationes, nostrique victoriam, ac veluti negationem, concupiscentiam minuamus, quo fiet, ut tamquam praemium in patria ipsius concupiscentiae immunitatem plenam, completamque destructionem perpetuo duraturam accipiamus.

*Inst. 2.º* Primum, et maximum Dei praeceptum est, *Diliges Dominum Deum tuum ex toto corde tuo, ex tota mente, et tota anima, ex totis viribus.* Atqui ille, cui vel minimum concupiscentiae inest, etiam invito, non diligit Deum ex toto corde, anima, mente, viribus, ut patet. Ergo ipsa concupiscentia proprie peccatum est, et praecepti violatio.

*¶. Dist. min.* Ille, cui concupiscentia inest, non diligit Deum ex toto corde, quia aliquando voluntarie obedit concupiscentiae, *conc.* Si semper concupiscentiam vinceret, *neg.* Imo qui concupiscentia oppugnatur, si illam semper, et in omnibus vinceret, magis, et plenius, et laudabilius observaret praeceptum illud dilectionis; sed quia dum homo rationis capax esse incipit, non potest sine speciali Dei privilegio omnes omnino vitare lapsus; ideo praeceptum aliquando transgreditur, et quidem voluntarie, ut suo loco explicabimus.

*Inst. 3.º* Augustinus licet aliquando concupiscentiam proprie peccatum esse negaverit, ut declinaret tela Pelagianorum, qui illum eo nomine Manichaeorum haeresis accusabant; tamen Pelagianis prostratis, non dubitavit illam vere, et proprie appellare peccatum. *Sic. Lib. V. cont. Julian. cap. 3.* Sicut, inquit, caecitas cordis et peccatum est, quo in Deum non creditur, et poena peccati, qua cor superbum digua animadversione punitur, et causa peccati, cum aliquid mali cordis caecitate committitur; ita carnis concupiscentia, adversus quam bonus spiritus concupiscit, et peccatum est, quia inest illi inobedientia adversus dominatum mentis, et poena peccati est, quia reddita est meritis inobedientis, et causa peccati, defectione consentientis, vel contagione nascentis. Multa huic similia Augustini, aliorumque Patrum loca congerit Kemnitius in *Exam. Conca Trid.* Quibus verbis concupiscentiam peccatum vocat, non solum quia effectus, et causa est peccati; verum etiam quia ipsa peccatum est. Ergo.

*N. Neg. ant.* Augustino, et veritati injuriosum. *Ad confirm. dist. ant.* ut supra. Concupiscentia peccatum est, quia inest ei inobedientia adversus dominatum mentis, peccatum, inquam, *materiale*, conc. *Formale*, et proprium, *subdist.* Si mens illi sit subdita, conc. Si resistat, *neg.* Patet responsio ex dictis.

*Objic.* praeterea Lutherus Augustinum *Lib. I. de Nupt. et conc. cap. 25. et 27.* docuisse, peccatum in baptismo dimitti non ut non sit, sed ut non imputetur, et ipsum peccatum per baptismum transire reatu, actu manere. Sed hoc insigne mendacium est. Augustinus enim non ait, peccatum, sed concupiscentiam manere actu, et non imputari post baptismum; quia mens ei jam habitu non servit. Fusius hac de re disserit Bellarminus *De ami.s. grat. Lib. V. cap. 7. et seq.*

### PROPOSITIO III.

*Peccatum originale non est ipsum Adae delictum extrinsecus imputatum ejus posteris, ut volunt Pighius, et Catharinus.*

*Prob. I. Rom. V. 12. Per unum hominem peccatum intravit in hunc mundum, et per peccatum mors.* Atqui Adae peccatum dici non potest intrasse in ejus posteros, cum fuerit personae illi peculiaris actus. Ergo. Praeterea ibidem Apostolus comparat peccatum, quod ex Adamo trahitur, cum justitia, quae derivatur ex Christo. *Sicut per inobedientiam unius peccatores constituti sunt multi: ita et per unius obeditionem justi constituentur multi.* Atqui justitia, quae in homines derivatur ex Christo, non est ipsa Christi justitia extrinsecus illis imputata, ut suo loco dicemus; sed ipsis intrinsecus inhaeret. Ergo et peccatum, quod trahitur ex Adam.

*Prob. II. Concilium Tridentinum Sess. V. can. 3. declarat, peccatum originale inesse unicuique proprium: Si quis hoc Adae peccatum, quod origine unum esse, et propagatione, non imitatione transfusum, omnibus inest unicuique proprium etc.* Et addit in ead. Sess. per baptismum deleri in parvulis quidquid veram, et propria



priam peccati rationem habet. Atqui exterior imputatio peccati Adae non sufficit, ut originalis culpa insit unicuique propria; et in baptismo deleatur. Ergo merito *Catharini*, et *Pighii* sententia a Theologis omnibus rejicitur ut *erronea*. *Suarez* quidem illam etiam haereseos censura notat. Sed quia *bellarminus De amiss. grat. Lib. V. cap. 16.* ait, agnovisse *Pighium*, et *Catharinum* in parvulis, praeter imputationem peccati Adae, etiam privationem originalis justitiae, reatum etc. ideo ab haereseos censura abstinendum ducimus.

#### PROPOSITIO IV.

*Peccati originalis natura, sita est in concupiscentia cum reatu, seu cum privatione originalis justitiae; ita ut concupiscentia se habeat ut materiale peccati, reatus vero ut formale.*

*Prob. I.* Nihil est fere in Augustini Libris contra Pelagianos frequentius, et clarius inculcatum, quam concupiscentiam esse originale peccatum, eam remitti in baptismo, quoad reatum, licet quoad actum maneat. Respondetur, inquit *Lib. I. de Nupt. et conc. cap. 25.*, dimitti concupiscentiam carnis in baptismo, non ut non sit, sed ut in peccatum non imputetur, quamvis autem reatu suo jam soluto, manet tamen. Itaque in baptismo peccatum originale dimittitur. Sed *Augustinus* ait, in baptismo remitti concupiscentiam quoad reatum. Ergo ipsa concupiscentia, quatenus cum reatu conjuncta est, peccatum originale constituit. Et in eodem Libro cap. 23. Haec concupiscentia, quae solo sacramento regenerationis expiatur, profecto peccati vinculum generatione trajicit in posterum, nisi ab illo et ipsi regeneratione solvantur. Quod saepissime aliis in locis repetit (a). Ne-

---

(a) *Lib. I. de Nupt. et conc. cap. 23. et 24. lib. II. cap. 33. lib. II. cont. Julian. cap. 3. 5. 9. 10. lib. V. cont. eundem cap. 7. lib. VI. cap. 6. 7. 8. lib. De peccat. merit. cap. 9. 10. 29. lib. II. cap. 4. Serm. XII. de verb. Apost. in Ps. LVII. lib. I. Retract. cap. 15. et al.*

Neque audiendi sunt qui dicunt, ideo Augustinum vocare concupiscentiam cum reatu peccatum originale, quia cum peccato originali conjuncta, et ab illo producta est; quis enim umquam dixerit, ignem esse fumum quia fumus cum igne conjunctus, et ab illo productus est? Ergo.

*Prob. II. ex S. Thoma 1. 2. Q. LXXXII. art. 3. Privatio justitiae originalis, per quam voluntas subdebatur Deo, est formale in peccato originali: omnis autem alia inordinatio virium animae se habet in peccato originali sicut quiddam materiale.* Quae verba frustra conantur in alienum sensum detorquere recentiores, urgentes illa verba; *sicut quiddam materiale*, quasi innuat Angelicus Doctor, concupiscentiam non esse proprie materiale peccati originalis. Frustra, inquam; nam ideo sic loquitur, quia concupiscentia non est corpus aliquod, aut substantia; sicut cum Tridentinum ait, actus poenitentis esse *quasi materiam* Sacramenti poenitentiae. Ergo concupiscentia cum privatione originalis justitiae, ex qua privatione mens non subditur Deo, sed ipsi concupiscentiae, originale peccatum est.

*Prob. III. ex S. Bonaventura in II Dist. XXX: art. 2. Q. 1. Concedendum est, sicut rationes ostendunt, et Magister dicit in litera, quod originale peccatum est concupiscentia non quaecumque, sed concupiscentia prout claudit in se debitae justitiae carentium, haec autem est concupiscentia immoderata, et intensa, adeo ut sit carnis ad spiritum praedominantia.* Ergo.

*Prob. IV. Tridentina Synodus Sess. V. can. 5. ait, concupiscentiam in renatis non esse peccatum. Ergo pro certo habet, illam in iis, qui nondum renati sunt, esse peccatum. Non est autem peccatum actuale cujus infantes non sunt capaces; est igitur peccatum habituale, et originale.*

*Prob. V. ratione S. Bonaventurae Ibid. In omni peccato est aliqua conversio ad commutabile bonum vel in actu, vel in habitu; quod est sapientissime ab Augustino usurpatum axioma. Si igitur peccatum originale est peccatum; ergo ibi est aliqua conversio inordinata ad bonum commutabile. Sed conversio inordinata ad bonum commutabile nihil est aliud quam concupiscentia.*

Er-

inde veram, et propriam peccati rationem amplius non habet. Ita Augustinus *Lib. I. de pecc. merit. et remiss. cap. ult. et alibi*: quem nimis intemperanter, atque audacter Vasquez censura notare non est veritus. *Bel-larminus* vero loquitur adversus eos, qui concupiscentiam fingebant, esse *positivam qualitatem*, et nescio quam *entitatem*, quod non probamus.

*Inst. 1.º* Si concupiscentia pertineret ad peccati originalis naturam, tamquam ejus materia, peccatum post baptismum maneret actu, transiret reatu. Atqui hoc fieri non potest; quis enim dixerit, homicidium *ex. gr.* aut sacrificium idolis oblatum manere actu sine reatu? Ergo.

¶ *Dist. maj.* Quoad materiam, *conc.* Quoad *formalem* rationem, sive naturam, *neg.* et *Dist. min.* Fieri non potest in peccatis actualibus, quale est homicidium, aut idololatria in exemplo adducta, *conc.* In peccatis habitualibus, *neg.* Videmus enim, in iis, qui peccandi consuetudine implicati sunt, etiam soluto per baptismum, aut per absolutionem sacramentalis vinculo reatus, manere tamen adhuc pravam habitum, contra quem animus gratia Dei jam sanatus dimicare debet, ne in voluntarios actus prorumpat. Unde merito talia objicienti Juliano respondet Augustinus *Lib. VI. cont. Jul. cap. 19.* *Idolis itaque sacrificatum factum est transiens, non vitium manens. Nullo modo igitur simile est, quod pro simili ponendum putasti. Nullo modo, inquam, simile est sacrificium transiens manenti concupiscentiae.*

*Inst. 2.º* Si reatus peccati originalis solveretur in baptismo, manente adhuc ejus materia; sequeretur, eum qui voluntarie gratiam baptismi per peccatum amittit, iterumque concupiscentiae subditur, incidere iterum in originale peccatum, posseque iterum baptizari. Absurdum consequens. Ergo et *antecedens.*

¶ *Neg. seq. maj.* Quodcumque enim post baptismum admittitur peccatum, semper *actuali* peccantis voluntate fit, non originaria ipsius Adæ; ac proinde non est *originale*, sed *actuale*, per alia remedia sanandum, a Christo instituta pro baptizatorum reconciliatione, et

salute, in quibus baptismi character nullo umquam actuali peccato deletur.

*Objic. III.* Concupiscentia non in omnibus aequalis est, sed in nonnullis vehementior. Atqui peccatum originale in omnibus idem est. Ergo.

*¶. Dist. maj.* Non in omnibus aequalis est quoad actum, quia pro varia corporis, aut pravae consuetudinis dispositione varios producit actus, *conc.* Quoad habitum, seu *inordinationem habitualement*, *neg.* Ita S. Thomas 1a. 2ae. Q. LXXXII. art. 4. Quod illustrari potest exemplo rationalis animae, quae in omnibus hominibus ejusdem generis est; alioquin diversa esset hominum natura; et tamen in nonnullis est ingenium promptius, et mens quodammodo diviniore, et memoria tenacior; in aliis vero ita infirmae mentis facultates, ut stupidi videantur: quod ex varia corporis, humorum, aliarumque causarum, quae mentem afficiunt, dispositione oritur.

*Objic. IV.* auctoritatem Anselmi, qui *Lib. de Conceptu Virg.* cap. 26. sic habet: *Hoc peccatum, quod originale dicitur, aliud intelligere nequeo in ipsis infantibus, nisi ipsam, quam supra posui, factam per inobedientiam Adae justitiae debitae nuditatem.* Ergo.

*¶. Dist. ant.* Non aliud ex Anselmo est peccatum originale praeter justitiae nuditatem, si inspiciatur ejus ratio formalis, *conc.* Materialis, *subdist.* Si per nuditatem justitiae intelligas privationem tum gratiae sanctificantis tum recti ordinis omnium animae virium, et facultatum, *conc.* Si intelligas solam privationem gratiae sanctificantis, *neg.* Responsio patet ex dictis.

*Inst.* Peccatum originale est peccatum habituale. Atqui in omni peccato habituali ipsa privatio justitiae propter actum pravam, qui praecessit, constituit peccati naturam, licet nullus contractus sit ex actu malo habitus vitiosus. Ergo idem dicendum de peccato originali; ejus scilicet naturam etiam esse in privatione gratiae sanctificantis propter Adae inobedientiam: concupiscentiam vero esse ejus appendicem.

*¶. Dist. min.* Si privatio justitiae intelligatur pro habituali aversione a Deo, et conversione ad creaturam, *conc.* Si pro sola privatione gratiae sanctificantis, *neg.* Fateamur itaque, in peccato originali, sicut in quocumque

que *habituali* peccato, conversionem *habitualement* ad creaturam esse *materiale*: habitualement vero aversionem a Deo, per quam ipsa voluntas subdita fit cupiditati, esse *formale* peccati. In eo tantum originale a ceteris habitualibus differt, quod in illo generalis est conversio ad quaecumque illicita propter culpam Adae, qui in se naturam humanam pessima concupiscentiae tabe vitiauit; in aliis vero conversio ad peculiariora mala, quae liberae peccantis voluntati placuerunt. Sed quia privatio gratiae est aversionis illius, et conversionis poena; ideo, si privatio iustitiae de ipsa gratiae privatione intelligatur, negamus, in ea sitam esse naturam cujuscumque habitualis peccati, nisi forte per *metonymiam*, qua nomen effectus causae tribuitur. Vide *Berti*, *Estium*, aliosque, qui hanc fusius doctrinam pertractant.

## §. III.

*Quomodo peccatum originale traducatur.*

*Adv. I.* Non est ad salutem necessarium scire, quo tandem modo peccatum originale traducatur, sicut contra necesse est scire illius existentiam, et modum, quo deleri possit. Sic necesse non est, inquit *Augustinus*, scire modum, quo quis in puteum decidit, sed sufficit ad illius miseri salutem scire, eum cecidisse, et modum, quo possit inde extrahi, illumque adhibere. Quod si modus translationis originalis culpa esset scitu necessarius, etiam illam revelasset Deus. *Credo quod etiam hinc divinarum dequorum clarissima auctoritas esset, si homo illud sine dispendio promissae salutis ignorare non posset*, inquit idem *Augustinus Lib. II. de pecc. merit. cap. ult.* Igitur deficiente hic revelationis face, in varias theologi sententias abeunt.

*II.* Veteres nonnulli putarunt, animas hominum a parentibus traduci; atque ideo ex anima Adae peccatrice nonnisi peccatrices animas prodire potuisse. Hanc sententiam, de qua ut supra vidimus *cap. II.* semper dubitavit *Augustinus*, nos ibidem refutavimus.

*III.* Theologi, qui nolunt, concupiscentiam esse materiale peccati originalis, putant, Deum pactum quoddam

dam cum Adamo inivisse, vel legem sanxisse, ut si ille iustitiam conservaret originalem, velut haereditatem transmitteret eam ad posteros; sin desereret, omnes nepotes suos illa privaret.

IV. In Schola *Augustini* communis sententia est, peccatum originale ab Adamo ad posteros per concupiscentiam transmitti. Cum enim concupiscentia sit *materiale* illius peccati, atque ea peste Adam naturam suam infecerit, necessario factum est, ut ea suos quoque posteros inficeret, ac labefactaret. Si enim videmus, minora vitia aliquando a parentibus in filios derivari, cuius rei explicatio non Theologorum, sed physicorum est; multo magis hoc concupiscentiae vitium, quod penitus in ipsa viscera, ossa, et medullas penetraverat primi parentis. Porro licet anima sine peccato creetur a Deo, tamen infusa corpori tabe ista infecto; propter naturale corporis, animique commercium, inficitur et ipsa; cum enim careat gratia, quam Deus post Adae culpam non nisi per Christum dare voluit renatis in Christo, non potest non esse subdita concupiscentiae, atque habitu a Deo aversa, et ad creaturas inclinata, donec per gratiam Salvatoris habitu convertatur ad Deum, fiatq. illi concupiscentia carnis involuntaria.

## PROPOSITIO I.

*Peccatum originale non traducitur in Adae filios ex pacto, quod Deus cum primis parentibus inierit.*

*Prob. I.* Altum est hujuscemodi pacti, aut legis silentium tum in Scriptura, tum in traditione, praescriptum in *Augustino*, qui doctrinam originalis peccati funditus rimatus est. Ergo gratis fingitur.

*Prob. II.* Hypothesis ejus pacti modum traductionis peccati, tantum abest ut explicet, quin potius obscuriorem reddit, ipsumq. dogma fidei de transfusione originalis culpaе incredulorum cavillis, et irrisioni videtur objicere. Quis enim credat, Deum optimum, sapientissimum, acquissimum, sanxisse hoc pactum, ut in voluntate unius hominis, quem certissime sciebat esse peccaturum, reponeret voluntates tot millium hominum non dum nato-

rua

ram, ita ut quod ille primus vellet, omnes voluisse censerentur; atque hinc poenis aeternis punirentur? Ergo.

*Objic.* Scriptura, et Patres docent, omnes in Adam peccasse *Rom. V. 12. In quo omnes peccaverunt . . . per inobedientiam unius hominis peccatores constituti sunt multi.* Augustinus *Lib. XVI. de Civ. cap. 27. verba illa Gen. XVII. Masculus, cujus caro circumcisa non fuerit delebitur anima illa de populo suo; quia pactum meum irritum fecit, ita explicat, ut ipsi parvuli in Adam transgressi sint pactum, et legem Dei: testamentum dissipavit quando in Adam cum omnibus et ipse peccavit. Et Epist. XCVIII. al. XXIII. ad Bonif. Trazit ergo reatum, quia unus erat cum illo, et in illo, a quo trazit, quando eum trazit, admissum est. Ambrosius in cap. XV. Luc. Fuit Adam, et in illo fuimus omnes. Periiit Adam, et in illo omnes perierunt. Bernardus Serm. I. in Dom. 1. post. Oct. Epiph. Aliena est (culpa) quia in Adam omnes nescientes peccavimus; nostra, quia etsi in alio, nos tamen peccavimus. Ergo.*

*¶. Dist. ant.* Omnes in Adam peccaverunt, et pactum, sive legem Dei violarunt, *moraliter*; quia scilicet Adam peccando causam posuit, ex qua omnes ejus posterii peccatum contraherent, *conc.* Omnes in Adam peccarunt *physice, neg.* Sicut cum dicitur in Scripturis in Deo faciemus virtutem, in te inimicos nostros ventilabimus cornu, in te eripiar a tentatione, sensus est, Deam per gratiam suam ad haec bona opera nos movere; sic eum dicimur peccasse in Adam, idem sensus est. Vide hac e fusius apud Berti, *Lib. XIII. cap. 6.* ubi nostram sententiam solide confirmat.

## PROPOSITIO II.

*Causa, et modus transfusionis peccati originalis est ipsa concupiscentia.*

*Prob. I. ex PP. 1.º Augustinus* id saepe docet contra Pelagianos. *Hac concupiscentia, quae solo sacramento regenerationis expiatur, profecto peccati vinculum generatione transit in posteros Lib. de Nupt. et conc. cap. Tom. II.*

23. Et Lib. V. cont. Julian. cap. 15. docet, ideo Christum peccatum originale contrahere non potuisse, quia non per concupiscentiam carnali generatione conceptus est. Quod autem attinet ad peccati originalis in omnes homines transitum, quoniam per concupiscentiam carnis transit, transire in eam carnem non potuit, quam non per illam Virgo concepit. Idem saepissime repetit (a): 20. Augustino consentiunt alii PP. Origenes, sive Auctor Comment. in Epist. ad Rom. Origeni attributus: Qui ex nulla viri contagione, sed solo Spiritu Sancto super Virginem veniente, et virtute Altissimi obumbrante, venit ad corpus immaculatum, naturam quidem corporis nostri habuit, pollutionem tamen peccati, quae ex concupiscentiae motu conceptis traditur, omnino non habuit. Ambrosius Comment. in Isaiam ap. Augustinum Lib. I. cont. Jul. cap. 4. et al. Male Heva parturivit, . . . ut unusquisque concupiscentiae voluptate concretus . . . prius subiret delictorum contagium, quam vitalis spiritus munus hauriret Idemque docent Fulgentius Leo M., Gelasius, Beda, Bernardus, Innocentius III., Hugo Victorinus, Magister sententiarum, S. Thomas, Bonaventura, Ariminensis, aliique (b). Ergo etc.

Prob. II. Infecta Adam naturae concupiscentiae labe, idem vitium in prolem transfundi, nemini mirum videri debet. Atqui licet concupiscentia non sit formale peccatum, tamen anima ipsa, corpori sic vitio infusa naturaliter eidem vitio subditur, ac proinde contrahit concupiscentiae reatum, ut supra explicavimus, et uberius patebit ex objectionum solutione. Ergo etc.

Di-

(a) Lib. II. Op. imp. cont. Jul. Cap. 25. Lib. II. de pecc. merito cap. 6. 15. 27. 28. Lib. I. de Nupt. et conc. cap. 2. Lib. XI. cont. Julian. cap. ult. et alibi.

(b) Fulgentius de lib. arb. et grat. Leo M. Serm. V. de Nativ. Dom. Gelasius Ep. VIII. Beda Lib. aliquot. Quaest. XIV. Bernardus Epist. CLXXIV. Serm. IV. in Vig. Nat. et al. Hugo Victorinus in Ep. ad Rom. Q. 106. et in Summa Sent. Tract. III. cap. 12. Innoc. III. in Psal. L. Magister Lib. II. Sent. XXXI. Dist. et XXX. et ibi ejus Commenta-  
tores.



*Diluuntur objecta.*

**Obje. I.** Licet possit intelligi, quo pacto infecta per concupiscentiam Adami natura, idem vitium traducatur in corpora, aliasque animales potentias posterorum; nequit tamen intelligi quo pacto vitium hoc ipsam animam, quae sine peccato a Deo infunditur corpori, afficiat, et inficiat. Ergo rejiciendus est hic modus translationis peccati.

**R. Neg. ant.** Nam posita arctissimi commercii lege inter animam, et corpus, mirandum potius esset, si corporeum hoc vitium ipsam animam non inficeret, et habitu ad res illicitas inclinaret, atque ita a Deo averteret.

**Inst. 1.º** Si Deus creando animam infunderet ei gratiam, quam Adae in ipsa creatione largitus est, certum est, tunc concupiscentiam in anima non fore peccatum: sicut infusa per baptismum gratia, ipsius concupiscentiae reatus solvitur. Atqui Deus non ideo denegat animae gratiam, quia infundenda est corpori concupiscentia infecto; quin potius haec ratio esset majoris gratiae largiendi. Ergo semper confugiendum est ad pactum, sive legem primitus a Deo sancitam ut si Adam praeceptum violaret, denegaretur ejus posteris gratia, quae ablata, anima in corpore maculatur; atque haec ratio transfusionis peccati est.

**R. Trans. min. Neg. cons.** Quaecunque enim causa ponatur, cur Deus Adae posteris non largiatur in ipsa creatione gratiam, quam Adamo largitus est; sive quia Spiritus Sanctus longe est a tali generatione, quae semper fit per aliquod concupiscentiae peccatum: sive quia id omnino exigunt aliae occultae rationes sapientiae, et justitiae Dei, ut amissa a primo homine gratia Creatoris, nonnisi per Redemptorem restitueretur posteris; id tamen certum est, nunquamtribuendum esse peccatum privationi gratiae, sed semper ipsius hominis voluntati. Ita cum homo adultus, justo Dei judicio privatus efficaci gratia, labitur in peccatum, non potest pro peccato suo privationem gratiae Dei causari, sed voluntatem suam accusare debet. Pari ratione, cum anima infantis

peccato inficitur originali, non debet accusare Deum, qui gratiam justo iudicio, quamvis occulto, denegavit; sed ipsum Adam, qui naturam humanam in se, tamquam in radice ita vitiauit, ut animae posterorum sine peccato creatae, peccato inficerentur cum corporibus infunduntur. Si enim haec naturae non esset facta corruptio, profecto anima infantis etiam sine gratia Dei peccatum non haberet, sed esset in pura natura.

*Inst.* 2.<sup>o</sup> Haec habitualis inclinatio animae ad creaturas, et aversio a Deo non est animae ipsi recens creatae peccatum, quia non libera. Ergo non potest eo modo traduci peccatum.

*Dist. ant.* Non est libera libertate actuali ipsius animae, *conc.* Libertate originali ipsius Adae, qui seipsum, naturamque suam liberrime vitiauit, *neg.* In peccatis actualibus ipsa peccantis voluntas, ac libertas necessaria est: in peccato originali sufficit libertas ejus, qui originem humanae naturae in seipso maculavit. Ita saepe respondet Augustinus Pelagianis ista objicientibus. *Hoc recte dicitur propter proprium cujusque peccatum, non propter primi peccati originale contagium. Quod tamen et ipsum a mala voluntate primorum hominum sumpsit exordium*, inquit *Lib. III. cont. Julian. cap. 5. et al.* Quare hoc, inquires? quo modo id explicandum? Respondeo 1.<sup>o</sup> non catholicorum, sed haereticorum est ista interrogatio *quo modo id sit?* unde Pelagiani saepe iis armis utebantur: 2.<sup>o</sup> haec quaestio non minus contra pactum illud moveri potest; posito enim eo pacto, transgressio Adae culpa non esset animae recens a Deo creatae; quare ergo Deus ejus voluntatem in Adamo posuit? quomodo id explicandum? 3.<sup>o</sup> Non negamus in hoc, sicut in ceteris fidei dogmatibus, semper aliquid remanere obscuritatis, quae nos terrere non debet a profitenda veritate: si enim in rerum natura tot sunt rerum genera oculis nostris subjecta, quorum rationes ignoramus; multo magis in rebus a Deo revelatis, ut observat Augustinus *Lib. VI. cont. Julian. cap. 7. 4.<sup>o</sup>* In nostra, et Augustini sententia facile explicatur, quomodo originale peccatum sit voluntarium, et liberum: voluntarium quidem, non sola voluntate Adami, sed ipsius infantis recens nati, cujus voluntas concupiscentiae subdita, ha-

bitu quodam, iniqua, impia nascitur; liberum vero libertate Adam. At in hypothesi pacti inter Deum, et Adamum initi, peccatum originale non solum non est nascenti liberum, sed nec voluntarium.

*Iust. 3.º* Quod non est voluntarium, ac liberum actuali, et personali voluntate peccantis, non potest a Deo odio haberi, aeternoque supplicio puniri; nisi potamus, illud, pro supremo dominatu in res creatas, posuisse in primi parentis libera voluntate omnium ejus posterorum voluntates, non secus ac principes pro supremâ in rem publicam potestate, crimina quaedam in filiis etiam reorum puniunt. Ergo etc.

*Æ. Neg. ant.* Deus enim odio habet actus, ac habitus vitiosos, et contraria ratione diligit actus, atque habitus bonos, et laudabiles, ut patet in parvulis, quos Deus aeterna gloria dignos censet, et donat propter habituales justitiam per Christum ipsis infusam in baptismos; licet non sit ipsis justitia illa voluntaria, et libera actuali voluntate. *Quamvis igitur, inquit Estius in II. Dist. XXX. §. 8. apud homines, qui ea sola vident, quae foris apparent, praemium non habeat habitus bonus in mente latens, nec supplicium recipiat habitus malus, sed solae externae actiones vel bonae, vel malae; apud Deum tamen, qui corda intuetur, sicut actiones internae, ita et habitus, qui sunt veluti continui quidam actus interni, retributionem accipiunt.*

*Objic. II.* Si secluso Dei pacto, peccatum originale ex ipsa rei natura per concupiscentiam traducetur, jam explicatu facilimum esset, quomodo peccatum primi parentis sit unicuique posterorum, si non liberum, saltem voluntarium. Atqui *Augustinus* semper fluctavit incertus de modo, quo peccatum illud traducitur. Unde ait *Lib. de morib. Eccl. cap. 32.* Hoc peccato antiquo nihil est ad praedicandum notius, nihil ad intelligendum secretius. Et *Serm. XCIV. al. XIV. de Verb. Apostoli:* Ego istam quaestionem profundam sentio, et ad ejus fundum rimandum vires meas idoneas non agnosco. Ergo sententiam nostram vel non probavit *Augustinus*, vel vidit, eam quaestioni non satisfacere.

*Æ. Dist. min.* Dubitavit *Augustinus*, utrum peccatum originale traheretur per traducem ipsius animae, an per

per infusionem animae in vitiatum corpus, conc. Dubitavit, utrum posita nova animarum creatione, peccatum originale traheretur eo modo, quo dictum est, neg. Ut ergo, inquit *Lib. V. cont. Julian. cap. 4. et anima, et caro pariter utrumque puniatur, nisi quod nascitur, renascendo emendetur, profecto* (en quomodo, sine ambiguitate loquitur) *aut utrumque vitiatum ex homine trahitur, aut alterum in altero tanquam in vitiatō vase corrumpitur, ubi occulta justitia divinae legis includitur. Quod autem horum sit verum, libentius disco, quam dico, ne audeam docere quod nescio. Tractat ista fusius Berti Lib. XIII. Cap. 6.*

*Corollarium.*

Christus ergo, qui sine ulla carnali concupiscentia genitus est ex Virgine, nullum contrahere debuit, nec potuit originale peccatum; licet factus sit in similitudinem carnis peccati. Contra omnes homines cum in concupiscentia, et cum concupiscentia, et per concupiscentiam generentur, debent sine dubio originalem contrahere culpam, nisi aliquis ex speciali privilegio ita praeveniat gratia Dei, ut eam actu non contrahat. Quod privilegium utrum B. Virgini sit concessum (de hac enim sola movetur quaestio) videbimus in sequenti capite.

*Scholion.*

In his, quae de natura, ac traducē peccati originalis toto hoc Capite disputavimus, notanda est, atque cavenda diligenter Baji doctrina, qui asserit *Prop. XLVI. Ad rationem, et definitionem peccati non requiri voluntarium*: ideoque concludit *Prop. XLVII. Unde peccatum originis vere habet rationem peccati sine ulla relatione, ac respectu ad voluntatem, a qua originem habuit*; Ideoque sine ulla relatione, ac respectu ad voluntatem Adae, ait *Prop. XLVIII. Peccatum originis est habitualiter parvuli voluntate voluntarium, et habitualiter dominatur parvulo, eo quod non gerit contrarium voluntatis arbitrium*; ut ex ejus sententia ipsa per se concupiscentia

et sit formaliter originale peccatum, quod a *Luthero* positum supra confutavimus. Quidquid igitur hic diximus, ita intellectum volumus, ut ab hac *Baji* doctrina, qualiscumque sit, longe abhorreat, atque in *Norisii*, *Berti*, aliorumque catholicorum sensu explicetur.

## §. IV.

*Utrum B. Virgo Maria ex speciali privilegio peccatum originale non contraxerit.*

*Adv. I.* Cum generalis sit Apostoli sententia *Rom. V. 12. in quo omnes peccaverunt*, nec ullus hominum, excepto homine et Deo Jesu Christo, sine carnali concupiscentia concipiatur, per quam concupiscentiam peccatum originale traducitur; hinc nemo temere a nobis test ab hac generali sententia excipiendus, nisi aut Scriptura, aut traditione, aut Ecclesiae auctoritate exceptio illa sumatur.

*II.* Ecclesia definire adhuc noluit, utram B. Virgo ex generali illa Apostoli sententia excipienda sit. Nam 1.<sup>o</sup> *Sixtus IV.* prohibuit tantum poena excommunicationis, ne quis haereseos notam inureret affirmantibus immaculatam B. Virginis conceptionem, quam Constitutionem Concilium Tridentinum *Sess. V.* confirmavit. 20. *Pius V.* et *Paulus V.* poena suspensionis vetuerunt, ne publicae, ubi promiscue fidelium multitudo virorum, ac mulierum convenire solet, propugnaretur sententia negans immaculatam Virginis Conceptionem: id tamen permiserunt in Academicis disputationibus, ubi nulla timetur occasio scandali. 3.<sup>o</sup> *Gregorius XV.* non solum prohibuit in Academicis disputationibus, verum etiam in scholis, privatisque colloquiis, ne quis asserere auderet, B. Virginem in peccato conceptam, nisi aliquibus fuerit indultum: indultum autem Dominicanae familiae, scimus; dicet plurimi ex illa Schola Theologi pro Immaculata Conceptione decertaverint, atque decertent. Caeterum iidem Pontifices professi sunt, nolle se his decretis controversiam definire. Cum nondum aeterna sapientia Ecclesiae suae tanti mysterii penetralia patefecerit, in Dei, Romanorumque Pontificum auctoritate de-

375 *Theol. Instit. Lib. V. Pars IV. Cap. XI.* debent fideles populi conquiescere, inquit Gregorius XV. in Epistola ad Regem Hispaniae.

III. De hac controversia plurima, atque ingentia edita sunt volumina a viris doctis. Nos ex instituti brevitate ea, quae scitu necessaria sunt, atque sufficiunt, asseremus; cetera peculiaris Dissertationis argumentum esse possunt.

## PROPOSITIO

*B. Virgo Maria sine ulla originalis peccati labe concepta est.*

*Prob. I. ex Script. Cant. II. 2. Sicut lilium inter spinas, sic amica mea inter filias. Et Cant. IV. 7. pulchra es amica mea, et macula non est in te.* Quae verba licet de Ecclesia, praesertim triumphante, debeant intelligi; tamen cum a Patribus, et ab Ecclesia etiam Catholica in divinis Officiis B. Virginis aptentur, satis probabiliter ostendunt, illam sine ulla semper macula fuisse.

*Prob. II. ex PP. 1.º Ambrosius in Psal. CXVIII. Serm. XXII. de Maria ait: Virgo per gratiam ab omni integra labe peccati: 2.º Hieronymus in ea verba Psal. LXXVII. deduxit eos in nube diei, ait, nubem illam significasse B. Virginem, de qua addit: pulchre dixit, diei; quia nubes illa non fuit in tenebris, sed semper in luce. 3.º Augustinus Lib. de nat. et grat. cap. 48. Excepta sancta Virgine Maria, de qua propter honorem Domini nullam prorsus, cum de peccatis agitur, haberi volo quaestionem. Unde enim scimus, quid ei plus gratiae collatum fuerit ad vincendum omni ex parte peccatum, quam concipere, ac parere meruit, quem constat, nullum habuisse peccatum? Licet autem ibi S. Doctor de peccatis actualibus disputet; tamen etiam de originali eum intelligendum esse suadetur: 1.º quia ejus sententia generalis est: cum de peccatis agitur: 2.º quia ex ejus constanti doctrina nemo ab actuali peccato fuit immunis, qui originali fuit maculatus, ut patet ex Lib. V. cont. Julian. cap. 9.: 3.º B. Virginem ab originali labe immunem pronunciant Sedulius, Auctor libri de Ope-*

*Operibus Cardinalibus Christi inter Opera Cypriani, Sophronius, Damascenus, Idiota, Petrus Damiani, Anselmus etc.*

*Prob. III.* Ecclesia catholica festum celebrat Immaculatae Conceptionis B. Mariae Virginis, Graeca quidem antiquius; Latina vero paulatim a tempore Bernardi in nonnullis peculiaribus Ecclesiis permisit: deinde ad omnem catholicam Ecclesiam praecepto extendit. At qui Ecclesia non celebrat festum, nisi de re sancta, quod S. Thomas ponit ut certum. Ergo. etc.

Huic argumento, quod maximi est roboris, duo respondere solebant adversarii: 1.<sup>o</sup> Ecclesiam celebrare festum non de *primo instanti*, quo B. Virgo in peccato concepta est, sed de secundo, in quo per gratiam fuit sanctificata: 2.<sup>o</sup> *objectum* illius festi non esse ipsam Virginis Conceptionem, sed beneficium Dei qui largitus est Mundo Virginem, quae Mater Dei mox futura erat. Sed utrumque effugium praecluserunt SS. Pontifices, et Ecclesia. Nam Alexander VII. in Bulla, quae incipit *Sollicitudo omnium Ecclesiarum* anni MDC LXII. declaravit, *objectum* ejus festi esse *primum* illud *instans*, quo B. Virgo concepta est; et haec eadem est omnium fidelium; ideoque ipsius Ecclesiae mens.

*Prob. IV.* Ex Sum. Pontificum auctoritate; qui non solum prohibuerunt, contrariam sententiam vel publice vel privatim defendi, sed etiam sententiam nostram uti piam semper novis privilegiis exornarunt; approbarunt Officia, et Missas, in quibus conceptis, apertisque verbis B. Virgo ab originali culpa immunis praedicatur: concesserant indulgentias hoc mysterium pie colentibus: Ordines etiam religiosos, et Congregationes sub titulo *Immaculatae Conceptionis* vel fundarunt, vel probarunt, vel privilegiis auxerunt; ita ut de mente Sedis Apostolicae nullus sit dubitandi locus. Innumera ad hanc rem momenta vide apud Antonium Gravois Lib. de Ortu, et progressu Cultus, ac Festi Immac. Conc.

*Prob. V.* Ex Concilio Basileensi Sess. XXXVI. Doctrinam illam asserentem, gloriosam Virginem Dei genitricem Mariam praeverniente, et operante divini numinis gratia singulari, numquam actualiter subjacuisse ori-  
gina-

ginali peccato, sed immunem semper fuisse ab omni originali, et actuali culpa, sanctamque, et immaculatam; tamquam piam, et consonam cultui ecclesiastico; fidei catholicae, rectae rationi; et Sacrae Scripturae, ab omnibus catholicis approbandam, tenendam, et amplectendam definimus; et declaramus, nullique de cetero licitum esse in contrarium praedicare, et docere. Licet autem tunc Concilium non esset OEcumenicum, pluribus Episcopis jam cum Eugenio IV., qui Basileense dissolverat, Florentiam convenientibus; tamen cum adhuc Basileae essent multi, iique doctissimi viri, decretum illud non levis est ponderis; cum praesertim accedat omnium Academicarum, Theologorum, et fidelium consensus. Ergo etc. Vide de hac argumento laudatum P. Gravis, apud quem invenies etiam copiosissimum catalogum eorum, qui pro hac sententia scripserunt (In Summario Documentorum).

*Solvuntur Objectiones.*

*Objic. I. Sententia Apostoli Rom. V. 12. in quo omnes peccaverunt;* generalis est, in qua Patres docent, solum excipiendum esse Christum. *Omnis caro, excepta illa, quae sine peccato venit in similitudinem carnis peccati, sub peccati origine, et sub peccati lege nata est;* inquit Hilarius ap. Augustin. Lib. II. cont. Julian. cap. 4. Idemque alii affirmant. Ergo.

*Ad. Dist. ant.* Patres docent, solum Christum excipiendum esse a generali illa Apostoli sententia, quatenus ille unus alio modo, ac ceteri homines conceptus, nec actu contraxit peccatum, nec debitum contrahendi habuit, conc. Quatenus solus actu non contraxit peccatum, neg. Solus ergo Christus sine carnali concupiscentia genitus, lege illa non tenebatur. Reliqui homines, qui ordinaria via generantur, ipsa etiam B. Virgo, debitum peccati illius contrahendi habuerunt; quod dicimus contra eos Theologos, qui B. Virginem etiam ab eo debito exemunt. Sed quia Deus in ipsa animae creatione gratiam contulit; ideo peccatum actu non contraxit.



*Inst. 1.º* Verbum illud peccaverunt non debitum, sed ipsum peccatum actu contractum significat. Ergo cum Patres docent, solum inde excipiendum esse Christum, ipsam B. Virginem volunt actu contraxisse peccatum.

¶ *Neg. ant.* Si enim eo sensu intelligeretur verbum illud, jam impossibile esset, Deum servare aliquem e posteris Adae a generali contagione peccati; quia si omnes actu jam contraxissent in Adamo peccatum, contradictionem inolveret, aliquem peccatum illud actu non contrahere. Hoc autem nemo dixerit. Sensus ergo illorum verborum est: ita per Adae peccatum vitiatam esse naturam, ut quicumque ex Adam ordinaria via nascitur, generali contagione maculetur, nisi Deus velit aliquem speciali privilegio servare, sicut de B. Virgine sentit Ecclesia.

*Inst. 2.º* Patres docent, ipsam B. Virginem fuisse per Christum redemptam; idque ad fidem pertinet; ait enim Apostolus *Rom. V. 18. Sicut per unius delictum in omnes homines in condemnationem: sic et per unius justitiam in omnes homines in justificationem vitæ.* Atqui si B. Virgo peccatum originale actu non contraxit non fuit redempta per Christum; nam nec redemptus dici potest, nisi qui fuerit per peccatum ante captivus, inquit Zosimus P. ap. Augustinum *Ep. CXCI. al. CLVII.* Ergo.

¶ *Neg. min.* Liberari enim, et redimi dicitur non solum ille, qui jam servus est, sed etiam ille, qui nisi defenderetur, ac liberaretur, in servitutem sine dubio redigendus esset. Quemadmodum, ait Augustinus in *Psalm. LXXXV.*, si medicus videat tibi imminentem aegritudinem forte ex aliquo labore, et dicat: parce tibi, requiesce, recte dicis medico: liberasti me ab aegritudine, non in qua jam eras, sed in qua futurus eras. Nescio quis habens causam molestam, mittendus erat in carcerem, venit alius, defendit eum. Gratias agens quid dicit? Eruisti animam meam de carcere. Suspendendus erat debitor, solutum est pro eo: liberatus dicitur de suspendio. Et *Lib. II. Conf. ss. cap. 7.* Gratiae tuae depulso quaecumque non feci mala; et mox: omnia mihi dimissa esse fateor et quae mea sponte feci mala, et quae te duce non

feci. Verba autem Zosimi recte concludunt contra Pelagianos, qui ex Scripturis fateri solebantur, parvulos redemptos esse per Christum, et tamen asserabant, nullum esse in natura humana vitium; ita ut parvuli nullo modo captivi essent nec quoad actum, nec quoad debitum contrahendi peccatum.

*Inst. 3.<sup>o</sup>* Tantum abest, ut Patres docuerint, B. Virginem non contraxisse actu peccatum originale, quin potius adeo constanter asseruere contrarium, ut S. Bernardo nostra sententia omnino nova, ideoque explodenda visa sit. Ait enim in *Epistola ad Canonicos Lugdunenses*, qui festum Conceptionis celebrare incipiebant *Epist. CLXXIV* Numquid Patribus doctiores, aut devotiores sumus? Periculose praesumimus quidquid eorum in talibus prudentia praeterivit. Non ita praecipitanter, atque inconsulte paucorum sequenda simplicitas imperitorum. Idem sentit Bernardo coaevus *Anselmus Lib. Cur Deus homo cap. 16*. Imo et post Bernardum idem visum est Alberto Magno, Alensi, S. Thomae, Bonaventurae etc. Ergo etc.

*N. Dist. ant.* Nova visa haec sententia Bernardo, aliisque propter clariorem veteris doctrinae explicationem, conc. Propter ipsam doctrinam, reg. Sicut in ipsis fidei dogmatibus, cum adhuc obscura esset traditio ante Ecclesiae definitionem, nonnulli Patres contrariam sententiam tenuerunt; qui tamen si vixissent eo tempore, quo Ecclesia clarius mentem suam aperuit, sententiam mutassent; ita multo magis accidit in hoc dogmate, quod ad fidem non pertinet. Veteres quidem Patres, ut Ambrosius, alique generatim docuerunt, Mariam Virginem fuisse integram ab omni labe peccati, nunquam fuisse in tenebris, sed semper in luce etc. quibus verbis implicite significabatur, eam ab ipsa originali labe fuisse immunem. Sed cum clarius id explicari coeptum est, res nonnullis visa est nova; qui tamen si hodie viverent, pro maxima, quam praeserebant erga Ecclesiam reverentia, sententiam communem amplecterentur. Unica enim ratio, quae S. Bernardum et S. Thomam retinuit ab illa asserenda, haec est; quia scilicet eo tempore nondum universalis Ecclesia festum Conceptionis cele-

celebrabat. Quod autem dixi, inquit Bernardus, absque praejudicio dicta sint sanius sentientis, Romanae praesertim Ecclesiae auctoritati, atque examini totum hoc, sicut et cetera, quae ejusmodi sunt, universa reservo, ipsius, si quid aliter sapiat, paratus judicio emendare. Et S. Thomas 3. P. Q. XXVII. art. 1. probat, B. Virginem fuisse in utero sanctificatam, ideoque natam esse sanctam, ex eo quod non celebratur festum in Ecclesia, nisi pro aliquo sancto; ac proinde cum celebretur in Ecclesia festum Nativitatis Mariae Virginis, necesse est, eam fuisse sanctam. Et art. 2. ubi quaestionem de Immaculata Virginis conceptione pertractat, cum sibi objecisset, Ecclesiam celebrare festum Conceptionis, respondet, hanc non esse universalis Ecclesiae consuetudinem, sed aliquarum ecclesiarum, quam Romana Ecclesia tolerat, et explicari potest non de prima Conceptione, sed de sanctificatione Virginis in utero matris. Quid ergo nunc diceret piissimus Doctor, si videret, Ecclesiam universam hoc festum celebrare, Romanam ecclesiam non tolerare, sed praecipere, et apertissime explicare, *objectum* ejus festi non esse sanctificationem, sed ipsam Conceptionem B. Virginis? Denique Anselmus cum clare dicat in Libro de *Conceptu Virginis*, eam in Conceptione immaculatam, ne sibi videatur contrarius in Libro *Cur Deus homo*, explicandus est benigne de peccato originali contracto quoad debitum, non quoad actum.

*Objic. II.* Ipsa B. Virgo morti, aliisque hujus vitae aerumnis subjecta est. Atqui mors est poena peccati, dicente Apostolo *Rom. V. 12. et per peccatum mors*. Ergo etc.

*R. Dist. min.* Mors est poena peccati vel quoad actum, vel quoad debitum contracti, *conc.* Quod actum tantummodo contracti, *neg.* Quemadmodum ergo post baptismum, ablato etiam originali peccato, mors, aliaeque calamitates remanent; quia Deus a peccato liberare nos voluit, non a miseria; ita in B. Virgine accidit, quae seryata a peccato, ad majorem virtutis perfectum, et fidei solatium iisdem aerumnis obiecta est, quae tamen in ea poenae rationem non habuerunt.

## §. V.

*De poenis peccati originalis.*

*Ado. I.* Poenae originalis peccati vel corpus, vel animum afficiunt; item vel ad mortalem hanc vitam pertinent, vel ad futuram.

*III.* Poenae autem tum corporis, tum animi, in hac vita homini in peccato originali nascenti inflictæ, sunt eadem, quas supra diximus subisse Adamum post peccatum, nempe in corpore mortem, aliasque hujus vitæ ætumnas, ipsas etiam aeris adversas tempestates, terræque sterilitatem; in animo vero ignorantiam in intellectu, malitiam in voluntate, infirmitatem in appetitu irascibili, cupiditatem in concupiscibili, ut fusius exponit S. Thomas 1a. 2ae. Q. LXXXV. art. 3.

*III.* Hæc autem poenæ tantæ sunt, ut homo non solum supernaturalibus donis spoliatus sit, verum etiam in ipsis naturalibus vulneratus; ita ut mentis caecitas, concupiscentia, aliæque calamitates longe majora sint, quam essent si homo in purâ natura, in hypothese impossibili, fuisset conditus. Omnium mortalium, inquit Augustinus *Lib. XXII. de Civ. cap. 22.*, progeniem fuisse damnatam, hæc ipsa vita, si vita dicenda est, tot et tantis malis plena, testatur. Quid enim aliud indicat horrenda quædam profunditas ignorantiae, ex qua omnis error existit, qui omnes filios Adam tenebroso quodam sinu suscipit, ut homo ab illo liberari sine labore, dolore, timore non possit? Quid amor ipse tot rerum vanarum atque noxiarum, et ex hoc mordaces curæ, perturbationes, moerores? Quis ignorat cum quanta ignorantia veritatis, quæ ipsis etiam infantibus manifestæ est, et cum quanta abundantia vanæ cupiditatis homo veniat in hanc vitam, ita ut si dimittatur vivere ut velit, et facere quidquid velit, in hæc ipsa facinora, et flagitia, quæ commemoravi, vel cuncta, vel multa perveniat? . . . Nonne hinc apparet, in quid veluti pondere suo proclivis, et prona sit vitiosa natura, et quantæ ope, ut hinc liberetur, indigeat? Hæc apud

apud omnes certa sunt, paucis exceptis, qui contra communem Patrum, et Theologorum sententiam contendunt, hominem ex peccato originali nasci quidem supernaturalibus donis spoliatum, sed in naturalibus integrum. Contra *quid sanatur*, inquit idem Augustinus *Lib. de nat. et grat. cap. 19. si nihil est vulneratum, nihil sauciatum, nihil debilitatum, atque vitiatum?* Uno igitur verbo: quidquid est in hac vita ignorantiae in intellectu, earum scilicet rerum, quae sunt scitu necessariae; infirmitatis, vel pravitatis in voluntate, aliisque facultatibus, sive potentiis; quidquid in vita molestum; id omne poena peccati originalis est.

IV. Sed de poenis alterius vitae major controversia est. Pelagiani quidem, qui peccatum originale negabant, cum asserere non possent, parvulos sine baptismo decedentes regno coelorum potiri contra aper tissimam Christi sententiam *Joann. III. 5. Nisi quis renatus fuerit ex aqua, et Spiritu Sancto, non potest introire in regnum Dei*; distinxerunt inter Regnum caelorum, et vitam aeternam; ita ut parvuli sine baptismo mortui, donarentur quidem aeterna vita, et quadam beatitudine aeterna, regno tamen caelorum carerent. Quorum vanissimas subtilitates confundit ipse Christus *Matth. XXV. ubi postquam de electis dixit v. 34. venite benedicti, possidete regnum, etc. subjungit, v. 46. et ibunt iusti in vitam aeternam*, utrumque idem esse significans. Haec Pelagianorum sententia sine dubio haeretica est.

V. At inter Catholicos *Ambrosius Catharinus*, et *Albertus Pighius* opinati sunt, parvulos in peccato originali decedentes, post universale iudicium, naturali quadam beatitudine in terris fructuros, tamquam in terrestri Paradiso; sapientia, et moralibus virtutibus praeditos, nec deesse iis etiam, si sit opus, Angelorum commercium. Nos catholicam doctrinam ordine explicabimus.

## PROPOSITIO I.

*Dogma fidei est, parvulos in peccato originali decedentes privari vita aeterna, scilicet beata Dei visione.*

*Prob. I. ex Scriptura 1.º Joan. III. 5. Nisi quis renatus fuerit ex aqua, et Spiritu Sancto, non potest introire in regnum Dei. Atqui regnum Dei est ipsa vita aeterna. Nam in eodem capite quod antea dixerat Christus regnum Dei, mox vocat vitam aeternam, ut omnis, qui credit in ipsum, non pereat, sed habeat vitam aeternam. Et Matt. XXV, ut paulo ante diximus, utrumque eodem sensu in eodem contextu accipitur. 2.º Rom. V. Per unius delictum in omnes homines in condemnationem. Ergo.*

*Prob. II. ex Augustino, qui totus est in resellenda Pelagianorum distinctione inter Regnum Dei, et vitam aeternam.*

*Prob. III. ex Conciliis Carthaginensi, Milevitano, Diospolitano, quorum definitiones Sedes Apostolica confirmavit. Novellos haereticos Pelagianos, inquit Augustinus Lib. II. de Orig. animae cap. 12., justissime Conciliorum Catholicorum, et Sedis Apostolicae damnavit auctoritas, eo quod ausi fuerint non baptizatis parvulis dare quietis, et salutis locum, etiam praeter regnum caelorum. Et Concilium Florentinum Sess. ult. definit, illorum animas, qui cum actuali peccato, vel solo originali decedunt, mox in infernum descendere, poenis tamen disparibus puniendos. Denique Tridentinum Sess. V. can. 4. Si quis parvulos . . . dicit . . . nihil ex Adam trahere originalis peccati, quod regenerationis lavacro necesse sit expiari ad vitam aeternam consequendam . . . anathema sit. Ergo etc.*

## PROPOSITIO II.

*Fictitia est naturalis beatitudo, quam parvulis in originali peccato morientibus pollicentur Pighius, et Catharinus.*

*Prob. I. ex Augustino Lib. I. de Orig. animae cap. 6. Non baptizatis parvulis nemo promittat inter damnationem, regnumque caelorum, quietis, vel felicitatis cujuslibet, atque ubilibet medium locum, hoc enim eis etiam haeresis Pelagiana promissit. Et innumeris in locis contra Pelagianos agens, ex ipsis baptismi caeremoniis, exorcismis scilicet, exsufflationibus etc. probat, parvulos sine baptismo decedentes manere sub potestate diaboli, ideoque in regno tenebrarum. Concipiunt et alii Patres, docentes, parvulos sine baptismo perire in aeternum, fore in aeterna miseria, mitti in gehennam (a). Denique Concilium Florentinum supra laudatum definiens, parvulos descendere in infernum puniendos, omnem naturalem beatitudinem prorsus excludit.*

*Prob. II. Licet Pelagius non explicaverit, quid per vitam aeternam intelligeret, quam docebat dari parvulis sine baptismo decedentibus, verisimilius tamen est, eum intellexisse beatitudinem naturalem, ut multis probant Petavius, Norisius, Estius, alique. Etenim fatebatur, parvulos ante baptismum nullo supernaturali dono exornatos per ipsam Sacramentum adoptari in filios Dei: illo regenerationis lavacro adoptari ex filiis hominum in Dei filios, non negatis imo etiam praedicatis, ait Augustinus Lib. II. cont. duas Epist. Pelag. cap. 6. Atqui non erat adeo stupidus, ut assereret, eos per dona naturalia pervenire ad supernaturalem beatitudinem.*

*Tom. II.*

*B b*

*di-*

(a) Cyprinus *Epist. ad Fidum. Lib. M. Epist. XCV. Auctor Lib. de vocatione gentium Prospero tributus Lib. II. cap. 22. et 24. Fulgentius de fide ad Pet. cap. 3. et 27. et Lib. de Incarn. cap. 14. Gregorius Lib. IV. Moral. cap. 3. et Lib. IX. cap. 12.*

386 *Theol. Instit. Lib. V. Pars. IV. Cap. XI.*  
dinem. Ergo *Pighii*, et *Catharini* sententia videtur ip-  
sissima haeresis Pelagiana.

### *Solvuntur Objecta.*

*Obje. I.* Patres supra laudati, et Concilium Floren-  
tinum docent quidem, parvulos descendere in infernum,  
esse in damnatione, in potestate diaboli etc.; sed hanc  
damnationem etiam post universale judicium duraturam  
in aeternum non affirmant. Ergo nihil vetat asserere,  
post judicium universale parvulos in naturalem illam bea-  
titudinem transferendos.

*¶. Transeat ant. neg. cons.* tum quia temerarium est  
asserere quod nulla Scripturae, aut traditionis auctori-  
tate nititur; tum quia communis fidelium sensus est, in  
universali judicio sententiam non fore diversam a judi-  
cio particulari; tum denique quia ex communi catholicor-  
um sententia ait Anselmus *Lib. de Conc. Virg. cap.*  
*22. Post diem judicii nullus erit Angelus aut homo,*  
*nisi aut in regno Dei, aut in inferno.*

*Obje. II.* Augustinus *Lib. III. de lib. arbitr. cap.*  
*23. Quis novit, inquit, quid ipsis parvulis in secreto*  
*judiciorum suorum bonae compensationis reservet Deus?*  
Ergo putavit, admitti posse medium quendam locum  
inter damnationem, regnumque caelorum.

*¶. Dist. cons.* Hoc putavit quando junior scribebat  
contra Manichaeos, *transeat*. Quando rem profundius  
contra Pelagianos tractavit senior, *neg.* Ita Augustinus  
ipse *Lib. De dono persever. cap. 12.* respondet Semipe-  
lagianis ipsi objicientibus quod in *Libris de Lib. arb.*  
contra Manichaeos scripserat. *Frustra itaque mihi de*  
*illius libri mei vetustate praescribitur.* Si enim  
quando *Libros de libero arbitrio laicus coepi, Presbyter*  
*explicavi,* adhuc de damnatione infantium non renascen-  
tium, et de renascentium liberatione dubitarem, nemo,  
ut opinor, esset tam injustus, atque invidus, qui me  
proficere prohiberet, atque in hac dubitatione remanen-  
dum mihi esse judicaret. Dixi *transeat*, quia in *Libris*  
*de Lib. arb.* Augustinus id unum agebat, ut contra  
Manichaeos, qui Scripturas non admittebant, in  
qui-



quibus peccatum originale adstruitur, tamquam causa malorum, quae in hac vita adulti simul, et parvuli experiuntur, demonstraret; ex malis, quae parvuli patiuntur morientes ante rationis usum, non sequi, ut agnoscendum sit malum rerum principium, sive Deus malus. Posita enim falsa Manichaeorum hypothese, quod haec mala non ex peccato originali manant, potest bonus Deus aliquid bonae compensationis in altera vita parvulis illis reservare pro malis naturalibus, quibus hic opprimuntur. Hinc ipse Augustinus Epist. CLXVI. et. XXVIII. ad Hieron. De Baptismo, inquit, parvulorum, in eodem libro non quidem sufficienter, sed quantum illi operi satis esse videbatur, utrumque respondi: non tamen de damnatione eorum parvulorum, qui sine illo ex hac vita migrant, tunc aliquid dicendum putavi.

## PROPOSITIO III.

*Parvuli ob amissam supernaturalem beatitudinem contristantur.*

*Prob. I. auctoritate, et ratione Augustini Lib. VI. cont. Julian. cap. 4. Si hoc eis non erit malum, non ergo amabunt regnum Dei tot innocentes imagines Dei: si autem amabunt, et tantum amabunt, quantum innocentes amare debent regnum ejus, a quo ad ejus imaginem creantur, nihil ne mali in hac separatione patientur? Fingi autem non potest, parvulos non amare regnum Dei, ad quod ipsa eorum natura divinitus ordinata toto impetu contendit. Ergo de aeterna ejus amissione non contristari non possunt.*

*Confirm. Constans est doctrina SS. Patrum, longe majorem in inferis esse poenam exulare a Regno Dei, quam ipso igne quamvis vehementissimo torqueri. Hinc Augustinus Inehir. cap. 112. Perire, inquit, a regno Dei, alienari a vita Dei, carere tam magna multitudine dulcedinis Dei . . . tam grandis est poena, ut ei nulla possint tormenta, quae novius comparari. Cui*

concinunt *Chrysostomus*, et *Basilius* (a). Et Theologi vulgo amissionem Regni caelestis poenam damni appellant; quia sicut quidquid boni cogitari potest, continetur in summo bono; ita quidquid damni cogitari potest, continetur in amissione summi boni. Fingi ergo non potest, eam poenam parvulos tristitia non afficere.

*Prob. II.* Parvuli sine baptismo decedentes, sunt filii irae *Ephes. II. 3.* hoc est, ut explicat *S. Thomas Lect. I. in cap. 2. Ephes.* post *Augustinum*, filii vindictae, poenae, et gehennae. Et Concilium Florentinum (*Sess. ult.*) etiam eos, qui in solo originali peccato moriuntur, defuit, in infernum descendere poenis puniendos. Sed poena non est, quae non est voluntati adversa, ideoque eam tristitia non afficit. Ergo. etc. Merito igitur *Estius in II. dist. XXX. §. 7.* ait, contrariam opinionem evacuare originale peccatum, utpote cui nulla poena infligatur.

*Dices. S. Thomas in II. Dist. LXXXIII. q. 2. art. 2.* ait: *Nihil omnino dolebunt (parvuli) de carentia visionis beatificae.* Ergo etc.

*Ad S. Thomam* in Summam retractasse nonnulla, quae junior scripsit in Libros sententiarum. Quare nisi praematura morte fuisset prohibitus Summam Theologicam absolvere, fortasse, ut erat *Augustini* studiosissimus, et hanc opinionem rejecisset, ut plures ex ejus discipulis rejecerant.

*Ad S. Thomam* in Summam retractasse nonnulla, quae junior scripsit in Libros sententiarum. Quare nisi praematura morte fuisset prohibitus Summam Theologicam absolvere, fortasse, ut erat *Augustini* studiosissimus, et hanc opinionem rejecisset, ut plures ex ejus discipulis rejecerant.

*Ad S. Thomam* in Summam retractasse nonnulla, quae junior scripsit in Libros sententiarum. Quare nisi praematura morte fuisset prohibitus Summam Theologicam absolvere, fortasse, ut erat *Augustini* studiosissimus, et hanc opinionem rejecisset, ut plures ex ejus discipulis rejecerant.

(a) *Chrysostomus XLVII, ad Pop. Anag.* *Basilius in Psal. XXXIII,*

## PROPOSITIO IV.

*Sententia affirmans, parvulos sine baptismo defunctos puniri etiam poena sensus, in comparatione adultorum, mitissima; congruentior est Scripturarum, et Patrum auctoritati; fidei tamen dogma non est.*

*Prob. 1a. pars. I. ex Script. Matth. III. 12. Cujus ventilabrum in manu sua; et permundabit aream suam; et congregabit triticum suum in horreum, paleas autem comburet igni inextinguibili. Et Matth. XIII. 30. Colligite primum zizania, et alligate ea in fasciculos ad comburendum; triticum autem congregate in horreum meum. Et Matth. XXV. 41. Tunc dicet his, qui a sinistris erunt; discedite a me maledicti in ignem aeternum. Denique Apoc. XX. Qui non est inventus in Libro vitae scriptus, missus est in stagnum ignis. Atqui Parvuli in originali peccato morientes non sunt triticum, non sunt oves, non sunt scripti in Libro vitae. Ergo, in ignem mittentur cum paleis, et zizaniis ad comburendum. Apposite ergo Augustinus Serm. XIV. de Verb. Apost. cap. 3. Venturus est Dominus, et judicaturus de vivis, et mortuis, sicut Evangelium loquitur, duas partes facturum est; dexteram, et sinistram. Sinistris dicturus est: Ite in ignem aeternum, qui paratus est diabolo, et angelis ejus: Dextris dicturus: venite benedicti Patris mei, percipite regnum, quod vobis paratum est ab origine mundi. Nullus relictus est medius locus; ubi ponere queas infantes . . . Qui non in dextera, procul dubio in sinistra. Ergo qui non in regnum, procul dubio in ignem aeternum.*

*Prob. II. ex PP. 1.º De Augustino nullus est relictus ambigendi locus; non solum ex verbis paulo antea laudatis; sed et ex aliis, quae sparsim habet in suis operibus contra Pelagianos, ut Lib. III. Op. imp. cont. Julian. n. 199. Si non eruitur a potestate tenebrarum, et illis remanet parvulus, quid miraris, in igne aeterno cum dia-*

390 *Theol. Instit. Lib. V. Pars IV. Cap. XI.*  
 diabolo futurum, qui in Dei regnum intrare non sintur? Nec *Juliano* obijciente, hanc sententiam esse durissimam, *Augustinus* eam emollit, nisi quod futuros ait parvulos in damnatione omnium mitissima, et levissima. *Lib. V. Cont. Julian. cap. 12. Lib. I. de pecc. merit. cap. 16. Epichir. cap. 93.* 2.<sup>o</sup> *Fulgentius Lib. de fide ad Pet. cap. 27. Firmissime, tene, et nullatenus dubita, non solum homines jam ratione utentes, verum etiam parvulos, qui sive in uteris matrum, sive jam de matribus nati sine Sacramento Sancti Baptismatis, de hoc saeculo transeunt, ignis aeterni sempiterno supplicio puniendos.* Quod etiam alibi docet *Lib. I. de veritate praedest. cap. 12. et Lib. de Incarn. et grat. 3.<sup>o</sup> Gregorius M. Lib. IX. Moral. cap. 12. Perpetua tormenta percipiunt, qui nihil propria voluntate peccaverunt.* 4.<sup>o</sup> Idem docent *Hieronymus, Isidorus, aliique, quos vide apud Norisium Vindiciae Augustin. qui hac de re copiose, et erudite disseruit.* Hinc *Sylvius 1a. 2ae. Q. LXXXVI. art. 2.* ait, hanc sententiam *Scripturis, et Patribus esse conformem.* Imo *Potavius Tom. I. Lib. IX. cap. 10. et l'Herminier Tom. VI. p. 441.* putant, eam a Concilio Florentino definitam.

*Prob. 2a. pars.* A saeculo XII. quo Magister sententiarum *Lib. II. Dist. 33.* scripsit, infantes nullam ignis poenam sensuros, qui in eum Commentaria scripserunt passim eam sententiam amplexi sunt, ne ipsi quidem exceptis Scholae principibus *S. Thoma, Bonaventura, Scotus*; ita ut evaserit in Scholis catholicorum communis, licet non defuerint, nec desint, qui veterum doctrinam, quam in prima prop. parte probavimus, defendant, quos longo ordine recenset *Norisius.* Laudantur etiam pro ea Scholasticorum opinione nonnulli Graeci Patres, ut *Nazianzenus Orat. XL. in S. Bapt.* qui ait: Nec caelesti gloria, neque supplicio a justo iudice afficientur, utpote qui licet signati non fuerint, improbitate tamen careant, atque hanc jaoturam pati potius fuerint, quam fecerint. Et *Nyssenius, qui Orat. I. Immatura mors, inquit, neque in doloribus, ac moestitia esse eum, qui sic vivere desiit, intelligendum esse, nobis suggerit.*

Et

Et quamvis Græcorum Patrum auctoritas hac in re minor habeatur, quam Latinorum, quos exercui hæresis Pelagiana, et S. Thomas non immerito credatus hanc opinionem rejecturus, si summam Theologicam absolvisset, cum aperte scribat *Lib. III. cont. Gen. cap. 156.* absurdum esse aliquos inveniri, qui ne beatitudinem, nec poenam habeant, *cujus contrarium*, inquit, *ostenditur ex eo, quod dicitur Matth. XXV. Quod omnibus in divino judicio existentibus dicitur. Venite, possideite paratum vobis regnum, vel discedite in ignem æternum*; tamen ob tanti præsertim Doctoris reverentiam, eorum opinio, qui asserunt, parvulos in originali peccato morientes non affici poena sensus, nulla potest censura notari, et probabiliter utcumque defendi. Ideo etiam eorum objectiones prætermittimus, quas vide, si vacat, refutatas apud Laur. Berti *Lib. XIII. cap. 6.* Illud tamen monemus, ne quis imprudenter pro concione unam, vel alteram sententiam tamquam fidei dogma obtrudat, sed alterutram in privatis ad matres admonitionibus historico modo referat, prout expedire judicaverit, aut ad eas ob mortem filiorum consolandas, aut terrendas, ne eorum culpa parvuli sine baptismo moriantur.

### Libri Conclusio.

**D**Eus igitur in seipso perfectus, atque beatus; ut immensos bonitatis suae extra se thesauros effunderet, pulcherrimam hanc Mundi molem condidit, in eaque rationales substantias, Angelos scilicet, atque homines ad imaginem, et similitudinem suam effecit, ut divinae naturae consortes, beatitudinis participes, et cum ipsa divinarum Trinitate personarum aeterna societate conjunctae, perpetua pace, atque laetitia fruerentur. A qua tamen societate Angeli multi superbia recedentes primum hominem Adam, atque in eo universum hominum genus in ruinam impulerunt; ut qui debuerant esse etiam corpore spirituales, facti etiam mente carnales, jumentisque similes, aliqua etiam ex parte peiores, in æternum, post mortalem hanc

hanc, acrumnisque plenissimam vitam, cum deserto-  
ribus Angelis supplicium mitterentur. Tantum effice-  
re potuit malorum unum superbiae peccatum. Quod  
autem tantae calamitati remedium hominibus suppedi-  
taverit Deus, in sequenti libro dicendum est, ut quo-  
niam patrimonium amplissimum prodeginus, atque in  
profundum prolapsi sumus, oblata spe, surgere stu-  
deamus.

*Finis Lib. V.*

VAI 153007

# INDEX CAPITUM

<b>LIBER IV. De Trinitate</b>	<b>3</b>
<b>CAP. I. De variis hæresibus contra mysterium Trinitatis.</b>	<b>4</b>
<b>CAP. II. Explicantur nomina nonnulla, quorum in hoc Libro frequentior erit usus</b>	<b>10</b>
<b>CAP. III. Asseritur Trinitas personarum in divinis.</b>	<b>12</b>
<b>CAP. IV. Ostenditur, tres personas esse consubstantiales, h. e. habere eandem naturam divinam.</b>	<b>27</b>
<b>CAP. V. Ostenditur, Verbum divinum, sive Filium esse Patri ομοουσιον seu consubstantiale.</b>	<b>33</b>
<b>§. I. Verbi divinitas, et consubstantialis cum Patre natura ex Scripturis ostenditur.</b>	<b>ibid.</b>
<b>§. II. Eadem Verbi divinitas, et consubstantialis cum Patre natura ex Patribus Antenicænis ostenditur.</b>	<b>40</b>
<b>§. III. Verbi divinitas ex definitione Nicaenæ synodi, et sequentibus Patribus invicte demonstratur.</b>	<b>57</b>
<b>CAP. VI. De divinitate Spiritus Sancti.</b>	<b>68</b>
<b>CAP. VII. De proceSSIONIBUS divinis.</b>	<b>75</b>
<b>§. I. Utrum agnoscendæ sint proceSSIONES in divinis, et quot illæ sint.</b>	<b>ibid.</b>
<b>§. II. Utrum Spiritus Sanctus procedat a Patre, et Filio.</b>	<b>80</b>
<b>§. III. Utrum recte Symbolo Constantinopolitano addita fuerit particula illa Filioque.</b>	<b>88</b>
<b>§. IV. De principio divinarum proceSSIONUM.</b>	<b>92</b>
<b>CAP. VIII. Consecutaria Capitis præcedentis. De circuminsessione, et missione divinarum personarum.</b>	<b>103</b>
<b>CAP. IX. De divinis relationibus.</b>	<b>108</b>
<b>CAP.</b>	<b>108</b>

- CAP. X. De divinis notionibus. 113
- CAP. XI. De personis divinis tum generatim, tum singillatim. 116
- §. I. De personis divinis generatim, 116
- §. II. De persona Patris. 120
- §. III. De persona Filii. 121
- §. IV. De persona Spiritus Sancti. 123
- CAP. XII. De ratione, et modo loquendi circa Trinitatem. 124
- CAP. XIII. Utrum notitia mysterii SS. Trinitatis sit ad salutem necessaria. 129
- CAP. XIV. Utrum mysterium Trinitatis ratione naturali cognosci et demonstrari possit. 132
- CAP. XV. Utrum mysterium SS. Trinitatis possit negative demonstrari; hoc est, utrum possint ratione naturali dissolvi quae ex ipsa ratione contra illud mysterium opponuntur. 141
- LIBER. V. De rerum creatione etc. 149
- PARS. I. De rerum creatione generatim. 149
- CAP. I. Ostenditur, creationem ex nihilo esse Deo possibilem. 149
- CAP. II. Utrum omnia, quae sunt, a Deo creata sint, ex nihilo. 152
- CAP. III. Utrum omnia creata sint, vel creari potuerint ab aeterno. 154
- CAP. IV. Utrum Deus creaturas ex necessitate produxerit. 159
- CAP. V. Ostenditur, res a Deo creatas indigere assidua Dei conservatione, ut existant. 161
- CAP. VI. De actione, sive concursu Dei ad singulos creaturarum actus. 164
- CAP. VII. Utrum aliquid a Deo creatum aliquando redigatur in nihilum. 174
- PARS. II. De creatione Angelorum. 175
- CAP. I. De existentia Angelorum, eorumque numero. 176
- CAP. II. Quando, et ubi Angeli fuerint creati. 179
- CAP.



	395
CAP. III. <i>De natura Angelorum.</i>	184
§. I. <i>Utrum Angeli spirituales sint, an corporei</i>	ibid.
§. II. <i>Utrum Angeli sint immortales.</i>	188
§. III. <i>Utrum Angeli differant inter se specie, an numero.</i>	190
CAP. IV. <i>De proprietatibus Angelorum naturalibus.</i>	192
§. I. <i>De intellectu, et locutione Angelorum.</i>	ibid.
§. II. <i>De voluntate Angelorum, et libero voluntatis arbitrio.</i>	202
§. III. <i>De loco, et motu Angelorum.</i>	207
§. IV. <i>De Angelorum vi, ac potestate movendi corpora.</i>	209
CAP. V. <i>De variis Angelorum Ordinibus.</i>	217
CAP. VI. <i>De fine, ad quem Angeli, et omnes rationales creaturae sunt a Deo ordinatae, eorumque donis supernaturalibus.</i>	225
CAP. VII. <i>De merito, et peccato Angelorum.</i>	239
CAP. VIII. <i>De poena peccati Angelorum.</i>	248
CAP. IX. <i>De officiis bonorum Angelorum erga Deum, et homines; et de impugnatione daemonum.</i>	262
PARS. III. <i>De mundi corporei creatione, si-ve de sex dierum opificio.</i>	274
CAP. UNICUM. <i>Utrum Deus cuncta creaverit in momento, seu, ut ajunt, in instanti, an continuis sex diebus.</i>	275
PARS. IV. <i>De homine.</i>	281
CAP. I. <i>De hominis natura, ejusque creatione quoad corpus, et animam.</i>	ibid.
CAP. II. <i>De origine animarum.</i>	283
CAP. III. <i>De dotibus primi hominis naturalibus quoad animam.</i>	291
CAP. IV. <i>De imagine, et similitudine Dei in homine.</i>	295
CAP. V. <i>De justitia originali,</i>	299

CAP. VI. <i>Utrum justitia originalis fuerit in primis parentibus naturalis.</i>	309
CAP. VII. <i>Utrum Status purae naturae sit possibilis.</i>	318
CAP. VIII. <i>De peccato primorum parentum.</i>	326
CAP. IX. <i>De pœna peccati primorum parentum.</i>	332
CAP. X. <i>De primorum parentum resipiscentia, et salute.</i>	336
CAP. XI. <i>De transfusione peccati Adae in ejus posteros, sive de peccato originali.</i>	338
§. I. <i>Demonstratur, peccatum originale in omnes Adae posteros derivari.</i>	339
§. II. <i>De peccati originalis natura.</i>	354
§. III. <i>Quomodo peccatum originale traducatur.</i>	367
§. IV. <i>Utrum B. Virgo Maria ex speciali privilegio peccatum originale non contraxerit</i>	375
V. <i>De paenis peccati Originalis.</i>	382

# ERRATA CORRIGE

Pag. 2. <i>δεδιδάχματα</i>	<i>δεδιδάχμεν</i>
43. <i>figarac</i>	<i>figurae</i>
89. <i>esiam</i>	<i>etiam</i>
98. <i>Alter</i>	<i>Alter</i>
108. <i>porsequitur</i>	<i>prosequitur</i>
119. <i>in quae</i>	<i>in qua</i>
187. <i>perfecto</i>	<i>perlecto</i>
224. <i>Dragone</i>	<i>Dracone</i>
312. <i>arbitri</i>	<i>arbitrii</i>
322. <i>testatura</i>	<i>statum</i>

Α. Σ. Ε.

IL CARDINALE ARCIVESCOVO DI NAPOLI

PRESIDENTE DELLA GIUNTA PERMANENTE DELLA  
PUBBLICA ISTRUZIONE.

Gennaro Reale Pubblico stampatore di questa fedelissima Città umilmente espone che desidera ristampare un'opera intitolata *Institutiones Theologicae* per uso della gioventù divisa in 6. tomi dell'Autore D. Gaetano de Fulgore, perciò prega l'Eminenza Sua di accordargli un revisore, e l'avrà ut Deus.

Addì 15 Gennaro 1822.

Per disposizione di Sua Eminenza, il Regio Revisore Signor Canonico Lavitrano avrà la compiacenza di rivedere la sopraseritta opera, ed osservare se vi sia cosa contro la Religione, ed i dritti della Sovranità, col farne rapporto in iscritto alla Giunta.

*Il membro della Giunta Deputato*

FERDINANDO CANONICO PANICO

Napoli 4 febbrajo 1822

**L**a Giunta permanente per la Pubblica Istruzione.  
Veduta la domanda di Gennaro Reale Pubblico Stampatore per dare alle stampe l'opera intitolata *Institutiones Theologicae*.

Veduto il parere del Regio Revisore Signor Canonico Lavitrano; permette che la indicata opera si stampi, ma ordina che non si pubblichi se prima lo stesso Regio Revisore non attesti di aver nel confronto riconosciuta la impressione uniforme all' Originale approvato e non sia eseguita la consegna ad essa Giunta delle sedici copie ordinate dal Real Decreto de' 24 Dicembre 1817.

Il Presidente = firmato

**L. CARDINALE ARCIVESCOVO**

*Il Segretario Generale, e Membro  
della Giunta = firmato*

**ANGELO ANTONIO SCOTTI**


*Neapoli die 25 Januarii anni 1822.*

**I**nstitutiones theologiae a viro doctissimo Cajetano de Fulgure Canonico Aversano conscriptae, et jam a prima editione mihi notae, et probatae; dignissimae sunt, quae novis typis evulgentur. Tanta enim aviditate ab adolescentibus clero adscriptis exoptantur, ut Exemplaria, quae adhuc supersunt, eorum votis, sufficere non possint. Accedit doctorum hominum iudicium, qui has Institutiones commendant, quum contineant sanam, et Catholicam doctrinam, accuratam theologiae scientiae discussionem, selectam propositionum seriem, quae aut ipsam Catholicam Fidem, aut in rebus non definitis saniores, probatiores, graviores sententias complectuntur. Nihil in iis extat, quod regulis morum, aut regni tranquillitati adversetur. Mihi igitur gratulor, quod expectationem publicam, quam in ipso huius operis ortu aliquo modo familiari epistola praecoccupavi, publico iudicio confirmatam viderim. Teque, Eminentissime, et Reverendissime Praesul, exoro, ut novae huic editioni libenter assentiaris.

*Humillimus, addictissimus famulus*

CANONICUS JOACHIM LAVITRANO

1  
2  
3  
4  
5  
6  
7  
8  
9  
10  
11  
12  
13  
14  
15  
16  
17  
18  
19  
20  
21  
22  
23  
24  
25  
26  
27  
28  
29  
30  
31  
32  
33  
34  
35  
36  
37  
38  
39  
40  
41  
42  
43  
44  
45  
46  
47  
48  
49  
50  
51  
52  
53  
54  
55  
56  
57  
58  
59  
60  
61  
62  
63  
64  
65  
66  
67  
68  
69  
70  
71  
72  
73  
74  
75  
76  
77  
78  
79  
80  
81  
82  
83  
84  
85  
86  
87  
88  
89  
90  
91  
92  
93  
94  
95  
96  
97  
98  
99  
100



111



164. L 8  
~~164~~  
~~164~~



